

## ପ୍ରେରିତ ମାନଙ୍କ କାର୍ଯ୍ୟ ପାଣ୍ଡୁ ଆହ୍ୱାନାର କାମା ମୂଲ୍ୟ ହାତୀ

ପାଣ୍ଡୁ ଆହ୍ୱାନ କାମାତି ପତି କୁଲମିକା ମାଟୁହି କାତା ଅଡ଼େ ଜୀସୁ ଲାକପୁରୁ ହାନି ନକେଏ ତାନି ସୀସୁୟାଣି ଝେସାମାତି ଲେହେଁ, ଏନିକି ଜିରୁସାଲମଟିଏ ଜୀହୁଦା, ସମିରଣ, ଅଡ଼େ ସାରିଖାକି ଏଡେ, ଏ କାତାତି ପୁସପନି ୧:୮ ଇ ପତି ଲୁକ ରାଚାମାରେସି, ଆମ୍ବାଆସି ଲୁକ ରାଚାମାନି ନେହଁ କାରୁ ରାଚାମାରେସି । ଏଝାସି ତାଙ୍କାଦର ମାରେସି ଇଞ୍ଜା ବାରେ କାତା ଜାତନୁ ତଲେ ରାଚାମାରେସି । ଏଝାସି ତାନି ଲୁକ ନେହଁ କାରୁ ପାଣ୍ଡୁ ଆହ୍ୱାନାର କାମା ଇ ରୀ ପତିତା ଜିକେଏ ତିୟପିଲ ଇଞ୍ଜି ଝେସାମାନେସି, ଏଝାସି ଗ୍ରିକ ଲକୁ ମାରେସି, ସାମା ଗ୍ରିକ ଅଡ଼େ ଜୀହୁଦି ଲକୁଣି ଆଟୁହି କ୍ରୀସ୍ତାନା ଲକୁକି ଜିକେଏ ଇ ପତି ରାସ୍ତକି ଆହ୍ୱାନାରେ ୧:୧ ।

କ୍ରୀସ୍ତ ଜାନୀଆଡ଼ି ତାୟୁ ୬୦-୬୪ ବାର୍ଷା ବିତ୍ତା ପାଣ୍ଡୁଆଡ଼ି ପତି ରାସ୍ତକି ଆହ୍ୱାନାଣ୍ଡିନେ, ଏନୀଆଁତାକି ଇତିହଁ ପାଞ୍ଜୁଲ କାୟିଦିତି ପିସପିଆଡ଼ି ନକେଏ ପତି ରାଚାଲି ରାହାମାରେ । ଲୁକ ଜିକେଏ ପାଣ୍ଡୁଆଡ଼ି ପାଞ୍ଜୁଲ ତଲେ ରେଜିମାରେସି ଅଡ଼େ ଆନ୍ତିୟକତି ଗାତାତା ଇ ପାଣ୍ଡୁ ଆହ୍ୱାନାର କାମା ପତି ରାଚାମାରେସି । ପାଣ୍ଡୁ ଆହ୍ୱାନ କାମା ପତି “ଲୁକ ରାଚାମାନି ନେହଁ କାରୁ” ରାଚିତି ଜେଟ ଜେଟ ଜୀସୁ ଲାକପୁରୁ ହାଜାଲିଏ ରାଚାଲି ମାଟୁହା ମାରେସି । ଲୁକ ତାନି ନେହଁ କାରୁ ଏନୀଆଁତାକି ରାଚାମାରେସି, ଏଲେକିହଁ ଏ ଇ ପାଣ୍ଡୁ ଆହ୍ୱାନାର କାମା ପତି ରାଚାମାରେସି । ଏଝାସି ତିୟପିଲ ଅଡ଼େ ଗାତି ଜାନା ଆହିମାନି କ୍ରୀସ୍ତାନା ଲକୁଇଁ ଏନୀଆଁ ଜାପୁଞ୍ଜି ଆହ୍ୱାନାରେ, ଏମ୍ବାଆଁ ତୀରି ଆହ୍ୱାଲି ଅଣ୍ଡିମାରେସି, ଏନୀଆଁତାକି ଜୀସୁତି ବାରେ କାତା ଅଡ଼େ କ୍ରୀସ୍ତାନା ଲକୁ ବାରେଖାକି ଆହିମାନି କାତା ରାଚାମାନେସି ।

ପାଣ୍ଡୁ ଆହ୍ୱାନାର କାମା ପତି ମୂଲ୍ୟ ଆଡ଼ି କୁଲମିକାତି କାତା

ଅଡ଼େ ଜୀସୁ ତାଣା ନାମୁତଲେ ନୀଡ଼ିନାୟି ଏନିଆହୁଁ ତଞ୍ଜା ଆନାୟି ଏତାଆଁ ମାଜେ ଖେସ୍ତାନେ । ସୁଦୁଜୀଝୁତି ବାଡ଼ୁ ତଲେ ଏନିକିହୁଁ ଏଟକା ଲକୁତାଣା ନେହୁଁ କାବୁ ଏପନାୟି ପାଣୁଝି ଆଡ଼ାରି କାତା ଖେସ୍ତାନେ ।

### ପତିତା ମାନାୟି

୧. ମୁଲୁଏ ସୀସୁୟାଁ ଲାକ ସୁଦୁଜୀଝୁ ଖାନାୟି ଅଡ଼େ କୁଲମି ପାତାଆନାୟି । ୧:୧-୮:୧
୨. କୁଲମି ସାସି ବେଟାଆନାୟି ଅଡ଼େ ଜିରୁସାଲମ ସାରିଖାକି ଏନାୟି । ୮:୨-୧୨:୨୩
୩. ପାଝୁଲ ମୁଲୁଏ ତାନି ସେବା କାମାତାକି ହାନାୟି । ୧୨:୨୪-୧୪:୨୮
୪. ଜିରୁସାଲମତା କୁଚମି କୁରିନାୟି । ୧୪:୧-୩୫
୫. ପାଝୁଲ ରୀ ପାଲି ତାନି ସେବା କାମାତା ହାନାୟି । ୧୫:୩୬-୧୮:୨୨
୬. ପାଝୁଲ ତାନି ପାଲି ତାନି ସେବା କାମାତା ହାନାୟି । ୧୮:୨୩-୨୦:୩୮
୭. ପାଝୁଲ ଜିରୁସାଲମତା ଦସପି ଆନାୟି । ୨୧-୨୬
୮. ରମ୍ପତା ପାଝୁଲଇଁ ପାଣିନାୟି । ୨୭-୨୮

### ସୁଦୁଜୀଝୁ ତାକି ଆଞ୍ଜିନାୟି

୧ ✧ଏ ଜୀଝୁତି ତିୟପିଲ, ନା ମୁଲୁତି ପତିତା ଇ ବାରେ କାତା ରାଡ଼ାମାଇଁ, ଜୀସୁ ଏମିନି କାମା ମାଟ୍‌ହେସି ଅଡ଼େ ଜାପ୍‌ହେସି, ୨ ଏ ଦିନା ପାତେକା ଏଝାସି ପାଣୁଝି ଆଡ଼ାରାଇଁ ଆଡ଼ାମାଚେସି, ସୁଦୁଜୀଝୁ ତଲେ ହୁକୁମି ହୀହାନା ଲାକପୁରୁ ଅଝି ଆହାମାଚେସି । ୩ ଏଚେଟିଏ ଜୀସୁ ତାନି ଦୁକୁ ବେଟାଆଡ଼ି ତାୟୁ ହାରେକା ଦିନା ଏଝାସି ଜୀଝୁତଲେ ମାଚେସି ଇଦାଆଁ ପାଣୁଝି ଆହାମାନାରି ତାଣା ପାରମାଣା କିତେସି, ଇଞ୍ଜା ରୀ କଡ଼ି ଦିନା ପାତେକା ହାରେକା ଦେବା ତଞ୍ଜାଆହାନା ମାହାପୁରୁ ରାକିତି କାତା ଜାପ୍‌ହେସି । ୪ ✧ର ଦିନା ଏଝାରି ରଣିଏ ତାଣା ତିଞ୍ଜାଲି କୃତା ଆହାମାଚି ବେଲାତା ଜୀସୁ ଏଝାରାକି ଇ ହୁକୁମି ହୀଚେସି; “ମୀରୁ ଜିରୁସାଲମ ପିସାଁ ଆମ୍ବିୟା ହାଲାଆଦୁ, ସାମା ମୀରୁ

ମାହାପୁରୁ ଆବାଡ଼ି ଆଞ୍ଜାମାନାଣି ନା ତାଣାଟି ଖେଞ୍ଜା ମାଞ୍ଜେରି, ଏଦାଆଁ ପାଣିନି ପାତେକା କାଚାନା ଡ଼ୟାଦୁ; \* ଈଚିହିଁ ଜହନ ଏୟୁତା ବାପ୍ତିସ୍ନା\* ହୀତେସି ସାତା, ସାମା ମୀରୁ ଏଚେଦିନା ଜେଚ ସୁଦୁଜୀଞ୍ଜୁ ତଲେ ବାପ୍ତିସ୍ନା† ବେଟାଆଦେରି ।”

ଜୀସୁ ଲାକପୁରୁ ହାନାୟି

(ମାର୍କ ୧୭:୧୯-୨୦; ଲୁକ ୨୪:୫୦-୫୩)

୨ ର ଦିନା ପାଣ୍ଡୁଞ୍ଜି ଆଡ଼ାରି ରୁଣ୍ଡା ଆହାମାଟି ବେଲା ଜୀସୁଙ୍କୁ ଖେଚେରି, “ପୁରୁ, ନୀନୁ ଏନାଆଁ ନୀଏଁ ଇସ୍ରାୟେଲ କେୟୁତା ଅଡ଼େ ଖେଣ୍ଡେ ଇ ରାଜିତି ହେରପିଦି ?”

୩ ଜୀସୁ ଏଞ୍ଜାରାଇଁ ଏଲେଇଚେସି, “ଆମିନି ଦିନା ଅଡ଼େ କାଲା ନା ଆବା ତାନି ଅଦିକାରାତା ଇଟାମାନେସି, ଏ ବାରେ ମିଙ୍ଗେ ପୁଞ୍ଜାଲି ଲଡ଼ା ଆଏ । † ✱ସାମା ସୁଦୁଜୀଞ୍ଜୁ ମୀ ତାଣା ଖାଡ଼ିସାରେ, ମୀରୁ ବାଡ଼ୁୟୁ ବେଟାଆଦେରି, ଇଞ୍ଜା ଜିରୁସାଲମ ବାରେ ଜୀହୁଦା ଦେସା ଇଞ୍ଜା ସମିରଣତା ଅଡ଼େ ବୁମି ମୁଟପେ ତାକି ନା ସାକି ଆଦେରି ।”  
୯ ✱ଏଞ୍ଜାସି ଇ ବାରେ କାତା ଖେସ୍ତି ତାୟୁ ଏଞ୍ଜାରି ମେସ୍ପଦନିଏ ଜୀସୁ ଲାକପୁରୁ ହାଚେସି, ଅଡ଼େ ଇଚାୟି ଦୁୟା ଏଞ୍ଜାଣାଇଁ ଏଞ୍ଜାରି ତାଣାଟି ଅହିଁ ହାଚେ, ଏଞ୍ଜାରି ଅଡ଼େ ଏଞ୍ଜାଣାଇଁ ମେହ୍‌ଆତେରି ।

୧୦ ଏଞ୍ଜାସି ଲାକପୁରୁ ହାଜାଲିଏ ଜିକେଏ ଏଞ୍ଜାରି ହାଗୁଞ୍ଜାକି ମୁମୁ କିହାନା ସିନିକିହିଁ ମାନେରି; ଏଚିବେଲା ଦବଲା ହିମ୍ବରିକା ହୁଟାମାନି ରିଆରି ଦେବୁଣିଏ ଏଞ୍ଜାରି ନକିତା ନିତେରି, ୧୧ ଇଞ୍ଜା ଏଞ୍ଜାରି ଏଲେଇଚେରି “ଏ ଗାଲିଲିତି ଲକୁତେରି, ଏନାଆଁତାକି ହାଗୁଞ୍ଜାକି ମୁମୁ କିହାନା ନିଚାମାଞ୍ଜେରି ? ଇ ଆମିନି ଜୀସୁ ମୀ ତାଣାଟି ଲାକପୁରୁ ଅଞ୍ଜିଆଡ଼େସି, ଏଞ୍ଜାଣାଇଁ ଏନିକିଁ ଲାକପୁରୁ ହାଚାଣି ମୀରୁ ମେସ୍ପେରି, ଅଡ଼େ ଏଲେକିହିଁଏ ଖେଣ୍ଡେ ଖାନାଣି ମେହ୍‌ଦେରି ।”

ଜୀହୁଦା ଚାୟୁତା ମାଡ଼ିୟୁଙ୍କୁ ଆଡ଼ିନାୟି

✱ ୧:୫ ୧:୫ ମାଡ଼ି ୩:୧୧; ମାର୍କ ୧:୮; ଲୁକ ୩:୧୭; ଜହ ୧:୩୩ \* ୧:୫ ୧:୫ ମୁଞ୍ଜିନାୟି

† ୧:୫ ୧:୫ ମୁଞ୍ଜିନାୟି ✱ ୧:୮ ୧:୮ ମାଡ଼ି ୨୮:୧୯; ମାର୍କ ୧୭:୧୫; ଲୁକ ୨୪:୪୭,୪୮

✱ ୧:୯ ୧:୯ ମାର୍କ ୧୭:୧୯; ଲୁକ ୨୪:୫୦,୫୧

୧୭ ଏମ୍ବାଟିଏ ଡାୟୁ ଏଞ୍ଜାରି ଜୀତ ଇନି ହରୁ ଲାକଟି ଜିରୁସାଲମତା  
 ଝେଣ୍ଡାଞ୍ଜାଡେରି, ଏ ଜୀତ ହରୁଟିଏ ଜିରୁସାଲମ ର କିଲମିଟର ହେକ  
 ମାତେ । ୧୩ ✨ଇଞ୍ଜା ଏଞ୍ଜାରି ପିତର, ଜହନ, ଜାକୁବ, ଆନ୍ଦ୍ରିୟ, ପିଲିପ,  
 ତମା, ବାର୍ତ୍ତଲମି, ମାତିୟୁ, ଆଲେପି ମୀରଏସି ଜାକୁବ, ଦେସାତି ଜୀଝୁ  
 ନନି ସିମନ ଅଡେ ଜାକୁବ ମୀରଏସି ଜୀହୁଦା, ଗାଡାତା ଏଜାନା, ଏମିନି  
 ଲାକନି ଇଲୁତା ବାସା ଆହାମାତେରି, ଏମ୍ବାଆଁ ହାତେରି । ୧୪ ଏଞ୍ଜାରି  
 ବାରେଜାଣା ଇୟାସିକା ତଲେ ଇଞ୍ଜା ଜୀସୁତି ଇୟା ମରିୟମ ଅଡେ  
 ତାମି ତାୟିୟାଁ ତଲେ ରଣ୍ଡିଏ ଅଣ୍ପୁ ତଲେ ପ୍ରାଡାନା କିହିଁ ରୁଣ୍ଡା  
 ଆହାମାତେରି ।

୧୫ ଏତରଦିନା ଡାୟୁ ନାମିତାରି କୃଡା ଆହାମାତେରି, ଏମ୍ବାଆଁ  
 ସ କଡ଼ି ଜାଣା ଲକୁ କୃଡା ଆହାମାତେରି, ପିତର ତାୟିୟାଁ ବିତ୍ରାଟି  
 ନିଚାନା ଏଲେଇରେସି, ୧୬ “ଜୀଝୁତି ତାୟିୟାଁ ଅଡେ ତାଜିସ୍ତା, ଆମିନି  
 ଇସ୍ତାରିୟତ ଜୀହୁଦା ଜୀସୁଇଁ ସାଡୁୟାଁ କେୟୁତା ଆସ୍ପି କିହାଲିତାକି  
 ଜିରୁ ତସାମାତେସି, ଏଞ୍ଜାଣି ତାକି ସୁଦୁଜୀଝୁ ନକେଏ ଦାଝୁଦ ଗୁତିଟି  
 ଏନାଆଁ ଝେସାମାତେସି, ଏ ଦାମ୍ବୁ ସାସ୍ତେରି ପୁରା ଆନାୟି ମାତେ;  
 ୧୭ ଇଚିହିଁ ଏଞ୍ଜାସି ମା ବିତ୍ରାଟି ରଅସି ଇଞ୍ଜା ଏଜିକିଝି ଆହାମାତେସି,  
 ଅଡେ ଇ ସେବା କାମାତା ପାଣା ବେଟାଆହା ମାତେସି ।”

୧୮ ✨ଇ ଇସ୍ତାରିୟତ ଜୀହୁଦା ଲାଗେଏ କାମା କିତି ତାବୁୟାଁ ତଲେ  
 ରଚାଣି ବୁମି କଡ଼ି ଆହାମାତେ, ଅଡେ ଏଞ୍ଜାସି ହାଡ଼ି ତାଣା ତାୟିଁ  
 ଡଇ କିହିଁ ତରଗାଲିଏ ତାନି ବାଣ୍ଡି ଡାୟାହାତେ ଇଞ୍ଜା ଝାହିୟାଁ  
 ହଚାହାରୁ । ୧୯ ଅଡେ, ଇଦାଆଁ ଜିରୁସାଲମ ଗାଡାତା ବାସା କିହିମାନି  
 ଲକୁ ବାରେ ପୁଞ୍ଜାଲିଏ ଏ ବୁମିତି ଏଞ୍ଜାରି ହାଡାତଲେ “ହକଲଦାମା”  
 ଇଚିହିଁ “ନେତେରି ବୁମି” ଇଞ୍ଜାଁ ଝେଜିତେ ।

୨୦ ଅଡେ ପାରୁ ପତିତା ରାସ୍କି ଆହାମାନେ,

“ଏଞ୍ଜାଣି ବାସାଟାୟୁ ଝାରିଆୟି ଆଡେ;

ଏମ୍ବାଆଁ ଆମ୍ବାଆରି ବାସା କିଆପେରି ।”

ଅଡେ ଜିକେଏ ରାସ୍କି ଆହାମାନେ;

“ଏଞ୍ଜାଣି କାମାତି ପାଣା ଅର ରଅସି ବେଟା ଆଡେସି ।”

✨ ୧:୧୩ ୧:୧୩ ମାତି ୧୦:୨-୪; ମାର୍କ ୩:୧୭-୧୯; ଲୁକ ୬:୧୪-୧୬ ✨ ୧:୧୮ ୧:୧୮ ମାତି  
 ୨୭:୩-୮

୨୧ ✨“ଏଦାଆଁତାକି, ପ୍ରଭୁ ଜୀସୁ ଖେଣ୍ଡେ ନିଜିତି କାତା ସାକି ଆହାଲି  
 ଅର ରଅସି ମା ତଲେ ଆଣ୍ଡାନାୟି ମାନେ । ୨୨ ଜୀସୁ ଜହନ ତାଣାଟି  
 ବାପ୍ତିସ୍ମା‡ ଅତି ବେଲାଟିଏ ଲାକପୁରୁ ହାନି ପାତେକା ପ୍ରଭୁ ଜୀସୁ ମା  
 ତଲେ ନୀଡାମାଟି ବେଲାତା, ଆମିନି ଲକୁ ମା ଗତିତା ମାତେରି,  
 ଏଞ୍ଜାରି ତାଣାଟି ରଅସି ଖେଣ୍ଡେ ନିଜିନି ସାକି ଆନାୟି ମାନେ ।”

୨୩ ଏରେଟିଏ ଏଞ୍ଜାରି ରିଆରାଇଁ ଇତିହାସ ଜସେପଇଁ, ଆମ୍ବାଆରାଇଁ  
 ବର୍ସବା ଇନେରି ଅଡେ ଆମ୍ବାଆରି ହାଟା ଦରୁ ଜୁସୁ ଏଞ୍ଜାଣାଇଁ ଇଞ୍ଜା  
 ମତିୟଇଁ ବାଟି କିହାନା, ୨୪ ଇ ପ୍ରାଡାନା କିତେରି, “ପ୍ରଭୁ ନୀନୁ ବାରେତି  
 ହିୟାତି ଅଣ୍ଡୁ ପୁନାତି, ଜୀହୁଦା ଏମିନି ଟାୟୁତା ଡୟିନାୟି ମାନେ  
 ଏଞ୍ଜାସି ହାଜାଲିଏ, ଏଞ୍ଜାଣି ଟାୟୁତା ଇ ରିଆରି ବିତ୍ରାଟି ନୀ ତାଣାଟି  
 ଆଡିତାସି ଆମ୍ବାଆସି, ୨୫ ଏ ପାଣ୍ଡୁଞ୍ଜି ଆହାମାନାରି ସେବା କାମା କିହାଲି  
 ଆମ୍ବାଆରାଇଁ ଜୀହୁଦା ପାଣାତା ବାଟି କିହାମାଞ୍ଜି ତସ୍ତାମୁ ।” ୨୬ ଅଡେ  
 ଏଞ୍ଜାରି ଏ ରିଆରି ତାକି ପାଦି କିହାଲିଏ ମତିୟ ଦରୁତଲେ ଆଡେ;  
 ଅଡେ ଏଞ୍ଜାସି ଏଗାର ଜାଣା ପାଣ୍ଡୁଞ୍ଜି ଆହାମାନାରି ଗତିତା ଆଣ୍ଡିତେସି  
 ।

## ୨

### ସୁଦୁଜୀଞ୍ଜୁ ରେଟା ଖାନାୟି

୧ ପେଡ୍ରିକସ୍\* ଦିନାତା କ୍ରୀସ୍ତଇଁ ନାମିତି ବାରେଜାଣା ର ଟାୟୁତା  
 ରୁଣ୍ଡା ଆହାମାତେରି । ୨ ଏ ଦେବୁଣିଏ କାଜା ଗାଲି ଖାହିମାନି ଲେହେଁ  
 ର ହାଡା ଲାକପୁରୁଟି ଖାହାଁ, ଆମିନି ଇଲୁତା ଏଞ୍ଜାରି କୁଗାମାତେରି,  
 ଏ ଇଲୁତି ବାରେଖାକି ଖେଜିତେ । ୩ ଇଞ୍ଜା ହିରୁ ଗୁଦ୍‌ଖା ଲେହେଁ  
 ତଞ୍ଜାଆହାନା ଏଞ୍ଜାରି ନକିତା ରଣ୍ଡି ରଣ୍ଡି ଆହୁଁ ଏ ବାରେଜାଣାତି  
 ଲାକ ରେଟାଖାଡେ । ୪ ଏମ୍ବାଟିଏ ଏଞ୍ଜାରି ବାରେଜାଣା ସୁଦୁଜୀଞ୍ଜୁ  
 ବେଟାଆହାନା ଏ ଜୀଞ୍ଜୁ ଏନିକିଁ ଜଲାଇଁ ବାଡୁୟୁ ହାତେ, ଏଲେକିଁ  
 ଏଞ୍ଜାରି ଏଟକା ଏଟକା ହାଡାତଲେ ଜଲାଇଁ ମାଟୁହେରି ।

୫ ଏଟିବେଲାତା ପେଡ୍ରିକସ୍ ପାରୁଁତାକି ହାଗୁ ଡଇତି ଏଟକା  
 ଏଟକା ଦେସାଟି ଖାହାମାଟି ଜୀହୁଦି ଲକୁ ଜିରୁସାଲମତା ଡୟା

✨ ୧:୨୧ ୧:୨୧ ମାତି ୩:୧୭; ମାର୍କ ୧:୯; ଲୁକ ୩:୨୧; ମାର୍କ ୧୬:୧୯; ଲୁକ ୨୪:୫୧ ‡ ୧:୨୨  
 ୧:୨୨ ମୁଞ୍ଜିନାୟି \* ୨:୧ ୨:୧ ପିସ୍‌ପିଆନି ପାରୁଁତି ରା କଡ଼ି ଦସ ଦିନା

ମାରେରି; <sup>୬</sup> ଅଡ଼େ, ଏ ହାଡ଼ା ଖେଞ୍ଜାଲିଏ, ହାରେକା ଲକୁ କୃତ୍ତା ଆହାନା ବାରେଜାଣା ଜାହା ଜାହାରା ହାଡ଼ାତଲେ ଏଞ୍ଜାରି ଜଲିମାନାଣି ଖେଞ୍ଜାନା କାବା ଆହାହାରେରି । <sup>୭</sup> ଇଞ୍ଜା ଏଞ୍ଜାରି ଆଡ଼ାଜାକା ଅଡ଼େ କାବାଆହାନା ଏଲେଇଚେରି, “ମେହଦୁ ଇ ଆମିନି ଲକୁ ହାଡ଼ା ଜଲିମାନେରି, ଏଞ୍ଜାରି ବାରେ ଗାଲିଲିତାରି ଆଏକି ? 「ଆତିହ୍, ମାର ଏନିକ୍ ବାରେଜାଣା ଜାହା ଜାହାରା ଜାନା ଗାମୁତି ହାଡ଼ାତଲେ ଜଲିମାନାଣି ଖେଞ୍ଜିମାନାୟି ? <sup>୯</sup> ପାତ୍‌ୟ, ମାଦିୟ, ଏଲମାମିୟ, ଅଡ଼େ ମେସପଗାମିୟା, ଜୀହୁଦା ଦେସା, କାପାଦକିୟା; ପନ୍ତ ଅଡ଼େ ଆସିୟା, <sup>୧୦</sup> ପୁଗ୍‌ୟା, ପଂପୁଲିୟା, ମିସର ଇଞ୍ଜା କୁରିଣି ଦାରିତା ତ୍ତଇନି ଲିବିୟା ନାସକାଣା ବାସା କିନାରି, ଇଞ୍ଜା ରମ୍‌ଟି ଖାହାମାନି ଜୀହୁଦି, <sup>୧୧</sup> ଅଡ଼େ ଏକା କୃତ୍ତାତି ଲକୁ ଜୀହୁଦି ଦାମୁତି ନାମାହ୍ ତ୍ତୟାମାନାରି; ଅଡ଼େ କ୍ରିତି ଇଞ୍ଜା ଆରବିୟ ଦେସାତି ଲକୁତାୟି ମାର, ମାର ଜାହା ଜାହାରା ହାଡ଼ାତଲେ ମାହାପୁରୁତି କାଜା କାଜା କାମାତି କାତା ଜଲିମାନାଣି ଖେଞ୍ଜିମାନାୟି ।” <sup>୧୨</sup> ଅଡ଼େ ବାରେଜାଣା ଆଡ଼ାଜାକା ଅଡ଼େ କାବାଆହାନା ତାମ୍‌ତାମ୍‌ହାଡ଼ାକାତା ଆଡ଼େରି, “ଇଦାଣି ଅର୍ତ୍ତ ଏନାୟି ?”

<sup>୧୩</sup> ସାମା ଏବକାତାରି ଲାଜାକିହ୍ ଏଲେଇଚେରି, “ଇଞ୍ଜାରି ପୁଃନି ତାକ୍‌ହି ଅଜୁରି ରାସା ଗସାନା ହଡ଼ା ହାଜାମାନେରି ।”

### ପିତର କାବୁ ଖେକ୍‌ନାୟି

<sup>୧୪</sup> ସାମା ପିତର ଏଗାର ଜାଣା ସୀସୁୟା ତଲେ ନିତାନା କାଜା ଗିୟାତଲେ ଏଲେଇଚେସି, “ଜୀହୁଦି ତାୟିୟା ଅଡ଼େ ଜିରୁସାଲମତା ବାସା କିହିମାନାତେରି, ମୀରୁ ନା କାତାତି ଖେଞ୍ଜାଦୁ ଅଡ଼େ ଇଦାଆଁ ପୁଞ୍ଜୁ । <sup>୧୫</sup> ଇତିହ୍ ମୀରୁ ଏନିକ୍ ଅଣ୍‌ପିମାଞ୍ଜେରି, ଇଞ୍ଜାରି ଏଲେକିହ୍ ଅଜୁରି ରାସା ଗସାହ୍ ହଡ଼ା ହିଲଅରି; ଇଦି ଆଡ଼େ ଲାକ୍‌ତି ନ ଗଂଟା ଆହାମାନେ । <sup>୧୬</sup> ସାମା ମାହାପୁରୁ ଅଣ୍‌ପୁତି ବଲୁ ଖେହ୍‌ନି ଆମିନି ଜୟେଲ ତାଣାଟି ରାସକି ଆହାମାନେ ଇଦି ଆହିମାନେ ଏଦି;

<sup>୧୭</sup> ମାହାପୁରୁ ଖେସିମାନେସି ରାନ୍‌ ଦିନାତା ଇ ବାରେ ଗଟ୍‌ଞ୍ଜି ଆନେ,

ନାନୁ ବାରେ ଲକୁତାକି ନା ଜୀଞ୍ଜୁ ପାଣ୍ଡାଇଁ,

ଏଚେଟିଏ ମୀ ମୀରକା ମାସକା ମାହାପୁରୁ ଅଣ୍‌ପୁତି ବଲୁ ଖେହ୍‌ନେରି,

ମୀ ଦାଂଗ୍‌ଣାୟାଁ କାବା ଆନାଣି ମେହ୍‌ନେରି,  
ଅଡ଼େ ମୀ ବୁଡ଼ହାୟାଁ ହାପାନା ହେଣ୍‌ନେରି ।

୧୮ ହାଅ, ଏ କାଲ୍‌ତା ନା ହଲ୍‌ଲିୟାଙ୍ଗା ଇଞ୍ଜା ହୁଲେଣିସିକା ଲାକ,  
ନାନୁ ନା ଜୀଞ୍ଜୁତି ଏଞ୍ଜାରି ଲାକ ଖାକ୍‌ଇ,  
ଏଚେଟିଏ ଏଞ୍ଜାରି ମାହାପୁରୁ ଅଣପୁତି ବଲ୍ଲୁ ଖେହ୍‌ନେରି ।

୧୯ ନାନୁ ହାଗୁ ଲାକ କାବାଆନି କାମା;  
ଅଡ଼େ ଡ଼ଇ ଦାର୍‌ତିତା କାବାଆନି ସିନାୟାଁ,  
ଏମ୍‌ପାଆଁ ନେତେରି, ହିରୁ ଇଞ୍ଜା ହାଚ୍‌ରେକା ବୟ୍‌ ତହ୍‌ଇ;  
୨୦ ପ୍ରବୁତି କାଜା ଗାଞ୍ଜୁରମି ଦିନା ଖାନି ନଡ଼େଏ,  
ଝେଡ଼ା ଆନ୍ଦେରି ଆନେ,  
ଅଡ଼େ ଲେଞ୍ଜୁ ନେତେରିଲେହେଁ ଆନେ ।

୨୧ ଅଡ଼େ ଇଲେକିହିଁ ଆନେ, ଆମ୍‌ପାଆସି ପ୍ରବୁ ଦରୁ ଆସାନା ପ୍ରାଡ଼ାନା  
କିନେସି, ଏଞ୍ଜାସି ଗେଲ୍‌ପି ଆନେସି ।”

୨୨ “ଇସ୍‌ପାୟେଲ ଲକୁଡେରି, ଇ ବାରେ କାତା ଝେଞ୍ଜୁ ! ନାଜ୍‌ରିତ  
ଜୀସୁ ହାଚ୍‌ରେକା ବାଡ଼ୁୟୁତି କାମା, କାବାଆନି କାମା ଇଞ୍ଜା ସିନାୟାଁ  
ତଲେ ମୀ ନକିତା ମାହାପୁରୁତି ପାଣ୍ଡୁଞ୍ଜି ଆତାସି ଇଞ୍ଜା ପାର୍‌ମାଣା  
ଆହାମାନେସି, ଏଞ୍ଜାଣି ତାଣାଟି ମାହାପୁରୁ ମୀ ତାଣା ଇ ବାରେ କାମା  
କିହାମାନେସି, ଇଦାଆଁ ମୀରୁ ପୁଞ୍ଜାମାଞ୍ଜେରି । ୨୩ ☆ଏ ଜୀସୁ ମାହାପୁରୁ  
କିହାମାନି ଅଣପୁ ଅଡ଼େ ତଲିତି କାତାତଲେ ହେରପି ଆହାଲିଏ,  
ମୀରୁ ଏଞ୍ଜାଣାଇଁ ପାପୁ ଗାଟାରି କେୟୁଟି ପାସି ମୁଣ୍ଡାତା ଏକ୍‌ହାନା  
ପାୟାମାଚେରି । ୨୪ ☆ସାମା ମାହାପୁରୁ ଏଞ୍ଜାଣାଇଁ ହାକିତି ବାଡ଼ୁୟୁଟି  
ଗେଲ୍‌ପାନା ନୀର୍‌ହା ମାଚେସି, ଇଚିହିଁ ଏଞ୍ଜାସି ହାକିତା ଦସ୍‌ପି  
ଆହା ତୁୟିନେସି ଏଦି ଆହାଲି ଆଡ଼େଏ ।” ୨୫ ଦାଞ୍ଜୁଦ ଏ କାତାତି  
ଝେସାମାନେସି,

“ନାନୁ ବାରେଚେଲା ନା ନକିତା ପ୍ରବୁଇଁ ମେସିମାଚେଏଁ;

ଇଚିହିଁ ନାନୁ ଏନିକିଁ କିଲିବିଲି ଆଅଁ, ଏଦାଆଁତାକି ଏଞ୍ଜାସି  
ନା ଚିଞ୍ଜି ଚିତତା ମାନେସି ।

୨୬ ଏଦାଆଁତାକି ନା ହିୟାଁ ରାହାଁ

☆ ୨:୨୩ ୨:୨୩ ମାତି ୨୭:୩୫; ମାର୍କ ୧୫:୨୪; ଲୁକ ୨୩:୩୩; ଜହ ୧୯:୧୮ ☆ ୨:୨୪  
୨:୨୪ ମାତି ୨୮:୫,୬; ମାର୍କ ୧୭:୨; ଲୁକ ୨୪:୫

ଅଡ଼େ ନା ଝେନ୍ଦରି ରାହାଁ ଆଡ଼େ,  
ଅଡ଼େ ନା ଆଙ୍ଗା ଜିକେଏ ବାସୁଁ ତଲେ ବାସା କିନେ,

୨୭ ଇଚିହିଁ ନାନୁ ନା ଜୀଝୁତି ହାକିପୁରୁତା ପିହୁଅତି;  
ଅଡ଼େ ନୀ ନାମୁ ଅଡ଼େ ସୁଦୁ ଗାଟାଣାକ୍ ମାହୁଣି ମାଣ୍ଡାତା  
ସୀରହାଲି ହୀଅତି ।

୨୮ ନାନୁ ନାଙ୍ଗେ ଜୀଝୁତି ଜିରୁ ତସାମାଞ୍ଜାଦି,  
ଅଡ଼େ ନାନୁ ନାଙ୍ଗେ ନୀ ନକିତା ରାହାଁତା ନେଞ୍ଜିକିୟାଦି ।”

୨୯ “ଇସ୍ରାୟେଲତି ତାୟିୟାଁ ଅଡ଼େ ତାଙ୍ଗିସ୍ତାତେରି, ମା ଆକୁ  
ଦାଝୁଦତି କାତା ନାନୁ ମିଙ୍ଗେ କାଜା ହାଡ଼ାତଲେ ଝେସାଲି ଆଡ଼ାକ୍,  
ଇଚିହିଁ ଏଝାସି ହାଡ଼େସି ଇଞ୍ଜା ମୁସ୍ପି ଆଡ଼େସି, ଇଞ୍ଜା ଏଝାଣି ମାହୁଣି  
ମାଣ୍ଡା ନୀର୍ସ ପାତେକା ଇମ୍ମାଆଁ ମା ବିତ୍ରା ମାନେ । ୩୦ ରାଜା ଦାଝୁଦ  
ର ମାହାପୁରୁ ଅଣ୍ଟପୁତି ବଲୁ ଝେହୁନାସି ଲେହେଁ, ତାନି ନେତେରି  
ତଲେ ଜାନି ଆଡ଼ାଣାକ୍ ମାହାପୁରୁ ତାନି ସିଂଗାସାଣିତା କୁଗିକିହାଲି  
ତାନି ତାଣା ଆଞ୍ଜାମାତେସି ଇଞ୍ଜା ପୁଞ୍ଜାମାତେସି । ୩୧ ଦାଝୁଦ ଇଦାଆଁ  
ପୁଞ୍ଜାମାତାକି, କ୍ରୀସ୍ତତି ଝେଣ୍ଡେ ନିଙ୍ଗିନି କାତା ଝେସାମାତେସି ।”

“ଇଚିହିଁ ଏଝାସି ହାଡ଼ାରି ତାଣା ଡୟାଆତେସି;

ଇଞ୍ଜା ଏଝାଣି ଆଙ୍ଗା ମାହୁଣି ମାଣ୍ଡାତା ସୀରୁଆତେ ।”

୩୨ ମାହାପୁରୁ ଇ ଜୀସୁକ୍ ଅଡ଼େ ଝେଣ୍ଡେ ହାକିଚି ନିକହାମାନେସି  
ଇଦାଣି ତାକି ମାମୁ ବୁରେ ସାକି । ୩୩ ଏଦାଆଁତାକି ଆଡ଼ା ମାହାପୁରୁ  
ଜୀସୁକ୍ କାଜାସି କିହାନା ତାନି ଚିଝନିଝାକି କୁଗିକିହାନା ତାନିତଲେ  
ସାଲୁଝି କିହାଲି ହୀତେସି, ଇଞ୍ଜା ଏଝାସି ମାଙ୍ଗେ ଆଞ୍ଜାମାତି ସୁଦୁଜୀଝୁ  
ହିୟାତେସି, ଇଦି ମୀରୁ ବାରେ ଆମିନିଗାଟାଣି ମେସିମାଞ୍ଜେରି ଇଞ୍ଜା  
ଝେଞ୍ଜିମାଞ୍ଜେରି । ୩୪ ଇଚିହିଁ ଦାଝୁଦ ଲାକପୁରୁ ହାଜାହିଲାଆତେସି;  
ଏଝାସି ତାନୁଏ ଝେସାମାତେସି,

“ପ୍ରୁ ନା ପ୍ରୁକ୍ ଏଲେଇତେସି;

୩୫ ନାନୁ ନୀ ସାଡୁୟାଁଣି ନୀ କଡାୟାଁ ଡଇ ଇଟାଆ ପାତେକା,  
ନାନୁ ନା ଚିଝନିଝାକି କୁଗାମାନାମୁ ।”



୩୭ “ଇଦାଆଁତାକି ବାରେ ଇସ୍ରାୟେଲତି ଲକୁ ସାତେଏ ପୁନାପେରି, ଇଚିହିଁ ଆମିନି ଜୀସୁଇଁ କୁସତା ପାୟିତେରି, ସାତେଏ ଏଞ୍ଜାଣାଇଁ ମାହାପୁରୁ, ପ୍ରବୁ ଅଡେ ମସିହା ପାଣା ହୀତେସି ।”

୩୮ ଇ କାତା ଖେଞ୍ଜାନା ଲକୁତି ହିୟାଁ ତୀହାହାଚେ, ଇଞ୍ଜାଁ ଏଞ୍ଜାରି ପିତର ଅଡେ ଏମ୍ବାଆଁ ମାଚି ପାଣୁଞ୍ଜି ଆଡାରାଇଁ ଏଲେଇଚେରି, “ତାୟିୟାଁ ମାମ୍ବୁ ଏନାଆଁ କିନମି ?”

୩୯ ପିତର ଏଞ୍ଜାରାଇଁ ଏଲେଇଚେସି, “ମୀରୁ ମୀ ହିୟାଁ ଖେଟ୍‌ହା କତାଦୁ, ଅଡେ ଜାହାରା ପାପୁତି ମ୍ବେକୁହାଲି ବାରେଜାଣା ଜୀସୁ କ୍ରୀସ୍ତ ଦରୁତଲେ ବାପ୍ତିସ୍ମାଁ ଅଦୁ; ଆଡିହିଁ ଦେଁ ମୀରୁ ସୁଦୁଜୀଞ୍ଜୁତି ଦାନା ବେଟାଆଦେରି । ୩୯ ଇଚିହିଁ ମାହାପୁରୁ ଆଞ୍ଜାମାନାୟି ମିଙ୍ଗେତାକି, ଇଞ୍ଜାଁ ମୀ ମୀରକା ମାସକା ତାକି, ଅଡେ ହେକତି ଏଚେକା ଲକୁ ମା ପ୍ରବୁ ମାହାପୁରୁ ତାନି ତାଣା ହାଟିନେସି, ଏ ବାରେ ଲକୁତାକି ଆନେ ।”

୪୦ ଅଡେ ପିତର ଏଞ୍ଜାରାଇଁ ହାରେକା କାତାତଲେ ବାତିମାଲିହିଁ ଅଡେ ଏଞ୍ଜାରାଇଁ ଜାପୁନି ହାଡା ଖେସିହିଁ ସାକି ହୀତେସି, “ଇ କୁଟୁଗାଟି କୁଡାତି ଲକୁଟିଏ ମୀରୁ ଗେଲ୍‌ପି ଆଦୁ ।” ୪୧ ହାରେକା ଲକୁ ଏଞ୍ଜାଣି ହାଡା ନାମିତେରି ଇଞ୍ଜାଁ ବାପ୍ତିସ୍ମାଁ ଅଡେରି, ଅଡେ ଏ ଦିନା ବାରେ ତାନି ମାଣା ଲକୁ କୁଲମି ତଲେ ଆଣ୍ଡିତେରି । ୪୨ ଏ ଦିନାଟିଏ ଏଞ୍ଜାରି ପାଣୁଞ୍ଜି ଆଡାରି ଜାପୁନି ତାଣା, ଏଞ୍ଜାରିତଲେ ଆଣ୍ଡାନା ରୁଟି ଡିକହାଲି, ପ୍ରାଡାନା କିହାଲି ଆଣ୍ଡି ଆହାଁ ଡୟିତେରି ।

### ନାମୁଗାଟାରି ମାଣ୍ଡକି

୪୩ ପାଣୁଞ୍ଜି ଆଡାରି ତାଣାଟି ହାରେ ହାରେକା କାବାଆନ୍ତି କାମା ଇଞ୍ଜାଁ ସିନାୟାଁ ତଞ୍ଜାଆହାଲି ମାଟ୍‌ହେ; ଅଡେ, ଲକୁ ବାରେ ଆଜାଲି ମାଟ୍‌ହେରି । ୪୪ ✠ସାମା ବାରେ ନାମିତାରି, ଏଞ୍ଜାରି ବାରେଜାଣା ରଣ୍ଡିଏ ତାଣା ଡୟାନା ବାରେ ଦନତି ବାରେତାୟି ଇଞ୍ଜାଁ ଅଣ୍ଡପିତେରି, ୪୫ ଅଡେ ଏଞ୍ଜାରି ଜାହାରା ଦନତି ଆସି ମାଚାଣି ପାର୍‌ତାନା, ଆମ୍ବାଆରାକି ଏନାୟି ଲଡାମାନେ, ଏଲେକିହିଁ ବାରେତାକି ବାଟିକିହାଁ ହୀହାଲି ମାଟ୍‌ହେରି । ୪୬ ଅଡେ, ଏଞ୍ଜାରି ରଣ୍ଡିଏ ହିୟାଁ ଆହାଁ ବାରେଦିନା ପ୍ରାଡାନା ଇଲୁତା ରୁଣ୍ଡା ଆହାନା ଡୟିମାଚେରି,

† ୨:୩୮ ୨:୩୮ ମୁଞ୍ଜିନାୟି ✠ ୨:୪୧ ୨:୪୧ ମୁଞ୍ଜିନାୟି ✨ ୨:୪୪ ୨:୪୪ କାମା ୪:୩୨-୩୫

ଇଞ୍ଜାଁ ଇଲୁତାକି ଇଲୁ ରୁଟି ଡିକହଁ ରାହଁ ଅଡ଼େ ହିଡ଼ଡ଼ି ହିୟଁ ତଲେ  
ତିଞ୍ଜି ଉଣ୍ଡିହଁ, <sup>୪୭</sup> ମାହାପୁରୁତି ଜହରା କିହିମାରେରି ଇଞ୍ଜାଁ ବାରେ  
ଲକୁତି ଜୀଞ୍ଜୁ ନନାରି ଆହିମାରେରି । ଅଡ଼େ ପ୍ରବୁ ତାଣା ଗେଲପି  
ଆହିମାନି ଲକୁଣି ବାରେଦିନା କୁଲମି ତଲେ କାଲହାଲି ମାଟ୍‌ହେରି ।

## ୩

### ପିତର ସଟାଙ୍ଗ ନେହଁ କିନାୟି

<sup>୧</sup> ପିତର ଅଡ଼େ ଜହନ ର ଦିନା ପ୍ରାତାନା କିନି କାରୁତା  
ଇତିହଁ ତାନି ଗଂଗା ବେଲାତା ପ୍ରାତାନା ଇଲୁତା ହାଜିମାରେରି  
। <sup>୨</sup> ଏଚିବେଲାତା ଜାର୍ନାଟିଏ ସଟା ରଅସି ଡେକି କିଞ୍ଜି ଆହଁ “ଅଜିତି”  
ଦରୁଗାଟି ଦୁଞ୍ଜେରିତା ଇଟ୍‌ଞ୍ଜି ଆହିମାରେସି; ଇଞ୍ଜାଁ ଏଞ୍ଜାସି ପ୍ରାତାନା  
ଇଲୁତା ଖାନି ଲକୁଣି ରାସିମାରେସି । <sup>୩</sup> ଅଡ଼େ ଏଞ୍ଜାସି ପିତର ଇଞ୍ଜାଁ  
ଜହନଙ୍ଗଁ ପ୍ରାତାନା ଇଲୁ ବିତ୍ରା ହାଜିମାନାଣି ମେସାନା ଏଞ୍ଜାରାଙ୍ଗଁ  
ରାସାଲି ମାଟ୍‌ହେସି । <sup>୪</sup> ପିତର ଅଡ଼େ ଜହନ ଏଞ୍ଜାଣାଙ୍ଗଁ ଆଟେ  
ସିନିକିତେରି, ଇଞ୍ଜାଁ ପିତର ଏଲେଇରେସି “ମା ଖାକି ସିନିକିୟାମୁ ।”  
<sup>୫</sup> ଏମ୍‌ମାଟିଏ ଏଞ୍ଜାସି ଏଞ୍ଜାରି ତାଣାଟି ଇଚାଣି ବେଗାଆହାଲି ଏଞ୍ଜାରି  
ଖାକି ସିନିକିତେସି । <sup>୬</sup> ସାମା ପିତର ଏଲେଇରେସି, “ନା ତାଣା  
ବାଂଗାରା କି ଖେଣ୍ଡି ହିଲେଏ, ସାମା ନା ତାଣା ଏନାୟି ମାନେ ଏଦାଆଁ  
ହୀହିମାଞ୍ଜାଙ୍ଗଁ; ନାଜ୍‌ରିତ ଜୀସୁ ଜୀସୁ ଦରୁତଲେ ହୁକୁମି ହୀହିମାଞ୍ଜାଙ୍ଗଁ  
ନିଙ୍ଗାନା ତାକାମୁ !” <sup>୭</sup> ଅଡ଼େ, ଏଞ୍ଜାସି ଏଞ୍ଜାଣି ଚିଃନି କେୟୁ ଆସାନା  
ଏଞ୍ଜାଣାଙ୍ଗଁ ନିକ୍‌ହେସି, ଏଚେଟିଏ ଏ ଦେବୁଣିଏ ଏଞ୍ଜାଣି କତାୟାତି  
ହାନ୍ତୁଲିକା ବାଡ଼ୟୁ ଆତୁ; <sup>୮</sup> ଏଞ୍ଜାସି ଡେଞ୍ଜଁ ଡେଞ୍ଜଁ ତାନି କତାତଲେ  
ନିତେସି, ଅଡ଼େ ତାକାଲି ମାଟ୍‌ହେସି । ଏଚେଟିଏ ଏଞ୍ଜାସି ଏଞ୍ଜାରିତଲେ  
ପ୍ରାତାନା ଇଲୁତା ତାକହଁ ଅଡ଼େ ଡେଞ୍ଜିହଁ ଇଞ୍ଜାଁ ମାହାପୁରୁଙ୍ଗଁ  
ଗାଞ୍ଜୁରମି କିହଁ ହାଚେସି । <sup>୯</sup> ଏମ୍‌ମାଆଁ ମାନି ଲକୁ ବାରେ ଏଞ୍ଜାଣି  
ତାକିନାଣି ଅଡ଼େ ମାହାପୁରୁତି ଗାଞ୍ଜୁରମି କିହିମାନାଣି ମେସ୍‌ସେରି;  
<sup>୧୦</sup> ଅଡ଼େ ଆମିନିଗାଟାସି ପ୍ରାତାନା ଇଲୁତି ଅଜିତି ଦୁଞ୍ଜେରିତା କୁଗାନା  
ରାସିମାରେସି, ଏଞ୍ଜାସିଏ ଇଞ୍ଜାସି ଇଞ୍ଜାଁ ପୁଚେରି, ଏଞ୍ଜାଣାକି ଏନାଆଁ  
କିଞ୍ଜି ଆହାମାରେ ଏଦାଆଁ ମେସାନା ଆତାଜାକା ଆହାନା କାବା  
ଆଡ଼େରି ।

### ପ୍ରାତାନା ଇଲୁତା ପିତର ଝେକ୍‌ନାୟି

୧୧ ଏଝାସି ପିତର ଇଞ୍ଜା ଜହନ ତଲେ ସଲମନତି ପିଣ୍ଡାତା ମାନାଣି ମେସାନା, ବାରେ ଲକୁ ଆତାଜାକା ଆହାନା ଏଝାରି ତାଗେ ହଟାତେରି । ୧୨ ପିତର ଏଝାରାଇଁ ମେସାନା ଏଲେଇଚେସି, “ଇସ୍ରାୟେଲ ଲକୁତେରି, ମୀରୁ ଏନାଆଁତାକି ଆତାଜାକା ଆହିମାଞ୍ଜେରି ? ମାମ୍ନୁ ମା ବାଡ଼ୟୁ କି ମାହାପୁରୁ ଆଜିତଲେ ଇଝାଣାକି ତାକାଲି ବାଡ଼ୟୁ ହୀହାମାନମି, ଏଦାଆଁ ଅଣ୍‌ପାନା ମାଞ୍ଜେ ରଣ୍ଡିଏ ଅଣ୍‌ପୁ ତଲେ ଏନାଆଁତାକି ସିନିକିହିମାଞ୍ଜାଦେରି ? ୧୩ ଅବାହାମ, ଇସାହାକ ଅଡ଼େ ଜାକୁବତି ମାହାପୁରୁ, ମା ଆକୁ ଆବାୟାଁତି ମାହାପୁରୁ, ତାନି ହଲେଏସି ଜୀସୁଇଁ ମାହାପୁରୁତି ଗାଝୁରମି ହୀହାମାନେସି । ସାମା ଜୀସୁଇଁ ମୀରୁଏ ସାଲୁକି କିନାରି କେୟୁତା ହେର୍ପିତେରି, ଏତିବେଲା ପିଲାତ ଜୀସୁଇଁ ପିସାଲି ଅଣ୍‌ପା ମାତିହୁଁ ଜିକେଏ, ଏଝାଣାଇଁ ମୀରୁ ପିଲାତ ନକିତା ଅପାଆତେରି । ୧୪ ☆ଏଝାସି ସୁଦୁ ଅଡ଼େ ଦାର୍‌ଗାଟାସି ମାଚେସି, ସାମା ମୀରୁ ଏଝାଣାଇଁ ଅପାଆତେରି, ଅଡ଼େ ଏଝାଣି ଚାୟୁତା ର ଲକୁଣି ପାୟିନାଣାଇଁ ପିସାଲି ପିଲାତଇଁ ବାତିମାଲିତେରି, ୧୫ ଆମ୍ବାଆସି ଜୀଝୁତି ଜିରୁ ତହନସି ଏଝାଣାଇଁ ମୀରୁ ପାୟିତେରି; ଏଝାଣାଇଁ ମାହାପୁରୁ ହାଡ଼ାରି ତାଣାଟି ନିକହାମାନେସି, ମାମ୍ନୁ ଛଦାଣି ସାକି । ୧୬ ଏଝାଣି ଦରୁତି ବାଡ଼ୟୁ ଇ ସଟାଇଁ ନେହୁଁ କିହାମାନେ, ମୀରୁ ଏନାଆଁ ମେସାନା ସାତା ଇଞ୍ଜୁଁ ପୁଞ୍ଜାମାଞ୍ଜେରି, ଏଝାଣି ଦରୁତଲେ ନାମିତାକି ଆହାମାନେ । ଜୀସୁଇଁ ନାମିତାକି ଏଝାସି ନେହୁଁ ଆହାମାନେସି ଇଦାଆଁ ମୀରୁ ମେସାମାଞ୍ଜେରି ।”

୧୭ “ଅଡ଼େ ନୀଏଁ ଇସ୍ରାୟେଲତି ତାୟିୟାଁ ଅଡ଼େ ତାଞ୍ଜିସ୍ତାତେରି, ମୀ କାଜାରି ଏନିକିଁ, ମୀରୁ ଜିକେଏ ଏଲେକିଁ ବୁଦି ହିଲାଆକି ଇଦାଆଁ କିହାମାନେରି ଇଞ୍ଜୁଁ ନାନୁ ପୁଞ୍ଜିମାଇଁ । ୧୮ ତଲି କାଲାଟିଏ ମାହାପୁରୁ ଅଣ୍‌ପୁତି ବଲୁ ଝେହ୍‌ନାରି ତାଣାଟି ମାହାପୁରୁ ଝେସାମାଚେସି ମସିହାତି ଦୁକୁ ପାଣନାୟି ମାନେ; ଏ ବାରେ ଏଝାସି ଇଲେକିଁ ପୁରା କିହାମାନେସି । ୧୯ ଇତିହୁଁ, ଏନିକିଁ ମୀ ପାପୁ ମେଣ୍‌ଜିନେ, ଏଦାଆଁତାକି ମନ ଝେହ୍‌ହାନା ମାହାପୁରୁ ତାଣା ଝେଣ୍ଡା ଝାଦୁ, ୨୦ ପ୍ରୁ

☆ ୩:୧୪ ୩:୧୪ ମାତି ୨୨:୧୫-୨୩; ମାର୍କ ୧୫:୬-୧୪; ଲୁକ ୨୩:୧୩-୨୩; ଜହ ୧୯:୧୨-୧୫

ତାଣାଟି ମୀରୁ ଜୀଝୁତି ବାଡ଼ୟୁ ବେଟାଆଦେରି, ମାହାପୁରୁ ମିଙ୍ଗେତାକି ତଲିଏ ଆଡ଼ାମାନି ମସିହା ଜୀସୁଇଁ ପାଣ୍ଡାନେସି । ୨୧ ବାରେ କାତାତି ଝେଣ୍ଡେ କିନାଣି ଆମିନି ବେଲାତି କାତା ତଲି କାଲାଟିଏ ମାହାପୁରୁ ତାନି ସୁଦୁ ମାହାପୁରୁ ଅଣ୍ପୁତି ବଲୁ ଝେହ୍ନାରି ତାଣାଟି ଝେକ୍‌ହା ମାରେସି, ଏ କାଲା ଝାଆ ପାତେକା ଏଝାଣାକି ସାତେଏ ଲାକପୁରୁ ହାଜାଲି ଆନେ । ୨୨ ମସା ଝେସାମାରେସି, ‘ପ୍ରୁ ମାହାପୁରୁ ମୀ ତାୟିୟା ବିତ୍ରାଟି ମିଙ୍ଗେତାକି ନା ଲେହେକି ର ମାହାପୁରୁ ଅଣ୍ପୁତି ବଲୁ ଝେହ୍ନାଣାଇଁ ନିକ୍‌ନେସି; ଏନା ଏନାଆଁ ମିଙ୍ଗେ ଝେସ୍ତାନେସି, ଏ ବାରେ ମୀରୁ ଏଝାଣି କାତା ଝେଞ୍ଜେରି । ୨୩ ଆମିନିଗାଟାସି ମାହାପୁରୁ ଅଣ୍ପୁତି ବଲୁ ଝେହ୍ନାରି କାତା ନାମଅରି ଏଝାରି ମାହାପୁରୁତି ଲକୁ ତାଣାଟି ଏଟକା କିଝିଆନେରି ଅଡେ ନାସା କିଝିଆନେରି ।’ ୨୪ ସାମୁୟେଲ ଇଞ୍ଜା ତାନି ତାୟୁତି ଏଚରଜାଣା ମାହାପୁରୁ ଅଣ୍ପୁତି ବଲୁ ଝେହ୍ନାରି ଝେସାମାନେରି, ଏଝାରି ବାରେ ଇ କାଲାତା ଆହିମାନି କାତା ଝେସାମାନେରି । ୨୫ ମାହାପୁରୁତି ଆଞ୍ଜାମାନି ମାହାପୁରୁ ଅଣ୍ପୁତି ବଲୁ ଝେହ୍ନାରି ତାଣାଟି ମିଙ୍ଗେତାକି ନେହେଁ, ମାହାପୁରୁ ମୀ ଆକୁ ଆବାୟା ତଲେ କିତି ରାଜିମାନା ମୀରୁ କିହିମାଞ୍ଜେରି । ଏନିକ୍ ଏଝାସି ଅବାହାମଇଁ ଏଲେଇଚେସି, ‘ନାନୁ ମୀ କୁଡ଼ାଟି ବାରେ ଦାର୍‌ତିତି ଲକୁକି ବର ହାଇଁ ।’ ୨୬ ମାହାପୁରୁ ତଲିଏ ତାନି ହଲେଏଣାଇଁ ମିଙ୍ଗେତାକି ବାଟି କିହାନା ପାଣ୍ଡାତେସି, ଏନିକ୍ ଏଝାସି ମୀ ବାରେଜାଣା ତେରି ମିଙ୍ଗେ ଲାଗେଏ ଜିରୁଟି ଝେଟ୍‌ହାନା ବର ହିୟାନେସି ।”

## ୪

### ପିତର ଅଡେ ଜହନ ବେରଣିମାଣ୍ଡାତା

<sup>୧</sup> ପିତର ଅଡେ ଜହନ ଲକୁ ନକିତା ଝେସିମାଟି ବେଲାତା ପୂଜେରାଙ୍ଗା, ମାହାପୁରୁ ଇଲୁତି କାଜାରି ଇଞ୍ଜା ସାଦୁକିୟା ଏଝାରି ନକିତା ଝାଡେରି । <sup>୨</sup> ଏଝାରି କପା ଆହିମାଚେରି, ଇତିହିଁ ପାଣ୍ଡୁଝି ଆହାମାନାରି ଲକୁଣି ଜାପୁହି ମାଚେରି, ଇଞ୍ଜା ଜୀସୁତି କାତା ଆସାନା ହାଡାରି ବିତ୍ରାଟି ଝେଣ୍ଡେ ନିଙ୍ଗିତି କାତା ଝେକ୍‌ହି ମାଚେରି । <sup>୩</sup> ଏଟିବେଲା ମିଡ଼ଅଲା ଆହିମାଚେ, ଏଦାଆଁତାକି ଏଝାରି ସାସୁୟାଣି

ଦସ୍‌ପାନା ଅର ନେରୁ ପାତେକା କାୟିଦି ଇଲୁତା ଇଚିତେରି । ୪ ସାମା ଏତେକା ଲକୁ ବଲୁ ଝେଚାରି ନାମିତେରି, ଇଞ୍ଜା ଖାରଇ ଆବାୟା ପାସାମାଣା ଆତେରି ।

୫ ତାନି ଅର ଦିନା ଜୀହୁଦିଙ୍ଗାତି କାଜାରି, ଇଞ୍ଜା ପ୍ରାଚିନାଙ୍ଗା, ଜାପୁନାରି ଅଡ଼େ ମୋରାପୁନାରି ଜିରୁସାଲମତା କୃଡ଼ା ଆତେରି । ୬ ଏମ୍ବାଆଁ କାଜା ପୂଜେରା ହାନାନ, କୟାପା, ଜହନ, ଆଲେକ୍‌ଜାଣ୍ଡରତି କାଜା ପୂଜେରାଙ୍ଗା କୃଡ଼ାତି ବାରେ ଲକୁ କୃଡ଼ା ଆତେରି । ୭ ଏଝାରି ପାଣ୍ଡୁଝି ଆଡ଼ାରାଇଁ ମାଦିଏ ନିପହାନା ଝେତେରି, “ଏନିକିହିଁ କିତେରି ? ଏନି ବାଡ଼ୟୁ ଇଞ୍ଜା ଆମ୍ବାଆରି ଦରୁତଲେ ମୀରୁ ଇ ବାରେ କାମା କିହିମାଞ୍ଜେରି ?”

୮ ଏମ୍ବାଟିଏ ପିତର ସୁଦୁଜୀଝୁତା ନେଞ୍ଜାନା ଏଝାରାଇଁ ଏଲେଇତେସି, “ଲକୁତି କାଜାତେରି ଇଞ୍ଜା ପ୍ରାଚିନାଙ୍ଗାତେରି, ୯ ନୀଞ୍ଜୁ ମାମ୍ବୁ ସୁଗାକି କିହାମାନି ନେହିଁ କାମାତାକି ମୀରୁ ଝେଞ୍ଜି ମାଞ୍ଜାଦେରି, ଏଝାସି ଏନିକିହିଁ ନେହିଁ ଆତେସି ଇଞ୍ଜା ପୁଞ୍ଜାଲି ଅଣପିମାଞ୍ଜେରି, ୧୦ ଆତିହିଁ ମୀରୁ ବାରେଜାଣା ତେରି ପୁନିକାତା, ଇସ୍ରାୟେଲତି ବାରେ ଲକୁ ପୁନାୟିମାନେ, ଆମିନି ନାଜରିତ ଜୀସୁ କ୍ରୀସ୍ତାଇଁ ମୀରୁ କୁସତା ପାୟିତେରି, ଆମ୍ବାଆରାଇଁ ମାହାପୂରୁ ହାକିଟି ନିକହାମାନେସି ଏ ଜୀସୁ ଦରୁଟି ଇ ମାଣ୍ଡସି ନେହିଁ ଆହାନା ମୀ ନକିତା ନିତାମାନେସି ।” ୧୧ ଜୀସୁ ରଅସିଏ, ଦାମ୍ବୁ ସାଢ଼େସୁରି ଝେସିମାଞ୍ଜାନେ, “ଇଲୁ କେପିନାତେରି ମୀରୁ, ମୀ ତାଣାଟି ଆମିନି ଝାଲି ଲାଗେଏତାୟି ଆହାମାଗେ,

ସାମା ଆମିନାୟି କନତି କାଜା ଝାଲି ଆତେ, ଏଝାସି ଏ ଝାଲି ।” ୧୨ ଏଝାଣି ପିସ୍‌ପେ ଅଡ଼େ ଆମ୍ବାଆରି ତାଣା ଗେଲ୍‌ପିନାୟି ହିଲେଏ; ଇଚିହିଁ ଆମ୍ବାଆରି ତାଣାଟି ମାର ଗେଲ୍‌ପି ଆନାୟି ଆନେ, ହାଗୁଡ଼ଇ ମାଣ୍ଡସିୟାଁ ବିତ୍ତା ଏନି ଦରୁ ହୀପକି ଆହା ହିଲେଏ ।

୧୩ ଏଝାରି ପିତର ଅଡ଼େ ଜହନତି ସାସା ମେସାନା ଇଞ୍ଜା ଏଝାରି ଏନାଆଁ ପୁନାଆତାରି ଅଡ଼େ ବୁଦି ହିଲ୍ୟାଆ ଲକୁ, ଇଦାଆଁ ପୁଞ୍ଜାନା ଆତାଜାକା ଆହାହାତେରି, ଇଞ୍ଜା ଏଝାରି ଜୀସୁତଲେ ମାଚେରି ଇଞ୍ଜା ପୁରେରି, ୧୪ ସାମା ଏ ନେହିଁ ଆହାମାଚାସି ଜହନ ଇଞ୍ଜା ପିତର ତଲେ ନିତାମାଚାଣି ମେସାନା ଏଝାରି କପାଟି ଏନାଆଁ ଜଲ୍‌ଲି

ଆଡ଼ାଆତେରି । ୧୫ ତାୟୁ ଏଞ୍ଜରାଈଁ ବେରଣି ମାଣ୍ଡାଟି ହଡ଼ା ହାଜାଲି ହୁକୁମି ହାହାନା ଏଞ୍ଜାରି ତାମ୍ନୁ ତାମ୍ନୁସୁ ଝେସ୍ପି ଆଡ଼େରି ୧୬ “ଇ ଲକୁଣି ଏନାଆଁ କିନାୟି ?” ଏଞ୍ଜାରି ଏଲେଇଚେରି, “ଇଚିହିଁ ଇଞ୍ଜାରି ତାଣାଟି କାବାଆନି କାମା କିଞ୍ଜିଆହାମାନେ, ଇଦି ଜିରୁସାଲମତି ବାରେଜାଣା ନକିତା ତଞ୍ଜା ଆହାମାନେ, ଇଞ୍ଜା ମାର ଏଦାଆଁ ଆଏ ଇଞ୍ଜାଲି ଆଡ଼ାଆୟି; ୧୭ ସାମା ଇ କାତା ଲକୁତାଣା ଏନିକିଁ ଗାଡ଼ି ଝେଜେସ, ଏଦାଆଁତାକି ଏଞ୍ଜରାଈଁ ଜୀସୁ ଦରୁ ଏଚେଲ୍ଲା ଆମ୍ବାଆରି ନକିତା ଆସାଲି ଏଞ୍ଜରାଈଁ କାହିକିନାୟି ମାନେ ।”

୧୮ ତାୟୁ ଏଞ୍ଜାରି ଜହନ ଅଡ଼େ ପିତରଇଁ ହାଟାନା ଜୀସୁତି ଦରୁ ଝେହ୍ଆଦୁ କି ଜାପୁଆଦୁ ଇଞ୍ଜିଁ ହୁକୁମି ହାତେରି । ୧୯ ସାମା ପିତର ଅଡ଼େ ଜହନ ଏଞ୍ଜରାଈଁ ଏଲେଇଚେରି, “ମାହାପୁରୁ କାତା ଝେନିକିହାଁ ମୀ କାତା ଝେନାୟି ମାହାପୁରୁ ନକିତା ନେହେଁ କି ଆଏ, ଏଦାଆଁ ମୀରୁ ଅଣ୍ଡା କତାଦୁ । ୨୦ ଇଚିହିଁ ମାମ୍ନୁ ଏନାଆଁ ମେସାମାନମି ଇଞ୍ଜା ଝେଞ୍ଜାମାନମି, ଏ ବାରେ ଝେହ୍ଆନା ଡ଼ୟାଲି ଆଡ଼ଅମି ।” ୨୧ ସାମା ଏ ବେରଣି ମାଣ୍ଡାତାରି ଏଞ୍ଜରାଈଁ ଅଡ଼େ ହାରେକା ଆଜି କିହାନା ପିସ୍ତେରି, ଏଞ୍ଜରାଈଁ ତଣ୍ଡ ହାହାଲି ଆଏ ଇଞ୍ଜିଁ ଏଞ୍ଜାରି ପୁଚେରି, ଏନାଆଁତାକି ଇଚିହିଁ ଏ କାମାତାକି ଲକୁ ବାରେ ମାହାପୁରୁଇଁ ଜହରା କିଚେରି । ୨୨ ଇଚିହିଁ ଆମିନିଗାଟାଣି ତାଣା କାବାଆନି ନେହିଁ କାମା କିଞ୍ଜି ଆହାମାରେ, ଏଞ୍ଜାସି ରୀ କଡ଼ି ବାର୍ଯ୍ୟାଟିଏ ଲାକ ମାଚେସି ।

### ପାଣ୍ଡୁଞ୍ଜି ଆହାମାନାରି ବାଡ଼ୟୁ ତାକି ପ୍ରାତାନା

୨୩ ପିତର ଅଡ଼େ ଜହନ ପିସ୍ପିଆଡ଼ି ଦେରୁଣିଏ ତାମି ତ଼ଣେସିଙ୍ଗା ତାଣା ହାଚେରି ଇଞ୍ଜା କାଜା ପୂଜେରାଙ୍ଗା ଅଡ଼େ ପ୍ରାଟିନାଙ୍ଗା ଏନାଆଁ ଝେସାମାଚେରି, ଏ ବାରେ ଏଞ୍ଜରାଈଁ ଝେସ୍ତେରି । ୨୪ ଏଞ୍ଜାରି ଏଦାଆଁ ଝେଞ୍ଜାନା ରଣ୍ଡିଏ ହିୟାଁ ତଲେ ମାହାପୁରୁ ନକିତା କାଜା ହାଡ଼ାତଲେ ପ୍ରାତାନା କିହିଁ ଏଲେଇଚେରି, “ପ୍ରୁ ନୀନୁ ହାଗୁ, ଦାରତି, ସାମ୍ବୁରି ଇଞ୍ଜା ଏ ବାରେ ତାଣା ମାନାଣି ବାରେ ଗାଡ଼ି କିହାମାଞ୍ଜି ! ୨୫ ସୁଦୁଜୀଞ୍ଜୁ ତଲେ ନୀନୁ ମା ଆକୁ ଦାଞ୍ଜୁଦ ନୀ ହଲେଏଣା ଗୁଡ଼ିଟି, ଇ କାତା ଝେସାମାଟି;

‘ଜୀହୁଦିଆଆତାରି ଏନାଆଁତାକି କାରବି ଆଡ଼େରି;

ଇଞ୍ଜା ଲକ୍ଷ୍ମୀ ଏନାଆଁତାକି ଉଦ୍ଦେଶ୍ୟତାଣି ଅଣ୍ଡପିତେରି ?

୨୭ ପ୍ରଭୁ ଅଡ଼େ ତାନି ବର ବେଟାଆହାମାନି ମସିହା କପାଟି,  
ଦାରୁତିତି ରାଜାୟା ନିଜିତେରି,  
ଇଞ୍ଜା ସାଲୁଞ୍ଜି କିନାରି କୃତା ଆଡ଼େରି ।”

୨୭ ଇତିହାସ ନୀ ସୁଦୁଗାଟି ହଲେଏସି ଜୀସୁଇଁ ବର ହୀତି,  
ସାତେଏ ଏଞ୍ଜାଣି କପାଟି ହେରଦ ଅଡ଼େ ପନ୍ତୁୟ ପିଲାତ ଇ ରିଆରି  
ଜୀହୁଦିଆଆତାରି ଅଡ଼େ ଇସ୍ରାୟେଲ ଲକ୍ଷ୍ମୀତଲେ ଇ ଗାଡ଼ାତା ପାରୁ  
ପାରିତେରି, ୨୮ ମୀ ଅଣ୍ଡପୁ ତଲେ ଏନାୟି ବାରେ ଗଟାଞ୍ଜି ଆନେ  
ଇଞ୍ଜା ତଲିଟିଏ କିଞ୍ଜି ଆହାମାରେ, ଏଦାଆଁ କିହାଲି କୃତା ଆଡ଼େରି  
। ୨୯ ଅଡ଼େ ନୀଏ, ଏ ପ୍ରଭୁ, ଏଞ୍ଜାରି ମାଙ୍ଗେ ଆଜି କିହିମାଞ୍ଜାନାଣି  
ସିନିକିୟାମ୍; ଅଡ଼େ ନୀ ହଲିୟାଙ୍ଗାଣି ହାରେକା ସାସାତଲେ ନୀ ବଲୁ  
ଞ୍ଜେସାଲି ବାଡ଼ୟୁ ହୀମ୍, ୩୦ ଇଞ୍ଜା ଏଦାଆଁ ତଲେ ନୀ ସୁଦୁ ହଲେଏସି  
ଜୀସୁତି ଦରୁତଲେ ନେହାଁ କିହାଲି ଅଡ଼େ ସିନାୟାଁ ଇଞ୍ଜା କାବାଆନି  
କାମାୟାଁ କିହାଲିତାକି ନୀ କେୟୁ ଦାସା ଡ଼ୟାମ୍ ।

୩୧ ଏଞ୍ଜାରି ପ୍ରାତାନା ରାପୁହି ତାୟୁ, ଆମିନି ଟାୟୁତା ରୁଣ୍ଡା  
ଆହାମାରେରି, ଏଦି ଖାଡ଼ିତେ । ଇଞ୍ଜା ବାରେଜାଣା ସୁଦୁଜୀଞ୍ଜୁ ତଲେ  
ନେଞ୍ଜାନା ବାଡ଼ୟୁ ତଲେ ମାହାପୁରୁତି ବଲୁ ଞ୍ଜେକହାଲି ମାଟୁହେରି ।

### ନାମୁଗାଟାରି ଦନ୍ତତି ସମାନା ବାଗା ବେଟାଆଡ଼େରି

୩୨ ☆ ନାମୁଗାଟି ଲକ୍ଷ୍ମୀ ରଣ୍ଡିଏ ହିୟାଁ ରଣ୍ଡିଏ ମନତଲେ ମାରେରି;  
ଏଞ୍ଜାରି ବିତ୍ରାଟି ଆମ୍ବାଆରି ଜିକେଏ ତାନି ଦନ୍ତତି ମାଦି ଇଞ୍ଜା  
ଅଣ୍ଡପି ହିଲାଆତେରି, ସାମା ଏଞ୍ଜାରିଞ୍ଜାୟି ବାରେ ସମାନା ଇଞ୍ଜା  
ଅଣ୍ଡପିମାରେରି । ୩୩ ପାଣ୍ଡୁଞ୍ଜି ଆହାମାନାରି ଗାଡ଼ି ବାଡ଼ୟୁ ତଲେ ପ୍ରଭୁ  
ଜୀସୁତି ଞ୍ଜେଣ୍ଡେ ନିଜିତି କାତା ଞ୍ଜେସାଲି ମାଟୁହେରି, ଇଞ୍ଜା ବାରେତି  
ଲାକ ମାହାପୁରୁତି ହାରେକା କାର୍ମା ମାରେ । ୩୪ ଇତିହାସ ଏଞ୍ଜାରି  
ବିତ୍ରା ଆମ୍ବାଆରାକି ଏନାୟି ଉଣା ଆହି ହିଲାଆତେ, ଇତିହାସ ଏରେକା  
ଲକ୍ଷ୍ମୀଟି ବୁନି ଇଞ୍ଜା ଇଲକା ମାରୁ ପାରୁତି ମାରେରି ୩୫ ଅଡ଼େ ପାଣ୍ଡୁଞ୍ଜି  
ଆଡ଼ାରି କଡ଼ାଁ ଡ଼ଇକା ଏ ତାବୁୟାଁ ହୀହିମାରେରି, ଅଡ଼େ ବାରେ

ଲକ୍ଷ୍ମୀତାକି ତାମି ଲକ୍ଷ୍ମୀମାନି ଲେହେଁ ଏ ଡାବୁୟାଁ ବାଟିକିଞ୍ଜି ଆହିମାଚେ ।

୩୭ କୁପ୍ର ଇନି ଟାୟୁତା ଜାର୍ନା ଆହାମାଚି ଲେବି କୁଡ଼ାତି ଜସେପ, ଆମିନାଶାଙ୍କ ପାଣ୍ଡୁ ଆଡ଼ାରି ବର୍ନବା ଇଞ୍ଜି ମାଚେରି, ଇ ଦରୁ ଅର୍ତ୍ତ “ବାର୍ସୁ ହାନାସି,” ୩୭ ଏଞ୍ଜାଣିଞ୍ଜାୟି ଇଚାୟି ବୁମି ମାଚେ, ଏଞ୍ଜାସି ଏଦାଆଁ ପାର୍ଚାନା ଏମ୍ବାତି ଟାକାୟାଁ ତାଚାନା ପାଣ୍ଡୁ ଆଡ଼ାରି କଡାୟାଁ ତୁଇ ଇଟିତେସି ।



### ହନନିୟ ଅଡ଼େ ସପିରା

୯ ହନନିୟ ଦରୁଗାଟାସି ରଅସି ମାଚେସି, ଏଞ୍ଜାସି ତାନି ତକ୍ତି ସପିରା ତଲେ ଇଚାଣି ବୁମି ପାର୍ଚେସି । ୧୦ ହନନିୟ ତାନି ତକ୍ତି ତଲେ ଏ ଟାକାୟାଁ ବିତ୍ରାଟି କଚେକା ତୁକୁହା ଇଚାନା କଚେକା ତାଚାନା ପାଣ୍ଡୁ ଆଡ଼ାରାକି ହୀତେସି । ୧୧ ପିତର ଏଞ୍ଜାଶାଙ୍କ ଏଲେଇଚେସି, “ହନନିୟ, ସୁଦୁଜୀଞ୍ଜୁ ନକିତା ମିଚି ଜଲ୍ଲାଇ ଇଞ୍ଜା ବୁମି ପାର୍ଚାନା କଚେକା ତୁକୁହା ଇଚାଲି ସୟତାନ ଏନାଆଁତାକି ମୀ ହିୟାତି ଲକ୍ଷ୍ମୀମାନେ ? ୧୨ ପାର୍ଚନି ନକେଏ ଏଦି ନୀ ଅଦିକାରାତା ହିଲାଆତେ କି ? ପାର୍ଚତି ତାୟୁ ଜିକେଏ ଏମ୍ବାତି ଟାକାୟାଁ ଜିକେଏ ନୀଞ୍ଜି ଆହାହିଲାଆତୁ କି ? ଆତିହଁ ନୀନୁ ଏନିକଁ ନୀ ହିୟାତା ଇ ଅଣ୍ଡୁ ଅଣ୍ଡପିତି ? ଏଦାଆଁ ନୀନୁ ମାଣ୍ଡସି ନକିତା ମିଚି ଜଲ୍ଲମାଞ୍ଜି ଏଦି ଆଏ, ସାମା ମାହାପୁରୁ ନକିତା ମିଚି ଜଲ୍ଲମାଞ୍ଜି !” ୧୩ ହନନିୟ ଇ ହାଡ଼ା ଝେଣ୍ଡୁନିଏ ତୁଇ ତରଗାନା ହାହାହାଚେସି; ଏମ୍ବାଆଁ ଏଚେକା ଲକ୍ଷ୍ମୀ ଇ କାତା ଝେଚେରି, ଏଞ୍ଜାରି ବାରେ ହାଚେରକା ଆଜିତେରି । ୧୪ ଅଡ଼େ, ଦାଂଗଣାୟାଁ ବିତ୍ରା ଝାହାନା ହିମ୍ବରି ପୁକ୍‌ହେରି ଇଞ୍ଜା ପାଙ୍ଗାତା ଅହାନା ମାହ୍‌ଣି ମାଣ୍ଡାତା ମୁସ୍ତେରି ।

୧୫ ତାନି ଟାୟୁ ତାନି ତକ୍ତି ଝାଡ଼େ, ସାମା ଏନାଆଁ ଆହାମାନେ, ଏଦାଆଁ ଏଦି ପୁଞ୍ଜା ହିଲାଆତେ । ୧୬ ପିତର ଏଦାନି ଝେଚେସି, “ନୀନୁ ଅଡ଼େ ନୀ ତକ୍ତା ଇଚେକା ଟାକାୟାଁତାକି କି ମୀ ବୁମି ପାର୍ଚେଚେରି ?” ଏଦି ଏଲେଇଚେ, “ହାଅ ଏଚେକା ତାକିଏ ।”

୧୭ ପିତର ଏଦାନି ଏଲେଇଚେସି, “ପ୍ରବୁତି ଜୀଞ୍ଜୁତି ତାୟିପାରି କିହାଲି ମୀରୁ ଏନାଆଁତାକି ରଣ୍ଡିଏ କାତା ଆଚେରି ? ମେହ୍‌ମୁ ଆମିନି ଗାଚାରି



ନୀ ତକ୍ରାଈଁ ମୁସାନା ଖାହିମାନେରି, ଏଞ୍ଜାରି ଦୁଝେରିତା ଖାତେରିଏ, ଇଞ୍ଜା ଏଞ୍ଜାରି ନିଈଈ ପାଈାତା ତେକା ଅୟାନେରି ।” ୧୦ ଏ କାତା ଝେଣ୍ମୁନିଏ ଏଦି ପିତର କର୍ତ୍ତା ତୁଇ ତରଗାନା ହାହାହାତେ, ଇଞ୍ଜା ଦାଂଶାୟାଁ ବିତ୍ରା ଖାହାନା ହାହାମାନାଣି ମେସ୍ତେରି ଇଞ୍ଜା ପାଈାତା ତେକା ଅହାନା ତାନି ତକ୍ରା ଟଟତା ମୁସ୍ତେରି । ୧୧ ଏମ୍ବାଟିଏ ବାରେ କୁଲମି ଇଞ୍ଜା ଏରେକା ଲକୁ ଇ ବାରେ କାତା ଝେରେରି, ଏଞ୍ଜାରି ବାରେ ହାରେକା ଆଜିତେରି ।

### କାବାଆନି ସିନାୟାଁ

୧୨ ପାଣ୍ଡୁଝି ଆଡାରି ତାଣାଟି ହାରେକା କାବାଆନି କାମାୟାଁ ଅଡେ ସିନାୟାଁ ଆହାଲି ମାଟ୍‌ହେ, ଇଞ୍ଜା ବାରେ ନାମିତାରି ରଣ୍ଡିଏ ଅଣ୍ଡୁ ତଲେ ସଲମନତି ପିଣ୍ଡାତା କୂଡା ଆହିମାଚେରି, ୧୩ ସାମା ଏଟକାତ ଲକୁ ଆମ୍ବାଆରି ଏଞ୍ଜାରିତଲେ କୂଡାଲି ସାସା କିହିହିଲାଆତେରି; ଆଡିଜିକେଏ ଲକୁ ଏଞ୍ଜାରି ଗାଞ୍ଜୁରମି କିହିମାଚେରି, ୧୪ ଇଞ୍ଜା, ହାରେ ହାରେକା ଇୟାସିକା ଅଡେ ଆବାୟାଁ ନାମାହାଁ ପ୍ରବୁ ତାଣା କୂଡାଲି ଆଣ୍ଡିତେରି, ୧୫ ପାଣ୍ଡୁଝି ଆଡାରି କାମା ଦିନାତାକି ଦିନା ପାତାଆଡେ, ଇଲାଆହ୍, କି ପିତର ଝାନି ବେଲାତା ଏନିକ୍ ତାନି ସାୟ୍ ରଗ ଗାଟାରି ଲାକ ଆଡିନେ, ଏଦାଆଁତାକି ରଗ ଗାଟାରାଇଁ ଆଂଗେଣିତା ତେକା ତାଚାନା କାଟେଲି ଇଞ୍ଜା ପାସ୍‌ପନିତା ଇଟିମାଚେରି । ୧୬ ଜିରୁସାଲମତି ସାରିସୁରୁ ଗାଡାୟାଁତି ହାରେକା ଲକୁ ରଗ ଗାଟାରାଇଁ ଅଡେ ବୃତୁୟାଁ ଆଲ୍‌ଗିତାରାଇଁ ତାଟିହ୍ ଝାଡେରି, ଅଡେ ଏଞ୍ଜାରି ବାରେଜାଣା ନେହ୍ ଆଡେରି ।

### ପାଣ୍ଡୁଝି ଆଡାରାଇଁ ସାସ୍ତି

୧୭ ଏରେଟିଏ କାଜା ପୂଜେରାଈା ଅଡେ ଏଞ୍ଜାଣି ବାରେ ତଡୁ ଲକୁ, ନାୟୁତି ସାଦୁକିୟାଁ ଗଟିତାରି ପାଣ୍ଡୁଝି ଆଡାରାଇଁ ତାହାରା ଆହାନା ଏଞ୍ଜାରି କପାଟି ନିଈଈତେରି । ୧୮ ଏଞ୍ଜାରି ପାଣ୍ଡୁଝି ଆହାମାନାରାଇଁ ଆସାନା କାୟିଦି ଇଲୁତା ଇଟିତେରି । ୧୯ ସାମା ଲାଆଁୟାଁ ବେଲାତା ପ୍ରବୁତି ର ଦୂତୁ କାୟିଦି ଇଲୁତି ଦାରାୟାଁ ବାରେ ଦେଟାତୁସ୍ତେ, ଇଞ୍ଜା ଏଞ୍ଜାରାଇଁ ପାଈାତା ତାଚାନା ଏଲେଇଚେ, ୨୦ “ହାକୁ, ଇଞ୍ଜା ମାହାପୁରୁ ଇଲୁତା ନିଚାନା ଲକୁଣି ଇ ଜାଞ୍ଜୁତି ବାରେ କାତା ଝେହ୍‌ଦୁ ।”

୨୧ ଈ କାତା ଖେଞ୍ଜାନା ଏଞ୍ଜାରି ଲାଈଅଲି ମାହାପୁରୁ ଇଲୁତା ହଡ଼ାନା ଜାପୁହାଲି ମାଟ୍‌ହେରି ।

ଏମ୍ବାଟିଏ କାଜା ପୁଜେରାଙ୍ଗା ଅଡ଼େ ତାମି ତଟେସିଙ୍ଗା ଖାହାନା କୁଟମିତି କାଜାରାଇଁ ଅଡ଼େ ଇସ୍ତାୟେଲ ଲକ୍ଷ୍ମି ପ୍ରାଚିନାଙ୍ଗାଣି ହାଟାନା କୁଡ଼ି କିତେରି; ଇଞ୍ଜା ପାଣ୍ଡୁଞ୍ଜି ଆଡ଼ାରାଇଁ ତାଚାଲି କାୟିଦି ଇଲୁତା ଲକ୍ଷ୍ମି ପାଣ୍ଡୁତେରି । ୨୨ ସାମା କାମାକିନାରି ହାଜାନା କାୟିଦି ଇଲୁତା ପାଣ୍ଡୁଞ୍ଜି ଆଡ଼ାରାଇଁ ବେଟାଆଆନା ଖେଣ୍ଡା ଖାହାନା ବେରଣି ମାଣ୍ଡାତାରାଇଁ ଖେସ୍ତେରି, ୨୩ “ମାମ୍ବୁ କାୟିଦି ଇଜ ହାଜାନା ସିନିକିତମି, କାୟିଦି ଇଲୁ ଦାରା ଆଟ୍‌ଞ୍ଜା ତଲେ ସୁଣ୍ଡୁଞ୍ଜିଆହାମାତେ; ଇଞ୍ଜା ଦୁଞ୍ଜେରିକାଣା କାଟାମାତି କସ୍‌କା ନିଟାମାଚେରି, ସାମା ଦାରା ଦେତାଲିଏ ବିତ୍ରା ଆମ୍ବାଆରାଇଁ ଜିକେଏ ବେଟାଆଆତମି !” ୨୪ ଈ ହାଡ଼ା ଖେଞ୍ଜାନା କାଜା ପୁଜେରାଙ୍ଗା ଅଡ଼େ ମାହାପୁରୁ ଇଲୁତି କସ୍‌କା ମୁହେଁ କାଜାସି ପାଣ୍ଡୁଞ୍ଜି ଆଡ଼ାରାକି ଏନାଆଁ ଆଡେ ଅଣ୍‌ପାନା ଏଞ୍ଜାରି କାତାତା ଆଡ଼ାଜାକା ଆହାହାଚେରି । ୨୫ ଏଚିବେଲା ରଅସି ଖାହାନା ଏଞ୍ଜାରାଇଁ ଏଲେଇଚେସି, “ମେହ୍‌ଦୁ ମୀରୁ ଆମିନି ଗାଟାରାଇଁ କାୟିଦି ଇଲୁତା ଇଟାମାଚେରି, ଏଞ୍ଜାରି ମାହାପୁରୁ ଇଲୁତା ଜାପୁହିମାନେରି ।” ୨୬ ଏଚେଟିଏ କସ୍‌କା ମୁହେଁ କାଜାସି, କାମାକିନାରି ତଲେ ହାଜାନା ପାଣ୍ଡୁଞ୍ଜି ଆଡ଼ାରାଇଁ ଖେଣ୍ଡେ ହାଟା ତାଡେରି, ସାମା ବାଡ଼ମ୍ବୁ ତଲେ ଆଏ, ଇଚିହ୍‌ ଲକ୍ଷ୍ମି ଖାଲ୍‌କାତଲେ ଖେଡାନେରି ଜିକେଏ ଇଞ୍ଜା ଆଜିମାଚେରି ।

୨୭ ଏଞ୍ଜାରି ଏଞ୍ଜାରାଇଁ ତାଚାନା କୁଲମି ପାଙ୍ଗାତା ନିପ୍‌ହେରି, ଏମ୍ବାଟିଏ କାଜା ପୁଜେରା ଏଞ୍ଜାରାଇଁ ଖେଚେସି । ୨୮ ☆“ଇ ମାଣ୍ଡସି ଦରୁତଲେ ଆମ୍ବାଆରାଇଁ ଜିକେଏ ଖେହ୍‌ଆଦୁ ଇଞ୍ଜା ମାମ୍ବୁଜାଣ୍ଡେ ହୁକୁମି ହାହାମାଞ୍ଜାତମି, ସାମା ସିନିକିଦୁ, ମୀରୁ ଏନାଆଁ କିହାମାଞ୍ଜେରି ! ଜିରୁସାଲମତି ସାରିଞ୍ଜାକି ମୀରୁ ଏ କାତା ଜାପୁହି ମାଞ୍ଜେରି ଇଞ୍ଜା ଏଞ୍ଜାଣାଇଁ ନେଡେରିତି ଦହ୍‌ ମା ମୁହେଁ ଏକହାଲି ଅଣ୍‌ପିମାଞ୍ଜେରି ।”

୨୯ ସାମା ପିତର ଇଞ୍ଜା ଏଟକାତି ପାଣ୍ଡୁଞ୍ଜି ଆହାମାନାରି ଏଲେଇଚେରି, “ମାଣ୍ଡସିୟାତି ହୁକୁମି ମାନ୍ତି କିନି କିହାଁ ମାହାପୁରୁତି ହୁକୁମି ମାନ୍ତି କିନାୟିମାନେ । ୩୦ ଆମିନି ଜୀପୁଲ୍‌ ମୀରୁ ପାସି ମୁଣ୍ଡାତା

☆ ୫:୨୮ ୫:୨୮ ମାତି ୨୭:୨୫

ଏକହାନା ପାୟାମାଚେରି, ମା ଆକୁ ଆବାୟାତି ମାହାପୁରୁ ଏଞ୍ଜାଣାଇଁ  
 ଝେଣ୍ଡେ ନିକହାମାନେସି । ୩୧ ଇଞ୍ଜା ଏଞ୍ଜାସି ଏନିକିଁ ଇସ୍ରାୟେଲତି  
 ମନ ଝେଟ୍ପି କିହାଁ ପାପୁ ମେଣ୍ଡି କିନେସି, ଏଦାଆଁତାକି ମାହାପୁରୁ  
 ତାନି ଚିଃନି କେୟୁତଲେ ଏଞ୍ଜାଣାଇଁ କାଜାପାଣା ଇଞ୍ଜା ଗେଲ୍ପିନାଣା  
 ଲେହେଁ କାଜାସି କିହାମାନେସି । ୩୨ ଅଡେ, ମାମ୍ପୁ ଲ ବାରେତି ସାକି,  
 ଇଞ୍ଜା ଆମିନି ସୁଦୁଜାଞ୍ଜୁଇଁ ମାହାପୁରୁ ତାନି ହୁକୁମି ମାନଞ୍ଜି ଆନାରାକି  
 ହାହାମାଞ୍ଜାନେସି, ଏଦି ଜିକେଏ ସାକି ।”

୩୩ ଇ କାତା ଝେଞ୍ଜାନା କୁଟମିତି କାଜାରି ହାରେକା କାର୍ବି  
 ଆହାହାଚେରି, ଇଞ୍ଜା ଏଞ୍ଜାରାଇଁ ପାୟାଲି ତାକି କାତା ଆଡେରି ।  
 ୩୪ ସାମା ଗମଲିୟେଲ ଦରୁଗାଟି ର ମାନିଗାଟି ପାରୁସି, ଆମିନିଗାଟସି  
 ମସାତି ମେରା ଜାପୁନାସି ମାଚେସି, ଏଞ୍ଜାସି ବେରଣିମାଣ୍ଡା ନିଚାନା  
 ପାଣ୍ଡୁଞ୍ଜି ଆହାମାନାରାଇଁ ଗାଡ଼େକା ତାକି ପାଙ୍ଗାତା ପାଣ୍ଡୁଲି ହୁକୁମି  
 ହାଡେସି । ୩୫ ଇଞ୍ଜା ଏଞ୍ଜାସି ଏଞ୍ଜାରାଇଁ ଏଲେଇଚେସି “ଏ ଇସ୍ରାୟେଲ  
 ଲକୁଚେରି, ଇଞ୍ଜାରି ତାକି ମୀରୁ ଏନାଆଁ କିହାଲି ଅଣ୍ଡିମାଞ୍ଜେରି,  
 ଏ କାତାତା ଜାଗାତା ଆହାମାଞ୍ଜୁ । ୩୬ ଇଚିହଁ ଇଦାଆଁ ନକେଏ  
 ତିଞ୍ଜୁଦା ଇନାସି ହଚାନା ତାନୁ ର କାଜା ମାଣ୍ଡି କିହା କଡିଚେସି, ଇଞ୍ଜା  
 ସାରି ଝାଞ୍ଜା ଲକୁ ଏଞ୍ଜାଣିତଲେ ଆଣ୍ଡିଚେରି; ଏଞ୍ଜାସି ପାୟୁଞ୍ଜି ଆଡେସି,  
 ଇଞ୍ଜା ଏଚେକା ଲକୁ ଏଞ୍ଜାଣି ତାଣା ବାସୁଁ କିହାମାଚେରି, ଏଞ୍ଜାରି  
 ବାରେ ଇତାଲା ଆତାଲା ଆହାଁ ଏନି କାମାତା ହାଆଚେରି । ୩୭ ଏ  
 ଲକୁତି ଜେଚ ଲକୁଣି ଏଜିକିନି ବେଲାତା ଗାଲିଲିତି ଜୀହୁଦା ଇନାସି  
 ହଚାନା ଲକୁଣି ତାନି ଝାକି ରେଜା ଅହାନା ତାନି ସୀୟୁୟାଁ କିଚେସି;  
 ଏଞ୍ଜାସି ଜିକେଏ ପାୟୁଞ୍ଜି ଆଡେସି, ଇଞ୍ଜା ଏଚେକା ଲକୁ ଏଞ୍ଜାଣି ଜେଚ  
 ଆଣ୍ଡାମାଚେରି, ଏଞ୍ଜାରି ବାରେ ଇତାଲା ଆତାଲା ଆହାହାଚେରି ।  
 ୩୮ ଇଞ୍ଜା ନୀର୍ବ ନାନୁ ମିଜେ ଝେସିମାଞ୍ଜାଇଁ, ମୀରୁ ଇ ଲକୁଣି ଏନାଆଁ  
 କିଆନା ଏଞ୍ଜାରାଇଁ ପିସାଡୁହୁଦୁ, ଇଚିହଁ ଇ କାତା କି କାମା ମାଣ୍ଡି  
 ତାଣାଟି ଆହାମାନେ, ଇଚିହଁ ଏଦି ଉଜେଏ ଆନେ; ୩୯ ସାମା ଏଦି  
 ମାହାପୁରୁ ତାଣାଟି ଆହାମାନେ, ଇଚିହଁ ମୀରୁ ଏଞ୍ଜାରାଇଁ ଜୀଣା ଆନି  
 ସାସା ହିଲେଏ, ଇଚିହଁ ମୀରୁ ମାହାପୁରୁ କପାଟି ଜୁଜୁ କିହିମାଞ୍ଜେରି  
 ଇଞ୍ଜାଁ ତଞ୍ଜା ଆଦେରି !” ଏ ବାରେ କୁଟମି ଗମଲିୟେଲ କାତାତି  
 ଝେଚେରି । ୪୦ ଇଞ୍ଜା ପାଣ୍ଡୁଞ୍ଜି ଆଡାରାଇଁ ବିତ୍ରା ହାଚାନା ସାଚ୍ଟି ମାଡା

ଝେରାନା ଜୀସୁ ଦରୁତି କାତା ଝେହୁଆଦୁ ଇଞ୍ଜି ହୁକୁମି ହୀହାନା ପିସ୍ତେରି । <sup>୪୧</sup> ମାହାପୁରୁ ନକିତା ଏଞ୍ଜାରି ଜୀସୁ ଦରୁ ତାକି ଲାଜା ବେଟାଆହାଲି ଜଟେ ଇଞ୍ଜି ଅଣ୍ଠାମାଚେରି, ଏଦାଆଁତାକି ଏଞ୍ଜାରି ରାହାଁ କିହୁ କୁଟମି ବିତ୍ରାଟି ହଟାଞ୍ଜାଟେରି; <sup>୪୨</sup> ଅଡ଼େ, ଏଞ୍ଜାରି ଦିନାତାକି ଦିନା ମାହାପୁରୁ ଇଲୁତା ଇଞ୍ଜା ଇଲୁତାକି ଇଲୁ ଜାପୁହାଲି ଇଞ୍ଜା ଜୀସୁଏ ମସିହା, ଇ ନେହୁ କାବୁ ଝେକହାଲି ଡ଼ଣା ଆଆତେରି ।



### ସାତା ଜାଣାତି କାମା ହେରପିନାୟି

<sup>୧</sup> ଏମ୍ବାଟିଏ ସୀସୁୟାଁ ହାରେ ହାରେକା ଜାଣା ଆହାଲି ମାଟ୍‌ହେରି, ଗ୍ରିକ୍ ଜଲିନି ଜୀହୁଦି ଲକୁ ଏବି ଜଲିନି ନାମିତି ଲକୁଣି ଲାଜା କିହାଲି ମାଟ୍‌ହେରି, ଏନାଆଁତାକି ଇଟିହୁ ଦିନାତାକି ଦିନା କାଦିକଣ୍ଡା ବାଟିକିନି ବେଲାତା ରାଣ୍ଡେଣିସିକାକି ହୀହି ହିଲାଆତେରି । <sup>୨</sup> ଏମ୍ବାଟିଏ ବାରଜାଣା ସୀସୁୟାଁ ବାରେ ନାମିତି ଲକୁଇଁ ର. ତାଣା କୁଡ଼ି କିହାନା ଏଲେଇଚେରି, “ମାହାପୁରୁତି ବଲୁ ଝେକହାଲି ପିସାହାଁ ବାଟି କିହାଲି ହିକିତିହୁ ନେହେଁ ଆଏ । <sup>୩</sup> ଇଦାଆଁତାକି ଏ ତାୟିୟାଁ ଅଡ଼େ ତାଙ୍ଗିସ୍ତା, ମୀ ବିତ୍ରାଟି ନେହାଁରି ଇଞ୍ଜା ଝେଙ୍ଗିତ ସୁଦୁଜୀଞ୍ଜୁ ତଲେ ନେଞ୍ଜାମାନି ବୁଦିଗାଟି ସାତା ଜାଣାଇଁ ଆଚାଦୁ, ଏଞ୍ଜାରାକି ଇ ବାଟିକିନି କାମା ହେରପାଦୁ । <sup>୪</sup> ଆଡ଼ିହୁ ମାମ୍ବୁ ପ୍ରାତାନାତା ଇଞ୍ଜା ବଲୁ ଝେହୁନି ସେବା କାମାତା ରଣ୍ଡିଏ ଅଣ୍ଠାପୁ ତଲେ ଡ଼ୟିନମି ।”

<sup>୫</sup> ଇ କାତା ବାରେ ଲକୁଡ଼ି କାନୁତା ନେହୁ ତଞ୍ଜାଆଡ଼େ, ଇଞ୍ଜା ଏଞ୍ଜାରି ନାମୁ ଅଡ଼େ ସୁଦୁଜୀଞ୍ଜୁତା ନେଞ୍ଜାମାନି ସ୍ତ୍ରୀପାନ ଦରୁ ଗାଗାଣାଇଁ ଇଞ୍ଜା ପିଲିପ, ପ୍ରକର, ନିକାନର, ତିମନ, ପାର୍ମନା, ଅଡ଼େ ଆନ୍ତିୟକିୟାତି ତଲି ଜୀହୁଦି ଦାମ୍ବୁତା ଆଣ୍ଡାମାଟି ନିକଲାୟଇଁ ଆଟିଚେରି, <sup>୬</sup> ଏଞ୍ଜାରି ଏଞ୍ଜାରାଇଁ ପାଣ୍ଡୁଞ୍ଜି ଆଡ଼ାରି ତାଣା ତାତେରି, ଇଞ୍ଜା ଏଞ୍ଜାରି ଲାକ କେସ୍ତା ଇଟାନା ପ୍ରାତାନା କିଚେରି ।

<sup>୭</sup> ଏଚେଟିଏ ମାହାପୁରୁତି ବଲୁ ହାରେକା ଝେଙ୍ଗିଚେ, ଇଞ୍ଜା ଜିରୁସାଲମତା ସୀସୁୟାଁ ହାରେକା ପାତାଆହାଲି ମାଟ୍‌ହେରି; ଅଡ଼େ ପୂଜେରାଙ୍ଗା ବିତ୍ରାଟି ହାରେକା ଜାଣା କ୍ରୀସୁଇଁ ନାମାଲି ମାଟ୍‌ହେରି ।

### ବେରଣିମାଣ୍ଡାତା ସ୍ତ୍ରୀପାନ

୮ ସ୍ତ୍ରୀପାନ ମାହାପୁରୁତି କାର୍ମା ଇଞ୍ଜା ବାଡ଼ୁୟୁ ବେଟାଆହାନା ଲକୁ ବିତ୍ତା କାଜା କାଜା କାବାଆନି କାମା ଅଡ଼େ ସିନାୟାଁ କିହାଲି ମାଟ୍‌ହେସି ।<sup>୯</sup> ସାମା ଲିବର୍ତନ, କୁରିଣି ଅଡ଼େ ଆଲେକକାଣ୍ଡିୟା ଗାଡ଼ାୟାଣା ବାସା କିହାମାନି ଦରୁତା ଝେଙ୍ଗାମାନି ଜୀହୁଦି ଲକୁତି ପ୍ରାଡାନା ଇଲୁତି ଏଚେକା ଲକୁ ଅଡ଼େ କିଲିକିୟା ଇଞ୍ଜା ଆସିୟା ଦେସାତି ଏଟକା ଜୀହୁଦିଙ୍ଗା ନିଙ୍ଗାନା ସ୍ତ୍ରୀପାନ ତଲେ ବାଦିବାଦା ଆଡେରି ।<sup>୧୦</sup> ସାମା ଏଝାସି ଆମିନି ସୁଦୁଜୀଝୁ ଅଡ଼େ ବୁଦିତଲେ ଜଲିମାଚେସି, ଏଝାରି ଏ କାତାତି ଝେଣ୍ଡେ ଜଲଲି ସାସା କିହିଲିଆତେରି ।<sup>୧୧</sup> ଏଚେଟିଏ ଏଝାରି ଏଚରଜାଣାତି ମାଡ଼ଝି କିହାନା ଏଲେଇଞ୍ଜି ଝେସାଲି ଜାପ୍‌ହେରି, “ମାମ୍ ଇଝାଣି ତାଣାଟି ମସା ଅଡ଼େ ମାହାପୁରୁ ନିୟା କାତା ଜଲିମାଚାଣି ଝେଞ୍ଜାମାନମି ।”<sup>୧୨</sup> ଅଡ଼େ, ଏଝାରି ବାରେ ଲକୁଣି, ଇଞ୍ଜା ପ୍ରାତିନାଙ୍ଗାଣି ଅଡ଼େ ମେରା ପୁନାରାଇଁ କାର୍‌ବି କିହାନା ଏଝାଣାଇଁ ବାଡ଼ୁୟୁ ତଲେ ଆସାନା ବେରଣିମାଣ୍ଡାତା ତାଡେରି,<sup>୧୩</sup> ଇଞ୍ଜା ମିତି ସାକି ହାନାରାଇଁ ନିପ୍‌ହାନା; ଏଝାରାଇଁ ଏଲେଇଚେରି, “ଇଝାସି ଇ ସୁଦୁ ପ୍ରାଡାନା ଇଲୁ ଇଞ୍ଜା ମସା ମେରାତି କପାଟି ଜଲଲି ଉଣା ଆହିଲିଅସି,<sup>୧୪</sup> ଇଚିହ୍ ନାଜରିତ ଜୀସୁ ମାହାପୁରୁ ଇଲୁତି ମେକ୍‌ନେସି, ଇଞ୍ଜା ମସା ମାଙ୍ଗେ ଆମିନି ମେରା ହୀହାମାଞ୍ଜାନେସି, ଏ ବାରେ ତିରିମ୍‌ପୁନେସି ଇଞ୍ଜି ଝେସିମାଚାଣି ମାମ୍ ଝେଞ୍ଜାମାନମି ।”<sup>୧୫</sup> ଏଚିବେଲା ବେରଣିମାଣ୍ଡାତା କୁଗାମାଟି ବାରେ ଲକୁ ସ୍ତ୍ରୀପାନଇଁ ଆଚେ ସିନିକିତେରି, ଏଝାଣି ମ୍‌ମ୍‌ଦୁଡୁତି ମ୍‌ମ୍‌ଲେହେଁ ଉଜେଡ଼ି ତଞ୍ଜାଆଡ଼େ ।



### ସ୍ତ୍ରୀପାନ ଝେହ୍‌ନାୟି

<sup>୧</sup> ଏଚେଟିଏ କାଜା ପୂଜେରା ସ୍ତ୍ରୀପାନଇଁ ଝେଚେସି, “ଇ ବାରେ କାତା ସାତା କି ?”

<sup>୨</sup> ସ୍ତ୍ରୀପାନ ଏଲେଇଚେସି, “ତାୟିୟାଁ ଅଡ଼େ ଆବାୟାଁତେରି ଝେଞ୍ଜି ! ମା ଆବା ଅଭାହାମ ହାରଣତା ବାସାଆନି ନକେଏ ଏଚିବେଲା ଏଝାସି ମେସପଟାମିୟାଁ ଦେସାତା ମାଚେସି, ଏଚିବେଲା ଗାଝୁରମିଗାଟି

ମାହାପୁରୁ ଏଞ୍ଜାଣାଇଁ ତଞ୍ଜାଆଡେସି, <sup>୩</sup> ଅଡେ ଏଲେଇଚେସି ‘ନାନୁ ମୀ ଇଲୁ କୁଟମି ଇଞ୍ଜା ମୀ ଦେସାଟି ହଡ଼ା ଖାମ୍ବୁ, ଇଞ୍ଜା ନାନୁ ଆମିନି ଦେସା ତସ୍ତାଇଁ ଏ ଦେସାତା ହାଲାମ୍ବୁ ।’ <sup>୪</sup> ଏଚେଟିଏ ତାନି କଲ୍‌ଦିୟ୍‌ୟା ଦେସାଟି ହଡ଼ାଖାହାନା ହାରଣତା ବାସା କିଚେସି, ଇଞ୍ଜା ଅବ୍ରାହାମତି ଆବା ହାଡ଼ି ତାୟୁ ଏମ୍ବାଟିଏ ମୀରୁ ନୀର୍ଏ ଆମିନି ଦେସାତା ବାସା କିହାମାଞ୍ଜେରି, ମାହାପୁରୁ ଏ ଦେସାତା ଏଞ୍ଜାଣାଇଁ ତାଟିହିଁ ଖାଡେସି, <sup>୫</sup> ଅଡେ, ମାହାପୁରୁ ଅବ୍ରାହାମକି ଏମ୍ବାଆଁ ଏନି ଅଦିକାରା ହାଆଡେସି, ଅଡେ ର ପାଞ୍ଜୁଲି ଝିହ୍‌ନି ବୁମିଗାରି ଜିକେଏ ହୀଆଡେସି, ଇଞ୍ଜା ଏଚିରେଲା ଏଞ୍ଜାଣାକି ପଡ଼ି ପଦା ହିଲାଆତି ଜିକେଏ ଏଞ୍ଜାସି ଏଞ୍ଜାଣାଇଁ ଇଞ୍ଜା ତାନି ଖାହିମାନି କୃତାତାରିକି ଏଦାଆଁ ଅଦିକାରା କିହାଲିତାକି ହୀଇଁ ଇଞ୍ଜା ଆଞ୍ଜିଚେସି । <sup>୬</sup> ଇଞ୍ଜା ମାହାପୁରୁ ଇଲେଇଞ୍ଜାଁ ଖେସ୍‌ସେସି, ‘ତାନି କୃତାତାରି ଏଟକା ଦେସାତା ବାସା କିନେରି ଇଞ୍ଜା ଏ ଟାୟୁତି ଲକୁ ଏଞ୍ଜାରାଇଁ ସାରି ଖାଞ୍ଜା ବାର୍ସା ପାତେକା ହଲିୟାଙ୍ଗା କିହାଁ ଏଞ୍ଜାରାଇଁ ଖେଟି କାମା କିଝି କିହାନା ସାସ୍ତି ହୀନେରି ।’ <sup>୭</sup> ଅଡେ ମାହାପୁରୁ ଏଲେଇଚେସି, ନାନୁ ଏଞ୍ଜାରାଇଁ ହଲିୟା କାମା କିଝିକିନାରାଇଁ ବିଚାରା କିଇଁ; ଅଡେ ତାୟୁ ମୀ କୃତାତାରି ଏ ଦେସାଟି ହଡ଼ା ଖାନ୍‌ନେରି ଅଡେ ଇ ଟାୟୁତା ନାଙ୍ଗେ ପ୍ରାତାନା କିୟାନ୍‌ନେରି । <sup>୮</sup> ଅଡେ ମାହାପୁରୁ ଅବ୍ରାହାମକି ତଲୁ ଦାଃନି ରାଜିମାନା ସିନାତି ହୀଡେସି, ଇଞ୍ଜା ଏଲେକିହିଁଏ ଅବ୍ରାହାମ ଇସାହାକଇଁ ଜାନି କିହାନା ଆଟାଦିନା ଆହାଲିଏ ଏଞ୍ଜାଣି ତଲୁ ଦାଡେସି; ଇସାହାକ ଜାକୁବଇଁ, ଅଡେ ଜାକୁବ ବାରଜାଣା ଖେଜିତି ଆକୁ ଆବାୟାଣି ଜାନି କିହାନା ତଲୁ ଦାପିକିଚେସି ।”

<sup>୯</sup> “ଜାକୁବ ମୀର୍‌ଏସି ଜସେପଇଁ ତାନି ତାୟିୟା ତାହାରା ଆହାନା ମିସର ଦେସାତା ଅଝିଆୟାଲି ଏଞ୍ଜାଣାଇଁ ପାର୍‌ଡେରି; ସାମା ମାହାପୁରୁ ଏଞ୍ଜାଣିତଲେ ମାଚେସି, <sup>୧୦</sup> ଅଡେ ବାରେ କସ୍ତୁଟି ଜସେପଇଁ ଗେଲ୍‌ପାହାଁ ମିସରତି ପାର ରାଜା ନକିତା ମାହାପୁରୁ କାର୍‌ମା ତସାହାଁ ବୁଦି ହୀଡେସି; ଏମ୍ବାଟିଏ ପାର ଜସେପଇଁ ମିସର ଦେସା ଇଞ୍ଜା ତାନି ଇଲୁତି ସାଲ୍‌ଝି କିହାଲି ଅଦିକାରା ହୀଡେସି । <sup>୧୧</sup> ତାୟୁ ମିସର ଇଞ୍ଜା କିଶାନ ଦେସାତା କାର୍‌ଝୁ କାଡ଼ାରା ଆଡେ,

ଲକୁ ହାରେକା କସ୍ତ୍ର ଆଡେରି, ମା ଆକୁ ଆବାୟାଁ ତିଞ୍ଜାଲି କାଢ଼ିକଣ୍ଡା  
 ବେଟାଆଆଡେରି, <sup>୧୭</sup> ସାମା ମିସର ଦେସାତା ଆନା ମାନେ ଇଞ୍ଜି  
 ଝେଞ୍ଜାନା, ଜାକୁବ ତାନି ମୀରକା ଇଚିହିଁ ମା ଆକୁ ଆବାୟାଁଣି ତଲିଏ  
 ପାଣ୍ଡିତେସି । <sup>୧୮</sup> ଏଞ୍ଜାରି ଅର ଦେବା ହାଜାଲିଏ ଜସେପ ତାନି ତାୟିୟାଁ  
 ତାଣା ପୁଣ୍ଡି କିହା କଡ଼ିତେସି, ଇଞ୍ଜା ମିସରତି ରାଜା ପାର ଜସେପ  
 କୃତାତାରି ଇଞ୍ଜି ପୁଚେସି । <sup>୧୯</sup> ଏମ୍ବାଟିଏ ଜସେପ ତାନି ଆବା ଜାକୁବ  
 ଇଞ୍ଜା ତାନିକଡ଼ି ପନ୍ଦର ଜାଣା ତାନି କୁଟମିତି ହାଟାଲି ପାଣ୍ଡିତେସି,  
<sup>୨୦</sup> ଏମ୍ବାଟିଏ ଜାକୁବ ମିସର ଦେସାତା ହାଚେସି; ଇଞ୍ଜା ଏଞ୍ଜାସି ଅଡ଼େ  
 ତାନି ମୀରକା ଏମ୍ବାଆଁ ହାଡେରି । <sup>୨୧</sup> ଇଞ୍ଜା ଏଞ୍ଜାରି ମାଡ଼ହା ସିକମତା  
 ଅଞ୍ଜିଆଡେ, ଇଞ୍ଜା ଅବୁହାମ ଏମ୍ବାଆଁ ହମର ମୀରକା ତାଣାଟି ଆମିନି  
 ମାହୁଣି ମାଣ୍ଡା ଟାକାୟାଁ ହାହାଁ କତାମାଚେସି, ଏମ୍ବାଆଁ ମୁସପି ଆଡେରି  
 ।”

<sup>୧୭</sup> “ସାମା, ମାହାପୁରୁ ଅବୁହାମ ନକିତା ଆଞ୍ଜାମାଟି ଲେହେଁ, ଏ  
 ଆଞ୍ଜାମାନାୟି ପୁରା ଆନି କାଲା ଖାହାଲିଏ ମା ଲକୁ ମିସର ଦେସାତା  
 ହାରେକା ଗାତି ପାତା ଆଡେରି । <sup>୧୮</sup> ତାୟିୟାଁ ମିସର ଦେସାତା ଅଡ଼େ ର  
 ରାଜା ଆଡେସି, ଏଞ୍ଜାସି ଜସେପଇଁ ପୁଞ୍ଜା ହିଲାଆଡେସି । <sup>୧୯</sup> ଏଞ୍ଜାସି  
 ମା ଆକୁ ଆବାଣି ଝେପିକିତେସି ଅଡ଼େ ସାସ୍ତି ହାଡେସି, ତାନି କକାରି  
 ହାପାରିଞ୍ଜା ଇଞ୍ଜି ଇଲୁଟି ପାଙ୍ଗାତା କୁତୁସାଲି ହୁକୁମି ହାଡେସି ।  
<sup>୨୦</sup> ଏଚିବେଲାତା ମସା ଜାନା ଆଡେସି, ଏଞ୍ଜାସି ମାହାପୁରୁ ନକିତା  
 ହାରେକା ଅକିତାସି ଇଞ୍ଜା ତାନି ଲେଞ୍ଜୁ ପାଡେକା ତାନି ଆବା ଇଜ  
 ପହିକିଞ୍ଜି ଆଡେସି । <sup>୨୧</sup> ତାୟିୟାଁ ଏଚିବେଲା ଏଞ୍ଜାସି ପାଙ୍ଗାତା ମେଡ଼ପି  
 ଆଡେସି, ଏଚିବେଲା ପାର ରାଜା ମାଙ୍ଗା ଏଞ୍ଜାଣାଇଁ ଅହାନା ତାନି  
 ମୀରଏଣା ଲେହେଁ ପହିକିତେ । <sup>୨୨</sup> ଅଡ଼େ ମସା ମିସର ଲକୁଡି ବାରେ  
 ବୁଦି ଜାପାନା କାତାତା ଅଡ଼େ କାମାତା ଝେଞ୍ଜିତେସି ।”

<sup>୨୩</sup> “ମସାକି ରୀ କଡ଼ି ବାର୍ଯା ଆୟାଲିଏ ତାନି ତାୟିୟାଁ ଇଚିହିଁ  
 ଇସ୍ରାୟେଲ ଲକୁଡି ମାସକା ମୀରକାଣି ଏନିକିହିଁ ଲେମ୍ବୁଞ୍ଜି  
 ଆହିମାନେ ଇଞ୍ଜି ପୁଞ୍ଜାଲି ଅଶ୍ପିତେସି । <sup>୨୪</sup> ଏଞ୍ଜାସି ରଅଣାଇଁ  
 ମିସରତାସି ଗଡ଼ହା କିହିମାଚାଣି ମେସେସି, ଏଞ୍ଜାଣାଇଁ ସାୟେମି  
 କିହାଲି ହାଚେସି ଅଡ଼େ ବାଦୁଲି ଅହାନା ଏଞ୍ଜାଣାଇଁ ପାୟିତେସି ।  
<sup>୨୫</sup> ଏଞ୍ଜାଣି କେୟୁଟି ମାହାପୁରୁ ତାନି ତାୟିୟାଁଣି ଗେଲପି ମାନେସି,

ଇଦାଆଁ ଏଞ୍ଜରି ପୁଞ୍ଜାଲି ଆଡ଼ିନେରି ଇଞ୍ଜି ଅଣ୍ଠିମାରେସି, ସାମା ଏଞ୍ଜରି ପୁଞ୍ଜାଲି ଆଡ଼ାଆତେରି । ୨୭ ତାନି ଅର ଦିନା ଇସ୍ତାୟେଲ ଲକୁ ରିଆରି ମାଡ଼ା ଆହିମାଗାଣି ମେସ୍ତେସି, ଇଞ୍ଜି ଏଞ୍ଜରାଇ ଆଣ୍ଡି କିହାଲି ମାଦି ଆହଁ ଏଲେଇରେସି, ‘ଆଡ଼େ, ମାରୁତ ଇସ୍ତାୟେଲ ତାୟିୟାତେରି; ଏନାଆଁତାକି ଇଲେଆହଁ ଗଡ଼ହା ଆହିମାଞ୍ଜେରି ?’ ୨୭ ସାମା ଆମିନିଗାଟାସି ପାଡ଼ିତାଣାଇଁ ଲାଗେଏ କିହିମାରେସି, ଏଞ୍ଜସି ମସାଇଁ ମେତାନା ଏଲେଇରେସି, ‘ଆମ୍ବାଆସି ନିଜେ ମା ଲାକ ସାଲ୍ଡି କିହାଲି ଅଡ଼େ ନୀହାୟି କିହାଲି ହିୟାତେସି ?’ ୨୮ ‘ରେ୪ଏନି ଏନିକଁ ମିସର ତାଣାଇଁ ପାୟାମାଟି, ଏଲେକିହଁ କି ନୀନୁ ନାଜେ ପାୟାଲି ଅଣ୍ଠିମାଞ୍ଜାଦି ?’ ୨୯ ଇ କାତା ଖେଞ୍ଜାନା ମସା ମିଦିୟନ ଦେସାତା ହାଜାନା ବାସା କିତେସି; ଇଞ୍ଜି ଏମ୍ବାଆଁ ରୀ ମୀରକା ଜାନା ଆଡ଼େରି ।”

୩୦ ତାୟୁ ରୀ କଡ଼ି ବାସା ଆୟାଲିଏ, ସିନୟ ହରୁ ତାଗେତି ଜାଡ଼ାତା ର ଦୁତୁ ର ବୁଟାତା ହିରୁ ଡ଼ାଞ୍ଜାନା ତଞ୍ଜାଆଡ଼େସି । ୩୧ ମସା ଏଦାଆଁ ମେସାନା ଆତାଜାକା ଆଡ଼େସି, ଇଞ୍ଜି ନେହଁକଁ ସିନିକିହାଲି ତାଗେ ହାଜିମାଟି ବେଲାତା ପ୍ରବୁତି ଇ ହାଡ଼ା ଖେରେସି, ୩୨ “ନୀନୁ ମୀ ଆକୁ ଆବାୟାଁ ମାହାପୁରୁ, ଅବ୍ରାହାମତି, ଇସାହାକ ଅଡ଼େ ଜାକୁବତି ମାହାପୁରୁ” ଏରେଟିଏ ମସା ଆଜିତାକି ନେହଁକଁ ସିନିକିହାଲି ସାସା କିଆଡ଼େସି । ୩୩ ପ୍ରବୁ ଏଞ୍ଜାଣାଇଁ ଏଲେଇରେସି, “ନୀ କତାତି ସେପୁୟାଁ ହୁକୁମି, ଇତିହଁ ନୀନୁ ଆମିନି ଟାୟୁତା ନିଚାମାଞ୍ଜି ଏଡ଼ି ସୁଦୁଗାଟି ଟାୟୁ । ୩୪ ମିସରତା ନା ଆମିନି ଲକୁ ମାନେରି, ନୀନୁ ଏଞ୍ଜରି କସ୍ତୁ ମେସାମାଇଁ, ଅଡ଼େ ଏଞ୍ଜରି ଡ଼ାହିମାନାଣି ଖେଞ୍ଜାମାଇଁ, ଇଞ୍ଜି ଏଞ୍ଜରାଇଁ ଗେଲପାଲି ରେଚା ଖାହାମାଇଁ; ଇଞ୍ଜି ନୀଏଁ ଖାମୁ ନୀନୁ ନିଜେ ମିସର ଦେସାତା ପାଣ୍ଡାଇଁ ।”

୩୫ “ମସାଇଁ ଇସ୍ତାୟେଲତି ଲକୁ ଅପାଆଡ଼େରି । ଏଞ୍ଜରି ଏଞ୍ଜାଣାଇଁ ଏଲେଇରେରି, ‘ମାଜେ ସାଲ୍ଡି କିହାଲି ଅଡ଼େ ନୀହାୟି କିହାଲି ଆମ୍ବିଟି ଅଦିକାରା ବେଟାଆଡ଼ି ? ଏଞ୍ଜାଣାଇଁ ମାହାପୁରୁ ଲକୁଣି ସାଲ୍ଡି କିହାଲି ଅଡ଼େ ମୁକ୍ଲଡ଼ି କିହାଲି ଦୁତୁତି ସାୟେମି ତଲେ ହିରୁ ଡ଼ାଞ୍ଜିମାନି ବୁଟାତା ତଞ୍ଜାଆହାନା ପାଣ୍ଡାଡ଼େସି । ୩୬ ଏଞ୍ଜସି ଲକୁଣି ମିସର ଦେସାଟି, ସୁପ ସାମଦୁରି, ଇଞ୍ଜି ରୀ କଡ଼ି ବାସା ପାଡ଼େକା ବାଟାତା ହାଡ଼େକା କାବାଆଦି କାମା ଅଡ଼େ ସିନାୟାଁ ତସାହାଁ ଏଞ୍ଜରାଇଁ



ହଫହା ତାତେସି । ୩୭ ଏ ମସା ତାନୁଏ ଇସ୍ରାୟେଲ ମୀରକାଣି ଏଲେଇଚେସି, ମାହାପୁରୁ ମୀ ତାୟିୟା ବିତ୍ରାଟି ମିଙ୍ଗେତାକି ନା, ଲେହେକି ର ମାହାପୁରୁ ଅଣ୍ଟପୁତି ବଲୁ ଝେହ୍ନାଣାକ୍ ହିୟାନେସି । ୩୮ ଏ ମସା ବାଃଲି ବାଟାତା କୃଡ଼ା ଆହାମାନି ଇସ୍ରାୟେଲ ଲକୁତଲେ ମାଚେସି । ସିନୟ ହରୁତା ତାନିତଲେ କାତା ଆହିମାଟି ଦୃତୁ ଇଞ୍ଜା ମା, ଆକୁ ଆବାୟା ବିତ୍ରା ମାଦିତାସି ମାଚେସି; ଏଞ୍ଜାସି ମିଙ୍ଗେ ହୀହାଲିତାକି ମାହାପୁରୁ ତାଣାଟି ଜୀଞ୍ଜୁତି ବଲୁ ବେଟାଆଡେସି ।”

୩୯ “ସାମା ମା ଆକୁ ଆବାୟା ଏଞ୍ଜାଣି କାତା ଆହୁଆନା ଏଞ୍ଜାଣାକ୍ ଅପାଆତେରି, ଅଡେ ମିସର ଦେସାତା ଝେଣ୍ଡା ହାଜାଲି ମନ କିତେରି, ୪୦ ଏଦାଆଁତାକି ଏଞ୍ଜାରି ହାରଣାକ୍ ଏଲେଇଚେରି । ‘ମା ନକି ନକିତା ହାଜାଲି ମାଙ୍ଗେତାକି ପେଣ୍ଡାକାଣି କେପାମୁ, ଇତିହ ମାଙ୍ଗେ ମିସର ଦେସାଟି ହଫହା ତାତାଟି ମସାକି ଏନାଆଁ ଆଡେ ମାମୁ ପୁଞ୍ଜାହିଲଅମି ।’ ୪୧ ଅଡେ, ଏଚିବେଲାତା ଏଞ୍ଜାରି ର କଡ଼ି ତାଲୁତି ବମା କେପାନା ଏ ବମା ତାକି ପୂଜା ହୀହାନା ତାନି କେୟୁଟି କେପିତି ଆସ୍ତି ତାକି ରାହାଁ କିତେରି । ୪୨ ସାମା ମାହାପୁରୁ ଏଞ୍ଜାରି ତାଣାଟି ଏବକା ଆହାନା ଏଞ୍ଜାରାକ୍ ହାଗୁଲାକତି ହୁକାୟାଣି ସେବା କିୟାଲି ପିସ୍ତେସି, ଏନିକ ମାହାପୁରୁ ଅଣ୍ଟପୁତି ବଲୁ ଝେହ୍ନାରି ପତିତା ରାସ୍ତକି ଆହାମାନେ; ଏ ଇସ୍ରାୟେଲ କୃଡ଼ାତେରି,

ବାଟାତା ରୀ କଡ଼ି ବାର୍ଯା ପାତେକା ମୀରୁ ନାଙ୍ଗେତାକି କଡ଼ି ଗରି ପୂଜା କିହାହିଲାଆତେରି ।

୪୩ ମୀରୁ ପୂଜା କିହାଲି ଆମିନି ବମାୟା କେପାମାଚେରି, ଏ ମଲକ ପେନୁତି ତୁମୁ ଅଡେ ରମ୍ପାନ ପେନୁତି ହୁକାତି ମୀରୁ ଆସାନା ସେବା କିତେରି, ଏଦାଆଁତାକି ନାନୁ ମିଙ୍ଗେ ବାବିଲନ ଆତାଲା ବାସା ଆୟାଲି ପାଣ୍ଡାକ୍ ।”

୪୪ “ନାନୁ ଏନିକ ମେସାମାଞ୍ଜି, ଏଲେକିହ ଏ ସାକି ହୀନି ତୁମୁ ଇଲୁ କେପାମୁ ଇଞ୍ଜା ମସାକି ଆମ୍ପାଆସି ଝେସାମାଚେସି, ଏଞ୍ଜାଣି ହୁକୁମି ତଲେ ମା ଆକୁୟା ବାଟାତା ସାକି ହୀନି ତୁମୁ ଇଲେ କେପାମାଚେରି । ୪୫ ତାୟୁ ମା ଆକୁ ଆବାୟା ଏଦାଆଁ ତାନି ଆବାୟା ତାଣାଟି ବେଟାଆଡେରି ଇଞ୍ଜା ଜିହସ୍ତୟ ତଲେ ତାକିମାଟିବେଲା

ଏଞ୍ଜେଲ୍ ଏଦାଆଁ ଡେକା ଅଡେରି, ଏମ୍ପାଟିଏ ମାହାପୁରୁ ଏଞ୍ଜେରି ନକିତା ମାଟି ବାରେ କୁଡ଼ାତି ଲକୁଣି ପେରହା ତୁସାଲିଏ, ଇସ୍ରାୟେଲ ଲକୁ ଇଞ୍ଜେରି ଦେସା ଜୀଣାଆହାନା ଇ କୁଡ଼ାଆନି ତୁମୁ ଇଲୁ ଏମ୍ପାଆଁ ତାଗାନା ଇଟିଡେରି, ଇଞ୍ଜା ଏଡି ଦାଝୁଦ ରାଜା ପାଡେକା ଏମ୍ପାଆଁ ଡିୟିଡେ । ୪୭ ଦାଝୁଦ ମାହାପୁରୁ ନକିତା କାର୍ମା ବେଟାଆହାନା, ଜାକୁବତି ମାହାପୁରୁକି ର ବାସାଟାୟୁ କିହାଲି ପ୍ରାତାନା କିଡେସି । ୪୭ ସାମା ସଲମନ ମାହାପୁରୁକି ଏ ଇଲୁ କେପିଡେସି ।”

୪୮ “ସାମା ବାଡୁୟୁ ଗାଟି ମାହାପୁରୁ ମାଣ୍ଠି କେୟୁତଲେ କେପିତି ଇଲୁତା ବାସା କିଅସି; ଏନିକି ମାହାପୁରୁ ଅଣ୍ପୁତି ବଲୁ ଝେହ୍ନାରି ଝେସାମାନେରି ।”

୪୯ ପ୍ରବୁ ଏଲେଇଞ୍ଜା ମାନେସି, “ଲକପୁରୁ ନା ସିଂଗାସାଣି,

ଦାରତି ନା କତା ଇଟିନି ଟାୟୁ,

ମୀରୁ ନା ତାକି ଏନିଲେହେତି ଇଲୁ କେପିଦେରି ?

ଇଞ୍ଜା ନା ଜିନି ଟାୟୁ ଏମ୍ପିୟାମାନେ ?

୫୦ ନା କେୟୁ ଇ ବାରେ ଗାଡ଼ି କିହାହିଲେଏ କି ?”

୫୧ ସ୍ତ୍ରୀପାନ ଏଲେଇଚେସି, “ମୀରୁ ଏଚେକା ମୁଣ୍ଡି ଗାଟାଡେରି, ଇଞ୍ଜା ଅବହା କତାଆତି ହିୟାଁ ଗାଟାଡେରି ଅଡେ ମାହାପୁରୁତି ବଲୁ ତାକି କୀକା ଝେନାଆ ଗାଟାଡେରି, ମୀରୁ କାଲେଏ ସୁଦୁଜାଝୁତି କସୁ ହୀହିମାଞ୍ଜେରି; ମୀ ଆକୁ ଆବାୟାଁ ଏନିକି ମୀରୁ ଜିକେଏ ଏଲେତାଡେରି । ୫୨ ମାହାପୁରୁ ଅଣ୍ପୁତି ବଲୁ ଝେହ୍ନାରାଇଁ ଆମ୍ପାଆରାଇଁ ଜିକେଏ ମୀ ଆକୁ ଆବାୟାଁ ନିଦା କିହାହିଲାଆଡେରି ? ଆମିନି ଗାଟାରି ଏ ଦାମ୍ପୁଗାଟାସି ଝାନି କାତା ନକେଏ ଝେସାମାନେରି, ଏଞ୍ଜେରାଇଁ ଏଞ୍ଜେରି ପାୟିଡେରି; ନୀଏଁ ମୀରୁ ଏଞ୍ଜେରାଇଁ ସାଡୁୟାଁ କେୟୁତା ହେରପାନା ପାୟିଡେରି । ୫୩ ମୀରୁ ମାହାପୁରୁତି ମେରା ବେଟାଆହା ମାନେରି, ଏ ମେରା ଦୁଡୁୟାଁ ତାଣାଟି ହୀପକି ଆହାମାନେ, ଆଡିଜିକେଏ ମୀରୁ ଏଦାଆଁ ନାମାଆଡେରି ।”

**ଝାଲକାତଲେ ସ୍ତ୍ରୀପାନଇଁ ପାୟିନାୟି**

୫୪ ସ୍ତ୍ରୀପାନ ବେରଣିମାଣ୍ଡାତା କୁଗାମାଟି ଲକୁଇଁ ଇ ବାରେ କାତା ଝେସେସି, ଏମ୍ପାଆଁ ମାଟି ପାରୁସି ଇଞ୍ଜା ବାରେ କୁଡ଼ା ଆହାମାଟାରି

କାର୍ବି ଆହାଁ ପାଲକା ଟୀଟି କିହାଲି ମାଟ୍‌ହେରି । <sup>୫୫</sup> ସାମା ସ୍ତ୍ରୀପାନ ସୁଦୁଜୀଝୁ ତଲେ ନେଞ୍ଜାନା ଲାକପୁରୁ ଝାକି ସିନିକିତେସି, ଇଞ୍ଜା ମାହାପୁରୁତି ଗାଝୁରମି ଅଡ଼େ ଜୀସୁଇଁ ମାହାପୁରୁତି ଚିଃନିଝାକି ନିରାମାନାଣି ମେସାନା ଏଲେଇଚେସି । <sup>୫୬</sup> “ମେହ୍‌ଦୁ ନାନ୍ତୁ ଲାକପୁରୁ ଦେପିଆହାମାନାଣି ଅଡ଼େ ମାଣସି ମୀରଏସି ମାହାପୁରୁତି ଚିଃନିଝାକି ନିରାମାନାଣି ମେସିମାଇଁ !”

<sup>୫୭</sup> ଏ କାତା ଝେନାଆପ ଇଞ୍ଜିଁ କାଲୁଝି ଆହ୍ଁ ବେରଣି ମାଣ୍ଡାତାରି କୀର୍କା ମୁଚାକତିତେରି । ତାନ୍ତୁ ବାରେଜାଣା ରୁଣ୍ଡା ଆହାନା ଏଝାଣାଇଁ ମୁଚିତେରି । <sup>୫୮</sup> ଅଡ଼େ ଏଝାରି ଏଝାଣାଇଁ ଗାଡ଼ାଟିଏ ପାଙ୍ଗାତା ରେଜା ଅହାନା ଏଝାଣାଇଁ ଝାଲୁକାତଲେ ଝେଚାଲି ମାଟ୍‌ହେରି; ଅଡ଼େ ସାକିୟା ବିତ୍ରାଟି ସାଝୁଲ କତାୟାଁ ତୁଇ ହିମ୍ବୁରିକା କାଟିମାଚେସି । <sup>୫୯</sup> ଏଚିବେଲା ଏଝାରି ସ୍ତ୍ରୀପାନଇଁ ଝାଲୁକା ଝେଚି ମାଚେରି, ଏଚିବେଲା ଏଝାସି ମାହାପୁରୁ ତାଣା ପ୍ରାଡାନା କିହାନା ଏଲେଇଚେସି, “ପ୍ରୁ ଜୀସୁ, ନା ଜୀଝୁତି ଅହାକତାମୁ !” <sup>୬୦</sup> ଇଞ୍ଜା ଏଝାସି ମେଣ୍ଡାକୁତାନା କାଜା ଗିୟାତଲେ ଏଲେଇଚେସି, “ପ୍ରୁ ! ଇ ପାପୁ ଇଝାରି ତାଣା ଲେକା କିଆନି” ଏଲେଇଞ୍ଜାହାଁ ହାଡେସି ।

## ୮

### ସାଝୁଲ କ୍ରୀସ୍ତାନା କୁଲମିତି ସାସ୍ତି ହୀନାୟି

<sup>୧</sup> ସ୍ତ୍ରୀପାନଇଁ ପାୟିତାୟି ନେହେଁ ଆଡେ ଇଞ୍ଜିଁ ସାଝୁଲ ଅଣ୍ଡପିମାଚେସି । ଏ ଦିନାଟିଏ ଜିରୁସାଲମତା ମାନି କୁଲମିକାକି ହାରେକା ନିନ୍ଦା ସାସ୍ତି ଝାଡ଼େ; ଏମ୍ବାଟିଏ ପାଣ୍ଡୁଝି ଆହାମାନାରି ପିସ୍‌ପେ ବାରେ ନାନିତାରି, ଜୀହୁଦା ଦେସା ଇଞ୍ଜା ସମିରଣ ନାସ୍‌କା ସାରିସୁଟୁ ଇତାଲା ଆତାଲା ଆଡେରି । <sup>୨</sup> ଆଡ଼ିଜିକେଏ ଏଚେକା ନାମୁଗାଟି ଲକୁ ସ୍ତ୍ରୀପାନଇଁ ମୁସ୍ତେରି ଇଞ୍ଜା ହାରେକା ଦୁକୁ ତଲେ ଡୀତେରି ।

<sup>୩</sup> ✨ସାମା ସାଝୁଲ କୁଲମିତା ହାଜିହ୍ଁ ଇଲୁତାକି ଇଲୁ ହଡ଼ିହ୍ଁ ନାନିତି ଆୟାସିକା, ଆବାଣି ରେଜା ତାଗାନା କାୟିଦି ଇଲୁତା ହେର୍‌ପିହ୍ଁ କୁଲମିତି ନାସା କିହାଲି ମାଟ୍‌ହେସି ।

✨ ୮:୩ ୮:୩ କାମା ୨୨:୪,୫; ୨୭:୯-୧୧

ସମିରଣତା ନେହଁ କାରୁ ଝେକ୍‌ନାୟି

୪ ଏମ୍ବାଟିଏ ଆମିନି ଗାଟାରି ଇତାଲା ଆତାଲା ଆହାମାଚେରି, ଏଝାରି ସାରିସୁରୁ ରେଜି ରେଜି ନେହଁ କାରୁ ଝେକ୍‌ହେରି । ୫ ଇଞ୍ଜା ପିଲିପ ସମିରଣତି କାଜା ଗାଡ଼ାତା ହାଜାନା ଲକୁ ନକିତା ମସିହାତି କାତା ଝେକ୍‌ହେସି । ୬ ଅଡ଼େ, ଲକୁ ବାରେ ପିଲିପ ହାଡ଼ା ଝେଚେରି ଇଞ୍ଜା ଏଝାସି କିହାମାନି କାବାଆନି କାମା ମେସାନା ରଣ୍ଡିଏ ହିୟା ତଲେ ଏଝାଣି କାତାତି ଝେଞ୍ଜିମାଚେରି । ୭ ଇଚିହଁ ଆଲ୍‌ଗାମାଟି ପଲ୍‌ଆ ବୁଡୁ ହାରେକା ଲକୁ ତାଣାଟି କାଜା ଗିୟାତଲେ କିରଡ଼ିହଁ ହଡ଼ାହାଡୁ, ଇଞ୍ଜା ଟଟ ଝାୟିତାରି ଅଡ଼େ ସଟାୟା ହାରେକା ଜାଣା ନେହଁ ଆଡ଼େରି । ୮ ଏଡ଼ାଆଁତାକି ଏ ଗାଡ଼ାତା ହାରେକା କାଜା ରାହାଁ ଆଡ଼େ ।

୯ ସାମା ସିମନ ଦରୁଗାଟାସି ରଅସି ଇ ନକେଏ ଏ ଗାଡ଼ାତା ଗାରଡ଼ି କିହଁ ନାନୁ କାଜାତେଏଁ ଇଞ୍ଜା ଝେସା କଡ଼ିହଁ ସମିରଣତି ଲକୁଣି କାବା କିହିମାଚେସି । ୧୦ ମାହାପୁରୁତି ଆମିନି ବାଡ଼ୁୟୁତି କାଜାୟି ଇଞ୍ଜା ଇଣ୍ଡି ଆନେ, ଉଣାଟିଏ କାଜାରି ପାତେକା ବାରେଜାଣା ଇଝାସିଏ ଏଝାସି ଇଞ୍ଜା ଏଝାଣାଇଁ ମାନି କିହିମାଚେରି । ୧୧ ଏଝାରି ଏଝାଣାଇଁ ମାନି କିହିମାନାୟି ଆଡ଼େ, ହାରେକା ଦିନାଟିଏ ତାନି ଗାରଡ଼ି କାମା ତଲେ ଏଝାଣାଇଁ କାବା କିହିମାଚେସି । ୧୨ ସାମା ପିଲିପ ମାହାପୁରୁତି ରାଜି ଇଞ୍ଜା ଜୀସୁ କ୍ରୀସୁ ଦରୁତି ନେହଁ କାରୁ ଝେକ୍‌ହାଲିଏ ଏଝାରି ଏଚିବେଲା ଏଝାଣି କାତାତା ନାମିଚେରି, ଇଞ୍ଜା ଆୟାସିକା ଅଡ଼େ ଆବାୟା ବାପ୍ତିସ୍ତା\* ଅହାଲି ମାଟ୍‌ହେରି । ୧୩ ଅଡ଼େ ସିମନ ତାନୁଏ ନାମିଚେସି ଇଞ୍ଜା ବାପ୍ତିସ୍ତା† ଅଡ଼େସି, ଇଞ୍ଜା ପିଲିପ ତଲେ ଡ଼ୟିଚେସି, ଅଡ଼େ ହାରେକା ସିନାୟା ଇଞ୍ଜା ହାରେକା ବାଡ଼ୁୟୁତି କାବାଆନି କାମାୟା ମେସାନା କାବା ଆହାହାଚେସି ।

୧୪ ସମିରଣତି ଲକୁ ଜିକେଏ ମାହାପୁରୁ ବଲୁତି ନାମିମାନେରି, ଇଞ୍ଜା ଜିରୁସାଲମତା ମାନି ପାଣ୍ଡୁଞ୍ଜି ଆଡ଼ାରି ଝେଚେରି, ଏମ୍ବାଟିଏ ଏଝାରି ପିତର ଅଡ଼େ ଜହନଇଁ ଏଝାରିତାଣା ପାଣ୍ଡିଚେରି । ୧୫ ଏଝାରି ଏଗାହାଜାନା, ଏଝାରି ଏନିକି ସୁଦୁଜୀଝୁ ବେଟାଆନେରି, ଏଡ଼ାଆଁତାକି ଏଝାରି ତାକି ପ୍ରାଡ଼ାନା କିଚେରି । ୧୬ ଇଚିହଁ ନୀଏଁ

\* ୮:୧୭ ୮:୧୭ ମୁଞ୍ଜିନାୟି † ୮:୧୩ ୮:୧୩ ମୁଞ୍ଜିନାୟି

ପାତେକା ଏଞ୍ଜାରିତାଣା ଆମ୍ବାଆରି ଲାକ ସୁଦୁଜୀଞ୍ଜୁ ରେଚା ହିଲାଆତେ, ଇଚିହିଁ ଏଞ୍ଜାରି ଖାରଇ ପ୍ରବୁ ଜୀସୁ ଦରୁତଲେ ବାପ୍ତିସ୍ମାଃ ଅହାମାଚେରି । ୧୭ ପିତର ଅଡ଼େ ଜହନ ଏଞ୍ଜାରି ଲାକ କେୟ୍ ଇଚିତେରି ଇଞ୍ଜା ଏଞ୍ଜାରି ସୁଦୁଜୀଞ୍ଜୁ ବେଟାଆଡ଼େରି ।

୧୮ ପାଣ୍ଡୁଞ୍ଜି ଆଡ଼ାରି କେୟ୍ ଇଚିସାରେ ସୁଦୁଜୀଞ୍ଜୁ ଖାହିମାନାଣି ମେସାନା, ସିମନ ଏଞ୍ଜାରାକି ଟାକାୟ୍ ହାହାନା ଏଲେଇଚେସି, ୧୯ “ନାଜେ ଜିକେଏ ଇ ବାଡ଼ୟ୍ ହିୟାଦୁ, ଏନିକିଁ ନାନୁ ଆମିନିଗାଟାଣି ଲାକ କେୟ୍ ଇଚିଇଁ ଏଞ୍ଜାସି ସୁଦୁଜୀଞ୍ଜୁ ବେଟାଆନେସି ।”

୨୦ ସାମା ପିତର ଏଞ୍ଜାଣାଇଁ ଏଲେଇଚେସି “ନୀ ଟାକାୟ୍ ନୀ ତଲେ ନସ୍ତୁ ଆପୁ, ଇଚିହିଁ ନାନୁ ଟାକାୟ୍ ହାହାନା ମାହାପୁରୁତି ଦାନା କଡାଲି ଅଣ୍ଡପିତି । ୨୧ ଇ କାମାତା ନୀଦି ଏନି ବାଟା କି ଅଦିକାରା ହିଲେଏ, ଇଚିହିଁ ମାହାପୁରୁ ତାଣା ନୀ ହିୟା ଟିକାଣା ହିଲେଏ । ୨୨ ଇଦାଆଁତାକି ନୀ ଲାଗେଏତି ଅଣ୍ଡପୁଟି ମନ ଝେବ୍‌ହାଁ ପ୍ରବୁ ତାଣା ପ୍ରାତାନା କିମ୍, ଏନିଆଡ଼ିହିଁ ନୀ ହିୟାତା ମାନି ଲାଗେଏତି ଅଣ୍ଡପୁ ମେକ୍‌ନେସି; ୨୩ ଇଚିହିଁ ନାନୁ ମେସିମାଞ୍ଜାଇଁ ନୀ ହିୟା ବିତ୍ରା ତାହାରା ଆନାୟି ମାନେ, ନାନୁ ଲାଗେଏତି ପାନ୍ଦାତା ଦସ୍‌ପି ଆହାମାଞ୍ଜି ।”

୨୪ ଏଚେଟିଏ ସିମନ, ପିତର ଅଡ଼େ ଜହନଇଁ ଏଲେଇଚେସି, “ମୀରୁ କାର୍ମା ଅଣ୍ଡପାନା ନା ତାକି ପ୍ରବୁ ତାଣା ପ୍ରାତାନା କିଦୁ, ମୀରୁ ଏନାଆଁ ଜଲିତେରି ଏ ବାରେ ଏନିକିଁ ନାଜେତାକି ଏଲେଆହିଁ ଆଏ ।”

୨୫ ଇଲେକିହିଁ ପିତର ଅଡ଼େ ଜହନ ସାକି ହାହିଁ ପ୍ରବୁତି ବଲ୍ଲୁ ଝେସିହିଁ, ହାରେକା ସମିରଣ ନାସ୍‌କାଣାଁ ନେହିଁ କାରୁ ଝେସି ଝେସିହିଁ ଜିରୁସାଲମତା ଝେଣ୍ଡା ହାଚେରି ।

**ପିଲିପ ଅଡ଼େ ଇତିୟପିୟାତି କାମାକିନାସି**

୨୬ ଡାୟ୍ ପ୍ରବୁତି ର ଦୁଡୁ ପିଲିପଇଁ ଏଲେଇଚେସି, “ନିଜାମ୍ ଇଞ୍ଜା ଚିଃନି ଖାକିତି ଆମିନି ଜିରୁ ଜିରୁସାଲମଟିଏ ଗଜା ଖାକି ମାନେ ଏ ଜିରୁତା ହାଲାମ୍ ।” ଏ ଜିରୁତି ଅଡ଼େ ଲକ୍ କାକିହିଲଅରିଃ । ୨୭ ଏମ୍‌ପାଟିଏ ଏଞ୍ଜାସି ନିଜାମା ହାଚେସି, ଇତିୟପିୟା ଦେସାତି

‡ ୮:୧୭ ୮:୧୭ ମୁଞ୍ଜନାୟି § ୮:୨୭ ୮:୨୭ ଲକ୍ ହିଲାଆ ଟାୟ୍

କାଣ୍ଡାକି ଦରୁଗାଟି ରାଣିନି ଡ଼ଲ ର କାଜାପାଣା ବେଟାଆହାମାନି ପେଜୁ ଆମିନିଗାଟାସି ଇତିୟପିୟା ରାଣିନି ବାରେ ଦନତି ଗୁମୁସ୍ତା ମାରେସି, ଏଞ୍ଜାସି ମାହାପୁରୁ ତାଣା ପ୍ରାତାନା କିହାଲି ଜିରୁସାଲମତା ଖାହାମାରେସି; <sup>୨୮</sup> ଏଞ୍ଜାସି ମାହାପୁରୁ ଅଣ୍ଡୁପୁତି ବଲୁ ଖେହ୍ନି ଜିସାୟତି ପତି କାଜା ଗିୟାତଲେ ପଡ଼଼ି ଆହ୍ ରାତାତା କୁଗାନା ଖେଣ୍ଡା ହାଜିମାରେସି । <sup>୨୯</sup> ଏତିବେଲା ସୁଦୁଜୀ଼ୁ ପିଲିପଇ ଏଲେଇରେ, “ନକିତା ହାଜାନା ରାତାତା ହାଜିମାନାଣି ତାଣା ହାଲାମୁ;” <sup>୩୦</sup> ଏଚେଟିଏ ପିଲିପ ହଟି ହଟି ହାଜାନା ଜିସାୟତି ପତି କାଜା ଗିୟାତଲେ ମାହାପୁରୁ ଅଣ୍ଡୁପୁତି ବଲୁ ପଡ଼଼ି ଆହିମାନାଣି ଖେଞ୍ଜାନା ଖେରେସି, “ନୀନୁ ଆମିନିଗାଟାଣି ପଡ଼଼ି ଆହିମାଞ୍ଜି ଏଦାଆଁ ପୁଞ୍ଜାଲି ଆଡ଼ିମାଞ୍ଜି କି ?”

<sup>୩୧</sup> ପେଜୁ ଏଲେଇରେସି, “ଆମ୍ବାଆସି ନାଙ୍ଗେ ଖେସ୍ତାଆସାରେ ନାନୁ ଏନିକି ପୁଇଁ ?” ଇଞ୍ଜା ଏଞ୍ଜାସି ପିଲିପଇଁ ରାତାତା ହଟାନା ତାନିତଲେ କୁଗାଲି ଏଲେଇରେସି । <sup>୩୨</sup> ଏଞ୍ଜାସି ଦାମ୍ବୁ ପତିତା ପଡ଼଼ି ଆହିମାଟି କାତା ଇଦି;

“ଏଞ୍ଜାସି ପାୟି଼ିଆନି ମେଣ୍ଡା ତାଲୁ ଲେହେଁ ଅ଼ିଆଡେସି,  
 ଇଞ୍ଜା ମେଣ୍ଡା ତାଲୁ ବାଣାୟାଁ ଦା଼ୁନି ବେଲାତା ମେଣ୍ଡା ତାଲୁ  
 ଏନିକି ତୀଆନା ପାଲେଏ ଡ଼ୟିନେ,  
 ଏଲେକିହ୍ ଏ ଏଞ୍ଜାସି ତାନି ଗୁଡ଼ି ଏକ୍‌ଆଡେସି ।

<sup>୩୩</sup> ଏଞ୍ଜାଣାଇଁ ଉଣା କିହାଁ ନୀହାଁୟି କିଆଡେରି,  
 ଏଞ୍ଜାଣି କୁଡ଼ାଟି କାତା ଆମ୍ବାଆସି ଖେସାଲି ଆଡ଼ଅସି,  
 ଇତିହ୍ ତାନି ଜୀ଼ୁ ଦାର୍‌ତିତା ରାଡେ ।”

<sup>୩୪</sup> ଏ ପେଜୁ ପିଲିପଇଁ ଏଲେଇରେସି, “ନାଙ୍ଗେ ଖେସ୍ତାମୁ, ମାହାପୁରୁ ଅଣ୍ଡୁପୁତି ବଲୁ ଖେହ୍ନାସି ଆମ୍ବାଆରି କାତା ଖେସିମାନେସି ? ତାନି କାତା କି ଅର ରଅଣି କାତା ?” <sup>୩୫</sup> ଏମ୍ବାଟିଏ ପିଲିପ ଗୁଡ଼ି ଦେଚାନା ଦାମ୍ବୁ ସାସ୍ତେରିଟିଏ ମାଟ୍‌ହାନା ଏଞ୍ଜାଣି ତାଣା ଜୀସୁତି ନେହ୍ କାବୁ ଖେସ୍ତେସି । <sup>୩୬</sup> ଏଞ୍ଜାରି ଜିରୁତା ହାଜିମାଟାଟି ଏମୁ ମାନି ର ଗାମୁତା ଏଗାହାଚେରି; ଏଚେଟିଏ ପେଜୁ ଏଲେଇରେସି, <sup>୩୭</sup> “ଇମ୍ବାଆଁ ଏମୁ

ମାନୁ, ଏନାଆଁ ନାନୁ ବାପ୍ତିସ୍ମ\* ଅହାଲି ଆଡ଼ିଲ୍ ?”

୩୮ ଇଞ୍ଜା ଏଝାସି ରାତା ନିପହାଲି ହୁକୁମି ହୀତେସି, ଇଞ୍ଜା ପିଲିପ ଅଡ଼େ ପେଜୁ ଏୟୁଣାଁ ରେତେରି, ଇଞ୍ଜା ପିଲିପ ଏଝାଣାଇଁ ବାପ୍ତିସ୍ମ‡ ହୀତେସି । ୩୯ ଏଝାରି ଏୟୁଟି ହଚା ଖାଡ଼ି ତାୟୁ, ପ୍ରବୁତି ସୁଦୁଜୀଝୁ ପିଲିପଲ୍ ଅହ୍ ହାରେ, ଇଞ୍ଜା ପେଜୁ ଅଡ଼େ ଏଝାଣାଇଁ ମେହ୍ ଆତେସି; ଆଡ଼ିଜିକେଏ ରାହ୍ କିହ୍ ତାନି ଜିରୁତା ହାରେସି । ୪୦ ସାମା ପିଲିପ ଅସଦଦ୍ ଗାଡ଼ାତା ତଞ୍ଜାଆଡେସି; ଇଞ୍ଜା ଏଝାସି ଗାଡ଼ାତାକି ଗାଡ଼ାତା ହାଜାହ୍ ନେହ୍ କାରୁ ଝେସ୍ତେସି ଇଞ୍ଜା କାୟିସରିୟାତା ଏଗାହାରେସି ।



ସାଝୁଲ ମନ ଝେଚ୍ନାୟି  
(କାମା ୨୨:୬-୧୬; ୨୬:୧୨-୧୮)

୧ ସାମା ସାଝୁଲ ନୀର୍ଘ ପାତେକା ପ୍ରବୁତି ସୀସୁୟାଁ କପାଟି ଆଜି ତସାନା ଅଡ଼େ ଜୀଝୁ ନାସାକିନି କାତାୟାଁ ଜଲିହ୍ କାଜା ପୂଜେରାଙ୍ଗା ତାଣା ହାରେସି । ୨ ଅଡ଼େ ପ୍ରବୁ ଜିରୁଟି ତାକିମାନି ଆମିନି ଇୟାସିକା ଆବାୟାଣି ମେସ୍ତେହ୍, ବାରେଜାଣାତି ଦସ୍ପାନା ଜିରୁସାଲମତା ତାଚାଲି ଆଡ଼ିମାନେସି, ଏନାଆଁତାକି ଏଝାସି କାଜା ପୂଜେରାଙ୍ଗା ତାଣା ହାଜାନା ଦମେସକତା ମାନି ଜୀହୁଦି ଲକୁଡି କୁଟମି ଇଲ୍‌କାଣା\* ହିୟାଲି ଏଝାରି ତାଣାଟି ଆକୁ ରୀସ୍ତେସି ।

୩ ସାଝୁଲ ଦମେସକ ତାଗେ ଝାହିମାଚାଟି ଦେବୁଣିଏ ର ଉଜେଡ଼ି ହାଗୁଲାଇଟି ତାନି ସାରିଝାକି ମ୍ଲିସ୍ତେ । ୪ ଏମ୍ବାଟିଏ ଏଝାସି ବୁନିତା ତରଗା ହାରେସି ଇଞ୍ଜା ତାଙ୍ଗେତାକି ଇ ହାଡ଼ା ଝେରେସି, “ଏ ସାଝୁଲ, ଏ ସାଝୁଲ ! ନାନୁ ଏନାଆଁତାକି ନାଙ୍ଗେ ନିନ୍ଦା କିହିମାଞ୍ଜାଦି ?”

୫ ଏଝାସି ଏଲେଇରେସି, “ପ୍ରବୁ, ନାନୁ ଆମ୍ବାଆଡ଼ି ?” ଏଝାସି ଏଲେଇରେସି, “ନାନୁ ଆମ୍ବାଆରାଇଁ ନିନ୍ଦା କିହିମାଞ୍ଜି ଏ ଜୀସୁତେର୍ଘ୍

\* ୮:୩୭ ୮:୩୭ ମୁଞ୍ଜିନାୟି † ୮:୩୭ ୮:୩୭ ପିଲିପ ଏଲେଇରେସି, “ନାନୁ ବାରେ ହିୟାଁ ତଲେ ନାନିସାରେ ଅହାଲି ଆଡ଼ିଦି” ଏମ୍ବାଟିଏ ଏଝାସି ଏଲେଇରେସି, “ଜୀସୁ କ୍ରୀସ୍ତ ମାହାପୁରୁତି ମାବ୍‌ସି ଇଦାଆଁ ନାନୁ ନାନିମାଇଁ ।” ‡ ୮:୩୮ ୮:୩୮ ମୁଞ୍ଜିନାୟି \* ୯:୨ ୯:୨ ସିନଗଗ

ନାନୁ । <sup>୬</sup> ସାମା ନିଜାମୁ ଇଞ୍ଜା ଗାଡ଼ାତା ହାଲାମୁ, ଏନାଆଁ କିହାଲି ଆନେ, ଏମ୍ପାଆଁ ନିଜେ ଖେସପି ଆୟାନେ ।”

<sup>୭</sup> ଏଞ୍ଜାଣିତଲେ ଆମିନି ଲକୁ ହାଜିମାଚେରି, ଏଞ୍ଜାରି ଏ ହାଡ଼ା ଖେଞ୍ଜାନା ଆମ୍ପାଆରାକ୍ ମେହୁଆଚେରି, ଇଞ୍ଜା ଆଡ଼ାଜାକା ଆହାହାଚେରି । <sup>୮</sup> ଅଡ଼େ ସାଞ୍ଜୁଲ ବୁମିଟି ନିଜାନା ତାନି କାଶକା ଦେତେସି, ସାମା ଏଞ୍ଜାସି ଏନାଆଁ ମେସାଲି ଆଡ଼ାଆଚେସି । ଇଞ୍ଜା ଏଞ୍ଜାରି ତାନି କେୟୁ ଆସାନା ଦମେସକତା ଅଡ଼େରି । <sup>୯</sup> ଅଡ଼େ ତାନିଦିନା ପାଚେକା ଏଞ୍ଜାସି ଏନାଆଁ ମେସାଲି ଆଡ଼ାଆଚେସି, ଅଡ଼େ ଏନାଆଁ ତିନାଆଚେସି ଏନାଆଁ ଗହୁଆଚେସି ।

<sup>୧୦</sup> ଦମେସକତା ହନନିୟ ଦରୁଗାଟାସି ର ସୀସୁ ମାଚେସି; ପ୍ରବୁ ଏଞ୍ଜାଣାକ୍ ତଞ୍ଜାଆହାଁ ଏଲେଇଚେସି, “ଏ ହନନିୟ !” ଏଞ୍ଜାସି ଏଲେଇଚେସି, “ଏ ପ୍ରବୁ ନାଜେ ଖେସ୍ତାମୁ ।”

<sup>୧୧</sup> ଏଚେଟିଏ ପ୍ରବୁ ଏଞ୍ଜାଣାକ୍ ଏଲେଇଚେସି, “ତିୟାରା ଆହାନା ‘ସଲକ’ ଦରୁଗାଟି ଜିରୁ ଆସାଁ ଜୀହୁଦା ଇଲୁତା ତାର୍ସ ଗାଡ଼ାତି ସାଞ୍ଜୁଲ ଇନାଣାକ୍ ପାରାମୁ; ଇଚିହୁଁ ଏଞ୍ଜାସି ପ୍ରାଡ଼ାନା କିହିମାନେସି; <sup>୧୨</sup> ଅଡ଼େ, ଏଞ୍ଜାସି ସେୟାଣା ହାପାନା ମେସାମାନେସି, ହନନିୟ ଇନାସି ର ମାଣ୍ଡସି ଖାହାନା ତାନି ଲାକ କେୟୁ ଇଚିମାନେସି, ଏନିକଁ ଏଞ୍ଜାସି ମେସାଲି ଆଡ଼ିମାନେସି ।”

<sup>୧୩</sup> ହନନିୟ ଏଲେଇଚେସି, “ପ୍ରବୁ, ଜିରୁସାଲମତା ମାହାପୁରୁ ଲକୁକ୍ ଇଞ୍ଜାସି ଏଚେକା ନିୟା କିହାମାନେସି ଇଞ୍ଜାଁ ନାନୁ ହାରେକା ଲକୁ ତାଣାଟି ଇ ଲକୁତି କାତା ଖେଞ୍ଜାମାକ୍ । <sup>୧୪</sup> ଅଡ଼େ ଇ ଟାୟୁତା ନୀ ଦରୁଟି ପ୍ରାଡ଼ାନା କିହିମାନାରାକ୍ ବାରେଜାଣାତି ଦସା ଅୟାଲି ଏଞ୍ଜାସି କାଜା ପୁଜେରାଜା ତାଣାଟି ଅଦିକାରା ଆକୁ ବେଟାଆହାମାନେସି ।”

<sup>୧୫</sup> ସାମା ପ୍ରବୁ ଏଞ୍ଜାଣାକ୍ ଏଲେଇଚେସି, “ହାଲାମୁ; ଇଚିହୁଁ ଏଞ୍ଜାସି ଏଟକା କୁଡ଼ାତି ରାଜାୟାଁ ଅଡ଼େ ଇସ୍ରାୟେଲ ଲକୁତି ମାସ୍କା ମୀରକା ନକିତା ନା ଦରୁ ଖେକ୍‌ହାଲି ନାନୁ ଏଞ୍ଜାଣାକ୍ ନା ସେବା କିନାସି କିହାନା ଆଡ଼ାମାକ୍; <sup>୧୬</sup> ଅଡ଼େ ନା ଦରୁ ତାକି ଏଞ୍ଜାସି ଏଚେକା ଦୁକୁ ବେଟାଆନେସି, ଏଡ଼ାଆଁ ନାନୁ ଏଞ୍ଜାଣାକ୍ ଖେହୁକ୍ ।”

<sup>୧୭</sup> ଏଚେଟିଏ ହନନିୟ ହାଜାନା, ଏ ଇଲୁତା ହଚେସି, ଇଞ୍ଜା ତାନି ଲାକ କେୟୁ ଇଟାନା ଏଲେଇଚେସି, “ତାୟି ସାଞ୍ଜୁଲ, ଇମ୍ପାଆଁ



ଖାନି ଜିରୁତା ଆମିନି ପ୍ରବୁ ଜୀସୁ ନିଜେ ତଞ୍ଜା ଆୟାତେସି, ଏଞ୍ଜାସି ନାଜେ ପାଣ୍ଡାମାଞ୍ଜାନେସି, ନୀନୁ ଏନିକିଁ ଖେଣ୍ଡେ ମେହ୍ନୁ ଇଞ୍ଜା ସୁଦୁଜୀଞ୍ଜୁ ବେଟାଆମୁ ।”<sup>୧୮</sup> ଏ ଦେବୁଣିଏ ଏଞ୍ଜାଣି କାଣ୍ଡକାଟି ମୀନୁ ହିପି ଲେହେଁତାୟି ତୁଲିତେ, ଇଞ୍ଜା ଏଞ୍ଜାସି ଖେଣ୍ଡେ ମେସାଲି ଆଡିତେସି, ଅଡେ ନିଜ୍ଞାନା ବାପ୍ତିସ୍ତାଃ ଅଡେସି,<sup>୧୯</sup> ଅଡେ ଏଞ୍ଜାସି ତିଞ୍ଜା ଉଣ୍ଡାନା ବାଡ଼ୟୁ ବେଟାଆତେସି, ଏଚେଟିଏ ସାଞ୍ଜୁଲ ଏଚରଦିନା ସୀସୁୟାଁ ତଲେ ଦମେସକତା ଡୟିତେସି ।

ଦମେସକତା ସାଞ୍ଜୁଲ ଖେକନାୟି ।

<sup>୨୦</sup> ଅଡେ, ଜୀସୁ ମାହାପୁରୁତି ମୀରଏସି ଇଞ୍ଜାଁ ଆବ୍‌ଞ୍ଜା ତଲେ ଜୀହୁଦି ଲକୁଡି କୁଟମି ଇଲକାଣାଃ ଖେସାଲି ମାବ୍‌ହେସି ।

<sup>୨୧</sup> ଅଡେ, ଆମିନି ଗାଟାରି ତାନି ହାଡା ଖେଚେରି, ଏଞ୍ଜାରି କାବାଆହାନା ଏଲେଇଚେରି, “ଜୀସୁ ଦରୁ ଆସାନା ପ୍ରାଡାନା କିନି ଲକୁଣି ଆମ୍ବାଆସି ଜିରୁସାଲମତା ପାୟି କିହିମାଚେସି, ଅଡେ ଏଞ୍ଜାରାଇଁ ଦସ୍‌ପାହାଁ କାଜା ପୂଜେରାଜା ତାଣା ଅହାଲି ତାକି ଇମ୍ବାଆଁ ଖାହାମାଚେସି, ଏଞ୍ଜାସି କି ଇଞ୍ଜାସି ଆଏ ?”

<sup>୨୨</sup> ସାମା, ସାଞ୍ଜୁଲତି ଖେକନାୟି ହାରେକା ବାଡ଼ୟୁ ଗାଟାୟି ମାଚେ, ଅଡେ ଏଞ୍ଜାସି ପାରମାଣା କିହାଁ ଖେସ୍ତେସି ଜୀସୁ ଏ ମସିହା, ଇଦାଣି ଦମେସକତା ବାସା କିହାମାନି ଜୀହୁଦି ଲକୁଣି ଖେଣ୍ଡେ ଖେସାଲି ଆଡାଆଚେରି ।

<sup>୨୩</sup> ☆ଏଚରଦିନା ହାଟି ତାୟୁ ଜୀହୁଦିୟାଁ ରୁଣ୍ଡା ଆହାନା ଏଞ୍ଜାଣାଇଁ ପାୟାଲି କାତା ଆଚେରି; <sup>୨୪</sup> ସାମା ଏଞ୍ଜାରି କାତା ଆହିମାଚାଣି ସାଞ୍ଜୁଲ କିୟିଁ ତୁା ହାଚେ, ଅଡେ ଏଞ୍ଜାରି ଏନିକିଁ ସାଞ୍ଜୁଲଇଁ ପାୟାଲି ଆଡିନେରି, ଏଦାଆଁତାକି ଲାଆଁ ମାଦେନା ଗାଡାତି ଦୁଞ୍ଜେରିକାଣା କାଟିହିଁ ଡୟିତେରି । <sup>୨୫</sup> ସାମା ସାଞ୍ଜୁଲତି ସୀସୁୟାଁ ଲାଆଁୟାଁ ବେଲାତା ଏଞ୍ଜାଣାଇଁ ର. ତାଲିତା ରସାହାଁ କଟା କାଡିଟି ଡଇ ରେପ୍‌ହେରି ।

ଜିରୁସାଲମତା ସାଞ୍ଜୁଲ

† ୯:୧୮ ୯:୧୮ ମୁଞ୍ଜିକାୟି ‡ ୯:୨୦ ୯:୨୦ ସିନଗର୍ ☆ ୯:୨୩ ୯:୨୩ ୨କର ୧୧:୩୨,୩୩

୨୭ ତାମ୍ଭୁ ଏଞ୍ଜାସି ଜିରୁସାଲମତା ହାଜାନା ସୀସୁୟାଁ ତଲେ ଆଣ୍ଡାଲି ଅଣ୍ଡିମାଚେସି; ସାମା ଏଞ୍ଜାସି ର ସୀସୁ ଇଞ୍ଜିଁ ଏଞ୍ଜାରି ଇଚାଣି ନାମାଆନା, ବାରେଜାଣା ଏଞ୍ଜାଣାଲି ଆଜିମାଚେରି । ୨୭ ସାମା ବର୍ନବା ଏଞ୍ଜାଣାଲି ଆସାନା ପାଣ୍ଡୁଞ୍ଜି ଆଡାରି ତାଣା ତାତେସି, ଇଞ୍ଜା ଜିରୁତା ଏଞ୍ଜାସି ଏନିକିଁ ପ୍ରବୁଇଁ ମେସ୍ତେସି ଇଞ୍ଜା ପ୍ରବୁ ଏନାଆଁ ତାଙ୍ଗେ ହାଡ଼ା ଆଡେସି, ଦମେସକତା ଜୀସୁ ଦରୁତି ସାସାତଲେ ସାଞ୍ଜୁଲ ଏନିକିଁ ଝେସାମାଚେସି, ଇ ବାରେ କାତା ଏଞ୍ଜାରି ନକିତା ଝେସ୍ତେସି । ୨୮ ଅଡେ ସାଞ୍ଜୁଲ ଏଞ୍ଜାରିତଲେ ଡୟିତେସି ଅଡେ ଜିରୁସାଲମତି ବାରେଞ୍ଜାକି ହାଜାନା ସାସାତଲେ ପ୍ରବୁତି ଦରୁ ଝେକ୍‌ହେସି । ୨୯ ଇଞ୍ଜା ଏଞ୍ଜାସି ଗ୍ରିକ୍ ଜଲିନି ଜୀହୁଦି ଲକୁତଲେ ବାଦିବାଦା କିହିମାଚେସି, ସାମା ଏଞ୍ଜାରି ଏଞ୍ଜାଣାଲି ପାୟାଲି ପାରୁ ପାରିମାଚେରି । ୩୦ ନାମିତି ତାୟିୟାଁ ଏନାଆଁ ପୁଞ୍ଜାଲିଏ, ସାଞ୍ଜୁଲଇଁ କାୟିସରିୟାତା ଅହାନା ଏମ୍ପାଟି ଏଞ୍ଜାଣାଲି ତାର୍ସତା ପାଣ୍ଡିତେରି ।

୩୧ ଇଲେଆହଁ ଏ ବାରେ ଜୀହୁଦା ରାଜି, ଗାଲିଲି ଅଡେ ସମିରଣତି କୁଲମି ବାର୍ସୁ ଆହାନା ପ୍ରବୁଇଁ ଆଜାନା ହିଡ଼ଡି ଜୀଞ୍ଜୁତଲେ ମାଚେରି, ଇଞ୍ଜା ସୁଦୁଜୀଞ୍ଜୁତି ସାୟେମି ତଲେ ପାଡାଆହାଲି ମାଟ୍‌ହେରି ।

### ଲୁଦ ଅଡେ ଜାପତା ପିତର

୩୨ ଏଚେଟିଏ ପିତର ବାରେ ରାଜିତା ରେଜି ରେଜିହଁ ଲୁଦତା ଡୟିନି ମାହାପୁରୁ ଲକୁଣି ଆଣ୍ଡାଲି ହାଚେସି । ୩୩ ଏମ୍ପାଆଁ ଏଞ୍ଜାସି ଏନିୟ ଦରୁଗାଟି ରଅଣାଲି ବେଗାଆଡେସି, ଏଞ୍ଜାସି ଆଟା ବାର୍ସା ପାତେକା ଚଟ ଝାୟିତି ରଗ ଆହାନା କାଟେଲିଟି ନିଙ୍ଗାଲି ଆଡ଼ିହିଲାଆତେସି । ୩୪ ପିତର ଏଞ୍ଜାଣାଲି ଏଲେଇଚେସି, “ଏନିୟ, ଜୀସୁ ଜ୍ରୀସ୍ତ ନିଙ୍ଗେ ନେହଁ କିହାମାଞ୍ଜାନେସି; ନିଙ୍ଗାମୁ ନୀ ପାସ୍‌ପନି ମୁଦା କିମୁ” ଏଚେଟିଏ ଏଞ୍ଜାସି ଏ ଦେବୁଣିଏ ନିଙ୍ଗିତେସି । ୩୫ ଏଚେଟିଏ ଲୁଦ ଇଞ୍ଜା ସାରେଣତା ବାସା କିହାମାନି ଲକୁ ଏଞ୍ଜାଣାଲି ମେସାନା, ପ୍ରବୁ ତାଣା ହିୟାଁ ଝେଟ୍‌ହେରି ।

### ଦର୍କା ଝେଣ୍ଡେ ନୀଡିନାୟି

୩୭ ଜାପତା ଟାବିତା ଦରୁଗାଟି ମାହାପୁରୁରୁ ନାମିତି ର ଇୟା ମାରେ, ଗ୍ରିକ୍ ତଲେ ଦର୍କା ଇଟିସାରେ ତାନି ଦରୁ “ର କୁର୍ତ୍ତୁ ।” ଏଦି ବାରେବେଲା ନେହଁ କାମା କିହଁ, ହିଲାଆ ଗାଟାରାକି ସାୟେମି କିହିମାରେ । ୩୭ ଏଟିବେଲାତା ଏଦି ନମେରି ଆହାନା ହାହାହାରେ, ଲକୁ ଏଦାନି ଏୟୁ ମାଡ଼ହାନା ଲାକନି ପାରୁତି ର ବାକ୍ରାତା ତ୍ରିପୁହୁ । ୩୮ ଇଞ୍ଜା ଲୁଦ ଜାପ ତାଗେ ମାଟାକି ସୀସୁୟା ପିତର ଜାପତା ମାନେସି ଇଞ୍ଜା ଖେଞ୍ଜାନା, ରୀ ଲକୁଣି ଏଞ୍ଜାଣି ତାଣା ପାଣ୍ଡାନା ଇ କାତା ବାତିମାଲିତେରି, “ମା ତାଣା ଖାହାଲି ଖେଡ଼ା କିଆନି ।” ୩୯ ପିତର ନିଞ୍ଜାନା ଏଞ୍ଜାରିତଲେ ହାରେସି, ଏମ୍ପାଆଁ ଏଞ୍ଜାସି ଖାହାଲିଏ ଏଞ୍ଜାଣାଇଁ ଲାକନି ପାରୁତି ବାକ୍ରାତା ଅଡ଼େରି, ଅଡ଼େ ରାଣ୍ଡେଣିସିକା ସାରିସୁଟ ମୁରାନା ଡ଼ାହି ଡ଼ାହିଁ ଦର୍କା ନୀତାମାଟି ବେଲାତା କେପାମାଟି ହିମ୍ପରିକା ବାରେ ଏଞ୍ଜାଣାଇଁ ତସୁ । ୪୦ ସାମା ପିତର ବାରେଜାଣାଟି ପାଞ୍ଜାତା ପାଣ୍ଡାନା ମେଣ୍ଡାକୁତାନା ପ୍ରାଡ଼ାନା କିତେସି; ଇଞ୍ଜା ମାଡ଼ହା ଖାକି ଡିରଞ୍ଜାନା ଏଲେଇତେସି, “ଟାବିତା, ନିଞ୍ଜାମୁ” ଏତେଟିଏ ଏଦି କାଣକା ଦେଚାନା ପିତରଇଁ ମେସ୍ତେ ଇଞ୍ଜା ନିଞ୍ଜାନା କୁଟିଗେ । ୪୧ ଇଞ୍ଜା ପିତର କେୟୁ ଦାସାନା ଦର୍କାଇଁ ନିକ୍ହେସି, ଇଞ୍ଜା ମାହାପୁରୁ ଲକୁ ଅଡ଼େ ରାଣ୍ଡେଣିସିକାଣି ହାଟାନା ଏଦାନି ନୀତାମାନାଣି ତସ୍ତେସି । ୪୨ ଇ କାତା ଜାପତି ସାରିସୁଟ ଖେଞ୍ଜାହାରେ ଅଡ଼େ ହାରେକା ଲକୁ ପ୍ରୁରୁଇଁ ନାମିତେରି । ୪୩ ଅଡ଼େ, ପିତର ହାରେକା ଦିନା ପାତେକା ଜାପତି ସିମନ ଦରୁଗାଟି ତଲ୍ଲକା କାମାକିନାଣି ଇଜ ଡ଼ୟିତେସି ।

## ୧୦

### ପିତର ଅଡ଼େ କର୍ନଲିୟ

୧ କାୟିସରିୟା ଗାଡ଼ାତା କର୍ନଲିୟ ଦରୁଗାଟାସି ର ଲକୁ ମାରେସି, ଏଞ୍ଜାସି ଇତାଲିକ ଦରୁଗାଟି ରମିୟ ରିଜାରି କସ୍କାଡ଼ି ପାସାକଡ଼ି କସ୍କା ମୁହେଁ କାଜାସି ମାରେସି । ୨ ଏଞ୍ଜାସି ର ଦାମ୍ବୁ ଲକୁ ମାରେସି; ତାନି ଇଲୁ କୁଟମି ତଲେ ମାହାପୁରୁରୁ ଆଜିମାରେସି, ଏଞ୍ଜାସି କାକୁଲି ଲକୁତାକି ଦାନା ହାହିମାରେସି, ଅଡ଼େ ମାହାପୁରୁ ତାଣା କାଲେଏ ପ୍ରାଡ଼ାନା କିହିମାରେସି । ୩ ର ଦିନା ମିଡ଼ଅଲ୍ଲା ତାନି ଗଂଟା ବେଲାତା

ଏଞ୍ଜେଲ ସେୟାଣା ହାପାନାତା ତୀରପୁତଲେ ମେସ୍ତେସି, ରଫାହାପୁରୁତି ଦୂତୁ ଖାହାନା ଏଞ୍ଜେଲାଇଁ ଖେସ୍ତେସି “କର୍ନଲିୟ !”

୪ ଏଞ୍ଜେଲ ଆଜିତଲେ ଦୂତୁ ଖାକି ସିନିକିତେସି ଅଡ଼େ ଖେରେସି, “ଇଦି ଏନାୟି ପ୍ରବୁ ?” ଦୂତୁ ଏଞ୍ଜେଲାଇଁ ଏଲେଇଚେ, “ନୀ ପ୍ରାଡାନା ଅଡ଼େ ଦାନା ହୀନାୟି ଲାକ ମାହାପୁରୁ ନକିତା ଏଜାମାନେ । ୫ ନୀଏଁ ନୀନୁ ଜାପତା ଲକୁଣି ପାଣ୍ଟାନା ସିମନ ପିତର ଦରୁଗାଟି ଲକୁଇଁ ହାଟାତାମ୍, ଏଞ୍ଜେଲି ହାଟା ଦରୁ ପିତର ଇନେରି; ୬ ଏଞ୍ଜେଲି ସିମନ ଦରୁଗାଟି ର ତଲୁକା କାମାକିନାଣି ଇଜ ଗତାଗାଟାସି ଆହାମାନେସି, ଏଞ୍ଜେଲି ଇଲୁ ସାମ୍ବୁରି ଗାଟୁତା ।” ୭ ତାନିତଲେ କାତା ଆହିମାଟି ଦୂତୁ ହାଜାଲିଏ, ଏଞ୍ଜେଲି ତାନି ଇଜ କାମା କିନି ରୀ ହଲିୟାଙ୍ଗାଣି ଇଞ୍ଜା ତାଙ୍ଗେ ସେବାକିନି ରିଜାରି କସ୍କା ବିତ୍ରାଟି ର ଦାମ୍ବୁତି କହୁଏଣାଇଁ ହାଟିତେସି, ୮ ଅଡ଼େ ଏଞ୍ଜେଲି ଏଞ୍ଜେରାଇଁ ଏମ୍ବାଆଁ ଆହାମାଟି ବାରେ କାତା ଖେସାନା ଜାପତା ପାଣ୍ଟିତେସି ।

### ପିତର ସେୟାଣା ହାପାନା ହେଣ୍ଡନାୟି

୯ ଅର ଦିନା ଏଞ୍ଜେରି ହାଜି ହାଜିହୁଁ ଏ ଗାଡ଼ାତି ତାଗେ ଆଡେରି, ଏରିବେଲା ପିତର ମାଦେନା ବାର ଗଂଟା ବେଲାତା ପ୍ରାଡାନା କିହାଲି ଇଲୁ ଲାକ ହାଚେସି, ୧୦ ଏଞ୍ଜେଲି ହାକି ଆଡେସି ଅଡ଼େ ଏନାଆଁ ତିଞ୍ଜାଲି ମନ କିତେସି; ସାମା ଏଞ୍ଜେରି ରାନ୍ଦା ଖାଜିମାଟି ବେଲାତା, ଏଞ୍ଜେଲି ସେୟାଣା ହାପାନା ମେସ୍ତେସି, ୧୧ ଲାକପୁରୁ ଦେପିଆହାମାନେ, ଇଞ୍ଜା ଏନିକ୍ ର ହିମ୍ବୁରିତି ସାରି କନତା ଆସ୍ପି ଆହାନା ଦାର୍ତି ଲାକ ରେଚା ଖାହିମାନେ; ୧୨ ଏମ୍ବାଆଁ ଦାର୍ତିତି ବାରେ କୁଡ଼ାତି ସାରିଗଟା କତା ଗାଟି ଜନ୍ତୁ ଜିଞ୍ଜେଡିକା, ରାସ୍କା ତ୍ରିଗିୟାଁ ଅଡ଼େ ହାଗୁତି ପଟାୟା ମାନୁ । ୧୩ ଇଞ୍ଜା ଏଞ୍ଜେଲାକି ଇ ହାଡ଼ା ଆଡେ, “ପିତର; ନିଙ୍ଗାମ୍, ପାୟାନା ତିନାମ୍ !”

୧୪ ସାମା ପିତର ଏଲେଇଚେସି, “ଆଏ ପ୍ରବୁ, ନାନୁ ଏଚେଲାଞ୍ଜା ଏନି ଲାଗେଏ ପଲେଏତି ଦିଣ୍ଡୁ ତିଞ୍ଜାହିଲଅଁ ।”

୧୫ ଅଡ଼େ ର ପାଲି ଇ ହାଡ଼ା ଆଡେ, “ମାହାପୁରୁ ଏନାଆଁ ସୁଦୁ କିହାମାନେସି, ଏଦାଆଁ ନୀନୁ ଲାଗେଏତାୟି ଇନାଆନି ।”

୧୭ ଇଲେକିହିଁ ତାନି ପାଲି ଆଡେ, ତାୟୁ ଏ ହିମ୍ବରି ଲାକପୁରୁ ଅଢ଼ିଆଡେ ।

୧୭ ପିତର ଏନାଆଁ ସେୟାଣା ହାପାନା ହେଣ୍ଡାମାଚେସି, ଏଦି ଏନାୟି, ଇଞ୍ଜି ଅଣ୍ଡିହିଁ ଆତାଜାକା ଆହାମାନି ବେଲାତା, କର୍ନଲିୟ ତାଣାଟି ପାଣ୍ଡୁଢ଼ି ଆହାମାନାରି ସିମନ ଇଲୁ ପାରିହିଁ ଦୁଝେରିତା ନିକା ଖାଡେରି, ୧୮ ଇଞ୍ଜା ଏଞ୍ଜାରି ଝେଚେରି, “ସିମନ ଇନି ପିତର ଦରୁଗାଟାସି ରଅସି ଇମ୍ବାଆଁ ଗଡେଏସି ମାନେସି କି ?”

୧୯ ପିତର ଏ ସେୟାଣା ହାପାନା ହେଟାଣି ଅଣ୍ଡିମାଟି ବେଲାତା ଜୀଝୁ ଏଞ୍ଜାଣାଇଁ ଏଲେଇଚେ, “ମେହ୍ମୁ ! ତାନି ଜାଣା ଲକୁ ନିଜେ ପାରିମାଞ୍ଜାନେରି । ୨୦ ଏନାଆଁତାକି ତିୟାରା ଆମୁ ଅଡେଡ଼ ଡ଼ଇ ହାଲାମୁ, ଅଡେ ଆନାମାନା ଆଆନା ଏଞ୍ଜାରିତଲେ ହାଲାମୁ, ଏନାଆଁତାକି ଇଚିହିଁ ନାନୁ ଏଞ୍ଜାରାଇଁ ପାଣ୍ଡାମାଞ୍ଜାଇଁ ।” ୨୧ ଏଚେଟିଏ ପିତର ଏ ଲକୁତାଣା ରେଟାଞ୍ଜାହାନା ଏଲେଇଚେସି, “ମୀରୁ ଆମ୍ବାଆରାଇଁ ପାରିମାଞ୍ଜେରି, ନାନୁ ଏଞ୍ଜାଡେଏଁ । ମୀରୁ ଏନାଆଁତାକି ଖାହାମାଞ୍ଜେରି ?”

୨୨ ଏଞ୍ଜାରି ଏଲେଇଚେରି, “କର୍ନଲିୟ ଦରୁଗାଟି ପାସାକଡ଼ି କସ୍‌କା ମୁହେଁ କାଜାସି ମାଜେ ପାଣ୍ଡାମାଞ୍ଜାନେସି, ଏଞ୍ଜାସି ର ସ୍ତୁ, ଦାମ୍ବୁଗାଟାସି ଇଞ୍ଜା ମାହାପୁରୁଇଁ ଆଜିନାସି, ଅଡେ ବାରେ ଜୀହୁଦି କୃତାତା ଝେଙ୍ଗିତାସି, ଏଞ୍ଜାସି ନିଜେ ତାନି ଇଜ ହାଟାନା ନୀ ଜାପୁନାଣି ଝେଞ୍ଜାଲିତାକି ମାହାପୁରୁତି ଦୁତୁ ତାଣାଟି ହୁକୁମି ବେଟା ଆହାମାନେସି ।” ୨୩ ପିତର ବିତ୍ରା ହାଟା ଅହାନା ଏଞ୍ଜାରାଇଁ ସେବା କିଡେସି । ଅର ନେରୁ ନିଜାନା ତିୟାରା ଆହାନା ଏଞ୍ଜାରିତଲେ ହାଚେସି; ଜାପତି ଏଚରଜାଣା ନାମିତି ତାୟିୟାଁ ଏଞ୍ଜାରିତଲେ ହାଚେରି । ୨୪ ଅର ନେରୁ ଏଞ୍ଜାରି କାୟିସରିୟାତା ଏଚେରି, ଏମ୍ବାଆଁ କର୍ନଲିୟ ତାନି କୁଟମି ଇଞ୍ଜା ଅଡେ ଜାଟୁତି ତଟେସିଙ୍ଗାଣି ହାଟାହାଁ କୁଡ଼ି କିହାନା ଏଞ୍ଜାରାଇଁ କାଡ଼ିମାଚେରି । ୨୫ ପିତର ବିତ୍ରା ହାଜାଲିଏ କର୍ନଲିୟ ଏଞ୍ଜାଣି କର୍ତ୍ତା ଡ଼ଇ ମୁନୁ କୁତାନା ଜହରା କିଡେସି । ୨୬ ସାମା ପିତର ତାଜେ ନିକ୍‌ହାନା ଏଲେଇଚେସି, “ନିଜାମୁ, ନାନୁ ଜିକେଏ ର ମାଣ୍ଡସିଡେଏଁ ।” ୨୭ ଏଚେଟିଏ ପିତର କର୍ନଲିୟ ତଲେ କାତା ଆହିଁ ଆହିଁ ଇଲୁ ବିତ୍ରା ହାଜାନା ଏମ୍ବାଆଁ ହାଡେକା ଲକୁ ରୁଣ୍ଡା

ଆହାମାନାଣି ମେସ୍ତେସି । ୨୮ ଅଡ଼େ ଏଝାସି ଏଝାରାଇଁ ଏଲେଇଚେସି, “ଏଟ୍‌କା କୃତାତି ଏନି ଲକୁତଲେ ଆଣ୍ଟିନାୟି କି ଏ ଲକୁ ତାଗେ ହାନାୟି ଜୀହୁଦି ଲକୁତାକି ଏନିକିହିଁ ମେରା ହିଲେଏ, ଏଦାଆଁ ମୀରୁ ନେହିଁ କିଁ ପୁଞ୍ଜାମାଞ୍ଜେରି ଆଡ଼ିଜିକେଏ ଆମିନି ଲକୁଇଁ ସୁଦୁ ହିଲୀଆ ଗାଟାରି କି ଲାଗେଏତାରି ଇଞ୍ଜିହିଁ ଇନାଆନି ଇଞ୍ଜି ମାହାପୁରୁ ନାଙ୍ଗେ ତସାମାଞ୍ଜାନେସି । ୨୯ ଏଦାଆଁତାକି ହାଟ୍‌ନିଏ ନାନୁ ଏନାଆଁ ଅଣ୍‌ପାଆନା ଝାଡ଼େଏ । ଇଦାଆଁତାକି ନାନୁ ଝେଞ୍ଜିମାଞ୍ଜାଇ, ଏନାଆଁ କିହାଲି ମୀରୁ ନାଙ୍ଗେ ହାଟାତେରି ?”

୩୦ କର୍ନଲିୟ ଏଲେଇଚେସି, “ତାନିଦିନା ନକେଏ ଇ ବେଲୀତା ମିଡ଼ତ୍‌ଲୀ ତାନି ଗଂଟା ବେଲୀ ନାନୁ ନା ଇଜ ପ୍ରାତାନା କିହିମାଚେଏ; ମେହ୍‌ମୁ ଏମ୍‌ଆଁ ଉଜେଡ଼ିଗାଟି ଦବଲୀ ହିମ୍‌ରିକା ତୁରହାମାନି ର ଲକୁ ନା ନକିତା ନିତେସି, ୩୧ ଅଡ଼େ ଏଝାସି ଏଲେଇଞ୍ଜାତେସି, ‘କର୍ନଲିୟ ! ମାହାପୁରୁ ନୀ ପ୍ରାତାନା ଝେଞ୍ଜାମାନେସି; ଇଞ୍ଜା ହିଲୀଆ ଗାଟାରାକି ନୀ ଦାନା ହାନାୟି ବାରେ ମାହାପୁରୁ ନକିତା ନେହିଁ ତଞ୍ଜା ଆହାମାନେ । ୩୨ ଇଦାଆଁତାକି ସିମନ ଦରୁଗାଟି ପିତରଇଁ ହାଟା ତାଚାଲି ଜାପତା ଲକୁଇଁ ପାଣ୍ଡାମୁ, ଏଝାସି ସାମ୍‌ଦୁରି ଗାଟୁତା ଡ଼ୟିନି ତଲ୍‌କା କାମା କିନି ସିମନ ଇଜ ଗତାଗାଟାସି ଆହାମାନେସି ।’ ୩୩ ଏଦାଆଁତାକି ଝେଡ଼ାକିଆନା ନାନୁ ନୀ ତାଣା ଲକୁ ପାଣ୍ଡାତେଏ, ଅଡ଼େ ନାନୁ ଝାହାମାଞ୍ଜି ନେହିଁ କିହାମାଞ୍ଜି, ଇଚିହିଁ ପ୍ରବୁ ନିଙ୍ଗେ ଏନାଆଁ ହୁକୁମି ହାହାମାଞ୍ଜାନେସି, ଏଦାଆଁ ଝେଞ୍ଜାଲିତାକି ମାମ୍‌ରୁରେ ମାହାପୁରୁ ନକିତା କୃତା ଆହାମାନମି ।”

### ପିତର ଜାପ୍‌ନାୟି

୩୪ ଏଚେଟିଏ ପିତର ଗୁଡ଼ି ଏକ୍‌ହାନା ଏଲେଇଚେସି, “ମାହାପୁରୁ ସାତେଏ ବାରେ ଲକୁଣି ପାର୍‌ଡ଼ା ବାଟି କିଅସି, ୩୫ ଆମିନି ଲକୁ ଏଝାଣାଇଁ ଆଜିନେରି ଅଡ଼େ ଏଝାସି ଅପିନି ଲେହେଁ ନେହିଁ କାମା କିନେରି ଏଝାରି ଆମିନି କୃତାତାରି ଇଚିହିଁ ଜିକେଏ, ଏଝାସି ଆବିନେସି । ୩୬ ଏଝାସି ଜୀସୁ କ୍ରୀସ୍ତ ତାଣାଟି ହିଡ଼ଡ଼ିତି ନେହିଁ କାବୁ ଝେସାନା ଇସ୍ରାୟେଲ ମୀରକା ନକିତା ଇ ବଲୁ ପାଣ୍ଡିତେସି; ଏ ଜୀସୁ

କ୍ରୀସ୍ତ ବାରେଡି ପ୍ରଭୁ । ୩୭ ମୀରୁ ପୁଞ୍ଜାମାଞ୍ଜେରି ଜହନ ବାପ୍ତିସ୍ମ\* କାତା ଝେକ୍‌ହି ତାଣାଟିଏ ଏ ନେହ୍ କାବୁ ଗାଲିଲିଟିଏ ମାଟ୍‌ହାନା ବାରେ ଜୀହୁଦା ରାଜିତି ଲକୁତାଣା ଝେଙ୍ଗାମାନେ, ୩୮ ଇତିହ୍ ନାଜ୍‌ରିତ ଜୀସୁତି କାତା ପୁଞ୍ଜାମାଞ୍ଜେରି, ଏନିକ୍ ମାହାପୁରୁ ଏଞ୍ଜାଣାକି ସୁଦୁଜୀଝୁ ଇଞ୍ଜା ବାଡ଼୍‌ୟୁ ହୀହାନା ବର ହୀତେସି, ଇଞ୍ଜା ନେହ୍ କାମା କିହ୍ ସୟତାନ ପାନ୍ଦାତା ଦସ୍‌ପି ଆହାମାନି ଲକୁଣି ନେହ୍ କିହ୍ ବାରେଞ୍ଜାକି ରେରେସି, ଇତିହ୍ ମାହାପୁରୁ ଏଞ୍ଜାଣିତଲେ ମାତେସି । ୩୯ ଏଞ୍ଜାସି ଜୀହୁଦି ଲକୁତି ଦେସାତା ଅଡ଼େ ଜିରୁସାଲମତା ଏନା ଏନାଆଁ କିତେସି, ମାମ୍‌ୟୁଏ ବାରେଡି ସାକି; ଏଞ୍ଜାରି ଏଞ୍ଜାଣାକ୍ ପାସି ମୁଣ୍ଡାତା ଏକ୍‌ହାନା ପାୟିତେରି । ୪୦ ସାମା ମାହାପୁରୁ ଏଞ୍ଜାଣାକ୍ ତାନି ଦିନାତା ନିକ୍‌ହେସି ଅଡ଼େ ତଞ୍ଜାଆଞ୍ଜି କିତେସି; ୪୧ ବାରେଜାଣା ତାକି ଆଏ, ଝାରଇ ମାହାପୁରୁ ଆଡିତି ସାକି, ଇତିହ୍ ମା ନକିତା ତଞ୍ଜାଆଡେସି । ମାହାପୁରୁ ଏଞ୍ଜାଣାକ୍ ହାକିଟି ନିକ୍‌ହି ଜେତ ମାମ୍‌ୟୁ ଏଞ୍ଜାଣିତଲେ ତିଟମି ଉଟମି । ୪୨ ଅଡ଼େ ଲକୁ ନକିତା ଇ ନେହ୍ କାବୁ ଝେକ୍‌ହାଲି, ଇଞ୍ଜା ହାଡାରି ଅଡ଼େ ଜୀଝୁତା ନୀତାମାନାରି ନୀହାୟି କିନାସି ଆହାଲି ମାହାପୁରୁ ଏଞ୍ଜାଣାକ୍ ଆତାମାନେସି ଇଞ୍ଜା ସାକି ହୀହାଲି ଏଞ୍ଜାସି ମାଙ୍ଗେ ହୁକୁମି ହିୟାତେସି । ୪୩ ଆମ୍‌ୟାଆସି ଏଞ୍ଜାଣି ତାଣା ନାମିନେସି, ଏଞ୍ଜାସି ଏଞ୍ଜାଣି ଦରୁତଲେ ପାପୁ ମ୍ବେପୁକି ଆନେସି, ଇଦାଆଁ ବାରେ ମାହାପୁରୁ ଅଣ୍‌ପୁତି ବଲୁ ଝେହ୍‌ନାରି ଏଞ୍ଜାଣି କାତାତି ସାକି ହୀହାମାନେରି ।”

**ଜୀହୁଦିଆଆତି ଲକୁ ସୁଦୁଜୀଝୁ ବେଟାଆନାୟି**

୪୪ ପିତର ଇ ବାରେ କାତା ଝେସିମାତି ବେଲାତା ଆନିନି ଗାଟାରି ତାନି ବଲୁ ଝେଞ୍ଜିମାତେରି, ଏ ବାରେଜାଣାତି ମୁହେଁ ସୁଦୁଜୀଝୁ ରେଟାଞ୍ଜାଡ଼େ । ୪୫ ଜୀହୁଦିଆଆତି ଲକୁତାଣା ଜିକେଏ ସୁଦୁଜୀଝୁ ରେଟା ଝାଡାଣି ମେସାନା ପିତର ତଲେ ଜାପଟି ଝାହାମାତି ତଲୁ ଦାପି ଆଡି ନାମିତି ଜୀହୁଦିୟାଁ, ଏଞ୍ଜାରି ବାରେଜାଣା କାବା ଆଡ଼େରି । ୪୬ ଇତିହ୍ ଏଞ୍ଜାରି ଏଟ୍‌କା ଏଟ୍‌କା ହାଡାତଲେ କାତା ଆହିମାତାଣି ଇଞ୍ଜା ମାହାପୁରୁତି ଜହରା କିହିମାନାଣି ଝେତେରି । ଏତିବେଲା ପିତର

\* ୧୦:୩୭ ୧୦:୩୭ ମୁଞ୍ଜିନାୟି

ଏଲେଇଚେସି । ୪୭ “ଇଝାରି ଆମିନି ଲକୁ ମା ଲେହେଁ ସୁଦୁଜୀଝୁ ବେଟାଆହାମାନେରି, ଇଝାରି ଏୟୁତଲେ ବାପ୍ପିସ୍ତା† ବେଟାଆହାଲି ଆମ୍ବାଆସି କାହି କିୟାଲି ଆଡ଼ିମାନେସି ?” ୪୮ ଇଝା, ଏଝାସି ଏଝାରାଇଁ ଜୀସୁ କ୍ରୀସ୍ତ ଦରୁତଲେ ବାପ୍ପିସ୍ତା‡ ହାହାଲି ହୁକୁମି ହୀତେସି, ତାୟୁ ଏଝାରି ଏଚରଦିନା ଡୟାଲି ଏଝାଣାଇଁ ବାତିମାଲିତେରି ।

## ୧୧

### ପିତର କାମାତି କାତା ଜିରୁସାଲମ କୁଲମିତା ଝେହ୍ନାୟି

୧ ଜୀହୁଦିଆଆତାରି ଜିକେଏ ମାହାପୁରୁତି ବଲୁ ନାମିତେରି, ଇ କାତା ପାଣ୍ଡୁଝିଆଡାରି ଇଝା ଜୀହୁଦା ରାଜିତା ମାନି ତାୟିୟାଁ ଝେଚେରି । ୨ ପିତର ଏଚିବେଲା ଜିରୁସାଲମତା ଝାଡେସି, ଏଚିବେଲା ତଲୁ ଦାପି ଆଡ଼ି ସୀସୁୟାଁ ପିତର ତଲେ ବାଦିବାଦା ଆଡେରି, ୩ “ନୀନୁ ଜୀହୁଦିଆଆତି ଲକୁ ଇଲକାଣା ହାଜାନା ଏଝାରିତଲେ ତିଝାମାଝି !” ୪ ସାମା ପିତର ଇ ବାରେ କାତାତି ମୂଲୁଟିଏ ଝେସାଲି ମାଟ୍‌ହାନା ଏଲେଇଚେସି ।

୫ “ନୀନୁ ଜାପ ଗାଡାତା ପ୍ରାଡାନା କିହିମାଚେସି, ଇଝା ସେୟାଁଣା ହାପାନାତା ମେସ୍‌ସେସି, ଏନିକିଁ ର କାଜା ହିମ୍ବରିତି ସାରି କନତା ଆସାହାଁ ଲାକପୁରୁଟି ଡଇ ରେଚା ଝାହିମାଚେ, ଅଡେ ଏଦି ନା ପାତେକା ଝାଡେ; ୬ ନୀନୁ ଏମ୍ବାଆଁ ସିନିକିହାନା ଅଣ୍‌ପାଲି ମାଟ୍‌ହେସି, ଏମ୍ବାଆଁ ଦାରତିତି ସାରିଗଟା କଡାୟାଁ ତଲେ ତାକିନି ନାସକାତି ଜନ୍ତୁ ଇଝା ଜାଡାତି ଜନ୍ତୁ ତ୍ତରିୟାଁ ରାସକା ଅଡେ ହାଗୁତି ପଟାୟାଁ ମେସ୍‌ସେସି, ୭ ଅଡେ ନାଞେ ଝେସାମାଝାନି ଇ ହାଡା ଜିକେଏ ଝେଚେସି, ‘ପିତର; ନିଙ୍ଗାମୁ, ପାୟାନା ତିନାମୁ !’ ୮ ସାମା ନୀନୁ ଏଲେଇଚେସି, ‘ଆଏ ପ୍ରବୁ ! ତୀଗାଆଗାଟି ଲାଗେଏ ପଲେଏତି କାଡି ନୀନୁ ଏଚେଲାଝା ନା ଗୁତିତା ଅହାହିଲଅଁ ।’ ୯ ସାମା ଅର ଦେବା ଲାକପୁରୁଟି ଇ ହାଡା ଝେସ୍‌ସାତେ, ‘ମାହାପୁରୁ ଏନାଆଁ ସୁଦୁ କିହାମାନେସି, ଏଦାଆଁ ନୀନୁ ଲାଗେଏତାୟି ଇନାଆନି ।’ ୧୦ ଇଲାଆହୁଁ ତୀନି ପାଲି ଆଡେ, ଅଡେ ତାୟୁ ଏ ବାରେ ଝେଶ୍‌ଶେ ଲାକପୁରୁ ଅଝିଆଡେ । ୧୧ ଅଡେ ମେହ୍‌ଦୁ, ଦେବୁଣିଏ ତୀନି ଜାଣା ଲକୁ ମାମ୍ବୁ ଆମିନି ଇଲୁତା ମାଚମି

† ୧୦:୪୭ ୧୦:୪୭ ମୁଞ୍ଜିନାୟି ‡ ୧୦:୪୮ ୧୦:୪୮ ମୁଞ୍ଜିନାୟି



ଏମ୍ବାଆଁ ଖାହାନା ନିତେରି, ଏଞ୍ଜାରି କାୟିସରିୟାଟିଏ ନା ତାଣା ପାଣ୍ଡୁଞ୍ଜି ଆହାମାତେରି । ୧୭ ଇଞ୍ଜା ଆନାମାନା ଆଆନା ଏଞ୍ଜାରିତଲେ ହାଜାଲି ଜୀଞ୍ଜୁ ନାଞ୍ଜେ ଖେସ୍ତାତେ, ଅଡ଼େ ଇ ସ ଜାଣା ତାୟିୟା ଜିକେଏ ନା ତଲେ ଜାପଟି କାୟିସରିୟାତା ଖାଡ଼େତରି, ଇଞ୍ଜା ମାମ୍ବୁ ଏ କର୍ନଲିୟ ଇଜ ହାଟମି । ୧୮ ଏଞ୍ଜାସି ଏନିକ୍ ର ଦୁତୁଇଁ ସେୟାଣା ହାପାନାତା ମେସାମାତେସି, ଏଦାଆଁ ମାଞ୍ଜେ ଖେସ୍ତାତେସି, ଏ ଦୁତୁ ଏନିକ୍ ଏଞ୍ଜାଣି ଇଜ ନିଚାନା ଖେସ୍ତେ, ଜାପତା ଲକୁଣି ପାଣ୍ଡାନା ପିତର ଇନି ସିମନଇଁ ହାଟାତାମ୍ବୁ; ୧୯ ଏଞ୍ଜାସି ମିଞ୍ଜେ ଖେସ୍ତାନି କାତାତଲେ ‘ମୀରୁ ଅଡ଼େ ମୀ ବାରେ କୁଟମି ଗେଲ୍ପି ଆଡ଼େରି ।’ ୧୫ ତାୟୁ ନାନୁ ଜଲ୍ଲାଇ ମାଟ୍ଟହାଲିଏ ସୁଦୁଜୀଞ୍ଜୁ ମା ଲାକ ଏନିକ୍ ରେଚାଞ୍ଜାଡ଼େ, ଏଲେକ୍ ଏଞ୍ଜାରି ଲାକ ଜିକେଏ ରେଚାଞ୍ଜାଡ଼େ । ୧୬ ଏଟିବେଲା ପ୍ରୁ ଖେସ୍ତି ଇ ହାଡା ନା ଅଣ୍ପୁତା ଖାଡ଼େ; ‘ଜହନ ଏୟୁତଲେ ବାପ୍ତିସ୍ତା\* ହାଡେସି ସାତା, ସାମା ମୀରୁ ସୁଦୁଜୀଞ୍ଜୁ ତଲେ ବାପ୍ତିସ୍ତା† ଆଡ଼େରି ।’ ୧୭ ଇଟିହିଁ ମାର ପ୍ରୁ ଜୀସୁ କ୍ରୀସ୍ତ ତାଣା ନାମିତି ବେଲାତା ମାହାପୁରୁ ଏନିକ୍ ମାଞ୍ଜେ ଆମିନି ଦାନା ହାହାମାଞ୍ଜାତେସି, ଏଲେକିହିଁ ଏ ଏଞ୍ଜାରାକି ଜିକେଏ ସମାନା ଦାନା ହାଡେସି; ନାନୁ ଆମ୍ବାଆତେଏଁ ମାହାପୁରୁଇଁ କାହି କିହାଲି ଆଡ଼ିଇଁ !”

୧୮ ଏଞ୍ଜାରି ଇ ବାରେ କାତା ଖେଞ୍ଜାଲିଏ ଏଞ୍ଜାରି ପାଲେଏ ଆଡେତରି, ଇଞ୍ଜା ମାହାପୁରୁଇଁ ଜହରା କିହିଁ ଏଲେଇଚେରି, “ଆଡିହିଁ ମାହାପୁରୁ ଜୀହୁଦିଆଆଡି ଲକୁକି ଜିକେଏ ହିୟା ଖେଟ୍ଟହାଲି ଅଡ଼େ ନୀତାଲି ପାରୁ ହାହାମାନେସି ।”

**ଆକ୍ତିୟକିୟା କୁଲମି**

୧୯ ଏଚେଟିଏ ସ୍ତିପାନ ହାଡି ତାୟୁ, ଏଚେକା ନାମୁଗାଟାରି କସ୍ତ ନିୟା ଆଡାକି ଆଲାଚା ଆହାମାଚାରି ବିତ୍ରାଟି, ପୟିନିକିୟା, କୁପ୍ର ଅଡ଼େ ଆକ୍ତିୟକିୟା ପାତେକା ରେଜାନା ଖାର୍ଇ ଜୀହୁଦି ଲକୁ ପିସ୍ପେ ଅଡ଼େ ଆମ୍ବାଆରି ତାଣା ନେହିଁ କାରୁ ଖେସିହିଲିଆଡେତରି । ୨୦ ସାମା ଏଞ୍ଜାରି ବିତ୍ରାଟି ଏଚରଜାଣା କୁପ୍ର ଅଡ଼େ କୁରିଣିୟ ଲକୁ ଆକ୍ତିୟକିୟା ଖାହାନା

---

☆ ୧୧:୧୭ ୧୧:୧୭ କାମା ୧:୫ \* ୧୧:୧୭ ୧୧:୧୭ମୁଞ୍ଜିନାୟି † ୧୧:୧୭ ୧୧:୧୭ମୁଞ୍ଜିନାୟି ☆ ୧୧:୧୯ ୧୧:୧୯ କାମା ୮:୧-୪

ଗ୍ରିକ୍ ଲକ୍ଷ୍ମୀତାଣା ଜିକେଏ କାତା ଝେସିହିଁ ପ୍ରବୁ ଜୀସୁତି ନେହିଁ କାବୁ  
ଝେକ୍‌ହେରି । ୨୧ ଅଡ଼େ, ଏଝାରିତଲେ ପ୍ରବୁତି ବାଡ଼ୟୁ ମାତେ, ଅଡ଼େ  
ହାରେ ହାରେକା ଲକ୍ଷ୍ମୀ ନାମାହିଁ ପ୍ରବୁ ଝାକି ଝେଶ୍ଵାଝାଡ଼େରି ।

୨୨ ଏଝାରି ହାଡ଼ା ଜିରୁସାଲମତି କୁଲମିତା ଏଗାହାତେ, ଏମ୍ବାଟିଏ  
ଏଝାରି ଆନ୍ତିୟକିୟା ପାତେକା ବର୍ନବାଇଁ ପାଶ୍ଵାତେରି । ୨୩ ଏଝାସି  
ଏମ୍ବାଆଁ ଏଜାନା ମାହାପୁରୁତି କାର୍ମାମେସାନା ରାହିଁ ଆଡ଼େସି, ଇଞ୍ଜା  
ଏଝାରି ଏନିକ୍‌ ହିୟାତା ରଶ୍ଵିଏ ରାହିଁତଲେ ପ୍ରବୁ ତାଣା ମାନାପେରି  
ଇଞ୍ଜା ଏଝାରାକି ବାର୍ସୁ ହାତେସି । ୨୪ ବର୍ନବା ର ନେହିଁ ଲକ୍ଷ୍ମୀ,  
ନାମୁତା ଇଞ୍ଜା ସୁଦୁଜୀଝୁ ବେଟାଆହାମାନାସି ମାତେସି, ଇଞ୍ଜା ଇଲେତି  
ବଲୁ ଝେକ୍‌ନି ତାଣା ହାରେକା ଲକ୍ଷ୍ମୀ ପ୍ରବୁ ତାଣା ଆଣ୍ଡିତେରି ।

୨୫ ତାୟୁ ବର୍ନବା ସାଝୁଲଇଁ ପାରାଲି ତାର୍ସ ଗାଡ଼ାତା ହାତେସି,  
୨୬ ଇଞ୍ଜା, ଏଝାସି ଏଝାଶାଇଁ ବେଟାଆହାନା ଆନ୍ତିୟକିୟାତା ତାତିହିଁ  
ଝାଡ଼େସି, ଏଝାରି ର ବାର୍ସା ପାତେକା କୁଲମି ତଲେ ମାଞ୍ଜାନା ହାରେକା  
ଲକ୍ଷ୍ମୀ ଜାପ୍‌ହେରି, ଅଡ଼େ ଆନ୍ତିୟକିୟାତି ସୀସୁୟା ତଲିଏ କ୍ରୀସ୍ତାନା  
ଇଞ୍ଜା ଝେଞ୍ଜିତେରି ।

୨୭ ଏରିବେଲାତା ଏତରଜାଣା ମାହାପୁରୁ ଅଶ୍ଵପୁତି ବଲୁ ଝେହ୍‌ନାରି  
ଜିରୁସାଲମତି ଆନ୍ତିୟକିୟାତା ଝାଡ଼େରି । ୨୮ ଏଝାରି ବିତ୍ରାଟି ଆଗାବ  
ଦରୁଗାଟି ର ଲକ୍ଷ୍ମୀ ନିଜାନା ବାରେ ଦାର୍ଡିତା କାଜା କାଡ଼ାରା ଆନେ  
ଇଞ୍ଜା ଜୀଝୁତି ବାଡ଼ୟୁ ତଲେ ଝେସେସି; ଏଦି କ୍ଲାଝୁଦିୟା ସାଲଝି  
କିନାଣି ବେଲାତା ଆଡ଼େ । ୨୯ ଏମ୍ବାଟିଏ ସୀସୁୟା ତାମ୍ବୁଡ଼ାମି ଆଡ଼ିନି  
ଲେହେଁ ଜୀହୁଦା ରାଜିତା ମାନି ନାମିତି ତାୟିୟାକି ସାୟେମି କିୟାଲି  
ତୀରି କିତେରି, ୩୦ ଅଡ଼େ, ଏଝାରି ଜିକେଏ ଟାକାୟା କୁଡ଼ି କିହାନା  
ଏ କୁଲମିତି ପ୍ରାଟିନାଜା କେୟୁତା ହାହାଲି ବର୍ନବା ଅଡ଼େ, ସାଝୁଲ  
କେୟୁତା ଟାକାୟା ପାଣ୍ଡିତେରି ।

## ୧୨

### ହାରେକା ସାସ୍ତି ପାଶ୍ଵନାୟି

<sup>୧</sup> ଏଚିବେଲାତା ରାଜା ହେରଦ କୁଲମିତି ଏଚର ଜାଣାଇଁ ସାସ୍ତି ହୀହାଲି ମାଟ୍‌ହେସି । <sup>୨</sup> ଏଞ୍ଜାସି ଜହନତି ତାୟି ଜାକୁବଇଁ କାଣ୍ଡାତଲେ ପାୟି କିତେସି । <sup>୩</sup> ଅଡ଼େ, ଜୀହୁଦି ଲକୁ ଏଞ୍ଜାଣି ତାକି ରାହାଁ ଆହାମାନାଣି ମେସାନା ଏଞ୍ଜାସି ପିତରଇଁ ଜିକେଏ ଆସେସି, ଏଚିବେଲାତା ପୁଲା ଆଣ୍ଡାଆତି ରୁଟି ତିନି ପାର୍ବୁ ମାଚେ । <sup>୪</sup> ଏଚେଟିଏ ଏଞ୍ଜାସି ପିତରଇଁ ଦସ୍‌ପାନା କାୟିଦି ଇଲୁତା ଇଟିତେସି, ଇଞ୍ଜା ପିସ୍‌ପିଆନି ପାର୍ବୁ ରାଡି ତାୟୁ ଏଞ୍ଜାଣାଇଁ ବାରେ ଲକୁ ନକିତା ତାଚାଲି ଅଣ୍‌ପାନା ଏଞ୍ଜାଣାଇଁ କାଚାଲି ସାରି ଜାଣା ଲାକା ସାରି ଗଟି କସ୍‌କା କେୟୁତା ହେରପିତେସି । <sup>୫</sup> ପିତରଇଁ କାୟିଦିତା ସୁଣ୍ଡିତେରି, ସାମା ଏଞ୍ଜାଣି ତାକି କୁଲମି ରଣ୍ଡିଏ ହିୟାଁ ତଲେ ମାହାପୁରୁ ତାଣା ପ୍ରାତାନା କିହିମାଚେରି ।

### ପିତର କାୟିଦି ଇଲୁଟି ଗେଲ୍‌ପି ଆନାୟି

<sup>୬</sup> ତାୟୁ ହେରଦ ଆମିନି ଦିନା ପିତରଇଁ ହପ୍‌ହାଲି ଅଣ୍‌ପାମାଚେସି, ଏ ନେରୁ ଲାଆଁୟାଁ ପିତର ରୀ ହିକ୍‌ଣିୟାଁ ତଲେ ଦସ୍‌ପି ଆହାନା ରୀ କସ୍‌କା ମାଦି ତୁରାମାଚେସି, ଅଡ଼େ କାଃଆନାରି କାୟିଦି ଇଲୁ ଦୁଝେରିତା କାଚାମାଚେରି । <sup>୭</sup> ଅଡ଼େ ମେହ୍‌ଦୁ, ଦେବୁଣିଏ ପ୍ରବୁତି ର ଦୁତୁ ଏମ୍‌ଆଁ ତଞ୍ଜାଆଡ଼େ, ଇଞ୍ଜା ଇଲୁ ବିତ୍ରା ଉଜେଡ଼ି ଆହାହାଚେ, ଅଡ଼େ ପିତରଇଁ ବମିତା ତୀଗାହାଁ ନିକ୍‌ହାନା ଏଲେଇଚେ, “ତବେ ନିକ୍‌ମାମୁ,” ଏମ୍‌ାଟିଏ ଏଞ୍ଜାଣି କେସ୍‌ାତି ହିକ୍‌ଣିୟାଁ ହୁଞ୍ଜାହାଚୁ । <sup>୮</sup> ଏଚେଟିଏ ଦୁତୁ ଏଞ୍ଜାଣାଇଁ ଏଲେଇଚେ, “ଚେତେଲି ରୁପା କଡାମୁ ଇଞ୍ଜା ସେପୁୟାଁ ତୁରମୁ” ଇଞ୍ଜା ପିତର ଏଲେକିତେସି, ଅଡ଼େ ଦୁତୁ ଏଲେଇଚେ, “ନୀ ହିମ୍‌ରି ପର୍‌ହାନା ନା ଜେଚ ଜେଚ ଖାମୁ ।” <sup>୯</sup> ପିତର ହଚାନା ଏଞ୍ଜାଣି ଜେଚ ଜେଚ ହାଚେସି; ସାମା ଦୁତୁ ତାଣାଟି ଏନାଆଁ କିଞ୍ଜିଆଡ଼େ, ଏଦି ସାତେଏ ଏଦାଆଁ ପୁନାଆନା ଏଞ୍ଜାସି ହାପାନା ହେଣ୍ଡିମାଇଁ ଇଞ୍ଜା ଅଣ୍‌ପିମାଚେସି । <sup>୧୦</sup> ଏଚିବେଲାତା ଏଞ୍ଜାରି ନକିତି ଅଡ଼େ ଏଦାଣି ତାୟୁ କାଚାମାଚାରାଇଁ ଗାଣ୍ଡାଚାନା ଆମିନି ଲହ୍ ଦୁଝେରି ହୀହାନା ଗାଡାତା ହଡାଲି ଆନେ, ଏଦାଆଁ ତାଗେ ଖାହାଲିଏ, ଏଚେତା ଏ ଦୁଝେରି ତାନୁ ତାନୁଏ ଏଞ୍ଜାରାକି ଦେପି ଆହାହାଚେ, ଅଡ଼େ ଏଞ୍ଜାରି

ହଟା ହାଜାନା ର ଆଂଗେଣି ମୁଟ୍‌ହାମାନି ପାତେକା ହାଚେରି, ଇଞ୍ଜା ଦେବୁଣିଏ ଏ ଦୁତୁ ଏଝାଣାଲ୍ ପିସା ହାଚେ ।

୧୧ ଏଚେଟିଏ ପିତର ସେଡନା ଆହାନା ଏଲେଇଚେସି, “ପ୍ରବୁ ତାନି ଦୁତୁଲ୍ ପାଣ୍ଡାନା ହେରଦ କେୟୁଟି ଅଡ଼େ ବାରେ ଜୀହୁଦି ଲକୁ ଅଣ୍‌ପିମାଟି ତାଣାଟି ପିସ୍‌ପି କିହାଁ ମାଞ୍ଜାନେସି, ଇଦାଆଁ ନୀଏଁ ନାନୁ ସାତେଏ ପୁଚେଏଁ ।”

୧୨ ଏଝାସି ଇ କାତା ଅଣ୍‌ପିହ୍ ମାର୍କ ଦରୁଗାଟି ଜହନ ତାନି ଇୟା ମରିୟମନି ଇଜ ହାଚେସି; ଏମ୍‌ଆଁ ହାଚେକା ଲକୁ ରୁଣ୍ଡା ଆହାନା ପ୍ରାତାନା କିହିମାଚେରି । ୧୩ ପିତର ପାଙ୍ଗାଟି ଦୁଝେରିତା ଝେଚାଲିଏ, ରଦା ଦରୁଗାଟି ର ହ୍‌ଲେଣି ଆମ୍‌ଆଆତେରି ଇଞ୍ଜା ଝେଞ୍ଜାଲି ହାଚେ । ୧୪ ଏଦି ପିତରତି ହାଡ଼ା ଝେଞ୍ଜାନା ରାହାଁତାକି ଦାରା ଦେଝଆନା ବିତ୍ରା ଦାବ୍‌ଡି ହାଜାନା ଦାରା ତାକିତା ପିତର ନିଚାମାନେସି ଇଞ୍ଜା ଝେସ୍ତେ । ୧୫ ଏଝାରି ଏଦାନି ଏଲେଇଚେରି, “ନୀନୁ ବାୟା ଆଡ଼ିକି ଇଞ୍ଜା ଇଚେରି,” ସାମା ଏଦି ଏଦାଆଁ ସାତା ଇଞ୍ଜା ଗାଡ଼ିକିହ୍ ଝେସ୍ତେ, ଇଞ୍ଜା ଏଝାରି ଏଲେଇଚେରି, “ଏଦି ଏଝାଣି ଦୁତୁ ।”

୧୬ ସାମା ପିତର ଦାରାତା ଅଲେ ଅଲେ ଝେଟିମାଚାକି, ଏଝାରି ଦାରା ଦେଚାନା ଏଝାଣାଲ୍ ମେସାନା କାବା ଆଡ଼େରି । ୧୭ ସାମା ଏଝାସି ଏଝାରାଲ୍ ପାଲେଏ ମାଞ୍ଜାଲି କେୟୁ ଜୀଞ୍ଜିଚେସି, ଇଞ୍ଜା ପ୍ରବୁ ଏଝାଣାଲ୍ ଏନିକ୍ କାୟିଦି ଇଲୁଟି ହ୍‌ପ୍‌ହା ତାଚେସି ଏଝାରାଲ୍ ଝେସ୍ତେସି, ଅଡ଼େ ଏଝାସି ଏଲେଇଚେସି “ଇ ବାରେ କାତା ଜାକୁବ ଅଡ଼େ ବାରେ ନାମିତି ତାୟିୟାଲ୍ ଝେହ୍‌ଦୁ,” ଇଞ୍ଜା ଏଝାସି ତାକିହ୍ ଅର ଗାୟୁତା ହାଜାତୁସ୍ତେସି ।

୧୮ ଲାକ୍ ଝେୟାଲିଏ ପିତର ଆନ୍ଦିୟା ହାଚେସି ଇଞ୍ଜା କାପୁ କାଝଆନି କସ୍‌କା କାବାଆହାନା ହାଚେକା ବିଲ୍‌କି ଆଡ଼େରି ? ୧୯ ଅଡ଼େ, ହେରଦ ଏଝାଣାଲ୍ ପାରି କିହାନା ପ୍ଲୁଝଆଲିଏ, କାପୁ କାଝନାରାଲ୍ ଝେଟି ତାୟୁ, ଏଝାରାଲ୍ ପାୟାଲି ହୁକୁମି ହାଚେସି । ଏଦାଆଁ ତାୟୁ ହେରଦ ଜୀହୁଦା ରାଜିଟି କାୟିସରିୟାତା ହାଜାନା ଏମ୍‌ଆଁ ଡ଼ୟିଚେସି ।

ହେରଦ ହାନାୟି

୨୦ ଏଚିବେଲା ହେରଦ ସର ଅଡ଼େ ସିଦନତି ଲକୁତାକି ଆଜିହପେତି କପା ଆହାମାଚେସି, ଅଡ଼େ ଏଞ୍ଜାରି ରଣ୍ଡିଏ କାତା ଆହାନା ଏଞ୍ଜାଣି ତାଣା ଖାଡ଼େରି, ଇଞ୍ଜା ରାଜା ଇଲୁତି ବ୍ଲାସ୍ତସ୍ ଇନି ସାଲୁଝି କିନାଣାଈଁ ତାମି ଖାକି କିହାନା, ରାଜାଈଁ ହିଡ଼ଡ଼ି ତାକି ବାଡ଼ିମାଲିତେରି, ଇଚିହଁ ହେରଦ ରାଜା ଦେସାଟି ସର ଅଡ଼େ ସିଦନ ଦେସାତା ଆନାଁ ହାଜିମାଚେ ।

୨୧ ଏଚେଟିଏ ହେରଦ ତାରିକିତି ଦିନାତା ରାଜା ହୁଚିନି ହିମ୍ବୁରିକା ହୁଚାନା ସିଂଗାସାଣିତା କୁଗାନା ଲକୁ ନକିତା ର କାତା ଖେସ୍ତେସି; ୨୨ ଏଚେଟିଏ ଲକୁ କାଲୁଝି ଆହଁ ଏଲେଇଚେରି, “ଇଦି ମାହାପୁରୁତି ଗିୟାଁ, ମାଣ୍ଡସିତି ଗିୟାଁ ଆଏ !” ୨୩ ଏ ଦେବୁଣିଏ ପ୍ରବୁତି ର ଦୂତୁ ହେରଦଈଁ ତାଗିତେ, ଇଚିହଁ ଏଞ୍ଜାସି ମାହାପୁରୁଈଁ ଜହରା କିଆଚେସି, ଇଞ୍ଜା ଏଞ୍ଜାଣାଈଁ ପିଡ଼ୁଲୁଲି ତିଞ୍ଜାଲିଏ ଏଞ୍ଜାସି ହାଡ଼େସି ।

୨୪ ସାମା ମାହାପୁରୁତି ବଲୁ ପାତାଆହାନା ହାରେକା ଖେଞ୍ଜିତେ ।

୨୫ ତାୟୁ ବର୍ନବା ଅଡ଼େ ସାଞ୍ଜୁଲ ତାମି ସେବା କାମା ରାପୁହାନା ଜହନ ଈନି ମାର୍କଈଁ ତଡ଼ କୁହାନା ଜିରୁସାଲମଟି ଖେଣ୍ଡା ହାଚେରି ।

## ୧୩

### ବର୍ନବା ଅଡ଼େ ସାଞ୍ଜୁଲଈଁ ଆଚାନା ପାଣ୍ଡିନାୟି

୧ ଏଚିବେଲା ଆନ୍ତିୟକିୟାତି କୁଲମିତା ବର୍ନବା, ସିମିୟନ କାଡ଼ିୟା ଈନାସି, କୁରିଣି ଦେସାତି ଲୁକିୟ, ହେରଦ ରାଜା ତାୟିଲେହେଁ ପାତାଆତି ମନହେମ ଅଡ଼େ ସାଞ୍ଜୁଲ, ଆନ୍ତିୟକିୟାତା ମାଟି କୁଲମିତା ମାହାପୁରୁ ଅଣପୁତି ବଲୁ ଖେହ୍ନାରି ଅଡ଼େ ଜାପୁନାରି ମାଚେରି । ୨ ଏଞ୍ଜାରି ପ୍ରବୁତି ସେବା ଅଡ଼େ ଉପାସା କିହିମାଚାଟି, ସୁଦୁଜୀଞ୍ଜୁ ଏଞ୍ଜାରାଈଁ ଏଲେଇଚେ, “ନାନୁ ଆମିନି କାମାତାକି ବର୍ନବା ଅଡ଼େ ସାଞ୍ଜୁଲଈଁ ହାଚାନାଈଁ, ଏ କାମାତାକି ଏଞ୍ଜାରାଈଁ ଏଚକା କିଦୁ ।”

୩ ଏଚେଟିଏ ଏଞ୍ଜାରି ଉପାସା ଅଡ଼େ ପ୍ରାତାନା କିତି ତାୟୁ ଏଞ୍ଜାରି ତାର୍କାଣା କେସ୍ନା ଈଚାନା ଏଞ୍ଜାରାଈଁ ହେରପାନା ପାଣ୍ଡିତେରି ।

### କୁପ୍ରତା କାମା

୪ ଇଲେଆହୁଁ ବର୍ନବା ଅଡ଼େ ସାଞ୍ଜୁଲ ସୁଦୁଜୀଞ୍ଜୁ ତଲେ ପାଣ୍ଡୁଞ୍ଜି ଆହାନା ସେଲୁକିୟାତା ହାଚେରି; ଇଞ୍ଜା ର ସାମ୍ବୁରି ଜାଜାତା ହଚାନା କୁପ୍ରତା ହାଚେରି । ୫ ଏଞ୍ଜାରି ସାଲମି ଗାଡ଼ାତା ଏଗାହାଜାଲିଏ ଜୀହୁଦି ଲକୁତି ବାରେ ଜୀହୁଦି ଲକୁତି କୁଟମି ଇଲ୍‌କାଣା\* ମାହାପୁରୁତି ବଲୁ ଝେକହାଲି ମାଟହେରି; ଅଡ଼େ, ଜହନ ମାର୍କ ଜିକେଏ ସାୟେମି କିୟାଲି ଏଞ୍ଜାରିତଲେ ମାଚେସି ।

୬ ଇଞ୍ଜା ଏଞ୍ଜାରି ଏ ଦେସା ମାଦିଟି ରେଜିହୁଁ ପାପସ୍ ଗାଡ଼ାତା ହାଚେରି; ଏମ୍ପାଆଁ ଏଞ୍ଜାରି ବାର୍-ଜୀସୁ, ଦରୁଗାଟି ର ଜୀହୁଦି ଗାରଡ଼ି ଗାଟାଣାଇଁ ବେଟାଆଡେରି, ଏଞ୍ଜାସି ମିଟି ମାହାପୁରୁ ବଲୁ ଝେହନସି । ୭ ଏ ଦେସା ସାଲଞ୍ଜି କିନି ସେଗର୍‌ୟ ପାଞ୍ଜୁଲ ତଲେ ମାଚେସି, ଏ ସାଲଞ୍ଜି କିନାସି ର ରୁଦିଗାଟାସି, ଏଞ୍ଜାସି ସାଞ୍ଜୁଲ ଅଡ଼େ ବର୍ନବାଇଁ ହାଟି କିହାନା ମାହାପୁରୁତି କାତା ଝେଞ୍ଜାଲି ଅଣ୍ପିମାଚେସି । ୮ ସାମା ଏ ଗାରଡ଼ିଗାଟି “ଏଲିମା” ଇଦି ଗ୍ରିକ୍ ଦରୁ ଏ ସାଲଞ୍ଜି କିନାଣାଇଁ ନାମୁଟି ପିସପିକିନି ଅଣ୍ପୁ ତଲେ ଏଞ୍ଜାରାଇଁ ବାଦା ହାଚେସି । ୯ ସାମା ସାଞ୍ଜୁଲ ଆମ୍ପାଆରାଇଁ ପାଞ୍ଜୁଲ ଜିକେଏ ଇନେରି, ସୁଦୁଜୀଞ୍ଜୁଟି ନେଞ୍ଜାନା; ଏଲିମାଇଁ ସିନିକିଚେସି, ୧୦ ଅଡ଼େ ଏଲେଇଚେସି, “ଆଡ଼େ ସୟତାନ ମୀର୍‌ଏଶାଟି, ବାରେଲେହେଟି ନାଡ଼ିକିନି ଲାଗେଏତି ଅଣ୍ପୁତା ନେଞ୍ଜାମାନାତି, ଅଡ଼େ ବାରେ ନେହୁଁ କାମାତି ସାତୁ, ନୀନୁ ପ୍ରୁତି ସଲକ ଜିରୁତି ଲାଗେଏ କିହାଲି ପିହୁଅତି କି ? ୧୧ ଅଡ଼େ ନୀଏଁ ମେହମୁ ପ୍ରୁତି କେୟୁ ନୀ ଲାକ ମାନେ; ଇଞ୍ଜା ନୀନୁ କାଣା ଆହାନା ଗାଡ଼େକା ତାକି ଝେଡ଼ାତି ଉଜେଡ଼ି ମେହୁଅତି ।” ଏ ଦେବୁଣିଏ ଏଲିମା କାଣକାତା ଦୁହା ପଜିତି ଲେହେଁ ଆଡେ ଇଞ୍ଜା ତାନି କେୟୁ ଆସାଁ ଜିରୁ ତସାଲି ରଅଣାଇଁ ପାରୀଚେସି । ୧୨ ଇଦାଆଁ ମେସାନା ସାଲଞ୍ଜି କିନାସି ପ୍ରୁତି ଜାମ୍‌ନାଣି ଝେଞ୍ଜାନା କାବାଆହାନା ନାମିଚେସି ।

### ପିସିଦିୟାତି ଆନ୍ତିୟକିୟାତା କାମା

୧୩ ତାୟୁ ପାଞ୍ଜୁଲ ଅଡ଼େ ତାନି ତଢେସିଜା ପାପସଟିଏ ସାମ୍ବୁରି ଜିରୁଟି ହାଜାନା ପଂପୁଲିୟା ଗାଡ଼ାତି ପଗର୍‌ତା ଝାଡେରି; ସାମା ଜହନ ମାର୍କ ଏଞ୍ଜାରାଇଁ ପିସାନା ଜିରୁସାଲମତା ଝେଣ୍ଡାହାଚେସି । ୧୪ ଏଞ୍ଜାରି

\* ୧୩:୫ ୧୩:୫ ସିନଗଗ

ପର୍ବଟି ହାଜାନା ପିସିଦିୟାତି ଆନ୍ତ୍ରିୟକିୟାତା ଏଗାହାଚେରି, ଅଡ଼େ ଜନିନି ଦିନା ଜୀହୁଦି ଲକୁଡି କୁଟମି ଇଲୁତା† ହାଜାନା କୁରିତେରି । ୧୫ ଅଡ଼େ, ମସା ରାଡିତି ମେରା ଇଞ୍ଜା ମାହାପୁରୁ ଅଣ୍ପୁଡି ବଲୁ ଖେହ୍ନାରି ପତି ପଡ଼ୁଞ୍ଜି ଆଡି ତାୟୁ, ପ୍ରାଡାନା ଇଲୁଡି କାଜାରି ଏଞ୍ଜାରିତାଣା ଏଲେଇଞ୍ଜି ଖେସା ପାଣ୍ଡିତେରି; “ତାୟିୟା, ଲକୁଡାକି ବାର୍ସୁ ହାନି କାତା ମାଟିହିଁ ଖେହ୍ନୁ ।”

୧୬ ଏଚେଟିଏ ପାଞ୍ଜୁଲ ନିଚାନା ଲକୁଣି କେୟୁ ତସିହିଁ ଏଲେଇଚେସି; “ଇସ୍ରାୟେଲ ଲକୁଡେରି ଇଞ୍ଜା ଜୀହୁଦିଆଆତି ଲକୁଡେରି ଅଡ଼େ ମାହାପୁରୁଇଁ ଆଜିନେରି ନା କାତା ଖେଞ୍ଜୁ ।” ୧୭ ଇ ଇସ୍ରାୟେଲ କୁଡାତି ମାହାପୁରୁ ମା ଆକୁ ଆବାୟାଣି ଆଡିତେସି, ଅଡ଼େ ଏଞ୍ଜାରି ମିସର ଦେସାତା ବାସା କିହାମାନି ବେଲାତା, ଏଞ୍ଜାରାଇଁ ପାତି କିତେସି, ଇଞ୍ଜା ବାଡ଼ୟୁ ଗାଟି କେୟୁତଲେ ଏଞ୍ଜାରାଇଁ ହପ୍ତହା ତାତେସି, ୧୮ ତାୟୁ ରୀ କଡ଼ି ବାର୍ସା ପାତେକା ବାଃଲି ବାଗାତା ଏଞ୍ଜାସି ଏଞ୍ଜାରି ଲେନ୍ଦିନାଣି ଅରୁହିତେସି । ୧୯ ଏଞ୍ଜାସି କିଶାନ ଦେସାତି ସାଡାଗଟା କୁଡାତି ଲକୁଣି ନାସା କିହାନା ତାନି ଆଡାମାନି ଲକୁକି ଏ ଦେସାତି ଅଦିକାରା ହୀତେସି ।

୨୦ ସାରି ଖାଞ୍ଜା ରୀ କଡ଼ି ଦସ ବାର୍ସା ବିତ୍ରା ଇ ବାରେ ଆଡେ । ଏଚେଟିଏ ମାହାପୁରୁ ଅଣ୍ପୁଡି ବଲୁ ଖେହ୍ନି ସାମୁୟେଲ ପାତେକା ବିଚାରା କିନାରାଇଁ ଆଡିତେସି । ୨୧ ଏମ୍ବାଟିଏ ଏଞ୍ଜାରି ର ରାଜାଇଁ ହିୟାମୁ ଇଞ୍ଜା ରୀସାଲିଏ ମାହାପୁରୁ ରୀ କଡ଼ି ବାର୍ସା ପାତେକା ବିନ୍ୟାମିନ୍ କୁଡାତି କିସ୍ ମୀରଏସି ସାଞ୍ଜୁଲଇଁ ରାଜା ଆହାଲି ହୀତେସି । ୨୨ ତାୟୁ ମାହାପୁରୁ ଏଞ୍ଜାଣାଇଁ ରାଜା ପାଣା ପିସ୍ପି କିହାନା, ଏଞ୍ଜାରି ରାଜା ଆହାଲିତାକି ଦାଞ୍ଜୁଦଇଁ ଆଡିତେସି, ମାହାପୁରୁ ଜିକେଏ ଏଞ୍ଜାଣି କାତା ସାକି ହୀହାନା ଏଲେଇଚେସି; “ନାନୁ ଜିସି ମୀରଏସି ଦାଞ୍ଜୁଦଇଁ ବେଟାଆହାମାଇଁ, ଏଞ୍ଜାସି ନା ହିୟାତି ଅଣ୍ପୁ ଲେହେତାସି, ଏଞ୍ଜାସି ବାରେ କାତାତା ନା କାତା ମାନୁଞ୍ଜି ଆନେସି ।” ୨୩ ଏଞ୍ଜାଣି କୁଡାତି ମାହାପୁରୁ ଆଞ୍ଜାମାଟି ଲେହେଁ ଇସ୍ରାୟେଲ ଲକୁଡାକି ର ଗେଲ୍ପିନାଣାଇଁ ଇଡିହିଁ ଜୀସୁଇଁ ଜାନି କିହାମାନେସି । ୨୪ ☆ଜୀସୁ

† ୧୩:୧୪ ୧୩:୧୪ ସିନଗର ☆ ୧୩:୨୪ ୧୩:୨୪ ମାର୍କ ୧:୪; ଲୁକ ୩:୩

ତାନି କାମା ମାତୁନି ନକେଏ, ଜହନ ଇସ୍ରାୟେଲତି ବାରେ ଲକୁ ନକିତା ପାପୁଟି ଖେଣ୍ଡିନି କାତା ଅଡ଼େ ବାପ୍ତିସ୍ତା ଅନି କାତା ଖେକହା ମାତେସି । ୨୫ ✨ଅଡ଼େ ଜହନ ତାନି କାମା ରାପ୍ତୁହିମାଟି ବେଲାତା ଲକୁଣି ଏଲେଇଚେସି, “ନାଙ୍ଗେ ମୀରୁ ଆମ୍ବାଆସି ଇଞ୍ଜି ଅଣ୍ଡିମାଞ୍ଜାଦେରି ନାନୁ ଏଞ୍ଜାତେଏ ଆଏ, ସାମା ମେହ୍ଦୁ ନା ତାମୁ ରଅସି ଖାହିମାନେସି, ଏଞ୍ଜାଣି କତାତି ସେପୁୟା ହୁକହାଲି ନାନୁ ଜଗେ ଆଅଁ ।”

୨୬ ଏ ତାୟି ତାଙ୍ଗିସ୍ତା, ଅବ୍ରାହାମ କୁଡ଼ାତି ମୀରକା ମାସ୍କାତେରି, ଅଡ଼େ ମୀ ତାଣାଟି ମାହାପୁରୁଇଁ ଆଜିମାନି ଜୀହୁଦିଆଆତି ଲକୁତେରି; ମା ତାଣା ଇ ଗେଲ୍ପିଆନି ବଲୁ ପାଣୁଞ୍ଜି ଆହାମାଞ୍ଜାନେ । ୨୭ ସାମା ଏଞ୍ଜାସି ଗେଲ୍ପିନାସି, ଜିରୁସାଲମତା ମାନାରି ଅଡ଼େ ତାନି ବାରେ କାଜାରି ଏଦାଆଁ ପୁଞ୍ଜାହିଲାଆତେରି, ଅଡ଼େ ବାରେ ଜମିନି ଦିନା ପଡ଼ଞ୍ଜି ଆହିମାନି ମାହାପୁରୁ ଅଣ୍ଡିପୁତି ବଲୁ ଖେହ୍ନାରି କାତା ପୁଞ୍ଜାହିଲାଆତେରି, ଆଡ଼ିଜିକେଏ ଜୀସୁଇଁ ଦହ କିହାନା ମାହାପୁରୁ ବଲୁ ଖେହ୍ନାରି କାତା ପୁରା କିତେରି । ୨୮ ✨ଅଡ଼େ ଏଞ୍ଜାଣାକି ହାନି ତଣ୍ଡି ଏନି ଦହ ପ୍ଲାଃଆତି ଜିକେଏ ଏଞ୍ଜାଣାଇଁ ପାୟାଲି ପିଲାତଇଁ ବାତିମାଲିତେରି । ୨୯ ✨ଏଞ୍ଜାଣି ତାକି ଦାମ୍ବୁ ସାଢ଼େସିତା ବାରେ କାତା ରାସ୍କି ଆହାମାନେ, ଏଲେଆହ୍ ବାରେ ଗଟଞ୍ଜି ଆଡ଼ି କେଚ ଏଞ୍ଜାରି ଏଞ୍ଜାଣାଇଁ ପାସି ମୁଣ୍ଡାଟି ରେପହା ତାତାନା, ମାଡ଼ହା ଇଚିନି ଟାମୁତା ଇଚିତେରି । ୩୦ ସାମା ମାହାପୁରୁ ଏଞ୍ଜାଣାଇଁ ହାଡ଼ାରି ତାଣାଟି ନିକହେସି, ୩୧ ଅଡ଼େ ଆମିନି ଗାଟାରି ଗାଲିଲିଟି ଜିରୁସାଲମତା ତାନିତଲେ ଖାହାମାଚେରି, ଏଞ୍ଜାରି ହାରେକା ଦିନା ପାତେକା ଏଞ୍ଜାଣାଇଁ ମେସ୍ତେରି; ଏଞ୍ଜାରି ଇସ୍ରାୟେଲ ଲକୁତାଣା ନୀଏଁ ଏଞ୍ଜାରି ସାକି । ୩୨ ଅଡ଼େ ଆକୁ ଆବାୟା ନକିତା ମାହାପୁରୁ ଆଞ୍ଜାମାନାଣି ମାମ୍ବୁ ମିଙ୍ଗେ ଇ ନେହ୍ କାରୁ ଖେସିମାଞ୍ଜାନମି; ୩୩ ଜୀସୁଇଁ ମାହାପୁରୁ ନିକହାନା ଏଞ୍ଜାରି ମୀରକାତାୟି ମାର, ମାଙ୍ଗେତାକି ଏ ଆଞ୍ଜାମାନାଣି ପୁରା କିହାମାନେସି, ଏନିକ ରୀ

‡ ୧୩:୨୪ ୧୩:୨୪ମୁଞ୍ଜିନାୟି ✨ ୧୩:୨୫ ୧୩:୨୫ ଜହ ୧:୨୦; ମାତି ୩:୧୧; ମାର୍କ ୧:୭; ଲୁକ ୩:୧୭; ଜହ ୧:୨୭ ✨ ୧୩:୨୮ ୧୩:୨୮ ମାତି ୨୭:୨୨,୨୩; ମାର୍କ ୧୫:୧୩,୧୪; ଲୁକ ୨୩:୨୧-୨୩; ଜହ ୧୯:୧୫ ✨ ୧୩:୨୯ ୧୩:୨୯ ମାତି ୨୭:୫୭-୬୧; ମାର୍କ ୧୫:୪୨-୪୭; ଲୁକ ୨୩:୫୦-୫୬; ଜହ ୧୯:୩୮-୪୨



ଲମ୍ବର ପାରୁ ପତିତା ରାସ୍‌କି ଆହାମାନ,

“ନାନୁ ନା ମୀରୁଏଣାତି;

ନୀଞ୍ଜୁଟିଏ ନାନୁ ନୀ ଆବାତେଏଁ ।”

୩୪ ଏଞ୍ଜାସି ହାଡ଼ାରି ତାଣାଟି ଖେଣ୍ଡେ ନିକ୍‌ହାମାନେସି, ଏଞ୍ଜାସି ସୀରୁନି  
ତାଣା ହାଲଅସି ଇଞ୍ଜିଁ ମାହାପୁରୁ ଖେସାମାନେସି;

“ନାନୁ ଦାଞ୍ଜୁଦ ନକିତା ଆଞ୍ଜାମାନି ସୁଦୁ,

ଇଞ୍ଜା ତୀରି ଆନି ବର ମିଙ୍ଗେ ସାତେଏ ହିୟାକ୍ ।”

୩୫ ଇଞ୍ଜା ଏଞ୍ଜାସି ଅଡ଼େ ର ପତିତା ଏଲେଇଞ୍ଜା ମାନେସି,

“ନାନୁ ନୀ ତୀରି ଗାଟାଣାକ୍ ସୀରୁହାଲି ହୀଅତି ।”

୩୬ ଦାଞ୍ଜୁଦ ତାନୁ ରାଜି କିହିମାଟି ବେଲାତା ଲକୁ ବିତ୍ରା ମାହାପୁରୁ ଅଣ୍‌ପୁ  
ତଲେ ସେବା କାମା କିତି ତାୟୁ ହାତେସି, ଇଞ୍ଜା ତୀରି ଆକୁ ଆବାୟା  
ଟଟତା ମୁସ୍‌ପି ଆହାନା ସୀରୁହେସି । ୩୭ ସାମା ମାହାପୁରୁ ଆମ୍ବାଆରାକ୍  
ହାକିଟି ନିକ୍‌ହାମାନେସି ଏଞ୍ଜାସି ସୀରୁହା ହିଲଅସି । ୩୮ ଇଦାଆଁତାକି ଏ  
ତାୟିୟା ଇଦାଆଁ ପୁଞ୍ଜୁ, ଇ ଜୀସୁ ତାଣାଟି ମୀ ନକିତା ପାପୁତି ମେକ୍‌କିନି  
କାତା ଖେସ୍‌ପି ଆହାମାନେ; ୩୯ ଅଡ଼େ ମସାତି ଆମିନି ମେରାତି ବାରେ  
ତାଣାଟି ମୀରୁ ପିସ୍‌ପି ଆହାଁ ଦାମ୍‌ଗାଟାତେରି ଆହାଲି ଆଡାଆତେରି,  
ଇଞ୍ଜା ନାମିମାନି ବାରେ ଲକୁ ଏଞ୍ଜାଣି ତାଣାଟି ଏ ବାରେ ତାଣାଟି ପିସ୍‌ପି  
ଆହାନା ଦାମ୍‌ଗାଟାରି ଆନେରି । ୪୦ ଏଦାଆଁତାକି ଜାଗ୍ରାତା, ମାହାପୁରୁ  
ଅଣ୍‌ପୁତି ବଳୁ ଖେହ୍‌ନାରି ସାସ୍‌ସ୍‌ରିତା ଏନାୟି ଖେସ୍‌ପି ଆହାମାନେ,  
ଏଦି ଏନିକ୍ ମିଙ୍ଗେତାକି ଆୟେଏ;

୪୧ “ମାହାପୁରୁକ୍ ଅପାଆ ଗାଟାତେରି ମୀରୁ ମେସାନା, କାବା ଆହାଁ,  
ନାସା ଆଦୁ;

ଇତିହ୍ ମୀ ବେଲାତା ମାମ୍‌ରୁ କାମା କିହିମାନମି,

ଅଡ଼େ ଏ କାମାତି ଆମ୍ବାଆସି ମୀ ନକିତା ଖେସ୍‌ମାନେସି,

ଏଦାଆଁ ମୀରୁ ଏନିଜିକେଏ ନାମଅତେରି ।”

୪୨ ପାଞ୍ଜୁଲ ଅଡ଼େ ବର୍ନବା ଜୀହୁଦି ଲକୁତି କୁଟମି ଇଲୁତିଽ ହଡାହାନି  
ବେଲାତା ଖାନି ଜମିନି ଦିନାତା ମାଙ୍ଗେ ଇ ବାରେ କାତା ଅଡ଼େ  
ଖେସ୍‌ପୁ ଇଞ୍ଜିଁ ଲକୁ ଏଞ୍ଜାରାକ୍ ବାତିମାଲିତେରି । ୪୩ ବେରଣି ରାଡ଼ି  
ତାୟୁ ଏଚେକା ଜୀହୁଦି ଅଡ଼େ, ଜୀହୁଦି ଦାମ୍‌ ନାମିତି ଏଚକା କୁଡାତି

ଲକ୍ଷ୍ମୀ ବିଭୀଷି ହାରେକା ପାଞ୍ଚୁଲ ଅଡ଼େ ବର୍ନବା ଜେଚ ହାଚେରି; ପାଣ୍ଡୁ  
ଆଡ଼ାରି ଏଞ୍ଜାରିତଲେ କାତାବାର୍ତ୍ତା ଆହୁଁ ମାହାପୁରୁ କାର୍ମାତା ତୀରପୁ  
ଆହୁଁ ମାଞ୍ଜାଲି ଏଞ୍ଜାରାଇଁ ଖେସ୍ତେରି ।

୪୪ ଇଞ୍ଜା ଅର ଜମିନି ଦିନାତା ଗାଡ଼ାତି ବାରେ ଲକ୍ଷ୍ମୀ ମାହାପୁରୁ  
ବଲୁ ଖେଞ୍ଜାଲି ରୁଣ୍ଡା ଆଡ଼େରି । ୪୫ ସାମା ଜାହୁଦିୟାଁ ଲକ୍ଷ୍ମୀ ମାନ୍ଦାତି  
ମେସାନା ତାହାରା ଆଡ଼େରି, ଇଞ୍ଜା ପାଞ୍ଚୁଲ କାତା କପାଟି ନିନ୍ଦାକିହୁଁ  
ବାଦିବାଦା ଆଡ଼େରି । ୪୬ ଏଚେଟିଏ ପାଞ୍ଚୁଲ ଅଡ଼େ ବର୍ନବା ସାସା  
ଆସାନା ଖେସ୍ତେରି, “ତଲିଏ ମୀ ତାଣା ମାହାପୁରୁତି ବଲୁ ଖେସ୍ତାନାୟି  
ମାଚେ, ମୀରୁ ଏଦାଆଁ ଅପାଆନା ମୀରୁ ମୀରୁଏ କାଲେଏତି ଜୀଞ୍ଜୁ  
ବେଟାଆହାଲି ପାଡ଼ା ଆଅମି ଇଞ୍ଜୁଁ ଅଣ୍ଡି ମାନାକି ମେହଦୁ ମାମ୍ନୁ  
ମିଙ୍ଗେ ପିସାନା ଜାହୁଦିଆଆତି ଲକ୍ଷ୍ମୀତାଣା ହାଜିମାନମି । ୪୭ ଇତିହୁଁ  
ପ୍ରବୁ ମାଙ୍ଗେ ଇ ହୁକୁମି ହାହାମାଞ୍ଜାନେସି;

‘ନାନ୍ ମିଙ୍ଗେ ଜାହୁଦିଆଆତି ଲକ୍ଷ୍ମୀତାକି ଉଜେଡ଼ି ଲେହେଁ  
କିହାମାଞ୍ଜାଇଁ,  
ଆତିହୁଁ ବାରେ ଦାରତି ଗେଲ୍ପିଆନେ ।’ ”

୪୮ ଜାହୁଦିଆଆତାରି ଇ ହାଡ଼ା ଖେଞ୍ଜାନା ରାହୁଁ ଆଡ଼େରି; ଅଡ଼େ  
ମାହାପୁରୁତି ବଲୁତି ଗାଞ୍ଜୁରମି କିହାଲି ମାର୍ତ୍ତହେରି, ଅଡ଼େ ଏଚେକା  
ଲକ୍ଷ୍ମୀ କାଲ୍ଲକାଲ୍ଲାତି ଜୀଞ୍ଜୁତାକି ଆଡ଼ି ଆହାମାଚେରି, ଏଞ୍ଜାରି  
ନାମିଚେରି ।

୪୯ ଇଞ୍ଜା ପ୍ରବୁତି ବଲୁ ଏ ରାଜିତା ବାରେଞ୍ଜାକି ଏଜାହାଚେ । ୫୦ ସାମା  
ଜାହୁଦି ଲକ୍ଷ୍ମୀ ଗାଡ଼ାତି ଆବାୟାଣି ଅଡ଼େ ମାହାପୁରୁଇଁ ମାନି କିହିମାନି  
ପାଙ୍ଗାଞ୍ଜେଙ୍ଗେତି ଆୟସିକାଣି ରୁଣ୍ଡି କିହାନା ପାଞ୍ଚୁଲ ଅଡ଼େ ବର୍ନବାଇଁ  
ସାସି ହାହାନା ତାମି ରାଜିତି ପେରହାତୁସ୍ତେରି । ୫୧ ☆ଏଚେଟିଏ  
ପାଣ୍ଡୁ ଆଡ଼ାରି ଜାହାରା କତାୟାତି ଦୁଡ଼ି ଏଞ୍ଜାରି କପାଟି ହାଣ୍ଡାଁନା  
ଇକନିୟତା ହାଚେରି । ୫୨ ଅଡ଼େ ଆନ୍ତିୟକିୟାତି ସୀସୁୟାଁ ସୁଦୁଜୀଞ୍ଜୁ  
ବେଟାଆହାନା ରାହୁଁତଲେ ଡ଼ୟିଚେରି ।

☆ ୧୩:୫୧ ୧୩:୫୧ ମାତି ୧୦:୧୪; ମାର୍କ ୬:୧୧; ଲୁକ ୯:୫; ୧୦:୧୧

## ୧୪

## ଇକନିୟତା ସେବା କାମା

<sup>୧</sup> ଇକନିୟତା ଜିକେଏ ଏଲେଆହୁଁ ଏ ଆଡେ; ପାଞ୍ଚୁଲ ଅଡେ ବର୍ନବା ଜୀହୁଦି ଲକୁଡି ଜୀହୁଦି ଲକୁଡି କୁଟମି ଇଲୁଡା\* ହାଜାନା ଇଲେକ୍ ସେସ୍ତେରି, ଇଞ୍ଜା ଜୀହୁଦି ଅଡେ ଜୀହୁଦିଆଆତି ଲକୁ ବିତ୍ରାଟି ହାରେକା ନାମିତେରି । <sup>୨</sup> ସାମା ଆମିନି ଜୀହୁଦିକ୍ ନାମାଆତେରି, ଜୀହୁଦିଆଆତି ଲକୁଡି ମନତି କିଲିବିଲି କିହାନା, ଏଞ୍ଜାରାଇଁ ନାମିତି ତାୟିୟାଁ କପାଟି ଲାଗେଏତି ଅଣ୍ପୁ ଅଣ୍ପି କିତେରି । <sup>୩</sup> ପାଞ୍ଚୁଲ ଅଡେ ବର୍ନବା ହାରେକା ଦିନା ପାତେକା ଏ ଗାୟୁତା ଡୟାନା ପ୍ରୁ ତାଣା ବାର୍ସୁ ଇଟାନା ସାସାତଲେ ପ୍ରୁଡି କାତା ଖେସ୍ତେରି; ଇଞ୍ଜା ଏଞ୍ଜାରି ତାଣାଟି ହାରେକା ସିନାୟାଁ ଅଡେ କାବାଆନି କାମାୟାଁ କିହାନା ତାନି କାର୍ନାତି ବଲୁ ସାତା ଇଞ୍ଜୁଁ ସାକି ହାତେରି । <sup>୪</sup> ସାମା ଗାଡାତି ଲକୁ ରୀ ବାଗା ଆଡେରି ର ବାଗା ଜୀହୁଦି ଲକୁ ଖାକି ଅଡେ ର ବାଗା ପାଣ୍ଡୁଝି ଆହାମାନାରି ଖାକି ଆଡେରି ।

<sup>୫</sup> ଏଟିବେଲା ଜୀହୁଦିଆଆତି ଲକୁ ଅଡେ ଜୀହୁଦି ଲକୁ ତାନି କାଜାରି ତଲେ ଆଣ୍ଡାନା, ପାଣ୍ଡୁଝି ଆହାମାନାରାଇଁ ଲାଗେଏ କିୟାଲି ଅଡେ ଖାଲକାତଲେ ଇରହାଲି ଅଣ୍ପିତେରି, <sup>୬</sup> ଏଟିବେଲା ପାଞ୍ଚୁଲ ଅଡେ ବର୍ନବା ଏଦାଆଁ ପୁଞ୍ଜାନା ଲୁକାୟନିୟା ଦେସାତି ଲୁସ୍ତା ଅଡେ ଦବ ଗାଡା ଅଡେ ସାରିଖାକିତି ନାୟକାଣାଁ ହଚେରି, <sup>୭</sup> ଅଡେ ଏଞ୍ଜାରି ଏମ୍ପାଆଁ ନେହୁଁ କାରୁ ଖେକହାଲି ମାଟ୍‌ହେରି ।

## ଲୁସ୍ତା ଅଡେ ଦବ ଗାଡା ସେବା କାମା

<sup>୮</sup> ଲୁସ୍ତାତା ର ଲକୁ ମାଚେସି, ଏଞ୍ଜାସି ସଟା ମାଚେସି, ଏଞ୍ଜାସି ଜାର୍ନାଟିଏ ସଟା, ଏଞ୍ଜାସି ଏତେଲାଞ୍ଜା ତାକା ହିଲାଆତେସି । <sup>୯</sup> ଏଞ୍ଜାସି ପାଞ୍ଚୁଲ ଖେହ୍ନି କାତା ଖେଞ୍ଜିମାଚେସି, ଏଞ୍ଜାସି ହିୟାଁତା ନାମା ମାନେସି ଇଞ୍ଜା ଏଞ୍ଜାସି ନେହୁଁ ଆହାଲି ଆଡିମାନେସି ଇଞ୍ଜୁଁ ପୁଞ୍ଜାନା ଆଚେ ସିନିକିତେସି, <sup>୧୦</sup> ଏଞ୍ଜାଣାଇଁ କାଜା ଗିୟାଁତଲେ ଏଲେଇଚେସି, “ନୀ କଡାତି ବାଡ଼ୁହୁଁ ହାହାନା ସଲକେ ନିମୁ” ଏଚେଟିଏ ଏଞ୍ଜାସି ଡେଞ୍ଜୁଁ ତାକାଲି ମାଟ୍‌ହେସି । <sup>୧୧</sup> ପାଞ୍ଚୁଲ ଏଦାଆଁ କିହାମାନେସି, ଲକୁ ବାରେ

\* ୧୪:୧ ୧୪:୧ ସିନଗଗ୍

ଏଦାଆଁ ମେସାନା ଲୁକାୟନିୟା କାଜା ହାଡ଼ାତଲେ ଏଲେଇଞ୍ଜାଲି ମାଟ୍‌ହେରି, “ମାହାପୁରୁୟାଁ ମା ତାଣା ରେତା ଖାହାମାନୁ ।”<sup>୧୨</sup> ଏଞ୍ଜାରି ବର୍ନବାଇଁ ବୁହସ୍‌ପତି ଇଞ୍ଜିଁ ଇରେରି, ଅଡ଼େ ପାଞ୍ଜୁଲ ଗାଡ଼ି କାତା ଖେହ୍‌ନାସି ମାଚାକି ଏଞ୍ଜାଣାଇଁ ବୁଦ ଇଞ୍ଜିଁ ଇରେରି ।<sup>୧୩</sup> ଗାଡ଼ା ତାଗେ ମାନି ବୁହସ୍‌ପତି ଦେଖୁଡ଼ିତି ପୂଜେରାଙ୍ଗା ଏଚେକା ଡ଼କୁ କଡ଼ିୟାଁ ଇଞ୍ଜା ପୂଙ୍ଗା ପେତାୟାଁ ଗାଡ଼ା ଦୁଝେରିତା ତାଚାହାଁ ଏଞ୍ଜାସି ବାରେ ଲକୁତଲେ ଆଣ୍ଡାନା ପାଣ୍ଡୁଞ୍ଜି ଆଡ଼ାରି ନକିତା ପୂଜା ହୀହାଲି ଅଣ୍ଡିମାରେସି ।

<sup>୧୪</sup> “ସାମା ପାଣ୍ଡୁଞ୍ଜିଆହାମାନି ବର୍ନବା ଅଡ଼େ ପାଞ୍ଜୁଲ, ଇଦାଆଁ ଖେଞ୍ଜାନା ତାମି ହିମ୍‌ରିକା ଗେସାନା ଲକୁ ମାଦିଟି ହଟି ହଟି ହାଜାନା କାଜା ଗିୟାଁତଲେ ଏଲେଇରେରି, <sup>୧୫</sup> ଏ ମାନିଗାଟି ଲକୁଡେରି, ଏନାଆଁତାକି ଇ ବାରେ କିହିମାଞ୍ଜେରି, ମାମ୍‌ଜୁକିଏ ମୀ ଲେହେଁତି ମାଣ୍ଡିୟାଁତମି, ମୀ ତାଣା ଇ ନେହଁ କାରୁ ଖେସିମାଞ୍ଜାନମି, ଏନିକିଁ ମୀରୁ ଇ ବାରେ ଉଜେଏତି ପେଣ୍‌କା ବମାୟାଁଟି ହେକ ଆହାନା ଜୀଞ୍ଜୁଗାଟି ମାହାପୁରୁ ତାଣା ଖେଣ୍ଡା ଖାଦେରି, ଏଞ୍ଜାସି ହାଗୁପାକା ଦାର୍‌ଡି, ସାମ୍‌ଦୁରି ଅଡ଼େ ଏମ୍‌ଆଁ ମାନି ବାରେତି ରାଡ଼ି କିହାମାନେସି; <sup>୧୬</sup> ମାହାପୁରୁ ତଲିଏ ବାରେ ଲକୁଣି ତାମି ମନତଲେ ଡ଼ୟାଲି ପିସାମାରେସି । <sup>୧୭</sup> ସାମା ଏଞ୍ଜାସି ବାରେ ନେହଁ କାମାଟି ଏଞ୍ଜାସି କାଲେଏ ତାନି ଗୁଣ୍ଡୁତି ତସାମାନେସି; ଏଞ୍ଜାସି ହାଗୁଟି ପିୟୁ ଅଡ଼େ ସମାନା ବେଲୀତା ଆର୍ନା ହିୟାନାସି, କାଦି ଅଡ଼େ ମୀ ହିୟାଁତା ରାହାଁ ହିୟାନାସି ।”<sup>୧୮</sup> ଇ ବାରେ କାତା ଖେସାନା ପାଣ୍ଡୁଞ୍ଜି ଆହାମାନାରି ଲକୁ ମାନ୍ଦାତି ହାରେକା କସ୍‌ତଲେ ତାମ୍‌ଙ୍ଗେ ତାକି ପୂଜା କିହାଲି କାହି କିହାଲି ଆଡ଼ିଡେରି ।

<sup>୧୯</sup> ସାମା ପିସିଦିୟାତି ଆନ୍ତିୟକିୟା ଅଡ଼େ ଇକନିୟତି ଏଚେକା ଜୀହୁଦି ଏମ୍‌ଆଁ ଖାଡେରି, ଏଞ୍ଜାରି ଲକୁ ମାନ୍ଦାତି ତାମି ଖାକି କିହାନା ପାଞ୍ଜୁଲଇଁ ଖାଲକାତଲେ ଇର୍‌ହାନା ଏଞ୍ଜାସି ହାହାହାରେସି ଇଞ୍ଜିଁ ଅଣ୍ଡାମାନା ଗାଡ଼ାଡ଼ି ପାଙ୍ଗାତା ରେଜା ଅଡେରି । <sup>୨୦</sup> ସାମା ନାମିତି ସୀସୁୟାଁ ସାରି ଖାକିଟି ନିଚାମାଚାକି ଏଞ୍ଜାସି ନିଙ୍ଗାନା ଗାଡ଼ା ବିତ୍ରା ହାଚେସି, ଅର୍ ନେରୁ ବର୍ନବା ତଲେ ଦବଁ ତା ହାଚେସି ।

ସିରିୟାତି ଆନ୍ତିୟକିୟାତା ଖେଣ୍ଡାଖାନାୟି

୨୧ ପାଖୁଲ ଅଡ଼େ ବର୍ନବା ଦବର୍ତ୍ତା ନେହଁ କାରୁ ଖେସାହାଁ ହାରେକା ସାସୁୟାଁ କିତି ତାୟୁ ଏଞ୍ଜାରି ଲୁସ୍ତା, ଇକନିୟ ଅଡ଼େ ପିସିଦିୟାତି ଆନ୍ତିୟକିୟାତା ଖେଶ୍ଟାହାରେରି । ୨୨ ଅଡ଼େ, ଏ ଟାୟୁତି ନାମିତି ସାସୁୟାଁ ମନତି ସୁସ୍ତି କିହାନା ନାମୁତା ଗାଡ଼ିକିହଁ ଆଡ଼ଞ୍ଜା ତଲେ ଡ଼ୟାଲି ବାର୍ସୁ ହୀହାନା ଏଲେଇରେରି, “ମାହାପୁରୁ ରାଜିତା ହଡ଼ାଲି ତାକି ହାରେକା କସ୍ତ ପାଶ୍ଟାନାୟି ମାନେ ।” ୨୩ ଅଡ଼େ, ବାରେ କୁଲମିତା ଏଞ୍ଜାରି ପ୍ରାଚିନାଙ୍ଗାଣି ଆଡ଼ାନା ଉପାସା ତଲେ ପ୍ରାଡ଼ାନା କିତେରି, ଅଡ଼େ ଆମିନି ପ୍ରବୁ ତାଣା ନାମା ମାଚେରି, ଏଞ୍ଜାଣି କେୟୁତା ଏଞ୍ଜାରାଇଁ ହେରପିତେରି ।

୨୪ ତାୟୁ ଏଞ୍ଜାରି ପିସିଦିୟା ନାସ୍‌କାଟି ପଂପୁଲିୟାତା ଖାଡ଼େରି, ୨୫ ଅଡ଼େ ପଗର୍ତ୍ତା ନେହଁ କାରୁ ଖେସାନା ଆତାଲିୟାତା ହାଚେରି । ୨୬ ଏମ୍ବାଟି ଏଞ୍ଜାରି ଜାଜାତା ହଡ଼ାନା ଆନ୍ତିୟକିୟାତା ହାଚେରି; ଏଞ୍ଜାରି ଆମିନି କାମା କିହାମାଚେରି, ଏଦାଆଁ କିହାଲି ମାହାପୁରୁତି କାର୍ମାତା ହେରପି ଆହାନା ଏମ୍ବାଟି ହାଚେରି ।

୨୭ ଏଟିବେଲା ଏଞ୍ଜାରି ଆନ୍ତିୟକିୟାତା ଏଗାହାଜାନା କୁଲମିତି ଲକୁଣି କୁଡ଼ି କିତେରି; ଅଡ଼େ ମାହାପୁରୁ ଏଞ୍ଜାରିତଲେ ମାଞ୍ଜାନା କିହାମାଟି କାମାତାକି, ଅଡ଼େ ଜୀହୁଦିଆଆତି ଲକୁ ନାମାଲି ଦୁଖେରି ଦେତାମାଚାଣି ବାରେ ଏଞ୍ଜାରାଇଁ ଖେସ୍ତେରି । ୨୮ ଅଡ଼େ ଏଞ୍ଜାରି ନାମିତି ସାସୁୟାଁ ତଲେ ହାରେକା ଦିନା ଡ଼ୟିତେରି ।

## ୧୫

### ଜିରୁସାଲମତା ନାମିତାରି ବେରଣି କିନାୟି

୧ ଏମ୍ବାଟିଏ ଏଚରଜାଣା ଲକୁ ଜୀହୁଦା ରାଜିଟି ଆନ୍ତିୟକିୟାତା ଖାହାନା ନାମିତି ତାୟିୟାଁଣି ଇ କାତା ଖେସିହଁ ଜାପୁହେରି, “ମସାତି ମେରା ଲେହେଁ ମୀ ତଲୁ ଦାପି ଆଆତିହଁ ମୀରୁ ଗେଲପିଆୟାଲି ଆଡ଼ଅତେରି ।” ୨ ଏମ୍ବାଟିଏ ପାଖୁଲ ବର୍ନବା ତଲେ ହାରେକା ଆସ୍‌ପି ଆହାନା ବାଦିବାଦା ଆୟାଲିଏ ପାଖୁଲ, ବର୍ନବା ଅଡ଼େ ଆନ୍ତିୟକିୟାତି ଏଚରଜାଣା ତାୟିୟାଁ ଇ କାତା ଆସାନା ଜିରୁସାଲମତା ମାନି ପାଶ୍ଟୁଞ୍ଜି ଆଡ଼ାରି ଇଞ୍ଜା କୁଲମିତି ପ୍ରାଚିନାଙ୍ଗା ତାଣା ହାଲ୍‌ବେରି ଇଞ୍ଜାଁ ତାୟିୟାଁ ତୀରି କିତେରି ।

୩ ଏଚେଟିଏ କୁଲମି ଏଝାରାଇଁ ପାଣ୍ଡାଲି ଜିରୁ ତସ୍ତି ଜେଚ, ଏଝାରି ପୟନିକିୟା ଅଡ଼େ ସମିରଣ ଝାକି ହାଜି ହାଜିହିଁ ଜୀହୁଦିଆଆତି ଲକୁ ହିୟାଁ ଝେଟ୍‌ହାମାଟି କାତା ଝେସିହିଁ ବାରେ ତାୟିୟାଁଇଁ ହାରେକା ରାହାଁ କିଚେରି । ୪ ତାୟୁ ଏଝାରି ଜିରୁସାଲମତା ଏଗାହାଜାଲିଏ, କୁଲମି ଇଞ୍ଜା, ପାଣ୍ଡୁଝି ଆଡ଼ାରି ଅଡ଼େ ପ୍ରାତିନାଙ୍ଗା ଏଝାରାଇଁ ଆବିଚେରି, ଅଡ଼େ ମାହାପୁରୁ ଏଝାରିତଲେ ମାଞ୍ଜାନା ଆମିନି କାମା କିହାମାଚେସି, ଏ ବାରେ କାତା ଏଝାରାଇଁ ଝେସ୍ତେରି । ୫ ସାମା ପାରୁସିୟାଁ ଗିଟି ଏଚେକା ନାମୁଗାଟାରି ନିଚାନା ଏଲେଇଚେରି, “ନାମାମାନି ଜୀହୁଦିଆଆଡ଼ାରି ତଲୁ ଦାପି କିନାୟିମାନେ, ଅଡ଼େ ମସାତି ମେରା ମାନଝି ଆୟାଲି ଏଝାରାଇଁ ହୁକୁମି ହୀନାୟି ମାନେ ।”

୬ ତାୟୁ ଇ କାତା, କାତା ଆହାଲିତାକ ପାଣ୍ଡୁଝି ଆଡ଼ାରି ଅଡ଼େ ପ୍ରାତିନାଙ୍ଗା ରୁଣ୍ଡା ଆଡ଼େରି । ୭ \*ହାରେକା ଜଲୁକି ଆଡ଼ି ତାୟୁ ପିତର ନିଙ୍ଗାନା ଏଝାରାଇଁ ଏଲେଇଚେସି, “ତାୟିୟାଁ ଅଡ଼େ ତାଜିସ୍ତା ମୀରୁ ପୁଞ୍ଜାମାଞ୍ଜେରି, ନା ଗୁଡ଼ିଟି ଜୀହୁଦିଆଆଡ଼ାରି ନେହିଁ କାବୁ ଝେଞ୍ଜାନା ନାମାପେରିଝା ଇଞ୍ଜିଁ ହାରେକା ଦିନା ନକେଏ ମାହାପୁରୁ ନାଙ୍ଗେ ଆଡ଼ାମାଞ୍ଜାଚେସି । ୮ \*ବାରେ ଲକୁଡ଼ି ହିୟାଁ ପୁନି ମାହାପୁରୁ ମାଙ୍ଗେ ଏନିକିଁ ସୁଦୁଜୀଝୁ ହୀହାମାଞ୍ଜାନେସି, ଜୀହୁଦିଆଆତି ଲକୁକି ଜିକେଏ ଏଲେକିହିଁ ହୀହାନା ଏଝାରି ତାକି ସାକି ହୀହାମାନେସି । ୯ ଅଡ଼େ ଏଝାସି, ମା ବିତ୍ରା ଅଡ଼େ ଏଝାରି ବିତ୍ରା ଏନି ପାର୍ଡ଼ା ବାଟି କିହାମାଞ୍ଜଅସି; ଇଞ୍ଜା ନାମୁତଲେ ଏଝାସି ଏଝାରି ହିୟାଁ ସୁଦୁ କିହାମାନେସି । ୧୦ ଇଦାଆଁତାକି ଆମିନି ଜୁଝେଡ଼ି ମା ଆକୁ ଆବାୟାଁ ଅଡ଼େ ମାର ଡ଼େକାଲି ଆଡ଼ାଆତାୟି, ଏ ଜୁଝେଡ଼ି ସୀସୁୟାଁ ବନିତା ଏକ୍‌ହାନା ମୀରୁ ଏନାଆଁତାକି ମାହାପୁରୁଇଁ ତାୟିପାରି କିହିମାଞ୍ଜେରି ? ୧୧ ଇଦି ନେହେଁ ଆଏ, ସାମା ଏଝାରି ଏନିକିହିଁ ନାମାହାଁ ଗେଲ୍‌ପି ଆହାମାନେରି ମାର ଜିକେଏ ଏଲେକିହିଁ ଏ ନାମାହାଁ ପ୍ରୁ ଜୀସୁତି କାର୍ମାମେହ୍‌ନାଣି ତଲେ ଗେଲ୍‌ପି ଆହାମାନାୟି ।”

୧୨ ଏଚେଟିଏ ଏମାଆଁ ରୁଣ୍ଡା ଆହାମାଟାରି ବାରେ ଲକୁ ପାଲେଏ ଆଡ଼େରି, ଇଞ୍ଜା ପାଝୁଲ ଅଡ଼େ ବର୍ନବା ତାଣାଟି ଜୀହୁଦିଆଆତି

ଲକ୍ଷ୍ମୀତାଣା ମାହାପୁରୁ ତାଣାଟି ଆହିମାନି ସିନାୟାଁ ଅଡ଼େ କାବାଆନ୍ତି  
 କାମାୟାଁ କିହାଁ ମାଚେସି ଏଞ୍ଜାଆଁ ଏଞ୍ଜାରି ତାଣାଟି ଖେଞ୍ଜାଲି ମାଟ୍‌ହେରି  
 । ୧୩ ଏଞ୍ଜାରି କାତା ରାଡ଼ି ତାୟୁ ଜାକୁବ ନିଙ୍ଗାନା ଏଲେଇଚେସି;  
 “ତାୟିୟାଁ ଅଡ଼େ ତାଲିୟା, ନା କାତା ଖେଞ୍ଜୁ, ୧୪ ମାହାପୁରୁ ତଲିଏ ତାନି  
 ଦରୁ ତାକି ଜୀହୁଦିଆଆତି ଲକୁ ବିତ୍ରାଟି ତାନି ଲକୁ କିୟାଲି ଏଞ୍ଜାରାଙ୍ଗ  
 କାର୍ମାମେସାନା ଆଚାମାନେସି ଇଞ୍ଜୁଁ ସିମନ ଖେସାମାଞ୍ଜାନେସି  
 । ୧୫ ଅଡ଼େ, ମାହାପୁରୁ ଅଣ୍ଡପୁତି ବଲ୍ଲୁ ଖେହନାରି କାତାତଲେ  
 ଆଣ୍ଡିମାନେ, ଏନିକ୍ ଦାମ୍‌ସା ସାଢ଼େସୁରିତା ରାସ୍‌କି ଆହାମାନେ ।”

୧୬ ପ୍ରବୁ ଏଲେଇଞ୍ଜି ମାନେସି,

“ତାୟୁ ନାନୁ ଖେଣ୍ଡା ଖାହାନା, ଦାଞ୍ଜୁଦ ବାସାଟାୟୁ ଖେଣ୍ଡେ  
 ଗେଲ୍‌ପିଇ,

ଇଞ୍ଜା ଏମ୍‌ଗାତି ବିଡ଼ହାମାନି କାତିୟାଁ ବାରେ ଖେଣ୍ଡେ କେପାନା  
 ଆଟ୍‌ଞ୍ଜା କିଇଁ,

୧୭ ଏନିକ୍ ଡ଼ୟାମାଟି କୁଡ଼ାଟି ଲକୁ ଅଡ଼େ ଏଚେକା  
 ଜୀହୁଦିଆଆତାରି ନା ଦରୁଟି ଖେଙ୍ଗାମାନେରି,  
 ଏଞ୍ଜାରି ବାରେ ପ୍ରବୁଇଁ ପାରିନେରି, ବାରେ ଗାଡ଼ିକିତି ପ୍ରବୁ ଏଲେ  
 ଇଞ୍ଜିମାନେସି ।

୧୮ ପ୍ରବୁ ଇ କାତା ଏଲେଇଞ୍ଜା ମାନେସି, ଆମ୍‌ସାଆସି ତଲି କାଲ୍‌ଗାଟିଏ ଇ  
 କାତା ତସାମାନେସି ।”

୧୯ ଜାକୁବ ଅଡ଼େ ଜିକେଏ ଏଲେଇଚେସି, “ନା ଅଣ୍ଡପୁ ଇଦି,  
 ଜୀହୁଦିଆଆତି ଲକୁ ବିତ୍ରାଟି ଆମ୍‌ସାଆରି ମାହାପୁରୁ ଖାକି ଖେଣ୍ଡା  
 ଖାନ୍‌ନେରି, ଏଞ୍ଜାରାକି ମାର ବଜୁ ହାଆପ; ୨୦ ସାମା ଏଞ୍ଜାରାକି  
 ଇଲେକ୍ ଆକୁ ରାଚାନା ଖେହନ, ପେଣ୍ଡକା ବମାୟାଁ ତାକି ପୂଜା  
 କିହାମାନି ଲାଗେଏତାଣି ତିନାଆଦୁ; ଦାରିକାମାଟି ଏଟ୍‌କା ଆଦୁ;  
 ହେରକି ଦାଆନା ପାୟିତି ଜନ୍ତୁତି ଉଙ୍ଗା ଅଡ଼େ ନେତେରି ତିନାଆଦୁ  
 । ୨୧ ଏନାଆଁତାକି ଇଚିହ୍ ତଲି କାଲ୍‌ଗାଟିଏ ବାରେ ଗାଡ଼ାଣା ମସା  
 ମେରାତି କାତା ଖେକ୍‌ନାରି ମାନେରି, ଇଞ୍ଜା ବାରେ ଜମିନି ଦିନାତା  
 ଜୀହୁଦି ଲକୁତି କୁଟମି ଇଲ୍‌କାଣା\* ଏଞ୍ଜାଣି ମେରାତି କାତା ପଡ଼ଞ୍ଜି  
 ଆହିମାନେ ।”

\* ୧୫:୨୧ ୧୫:୨୧ ସିନଗଗ୍

### ଜୀହ୍ୱଦିଆଆତି ନାମିତି ଲକୁତାକି ଆକୁ

୨୨ ଏତିବେଲା ପାଣ୍ଡୁଓ ଆହାମାନାରି ଅଡ଼େ ପ୍ରାତିନାଙ୍ଗା ବାରେ କୁଲମି ତଲେ ତାମି ବିତ୍ରାଟି ଲକୁଇଁ, ଇତିହିଁ ତାୟିୟାଁ ବିତ୍ରାଟି ମାନ୍ନିଗାଟି ବର୍ନବା, ଦରୁଗାଟି ଜୀହ୍ୱଦା ଇଞ୍ଜା ସିଲାଇଁ ଆଚାନା ପାଞ୍ଜୁଲ ଅଡ଼େ ବର୍ନବା ତଲେ, ଆନ୍ତ୍ରିୟକିୟାତା ପାଣ୍ଡାଲି ତୀରି କିତେରି ।  
୨୩ ନାମିତାରି ତାଣାଟି ରାସ୍ତକି ଆହାମାନି ଆକୁ ଏ ରିଆରି କେୟୁତା ପାଣ୍ଡିତେରି

“ମାମ୍ନୁ ପାଣ୍ଡୁଓ ଆତାତମି ଅଡ଼େ ପ୍ରାତିନାଙ୍ଗା, ମୀ ତାୟିୟାଁତମି ମା ବାରେ ଜୀହ୍ୱଦିଆଆତି ତାୟିୟାଁ ଆମିନି ଗାଟାରି ଆନ୍ତ୍ରିୟକିୟା, ସିରିୟା ଅଡ଼େ କିଲିକିୟାତା ମାନେରି ଏଞ୍ଜାରାକି ଜହରା । ୨୪ ମାମ୍ନୁ ଝେଞ୍ଜାମାନମି, ମାମ୍ନୁ ଆମିନି ଲକୁଇଁ ଏନ୍ତି ହୁକୁମି ହାହାହିଲଅମି, ମା ତାଣାଟି ଏଲେତି ଏଚେକା ଲକୁ ମୀ ତାଣା ଝାହାନା ତାମି କାତାତଲେ ମୀ ମନତି ଏଚକା କିହାନା କିଲିବିଲି କିହାମାଞ୍ଜାନେରି; ୨୫ ଅଡ଼େ ମାମ୍ନୁ ବାରେଜାଣା ରୁଣ୍ଡା ଆହାନା ରଣ୍ଡିଏ ହିୟାଁ ତଲେ ଏଚରଜାଣାତି ଆଚାନା ମୀ ତାଣା ପାଣ୍ଡାଲି ତୀରି କିହାମାନମି, ଏଞ୍ଜାରି ମା ଜୀହ୍ୱତି ତଣେ ବର୍ନବା ଅଡ଼େ ପାଞ୍ଜୁଲ ତଲେ ହାନେରି । ୨୬ ଏଞ୍ଜାରି ଇଲେତି ମାଣ୍ଡସିୟାଁ ମା ପ୍ରବୁ ଜୀସୁ କ୍ରୀସ୍ତ ଦରୁ ତାକି ଜୀହ୍ୱ ତୁସାନା କାମା କିହାମାନେରି । ୨୭ ଏଦାଆଁତାକି ମାମ୍ନୁ ଜୀହ୍ୱଦା ଅଡ଼େ ସିଲାଇଁ ମୀ ତାଣା ପାଣ୍ଡିମାଞ୍ଜାନମି । ମାମ୍ନୁ ଏନାଆଁ ରାଚାମାନମି, ଏଞ୍ଜାରି ମିଙ୍ଗେ ଝେସ୍ତାନେରି । ୨୮ ଏଚରଗଟା ଲଡ଼ାମାନି ମେରା ପିସ୍ତେପେ ମୀ ଲାକ ଅଡ଼େ ଏନ୍ତି ବଦୁ ହେର୍ପାଲି ମାମ୍ନୁ ସୁଦୁଜୀହ୍ୱଟି ହୁକୁମି ବେଟାଆହାମାନମି । ୨୯ ଏ ମେରାୟାଁ ଆହିମାନୁ, ପେଣ୍ଡକା ବମାୟାକି ହେର୍ପିଆହାମାନି ରାହା ତିନାଆଦୁ, ନେତେରି ତିନାଆଦୁ, ହେର୍ବକି ଦାଆନା ପାୟୁଓ ଆହାମାନି ଜନ୍ତୁତି ଉଙ୍ଗା ତିନାଆଦୁ, ଦାରି କିଆଦୁ, ଇ ବାରେ କାମାଟି ହେକ ଆହାଲି ଜାଗ୍ରାତା ମାତିହିଁ ମିଙ୍ଗେ ନେହେଁ ଆନେ । ନେହିଁକିଁ ମାଞ୍ଜୁ ।”

୩୦ ଏଚେଟିଏ କାରୁ ଅନୁରାଇଁ ପାଣ୍ଡାଲିଏ ଆନ୍ତ୍ରିୟକିୟାତା ହାଚେରି, ଇଞ୍ଜା ବାରେ ନାମିତାରାଇଁ ରୁଣ୍ଡି କିହାନା ଏ ଆକୁ ହୀତେରି । ୩୧ ଏ ଲକୁ ବାରେ ଏଦାଆଁ ପଡ଼ଓ ଆହାନା ବାର୍ସୁ ବେଟାଆହାନା ରାହାଁ ଆଡ଼େରି



। ୩୨ ଜୀହ୍ୱଦା ଅଡ଼େ ସିଲା ତାମ୍ବୁ ଜିକେଏ ମାହାପୁରୁ ଅଣପୁତି ବଲୁ  
 ଝେହନାରି ମାଚାକି ହାଡ଼େକା କାତାତଲେ ତାୟିୟାଁଇଁ ବାସୁଁ ହାହାନା  
 ସୁସ୍ତି କିତେରି । ୩୩ ଅଡ଼େ, ଏଞ୍ଜାରି ଏମ୍ବାଆଁ ଏଚରଦିନା ମାଚି ତାୟୁ  
 ଏଞ୍ଜାରାଇଁ ପାଣ୍ଡାମାଚି ଲକୁତାଣା ଝେଣ୍ଡାହାଜାଲି ତାୟିୟାଁ ତାଣ୍ଡାଟି  
 ହେଲ ବେଟାଆହାନା ହିଡ଼ଡ଼ି ଜୀହ୍ୱତଲେ ଝେଣ୍ଡା ହାଚେରି । ୩୪ ସାମା  
 ସିଲା ଏମ୍ବାଆଁ ଡ଼ୟାଲି ତାରି କିହାମାଚେସି† ।

୩୫ ପାଞ୍ଜୁଲ ଅଡ଼େ ବର୍ନବା ଆନ୍ତ୍ରିୟକିୟାତା ମାଞ୍ଜାନା ଏଟକାତି  
 ଏଚେକା ଲକୁତାଣା ଜିକେଏ ପ୍ରବୁତି ନେହଁ ବଲୁ ଜାପହାନା  
 ଝେକହାଲି ମାଟହେରି ।

### ପାଞ୍ଜୁଲ ଅଡ଼େ ବର୍ନବା ଏଟକା ଆନାୟି

୩୬ ଏଚରଦିନା ହାଜାଲିଏ ପାଞ୍ଜୁଲ ବର୍ନବାଇଁ ଏଲେଇଚେସି,  
 “ଞ୍ଜାମ୍ବୁ, ମାର ପ୍ରବୁତି ବଲୁ ଝେକହାମାନି ବାରେ ଗାଡ଼ାୟାଁଣା ଝେଣ୍ଡା  
 ହାଜାନା, ତାୟିୟାଁ ନୀର୍ଏ ଏନିଆହଁ ମାନେରି ଇଞ୍ଜଁ ବେଟିହାନ  
 ।” ୩୭ ଏଚେଟିଏ ଜହନ ଇନି ମାର୍କଇଁ ଜିକେଏ ତାମିତଲେ ଅୟାଲି  
 ବର୍ନବା ଅଣ୍ଡିମାଚେସି । ୩୮ ☆ସାମା ଏଞ୍ଜାସି ଏଞ୍ଜାରାଇଁ ପିସାନା  
 ପଂପୁଲିୟାଟି ଝେଣ୍ଡାହାଚାସି ଅଡ଼େ କାମା ରାନ୍ଦି ପାତେକା ଏଞ୍ଜାରିତଲେ  
 ମାନାଆତାକି ତାମିତଲେ ଅୟାଲି ପାଞ୍ଜୁଲ କୂତେସି । ୩୯ ଏମ୍ବାଟିଏ  
 ଏଞ୍ଜାରି ହାଡ଼େକା ବାଡ଼ିବାଡ଼ା ଆୟାଲିଏ ତାମ୍ବୁ ଏଟକା ଆଡ଼େରି, ଇଞ୍ଜା  
 ବର୍ନବା ଜହନ ମାର୍କଇଁ ତାନିତଲେ ଅହଁ ଜାଜାତା ହଚାନା କୁପ୍ରତା  
 ହାଚେରି, ୪୦ ସାମା ପାଞ୍ଜୁଲ ସିଲାଇଁ ଆଚାନା ତାୟିୟାଁ ତାଣ୍ଡାଟି ପ୍ରବୁତି  
 କାର୍ମାତଲେ ହେର୍ପି ଆହାନା ହାଚେରି, ୪୧ ଅଡ଼େ ଏଞ୍ଜାସି ସିରିୟା  
 ଅଡ଼େ କିଲିକିୟାଟି ହାଜାହାଁ ବାରେ କୁଲମିକାଣି ନାମୁତା ଆଟ୍ଞା  
 କିତେସି ।

## ୧୭

### ପାଞ୍ଜୁଲ ଅଡ଼େ ସିଲା ତଲେ ତିମତି ହାନାୟି

୧ ତାୟୁ ପାଞ୍ଜୁଲ ଦବଁ ଅଡ଼େ ଲୁସ୍ତାତା ହାଚେସି, ଏମ୍ବାଆଁ ତିମତି  
 ଦରୁଗାଚାସି ର ସାମୁ ମାଚେସି, ଏଞ୍ଜାସି ର ନାମିତି ଜୀହ୍ୱତି କ୍ରାସ୍ତାନା

† ୧୫:୩୪ ୧୫:୩୫ ଇ କାତା ପୁଞ୍ଜଇ ପତିତା ହିଲେଏ । ☆ ୧୫:୩୮ ୧୫:୩୮ କାମା ୧୩:୧୩

ଇୟାନି ମୀରଏସି ମାରେସି, ସାମା ତାମି ଆବା ର ଗ୍ରିକ୍ ଲକୁ ।  
 ୨ ଲୁସ୍ତା ଅଡେ ଇକନିୟତା ମାନି ବାରେ ନାମିତି ତାୟିୟା ଏଞ୍ଜାଣାକ୍  
 ନେହ୍ସି ଇଞ୍ଜି ଏଲେଇଚେରି । ୩ ପାଞ୍ଜୁଲ ତାନିତଲେ ତିମତିକ୍  
 ଅହାଲି ଅଶ୍ପିତେସି, ଅଡେ ଏ ନାସ୍ତକାଣା ମାନି ଜୀହୁଦି ଲକୁତାକି  
 ଏଞ୍ଜାଣି ତଲୁ ଦାପିକିତେସି; ଇଚିହ୍ ତାମି ଆବା ଗ୍ରିକ୍ ଲକୁ ଇଞ୍ଜି  
 ବାରେ ପୁଞ୍ଜାମାଚେରି । ୪ ଇଞ୍ଜା ଏଞ୍ଜାରି ଗାଡ଼ାୟାଟି ହାଜି ହାଜିହ୍  
 ଜିରୁସାଲମତି ପାଶୁଞ୍ଜି ଆଡ଼ାରି ଅଡେ ପ୍ରାଚିନାଙ୍ଗା ତାଣାଟି କିଞ୍ଜି  
 ଆହାମାନି ମେରା ମାନୁଞ୍ଜି ଆହାଲି ଏଞ୍ଜାରିତାଣା ହେରପି ମାଚେସି ।  
 ୫ ଏଲେକିହ୍ କୁଲମିକା ବାରେ ନାମୁତା ଆଡ଼ଞ୍ଜା ଆହାନା ଦିନାତାକି  
 ଦିନା ପାତା ଆତୁ ।

### ତ୍ରୟାତା ପାଞ୍ଜୁଲ ହାପାନା ହେଶ୍ନାୟି

୬ ଏଞ୍ଜାରି ଆସିୟାତା ମାହାପୁରୁ କାତା ଖେସାଲି ସୁଦୁଜୀଞ୍ଜୁ କାହି  
 କିୟାଲିଏ, ଏଞ୍ଜାରି ପୁଗିୟା ଅଡେ ଗାଲାତିୟ ରାକ୍ତି ମାଦିତି  
 ରେଜିହ୍ ହାଚେରି । ୭ ଅଡେ, ଏଞ୍ଜାରି ମୁସିଆ ରାକ୍ତି ତାଗେ  
 ଏଗାହାଜାନା ବେତନିୟାତା ହାଜାଲିତାକି ଅଶ୍ପିତେରି, ସାମା ଜୀସୁତି  
 ଜୀଞ୍ଜୁ ଏଞ୍ଜାରାକ୍ ହାଜାଲି ହେଲ ହାଆତେ । ୮ ଏଞ୍ଜାରି ମୁସିଆ ମାଦିତି  
 ହାଜାନା ତ୍ରୟାତା ଖାଡେରି । ୯ ଅଡେ ଲାଆଁ ବେଲାତା ପାଞ୍ଜୁଲ  
 ର ସେୟାଣା ହାପାନା ହେଚେସି, ମାକିଦନିୟାତି ର ଲକୁ ନିଚାନା  
 ଏଞ୍ଜାଣାକ୍ ବାତିମାଲିହ୍ ଏଲେଇଚେସି, “ମାଙ୍ଗେ ସାୟେମି କିୟାଲି  
 ମାକିଦନିୟାତା ଗାଣ୍ଡା ଖାମୁ ।” ୧୦ ଏଞ୍ଜାସି ସେୟାଣା ହାପାନାତା  
 ମେସାଲିଏ ମାମୁ ଚୁଦବୁଣିଏ ମାକିଦନିୟାତା ହାଜାଲି ତିୟାରା ଆଡ଼ମି,  
 ଇଚିହ୍ ଏଞ୍ଜାରିତାଣା ନେହ୍ କାରୁ ଖେସାଲି ତାକି ମାହାପୁରୁ  
 ମାଙ୍ଗେ ହାଡ଼ାମାଞ୍ଜାନେସି ଇଞ୍ଜି ମାମୁ ପୁଚମି ।

### ଲୁଦିୟା ମନ ଖେଚ୍ନାୟି

୧୧ ଏଚେଟିଏ ମାମୁ ତ୍ରୟାଟି ଜାଜାତା ହଚାନା ତିୟିତି ଜିରୁଟି  
 ହାଜାନା ସାମତ୍ରାକିତା ଅଡେ ଅର ନେଚୁ ନୟାପଲିତା ଏଗାହାଚମି ।  
 ୧୨ ଏମ୍ବାଟିଏ ପିଲିପିତା ହାଚମି, ଇଦି ମାକିଦନିୟା ଜିଲାତି ର କାଜା  
 ଗାଡ଼ା, ଇଞ୍ଜା ରମ୍ ଦେସାତାରି ତ୍ରୟିନି ଚାମୁ ମାଚେ; ଏ ଗାଡ଼ାତା  
 ମାମୁ ଏଚରଦିନା ମାଚମି । ୧୩ ଜମିନି ଦିନାତା ମାମୁ ଗୁାଡ଼ାଟି ହଚାନା

କାତା ତାଗେ ହାତମି, ଏମ୍ବାଆଁ ପ୍ରାତାନା କିନି ଚାୟୁ ମାନେ ଇଞ୍ଜି ଅଣ୍ଠପାମାଚମି, ଅଡ଼େ ମାମ୍ବୁ କୁଗାନା ରୁଣ୍ଡା ଆହାମାଚି ଇୟାସିକା ତଲେ କାତା ଆଡ଼ମି । ୧୪ ଅଡ଼େ, ତୁୟାତିରା ଗାଡ଼ାତି ହେୟାଁ ଖାଣା ହିମ୍ବୁରିକା ପାରୁନି ଲୁଦିୟା ଦରୁଗାଟି ର ଇୟା ମା କାତା ଖେଞ୍ଜିମାଚେ, ଏଦି ମାହାପୁରୁ ସେବା କିନାୟି, ଏଦି ଏନିକି ପାଞ୍ଜୁଲତି କାତାତି ମନ ହାନେ ଏଦାଆଁତାକି ପ୍ରବୁ ଏଦାନି ହିୟାଁ ଦେଚାମାଚେସି । ୧୫ ଅଡ଼େ ଏଦି ଇଞ୍ଜା ତାନି କୁଟମି ବାପ୍ତିସ୍ମ\* ଅଡ଼ି ତାୟୁ ମାଚେ ବାତିମାଲିହୁ ଏଲେଇଞ୍ଜାଚେ, “ମାରୁ ନାଚେ ପ୍ରବୁ ତାଣା ନାମୁଗାଚାୟି ଇଞ୍ଜି ଅଣ୍ଠପିମାଚିହୁ, ନା ଇଜ ଖାହାନା ବାସା ଆଦୁ,” ଇଞ୍ଜି ବାଲାମାତମି କିହାଁ ହାଟା ଅୟାଚେ ।

**ପିଲିପିତି କାୟିଦି ଇଲୁତା ପାଞ୍ଜୁଲ ଅଡ଼େ ସିଲା**

୧୬ ର ଦିନା ମାମ୍ବୁ ପ୍ରାତାନା ଚାୟୁତା ହାନିବେଲାତା ର ହଲେଣି ପଦାକ୍ ବେଟାଆଡ଼ମି ଏଦି ପଲ୍ଲଆ ପେନୁ ଆଲ୍‌ଗାନା ତାୟୁ ଆନି କାତାୟାଁ ଖେସାଲି ଆଡ଼ିମାଚେ । ତାୟୁ ଆନି କାତାୟାଁ ଖେସାନା ତାନି ସାଞ୍ଜୁକାରିକି ହାରେକା ତାରୁୟାଁ କୃତି କିହିମାଚେ । ୧୭ ଏଦି ପାଞ୍ଜୁଲ ଅଡ଼େ ମା ଜେଟ ଜେଟ ଖାହାନା କିରଡ଼ିହୁ ଏଲେଇଞ୍ଜାଲି ମାଟ୍‌ହେ, “ଇ ଲକୁ ବାରେକିହାଁ କାଜା ମାହାପୁରୁତି ହଲିୟାଙ୍ଗା, ଏଞ୍ଜାରି ମିଚେ ଗେଲ୍‌ପିଆନି ଜିରୁତି ଖେକ୍‌ହି ମାଞ୍ଜାନେରି ।” ୧୮ ଏଦି ହାରେକା ଦିନା ପାତେକା ଏଲେକିୟାଚେ, ସାମା ପାଞ୍ଜୁଲ କପା ଆହାନା ଖେଶ୍ଟେ ସିନିକିହାନା ଏ ବୃତୁକ୍ ଏଲେଇଚେସି, “ଏଦାନି ତାଣାଟି ହଟା ହାଜାଲି ନାନୁ ନିଚେ ଜୀସୁ କ୍ରୀସ୍ତ ଦରୁତଲେ ହୁକୁମି ହାହିମାଞ୍ଜାଇ,” ଏ ଦେବୁଣିଏ ଏଦି ହଟାହାଚେ । ୧୯ ସାମା ଏଦାନି ସାଞ୍ଜୁକାରିୟା ତାନି ଲାବା ପାଣି ଆସା ହାଚେ, ଇଞ୍ଜି ପୁଞ୍ଜାନା ପାଞ୍ଜୁଲ ଅଡ଼େ ସିଲାକ୍ ଦସାନା ବେରଣିମାଣ୍ଡାତା ସାଲ୍‌ଞ୍ଜି କିନାରି ତାଣା ରେଜା ଅଡ଼େରି । ୨୦ ଅଡ଼େ, ଏଞ୍ଜାରି ରମିୟ ସାଲ୍‌ଞ୍ଜି କିନାରି ତାଣା ତାଚାନା ଏଲେଇଚେରି, “ଇଞ୍ଜାରି ଜୀହୁଦି ଲକୁ ମା ଗାଡ଼ାତା ଗଡ଼ହା କିହିମାନେରି । ୨୧ ମାରୁ ରମିୟ ଲକୁତି ମେରା ପାଣାପାଟୁ ଆବାଲି କି ମାନଞ୍ଜି ଆହାଲି ମେରା ହିଲେଏ, ଏଦାଆଁ ଇଞ୍ଜାରି ଖେସିମାନେରି

\* ୧୭:୧୫ ୧୭:୧୫ମୁଞ୍ଜିନାୟି

୧୭ ୨୨ ଏମ୍ବାଟିଏ ବାରେ ଲକୁ ପାଞ୍ଚଲ ଅଡ଼େ ସିଲା କପାଟି ନିଙ୍ଗିତେରି । ଅଡ଼େ ନୀହାଁୟି କିନାରି ପାଞ୍ଚଲ ଅଡ଼େ ସିଲା ହିମ୍ବରିକା ହୁକହାନା ଏଞ୍ଜାରାଇଁ ବାଡ଼ଗା ତଲେ ଝେଟାଲି ହୁକୁମି ହୀତେରି । ୨୩ ଏଞ୍ଜାରି ଏଞ୍ଜାରାଇଁ ହାରେକା ଝେତି ତାୟୁ କାୟିଦି ଇଲୁତା ଇଟିତେରି, ଇଞ୍ଜା ଏଞ୍ଜାରାଇଁ ଜାଗ୍ରାତା କିହୁଁ କାପୁ କାଟାଲି କାୟିଦି ଇଲୁତି କାଃଆନାଣାଇଁ ହୁକୁମି ହୀତେରି । ୨୪ କାୟିଦି କାଃଆନାସି ଇଲେତି ହୁକୁମି ବେଟାଆହାନା ଏଞ୍ଜାରାଇଁ କାୟିଦି ଇଲୁତି ବାରେକିହାଁ ବିତ୍ରାତି ବାକ୍ରାତା ମେଡ଼ହାନା ଏଞ୍ଜାରି କଡାଣା ବଜୁଗାଟି ମାରନ୍ତୁ କୁଡୁଲିକା ଦସା ପିସ୍ତେସି ।

୨୫ ସାମା ମାଦି ଲାଆଁୟାଁ ପାଞ୍ଚଲ ଅଡ଼େ ସିଲା ମାହାପୁରୁ ତାଣା ପ୍ରାତାନା ଅଡ଼େ ଜହରା ପାରୁ ପାଡ଼ିମାଚେରି, ଇଞ୍ଜା ଏଞ୍ଜାରିତଲେ କାୟିଦି ଇଲୁତା ମାଚାରି ବାରେ ଝେଞ୍ଜିମାଚେରି । ୨୬ ଏଟିବେଲାତା ଦେବୁଣିଏ ବୁମି ଝୀଡ଼ିତେ, ଇଞ୍ଜା କାୟିଦି ଇଲୁତି ପୁନାଦି ଜିକେଏ ଝୀଡ଼ାଲିଏ ବାରେ ଦୁଝେରିକା ଦେପି ଆହାହାରୁ, ଇଞ୍ଜା ବାରେଜାଣାତି ଦସାମାଟି ହିକ୍‌ଶିୟାଁ ହୁଙ୍ଗାହାରୁ । ୨୭ ଏଚେଟିଏ କାୟିଦି ଇଲୁ କାଃଆନାସି ଇଦାଟି ନିଙ୍ଗାନା, ଦାରାୟାଁ ଦେପିଆହାମାନାଣି ମେସାନା, କାୟିଦିତାରି ହଣପି ଆଡ଼େରି ଇଞ୍ଜୁଁ ଅଣ୍‌ପାନା, କାଣ୍ଡା ହୁପ୍‌ହାନା ଗୁକ୍‌ହା କଡ଼ିମାଚେସି । ୨୮ ସାମା ପାଞ୍ଚଲ କାଜା ଗିୟାଁତଲେ ହାଟାନା ଏଲେଇଚେସି, “ନୀନ୍ତୁ ନିଜେ ନାସା କିହା କଡାଆନି, ଏନାଆଁତାକି ଇଚିହୁଁ ମାନ୍ତୁ ରୁରେତମି ଇମ୍ବାଆଁ ମାନମି ।”

୨୯ କାୟିଦି ଇଲୁ କାଃଆନାସି ଦୀଞ୍ଜୁଁ ତାଚାଲି ଏଲେଇଚେସି, ତବେ ବିତ୍ରା ହାଚେସି ଇଞ୍ଜା ତାରଗି ତାରଗିହୁଁ ପାଞ୍ଚଲ ଅଡ଼େ ସିଲା କଡାୟାଁ ତୁଲ ରୀତେସି । ୩୦ ଅଡ଼େ ଏଞ୍ଜାରାଇଁ ପାଙ୍ଗାତା ତାଚାନା ଏଲେଇଚେସି, “ବାବୁୟାଁ ଗେଲପିଆୟାଲି ନୀନ୍ତୁ ଏନାଆଁ କିଇଁ?”

୩୧ ଏଞ୍ଜାରି ଏଲେଇଚେରି, “ପ୍ରବୁ ଜୀସୁ ତାଣା ନାମାଦୁ, ଆତିହୁଁ ନୀନ୍ତୁ ଅଡ଼େ ନୀ ଇଲୁ କୁଟମି ବାରେ ଗେଲପି ଆଡ଼େରି ।” ୩୨ ତାୟୁ ଏଞ୍ଜାରି ଏଞ୍ଜାଣାଇଁ ଅଡ଼େ ଏଞ୍ଜାଣି ଇଜ ମାଟି ବାରେ ଲକୁଣି ମାହାପୁରୁତି ବଲୁ ଝେସ୍ତେରି । ୩୩ ଅଡ଼େ, ଏ କାୟିଦି ଇଲୁ କାଃଆନାସି ଏଞ୍ଜାରାଇଁ ଏ ଲାଆଁୟାଁ ବେଲାତା ଅହାନା ଏଞ୍ଜାରି ଗାହାଁୟାଁ ନରହେସି, ଇଞ୍ଜା ଏଞ୍ଜାସି

ଅଡ଼େ ଏଞ୍ଜାଣି ଇଲୁ କୁଟମି ବାରେ ଏ ଦେବୁଣିଏ ବାପ୍ତିସ୍ତା<sup>†</sup> ଅଡ଼େରି ।  
 ୩୪ ଏରେଟିଏ ଏଞ୍ଜାସି ଏଞ୍ଜାରାଇଁ ତାମି ଇଜ ଅହାନା ତିଞ୍ଜାଲି ରାନ୍ଦା  
 ବାଟିକିହାଁ ହୀତେସି, ଅଡ଼େ ବାରେ କୁଟମି ମାହାପୁରୁ ତାଣା ନାମାନା  
 ହାରେକା ରାହାଁ ଆଡ଼େରି ।

୩୫ ଲାଲୁ ଝେୟାଲିଏ ରମିୟ ଲକୁତି କାଜାରି ରିଜାରି କସ୍‌କାଣି  
 ଇଲେଇଞ୍ଜି<sup>~</sup> ଝେସା ପାଣ୍ଡିତେରି, “ଏ ଲକୁଣି ପିସାତୁହ୍‌ଦୁ ।”

୩୬ ଏରେଟିଏ କାୟିଦି ଇଲୁ କାଃଆନାସି ପାଞ୍ଜୁଲଇଁ ଇ କାତା  
 ଝେସେସି, “ନୀହାଁୟି କିନାରି ନିଜେ ଅଡ଼େ ସିଲାଇଁ ପିସାଲି କାତୁ ପାଣ୍ଡା  
 ମାଞ୍ଜାନେରି, ଇଞ୍ଜା ନୀଏଁ ହଟାଞ୍ଜାହାନା ହିଡ଼ଡ଼ି ତଲେ ହାଲୁ ।”

୩୭ ସାମା ପାଞ୍ଜୁଲ କସ୍‌କାଣି ଏଲେଇରେସି, “ମାନ୍ତୁ ରୁମିୟ ଦେସାତି  
 ଲକୁତମି, ମାଜେ ନୀହାଁୟି କିଆନା ଝେତାତି ତାୟୁ କାୟିଦି ଇଲୁତା  
 ସୁଣ୍ଡାତେରି, ଅଡ଼େ ନୀଏଁ ଡକୁହାନା ପିସିମାଞ୍ଜାନେରି, ଏଦି ମିଶ୍‌ଏ,  
 ସାମା ଏଞ୍ଜାରି ତାମ୍‌ସୁ ଝାହାନା ମାଜେ ପାଙ୍ଗାତା ଅୟାପେରି ।”

୩୮ ଏରେଟିଏ କସ୍‌କା ହାଜାନା ନୀହାଁୟି କିନାରାଇଁ ବାରେ କାତା  
 ଝେସେରି, ଇଞ୍ଜା ଇଞ୍ଜାରି ରମିୟ ଲକୁ ଇଞ୍ଜି<sup>~</sup> ପୁଞ୍ଜାନା ଆଜିତେରି,  
 ୩୯ ଏମ୍‌ଗାଟିଏ ଏଞ୍ଜାରି ଝାହାନା ମାନ୍ତୁ ପୁନାଆନା ଏଲେକିତମି ଇଞ୍ଜି<sup>~</sup>  
 ବାତିମାଲିହ<sup>~</sup> ଏଞ୍ଜାରାଇଁ ପାଙ୍ଗାତା ହପ୍‌ହା ତାତାନା, ଗାଡ଼ା ପିସାନା  
 ହାଜାଲି ବାତିମାଲିତେରି ।<sup>୪୦</sup> ଏରେଟିଏ ପାଞ୍ଜୁଲ ଅଡ଼େ ସିଲା କାୟିଦି  
 ଇଲୁଟି ହଟାନା ଲୁଦିୟା ଇଜ ହାରେରି, ଅଡ଼େ ତାୟିୟା ତଲେ ଆଣ୍ଡାନା  
 ଏଞ୍ଜାରାଇଁ ବାସୁଁ ହୀହାନା ହାଜାତୁସେରି ।

## ୧୭

### ତେସଲନିକିତା କାମା

<sup>୧</sup> ତାୟୁ ଏଞ୍ଜାରି ଆପିପଲି ଅଡ଼େ ଆପଲନିୟା ହୀହାନା  
 ତେସଲନିକିତା ଝାଡ଼େରି; ଏମ୍‌ଗାଆଁ ଜୀହୁଦି ଲକୁତି ର ଜୀହୁଦି ଲକୁତି  
 କୁଟମି ଇଲୁ\* ମାରେ ।<sup>୨</sup> ଅଡ଼େ, ପାଞ୍ଜୁଲ ତାନି ମେରା ଲେହେଁ ଜୀହୁଦି  
 ଲକୁତି କୁଟମି ଇଲୁତା<sup>†</sup> ହାରେସି, ଇଞ୍ଜା ତାନିଗଟା ଜମିନି ଦନା  
 ପାତେକା ଦାମ୍‌ ପତିତି କାତା ଆସାନା ଲକୁତଲେ ଜଲକି ଆଡ଼େସି,

† ୧୭:୩୩ ୧୭:୩୩ମୁଞ୍ଜିନାୟି \* ୧୭:୧ ୧୭:୧ ସିନଗର୍ † ୧୭:୨ ୧୭:୨ ସିନଗର୍

୩ ଦୀର୍ଘ ସାପ୍ତେରି ତେଲହି କିହାନା ଏ କାତା ଇଦି ଇଞ୍ଜିଁ ଇଚେସି, ମସିହା ସାସ୍ତି ପାଣ୍ଡନାୟି ଅଡ଼େ ହାକିଟି ନିଜିନାୟି ଲଡ଼ାମାନେ । ପାଞ୍ଜୁଲ ଏଲେଇଚେସି, “ଆମିନି ଜୀମୁତି କାତା ଖେସିମାଞ୍ଜାଇଁ, ଏଞ୍ଜାସି ଏ ମସିହା ।” ୪ ଏମ୍ବାଟିଏ ଏଞ୍ଜାରି ବିତ୍ରାଟି ଏଚରଜାଣା ନାମାହାଁ ପାଞ୍ଜୁଲ ଅଡ଼େ ସିଲା କାତାତା ଆଣ୍ଡିତେରି; ଅଡ଼େ, ଜୀହୁଦି ଦୀର୍ଘ ନାମାମାନି ଗ୍ରିକ୍ ଲକୁ ବିତ୍ରାଟି ହାରେକା ଲକୁ ଅଡ଼େ ମାନିଗାଟି ହାରେକା ଇୟାସିକା ବିତ୍ରାଟି ଏଞ୍ଜାରିତଲେ ମାହାପୁରୁ ସେବାତା ଆଣ୍ଡିତୁ ।

\* ସାମା ଜୀହୁଦିୟାଁ ତାହାରା ଆହାନା ଏଚେକା ଲାଗେଏତାରାଇଁ ପାହେରିତା କୁଡ଼ି କିଚେରି, ଇଞ୍ଜାଁ ଲକୁଣି ମାନ୍ଦା କିହାନା ଗାଡ଼ାତା ଗଡ଼ହା ହପ୍ତହେରି, ଇଞ୍ଜାଁ ପାଞ୍ଜୁଲ ଅଡ଼େ ସିଲାଇଁ ସାଲୁଞ୍ଜି କିନାରି ନକିତା ହପ୍ତହାତାଗାଲି ଏଞ୍ଜାରି ହାଜାନା ଜାସନ ଇଲୁଡି ମୁଗାନା ପାରିଚେରି । ୬ ସାମା ଏଞ୍ଜାରିଇଁ ବେଟାଆଆଲିଏ ଏଞ୍ଜାରି ଜାସନ ଅଡ଼େ ଏଚେକା ତାୟିୟାଁଇଁ ଗାଡ଼ାତି ସାଲୁଞ୍ଜି କିନାରି ନକିତା ରେଜା ତାଚାନା କାଜା ଗିୟାତଲେ କାଲୁଞ୍ଜି ଆହୁଁ ଏଲେଇଚେରି, “ଆମିନି ଲକୁ ଦାରୁତି ଇତାଲା ଆତାଲା କିହିମାନେରି, ଏଞ୍ଜାରି ଇମ୍ବାଆଁ ଜିକେଏ ଖାହାମାନେରି; ୭ ଜାସନ ଏଞ୍ଜାରିଇଁ ଆବାମାନେସି, ଜୀମୁ ଦରୁଗାଟି ଅଡ଼େ ର ରାଜା ମାନେସି ଇଞ୍ଜିଁ ଖେସାନା ଇଞ୍ଜାରି ବାରେଜାଣା କାୟିସରତି ହୁକୁମିତି ମାନୁଞ୍ଜି କିହିଲିଅରି ।” ୮ ଇ କାତା ଆସାନା ଲକୁ ଅଡ଼େ ସାଲୁଞ୍ଜି କିନାରି ବିତ୍ରା ହାରେକା କାର୍ବି ଆଡ଼େରି ଅଡ଼େ ଗଡ଼ହା ଆଡ଼େ । ୯ ତାୟୁ ସାଲୁଞ୍ଜି କିନାରି ଜାସନ ଅଡ଼େ ଏଚକା ଲକୁଣି ତାବୁୟାଁ ରୀସାନା ଜାମ୍ଲି ତଲେ ଏଞ୍ଜାରିଇଁ ପିସ୍ତେରି ।

### ବେରିୟାତା କାମା

୧୦ ଅଡ଼େ, ତାୟିୟାଁ ଖେଡ଼ାକିଆନା ପାଞ୍ଜୁଲ ଅଡ଼େ ସିଲାଇଁ ଲାଆଁ ବେଲାତା ବେରିୟାତା ପାଣ୍ଡିତେରି; ଏଞ୍ଜାରି ଏମ୍ବାଆଁ ଏଜାନା ଜୀହୁଦି ଲକୁଡି ଜୀହୁଦି ଲକୁଡି କୁଚମି ଇଲୁଡା‡ ହାଚେରି । ୧୧ ତେସଲନିକିତା ମାନି ଜୀହୁଦି ଲକୁ କିହାଁ ଇଞ୍ଜାରି ସାତାପାଣା ଗାଟାରି ମାଚେରି, ଇଞ୍ଜାରି ହାରେକା ରାହାତଲେ ମାହାପୁରୁ କାତା ଖେଚେରି, ଅଡ଼େ ପାଞ୍ଜୁଲ

‡ ୧୭:୧୦ ୧୭:୧୦ ସିନଗଗ୍

ଝେସ୍ତି କାତା ସାତା କି ଆଏ ଏଦାଆଁ ପୁଞ୍ଜାଲି ବାରେଦିନା ଦାମ୍ବୁ ପତି ପଡ଼଼ି ଆହିମାଚେରି । ୧୭ ଇଦାଆଁତାକି ଏଞ୍ଜାରି ବିତ୍ରାଟି ହାରେକା ଲକୁ ନାମିଚେରି ଅଡ଼େ ଗ୍ରିକ୍ ଲକୁତି କାଜାରି ବିତ୍ରାଟି ହାରେକା ଇୟାସିକା ଅଡ଼େ ଆବାୟାଁ ଜିକେଏ ନାମିଚେରି । ୧୮ ସାମା ଏଚିବେଲା ଡେସଲନିକିତି ଜାହୁଦିଙ୍ଗା ପୁଚେରି, କି ବେରିୟାତା ଜିକେଏ ପାଞ୍ଜୁଲ ତାଣାଟି ମାହାପୁରୁତି ବଲୁ ଝେସ୍ତି ଆହିମାନେ, ଏଚିବେଲା ଏଞ୍ଜାରି ଏମ୍ବାଆଁ ଜିକେଏ ଝାହାନା ଲକୁ ମାନ୍ଦାତି ନିକ୍‌ହାନା ଗଡ଼ୁହା କିଞ୍ଜିକିଚେରି । ୧୯ ଏଚେଟିଏ ତାୟିୟାଁ ଝେଡ଼ାକିଆନା ପାଞ୍ଜୁଲଇଁ ସାମ୍‌ଦୁରି ଝାକି ହାଜାଲି ପାଣ୍ଡିଚେରି; ଇଞ୍ଜା ସିଲା ଅଡ଼େ ତିମତି ବେରିୟାତା ଡ଼ୟିଚେରି । ୨୦ ସାମା ଆମ୍ବାଆରି ପାଞ୍ଜୁଲଇଁ ଇଚିହାଚାରି ଏଞ୍ଜାରି ଆତିନି ପାତେକା ହାଚେରି, ଇଞ୍ଜା ସିଲା ଅଡ଼େ ତିମତି ତବେ ନା ତାଣା ଝାପେରି ଇଞ୍ଜା ପାଞ୍ଜୁଲ ତାଣାଟି ହୁକୁମି ବେଟାଆହାନା ଏଞ୍ଜାରି ବେରିୟାତା ଝେଣ୍ଡେ ଝାଡ଼େରି ।

### ଆତିନିତା ପାଞ୍ଜୁଲତି ସେବା କାମା

୧୭ ଆତିନିତା ପାଞ୍ଜୁଲ, ସିଲା ଅଡ଼େ ତିମତିଇଁ କାଟିମାଚେସି, ଏଞ୍ଜାସି ଏ ଗାଡ଼ାତା ହାରେକା ପେଣ୍ଡକା ବମାୟାଁ ମାନାଣି ମେସାନା ତାନି ଜୀଞ୍ଜୁ ହାରେକା ଝାଡ଼ିଚେ । ୧୮ ଏଦାଆଁତାକି ଏଞ୍ଜାସି ଜୀହୁଦି ଲକୁତି କୁଟମି ଇଲୁତାଟି ଜୀହୁଦି ଲକୁତଲେ ମାହାପୁରୁଇଁ ନାମାମାନି ଜୀହୁଦିଆଆତି ଲକୁତଲେ ଇ କାତା ବାରେଦିନା ଝେକ୍‌ହେସି । ଗାଡ଼ାତି ଜିରୁ ଗାଟାତା ହାଜି ଝାହିମାନି ଲକୁତଲେ ଏ କାତାତି ଝେସ୍ତିସି । ୧୯ ଏଚରଜାଣା ଏପିକୁରିୟା ଇଞ୍ଜା ସ୍ତୟିକ୍ ଜାପ୍‌ନି ଗୁରକା ତଲେ ଏଞ୍ଜାରି ରୁଜୁବାଡ଼ି ଆଡେ । ଏଞ୍ଜାରି ବିତ୍ରାଟି ଏଚରଜାଣା ଏଲେଇଚେରି, “ଇ ବୁଦି ହିଲାଆ ହାଡ଼ାକାଣ୍ଡୁ ଏନାଆଁ ଝେସାଲି ଅଣ୍ଡିମାନେସି ?” ଅଡ଼େ ଏଚରଜାଣା ଏଲେଇଚେରି, “ଏଞ୍ଜାସି ପୁନାଆତି ପେଣ୍ଡକାତି କାତା ଝେହ୍‌ନିଲେହେଁ ଝେସିମାନେସି;” ଇଚିହୁଁ ଏଞ୍ଜାସି ଜୀସୁ ଅଡ଼େ ତାନି ଝେଣ୍ଡେ ନିଜିତି କାତାତି ନେହୁଁ କାରୁ ଝେକ୍‌ହି ମାଚେସି । ୨୦ ଏଦାଆଁତାକି ଏଞ୍ଜାରି ପାଞ୍ଜୁଲଇଁ ଆରିୟପାଗ ଗାଡ଼ାତି ବେରଣି ନକିତା ତାଚେରି, “ନୀନୁ ଆମିନି ପୁଞ୍ଜି କାତା ଜାପ୍‌ହିମାଞ୍ଜି ଏଡ଼ି ଏନାୟି ଇଞ୍ଜା ମାମ୍‌ପୁଞ୍ଜାଲି

ଆଡ଼ିନମି କି ? ୨୦ ଇତିହାସ ନାନୁ ଏଚେକା କାବାଆନି କାତା  
ମାଙ୍ଗେ ଖେଣ୍ଡି କିହିମାଞ୍ଜାଦି; ଇ ବାରେ କାତା ଏନାୟି ଏଦାଆଁ ମାମ୍ବୁ  
ପୁଞ୍ଜାଲି ଅଣ୍ଡ଼ିମାନମି ।” ୨୧ ଆଡ଼ିନି ଗାଡ଼ାତି ଲକୁ ଅଡ଼େ ଏମ୍ବାଆଁ  
ବାସାଆହାମାନି ଏଟକା ଦେସାତି ଲକୁ ପୁଞ୍ଜି କାତା ଖେସାଲି ଇଞ୍ଜା  
ଖେଞ୍ଜାଲି ରାହାଁ ଆହିମାଚେରି । ଏମ୍ବାଆଁ ଏଞ୍ଜାରି ଦିନା ରାପୁହି ମାଚେରି  
।

୨୨ ଏଚେଟିଏ ପାଞ୍ଜୁଲ ଆରିୟପାଗତି ବେରଣି ମାଦିଏ  
ନିଚାନା ଏଲେଇଚେସି, “ଏ ଆଡ଼ିନିତି ଲକୁ, ମୀରୁ ବାରେ ଗାତି  
ଦାମ୍ବୁଗାଟାଚେରି, ଇଞ୍ଜା ହାରେକା ପେଣ୍ଡକାଣି ସେବା କିନାଚେରି,  
ଏଦାଆଁ ନାନୁ ମେସିମାଇଁ । ୨୩ ଇତିହାସ ନାନୁ ମୀ ଗାଡ଼ାତି  
ହାଜିମାଚେସି, ଅଡ଼େ ମୀରୁ ପୂଜା କିନି ଟାୟୁତା ସିନିକିତେସି, ନାନୁ  
ପୂଜା ପିଣ୍ଡାତା ମେସେସି ଏମ୍ବାଆଁ ରାସ୍‌କି ଆହାମାନେ, ‘ପୁନାଆତି  
ମାହାପୁରୁ ।’ ଆମିନିଗାଟାଣି ମୀରୁ ପୂଜା କିହିମାଞ୍ଜେରି, ଏଦାଆଁ ମୀରୁ  
ପୁଞ୍ଜାହିଲାଆତିହାସ ଜିକେଏ, ଏଦେଏ ନାନୁ ମିଙ୍ଗେ ଖେସିମାଞ୍ଜାଇଁ  
। ୨୪ \*ଆମିନି ମାହାପୁରୁ ଦାର୍ଡି ଅଡ଼େ ଏମ୍ବାଆଁ ମାନି ବାରେ ରାଡ଼ି  
କିହାମାନେସି, ଏଞ୍ଜାସି ଲାକପୁରୁ ଅଡ଼େ ଦାର୍ଡିତି ପ୍ରବୁ ଆହାମାନାକି  
ମାଣ୍ଡି କେୟୁଟି କେପିତି ଦେଞ୍ଜୁଡ଼ିତା ବାସା କିଅସି । ୨୫ ଇତିହାସ  
ଏଞ୍ଜାଣାକି ଏନାୟି ଲଡ଼ା ମାନାୟି ହିଲାଆକି ମାଣ୍ଡି କେୟୁଟି ସେବା  
ଆଅସି, ଇତିହାସ ଏଞ୍ଜାସି ତାନୁଏ ବାରେତାକି ଜୀଞ୍ଜୁ, ନେଞ୍ଜାଲି ଇଞ୍ଜା  
ବାରେ ଲଡ଼ାମାନାଣି ଇନେସି । ୨୬ ର ମାଣ୍ଡି ତାଣାଟି ଏଞ୍ଜାସି ବାରେ  
ଲକୁ ବାକାଇଁ ରାଡ଼ି କିହାମାନେସି; ଇଞ୍ଜା ଏଞ୍ଜାଣି ହୁକୁମି ତଲେ ଏଞ୍ଜାରି  
ଦାର୍ଡିତି ବାରେଞ୍ଜାକି ବାସା କିହାମାନେରି । ଆମିନି ବେଲାତା,  
ଆମ୍ବାଆସି ଆମିନି ତାଣା ବାସା କିନେସି, ମାହାପୁରୁ ମୂଲୁଟିଏ ଏଦାଆଁ  
ତୀରି କିହାମାନେସି । ୨୭ ମାହାପୁରୁତି ଅଣ୍ଡ଼ି ମାଚେ, ବାରେକାଣା  
ଏନିକିହି ଏଞ୍ଜାଣାଇଁ ପାରାନା ବେଟାଆନେରି । ସାମା ମାହାପୁରୁ  
ଆମ୍ବାଆରି ତାଣାଟି ହେକ ହିଲଅସି ।” ୨୮ ଏନିଇତିହାସ ରଅସି  
ଖେସାମାନେସି,

“ଏଞ୍ଜାଣି ତାଣା ମାର ନୀଡିନାୟି, ତାକିନାୟି ଅଡ଼େ ଡ଼ୟିନାୟି ।  
ଇଞ୍ଜା ମୀ ବିଡ଼ାଟି ଜିକେଏ ଏଚରଜାଣା ଖେସାମାନେରି,



ମାର ଜିକେଏ ଏଞ୍ଜାଣି ମୀରକା ମାସ୍କା ।”

୨୯ “ଇଚିହ୍ନି ମାର ମାହାପୁରୁତି ମୀରକା ମାସ୍କା ଆଡାକି ଈ ମାହାପୁରୁ ଲେହେଁ ମାଣ୍ଠିସି ବୁଦି ଅଡେ ଅଣ୍ଠୁ ତଲେ କେପିତି ବାଂଗାରା, ଖେଣ୍ଡି କି ଖାଲକାତି ବମା ଲେହେଁ ଅଣ୍ଠିପିନାୟି ଆଏ । ୩୦ ଲକୁ ମାହାପୁରୁଇଁ ପୁଞ୍ଜା ହିଲାଆ ବେଲାତା ଏଞ୍ଜାସି ଦହ ଆସା ହିଲାଆତେସି, ସାମା ନୀଏଁ ଏଞ୍ଜାସି ବାରେଜାଣାତି ବାରେଞ୍ଜାକି ତାମି ପାପୁ ଜିରୁଟି ଖେଣ୍ଡା ଖାହାଲି ଖେସିମାନେସି । ୩୧ ଇଚିହ୍ନି ଆମିନି ଦିନା ତାନୁ ଆଡିତି ମାଣ୍ଠିସି ତାଣାଟି ଦାମ୍ଫୁତଲେ ଦାର୍ଡିତି ନୀହାୟି କିନେସି, ଇଲେତି ର ଦିନା ତାରି କିହାମାନେସି, ଇଞ୍ଜା ଇ ବାରେ ସାତା ଇଞ୍ଜା ତସାଲି ଏଞ୍ଜାସି ଏଞ୍ଜାଣାଇଁ ହାତାରି ତାଣାଟି ନିକହାମାନେସି ।”

୩୨ ପାଞ୍ଜୁଲ ତାଣାଟି ହାତାରି ଖେଣ୍ଡେ ନିଜିନି କାତା ଖେଞ୍ଜାନା ଏଚରଜାଣା ଲାଜା କିତେରି, ଅଡେ ଏଚରଜାଣା ଏଲେଇତେରି, “ମାଜେ ଅଡେ ଖେଣ୍ଡେ ଖେସ୍ତାମୁ, ନୀ ତାଣାଟି ଇ କାତା ଖେନମି ।” ୩୩ ଏଚେଟିଏ ପାଞ୍ଜୁଲ ବେରଣିଟି ହରାହାଚେସି । ୩୪ ଏରିୟାପାରିୟ ଦିୟନ୍ଦୁସିୟ ଗଚିତି ଦାମାରି ଇନି ର ଇୟା ଇଞ୍ଜା ଅଡେ ଏଚେକା ଲକୁ ନାମିତେରି ଇଞ୍ଜା ଏଞ୍ଜାଣିତଲେ ଆଣ୍ଡିତେରି ।

## ୧୮

### କରନ୍ତିତା ପାଞ୍ଜୁଲତି କାମା

୧ ଏମ୍ପାଟିଏ ପାଞ୍ଜୁଲ ଆଡିନି ଗାଡ଼ା ପିସାନା କରନ୍ତିତା ହାଚେସି । ୨ ଇଞ୍ଜା ଏଞ୍ଜାସି ଆକ୍ଞିଲା ଦରୁଗାଟି ର ଜୀହୁଦି ଲକୁଇଁ ବେଟାଆଡେସି, ପନ୍ତ ଏଞ୍ଜାଣି ଜାନୀ ଟାୟୁ; ଏଚରଦିନା ନକେଏ ଏଞ୍ଜାସି ତାନି ତକ୍ତି ପିସ୍ଫିଲା ତଲେ ଇଟାଲିଟି ଖାହାମାଚେସି, ଇଚିହ୍ନି କ୍ଲାଞ୍ଜୁଦିୟା ବାରେ ଜୀହୁଦି ଲକୁଇଁ ରମ୍ ପିସା ହାଜାଲି ହୁକୁମି ହାହାମାଚେସି, ପାଞ୍ଜୁଲ ଏଞ୍ଜାସିକାଣି ବେଟି ହାଚେସି, ୩ ଅଡେ ଏଞ୍ଜାରି ଏଞ୍ଜାଣିଲେହେଁ ତୁମ୍ଫୁ ବେବାରା କିନାରି ମାଚାକି ଏଞ୍ଜାରିତଲେ ତୁୟିତେସି, ଅଡେ ଏଞ୍ଜାରି କାମା କିହାଲି ମାଟ୍ଫହେରି, ଏନାଆଁତାକି ଇଚିହ୍ନି ବେବାରାତା ଏଞ୍ଜାରି ତୁମ୍ଫୁ କିନାରି ମାଚେରି । ୪ ଅଡେ ବାରେ ଜମିନି ଦିନାତା ଏଞ୍ଜାସି ଜୀହୁଦି

ଲକ୍ଷ୍ମି କୁଟମି ଇଲୁତା\* ଜଲ୍ଲକି ଆହୁଁ ଜାପ୍‌ହେସି, ଜୀହୁଦି ଅଡ଼େ  
ଗ୍ରିକ୍ ଲକ୍ଷ୍ମି ନାମି କିଞ୍ଜିକିହାଲି ଅଣ୍ଡପିମାଚେସି ।

୫ ଏଚିବେଲା ସିଲା ଅଡ଼େ ତିମତି ମାକିଦନିୟାଟି ଖାଡ଼େଚରି,  
ଏଚିବେଲା ପାଞ୍ଜୁଲ ନେହୁଁ ବଲୁ ଖେକ୍‌ନି କାମା ଜମାଆନା  
କିହିମାଚେସି, ଅଡ଼େ ଜୀସୁଇଁ ମସିହା ଇଞ୍ଜୁଁ ଜୀହୁଦି ଲକ୍ଷ୍ମିତାଣା  
ସାକି ହାହିମାଚେସି । ୬ ସାମା ଏଞ୍ଜାରି ଅପାଆନା ନିନ୍ଦା କିହାଲିଏ  
ଏଞ୍ଜାସି ତାନି ହିମ୍ବରି ହାଣ୍ଡାଁନା ଏଲେଇଚେସି, “ମୀରୁ ନାସା ଆତିହୁଁ  
ଏଦାଆଁତାକି ମୀରୁ ଦାୟି ଆଡ଼େଚରି । ଏଦାଆଁତାକି ନାନୁ ଦାୟି ଆଏ,  
ନୀଏଁ ନାନୁ ଜୀହୁଦିଆଆତି ଲକ୍ଷ୍ମିତାଣା ହାଜିମାଇଁ ।” ୭ ଏମ୍ପାଟିଏ  
ଏଞ୍ଜାସି ଏ ଟାୟୁଟି ହଡ଼ା ହାଜାନା ତିତସ ଜୁସ୍ତ ଇନି ଜୀହୁଦିଆଆତି  
ମାହାପୁରୁ ସେବା କିନାସି ଏଞ୍ଜାଣି ଇଜ ହାଚେସି, ଏଞ୍ଜାଣି ଇଲୁ ଜୀହୁଦି  
ଲକ୍ଷ୍ମି କୁଟମି ଇଲୁ† ତାଗେ ମାଚେ । † ସାମା ଜୀହୁଦି ଲକ୍ଷ୍ମି କୁଟମି  
ଇଲୁ‡ କାଜାସି କ୍ରିସ୍‌ପ ବାରେ ଇଲୁ କୁଟମି ତଲେ ପ୍ରୁ ତାଣା  
ନାମିଚେଚରି, ଅଡ଼େ କରନ୍ତି ଗାଡ଼ାତି ଲକ୍ଷ୍ମି ବିତ୍ରାଟି ହାରେକା ପାଞ୍ଜୁଲତି  
କାତା ଖେଞ୍ଜାନା ନାମିଚେଚରି ଅଡ଼େ ବାପ୍ରିସ୍ତୁଁ ଅଡ଼େଚରି ।

୯ ଅଡ଼େ ପ୍ରୁ ଲାଆଁୟାଁ ବେଲାତା ସେୟାଁଣା ହାପାନାତା ପାଞ୍ଜୁଲଇଁ  
ଏଲେଇଚେସି, “ଆଜାଆନି, ସାପି ଡ଼ୟାଆନା ଜଲ୍ଲାମ୍, ୧୦ ଇଚିହୁଁ  
ନାନୁ ନୀ ତଲେ ମାଇଁ, ଆମିନି ଲକ୍ଷ୍ମି ଜିକେଏ ନୀ କପାଟି ନିଙ୍ଗାନା  
ନିଙ୍ଗେ ନାସା କିହାଲି ଆଡ଼ଅସି, ଇଚିହୁଁ ଇ ଗାଡ଼ାତା ହାରେକା ନା  
ଲକ୍ଷ୍ମି ମାନେଚି ।” ୧୧ ଇଞ୍ଜା ପାଞ୍ଜୁଲ ଏଞ୍ଜାରିତାଣା ମାହାପୁରୁତି କାତା  
ଜାପ୍‌ହେସିଁ ର.ବାର୍ସା ସ ଲେଞ୍ଜୁ ଡ଼ୟିଚେସି ।

୧୨ ସାମା ଗାଲିୟ ଆକାୟାତି ରମିୟ ସାଲ୍‌ଞ୍ଜି କିନାସି  
ମାଟିବେଲାତା, ଜୀହୁଦି ଲକ୍ଷ୍ମି ପାଞ୍ଜୁଲ କପାଟି ନିଙ୍ଗାନା ଏଞ୍ଜାଣାଇଁ  
ନୀହାଁୟି କିନାରି ତାଣା ଦସା ଅହାନା ଏଲେଇଚେଚରି, ୧୩ “ଇଞ୍ଜାସି  
ମସାତି ମେରା କପାଟି ଅର ରଲେକ୍‌ ମାହାପୁରୁତି ସେବା କିହାଲି  
ଲକ୍ଷ୍ମି ଜାପ୍‌ହେମାନେସି ।”

୧୪ ସାମା ପାଞ୍ଜୁଲ ଗୁତି ଏକ୍‌ହାନା ଜଲ୍ଲାଲି ମାଟ୍‌ହି ମାଚାଟି,  
ଗାଲିୟନ ଜୀହୁଦି ଲକ୍ଷ୍ମି ଏଲେଇଚେସି, “ଆଡ଼େ ଜୀହୁଦି ଲକ୍ଷ୍ମିଚେଚରି

\* ୧୮:୪ ୧୮:୪ ସିନଗର † ୧୮:୭ ୧୮:୭ ସିନଗର ‡ ୧୮:୮ ୧୮:୮ ସିନଗର  
§ ୧୮:୮ ୧୮:୮ ମୁଞ୍ଜନାୟି

ଏନିଲେହେଁତି ଦହ କି ଲାଗେଏତି କାମା ଆଡ଼ିହୁଁମା ସୁସ୍ତି ତଲେ ମୀ କାତା ଝେନାୟି ନାଙ୍ଗେତାକି ନେହେଁ ଆଡେତମା, <sup>୧୫</sup> ସାମା ଇଦି ଝାରୁଇ ବଲୁ ଅଡେତ ଦରୁ ଅଡେତ ମୀ ମେରାତି କାତା ମୀରୁଏ ଇଦାଆଁ ସୁସ୍ତି କିଦୁ । ଇଲେତି କାତାତି ନାନୁ ନାହାଁୟି କିଅଁ !” <sup>୧୬</sup> ଏଲେଇଞ୍ଜାନା ଏଞ୍ଜାସି ଏଞ୍ଜାରାଇଁ ନାହାଁୟି କିନି ତାଣାଟି ପେର୍ହା ତୁସ୍ତେସି । <sup>୧୭</sup> ଏଚେଟିଏ ବାରେଜାଣା ସସ୍ତାନ ଇନି ଜାହୁଦି ଲକୁତି କୁଟମି ଇଲୁତି\* କାଜାଣାଇଁ ଆସାନା ନାହାଁୟି ପାଙ୍ଗାତା ଝେତେରି; ସାମା ଗାଲିୟନ ଏ ବାରେ କାତାତା ମନ ହୀଆତେସି ।

### ପାଞ୍ଜୁଲ ଆନ୍ତ୍ରିୟକିୟାତା ଝେଣ୍ଡାଞ୍ଜାନାୟି

<sup>୧୮</sup> ପାଞ୍ଜୁଲ କରନ୍ତ୍ରିତା ନାମିତି ତାୟି ତାଙ୍ଗିସ୍ତା ତଲେ ହାରେକା ଦିନା ତୟାନା ତାୟିୟାଁ ତାଣାଟି ହେଲ ବେଟାଆହାନା ଏୟୁ ଜାକାଟି ସିରିୟାତା ହାଚେସି, ପ୍ରିସ୍ତିଲା ଅଡେ ଆକ୍ଝିଲା ତାନିତଲେ ହାଚେରି, ତାନି ଆଞ୍ଜିତାୟି ମାଗାକି ଏଞ୍ଜାସି କେକ୍ଝେୟାତା ତାନି ତାୟିଁ ହିଣ୍ଡହେସି । <sup>୧୯</sup> ତାୟୁ ଏଞ୍ଜାରି ଏପିସିୟତା ଝାଡେତରି, ଅଡେ ଏଞ୍ଜାସି ଏ ଗାୟୁତା ଆକ୍ଝିଲା ଅଡେ ପ୍ରିସ୍ତିଲାଇଁ ହେଲ ହୀହାନା ପାଞ୍ଜୁଲ ରଅସିଏ ଜାହୁଦି ଲକୁତି କୁଟମି ଇଲୁତା† ହଡାନା ଜାହୁଦିୟାଁ ତଲେ ହାଡାକାତା ଆଡେତରି । <sup>୨୦</sup> ଇଞ୍ଜା ଏଞ୍ଜାରି ଏଞ୍ଜାଣାଇଁ ହାରେକା ଦିନା ତୟାଲି ବାତିମାଲିତିହୁଁଞ୍ଜା ଏଞ୍ଜାସି ତୟାଲି କୂତେସି । <sup>୨୧</sup> ସାମା ଏଞ୍ଜାରି ତାଣାଟି ହେଲ ଅହାନା ଏଲେଇଚେସି, “ମାହାପୁରୁତି ମନ ଆଡ଼ିହୁଁ ଅଡେ ର ଦେବା ମୀ ତାଣା ଝେଣ୍ଡା ଝାଇଁ,” ଇଞ୍ଜା ଏଞ୍ଜାସି ଏପିସିୟଟି ହାଚେସି ।

<sup>୨୨</sup> କାୟିସିରିୟାତା ଏଗାହାଜାନା ଏମ୍ବାଟି ଜିରୁସାଲମତା ହାଚେସି, ଅଡେ କୁଲମିତି ଜହରା କିହାନା ଏମ୍ବାଟିଏ ଆନ୍ତ୍ରିୟକିୟାତା ହାଚେସି । <sup>୨୩</sup> ଏମ୍ବାଆଁ ଏଚରଦିନା ତୟିତି ତାୟୁ, ଏଞ୍ଜାସି ଅଡେ ଝେଣ୍ଡେ ହାଜାନା ଗାଲାତିୟ ଇଞ୍ଜା ପୁଗିୟା ନାୟକା ହୀହାନା ହାଚେସି, ଅଡେ ଜିରୁତା ସୀସୁୟାଣି ତାନି ନାମୁତା ଆର୍ଝା ତଲେ ତୟାଲି ରାହାଁ ହୀତେସି ।

### ଏପିସିୟ ଅଡେ କରନ୍ତ୍ରିତା ଆପଲ

\* **୧୮:୧୭** ୧୮:୧୭ ସିନଗର    † **୧୮:୧୯** ୧୮:୧୯ ସିନଗର

୨୪ ଏମ୍ବାଟିଏ ଆପଲ ଦରୁଗାଟି ର ଜୀହୁଦି ଏପିସିୟତା ଖାଡେସି, ଏଝାସି ଆଲେକଜାଣ୍ଡିୟାତା ଜାର୍ନା ଆହାମାରେସି, ଏଝାସି ନେହ୍‌କ୍‌ ଝେସାଲି ଆଡିନାସି ଅଡେ ଦାର୍ନୁ ପତିତି କାତା ଗାତି ପୁନାସି ମାରେସି । ୨୫ ଇଝାସି ପ୍ରବୁ ଜିରୁତି କାତା ନେହ୍‌କ୍‌ ଜାପାମାରେସି, ଇଞ୍ଜା ଜୀହୁତଲେ ବାଡ଼ୟୁ ବେଟାଆହାନା ଜୀସୁତି କାତା ନେହ୍‌କ୍‌ ଜାପୁହି ମାରେସି, ଏଝାସି ଖାରୁଇ ଜହନତି ବାପ୍ତିସ୍ମା କାତା ପୁଞ୍ଜାମାରେସି । ୨୬ ଏଝାସି ସାସାତଲେ ଜୀହୁଦି ଲକୁତି କୁଟମି ଇକୁତାଟି ଜଲ୍ଲାଲି ମାଟ୍‌ହେସି, ସାମା ଆକ୍‌ଝିଲା ଅଡେ ପ୍ରିସ୍ତିଲା ଏଝାଣି କାତା ଝେଞ୍ଜାନା ଏଝାଣାଇଁ ତାମି ଇଜ ଅହାନା ଏମ୍ବାଆଁ ହାରେକା ନେହ୍‌ ମାହାପୁରୁ ଜିରୁତି କାତା ପୁଣ୍ଡିକିତୁ । ୨୭ ତାୟୁ ଆପଲ ଆକାୟା ଦେସାତା ହାଜାଲି ମନ୍ କିହାଲିଏ ଏପିସିୟତି ନାମିତି ତାୟିୟାଁ ଏଝାଣାଇଁ ସାୟେମି କିତେରି, ଇଞ୍ଜା ଏଝାଣାଇଁ ରାହାତଲେ ଆବାଲି ଆକାୟାତା ମାନି ସୀସୁୟାକି ର ଆକୁ ରାଡିତେରି, ଏଝାସି ଏମ୍ବାଆଁ ଏଗାହାଜାନା ମାହାପୁରୁ କାର୍ମାଟି ନାମା ମାନାରାକି ହାରେକା ସାୟେମି କିତେସି । ୨୮ ଇତିହ୍‌ ଜୀସୁଏ ମସିହା ଇଞ୍ଜ୍‌ ଦାର୍ନୁ ପତିତି ନେହ୍‌କ୍‌ ତସାହାଁ ଏଝାସି ବାରେଜାଣା ନକିତା ତାନିତଲେ ଆସ୍‌ପି ଆହିମାନି ଜୀହୁଦି ଲକୁଣି ହାରୁଝି କିତେସି ।

## ୧୯

### ଏପିସିୟତା ପାଞ୍ଜୁଲ

୧ ଆପଲ କରନ୍ତିତା ମାଟିବେଲ୍‌ତା ପାଞ୍ଜୁଲ ଝେଡ଼ା ହପୁଞ୍ଜାକିତି ରାକି ରେଜାନା ଏପିସିୟ ଗାଡ଼ାତା ଏଗାଞ୍ଜାଡେସି । ଏମ୍ବାଆଁ ଏତରଜାଣା ସୀସୁୟାଣି ବେଟାଆଡେସି, ୨ ଏଝାସି ଏଝାରାଇଁ ଝେରେସି, “ମୀରୁ ନାମିତି ରେଟୁଏ ସୁଦୁଜୀଞ୍ଜୁ ବେଟାଆହା ମାରେରି କି ?” ଏଝାରି ଏଲେଇଚେରି, “ଆଏ ସୁଦୁଜୀଞ୍ଜୁ ମାନେ ଇଞ୍ଜ୍‌ ମାମ୍‌ ଝେଞ୍ଜା ଜିକେଏ ହିଲଅମି ।”

‡ ୧୮:୨୫ ୧୮:୨୫ମୁଞ୍ଜିନାୟି § ୧୮:୨୬ ୧୮:୨୬ ସିନଗଗ

୩ ପାଞ୍ଚୁଲ ଏଞ୍ଜରାକ୍ ଖେରେସି, “ଆଡିହିଁ ମୀରୁ ଏନିଲେହେଟ୍ଟି ବାପ୍ତିସ୍ତା\* ବେଟାଆହା ମାଚେରି ।” ଏଞ୍ଜାରି ଏଲେଇଚେରି, “ମାମ୍ନୁ ଜହନତି ବାପ୍ତିସ୍ତା† ଅହାମାଚମି ।”

୪ ✨ଏମ୍ବାଟିଏ ପାଞ୍ଚୁଲ ଏଲେଇଚେସି, “ଜହନତି ବାପ୍ତିସ୍ତା‡ ହିୟାଁ ଖେଟ୍ପି କିଞ୍ଜିକିନି ବାପ୍ତିସ୍ତା;§ ଜହନ ଇସ୍ରାୟେଲ ଲକୁଣି ବାପ୍ତିସ୍ତା\* ହୀହାନା ଏଲେଇଚେସି, ନା ଢେଟ ଆମ୍ବାଆସି ଖାହିମାନେସି, ଏଞ୍ଜାଣାକ୍ ଇଚିହିଁ ଜୀସୁକ୍ ନାମାଦୁ ଇଞ୍ଜିଁ ଖେସିମାଚେସି ।”

୫ ଇଦାଆଁ ଖେଞ୍ଜାନା ଏଞ୍ଜାରି ପ୍ରୁ ଜୀସୁ ଦରୁତଲେ ବାପ୍ତିସ୍ତା† ଅଡେରି । ୬ ଅଡେ ପାଞ୍ଚୁଲ ଏଞ୍ଜାରି ଲାକ କେସ୍ଲା ଇଟାଲିଏ ସୁଦୁଜୀସୁ ଏଞ୍ଜାରି ଲାକ ରେଟାଞ୍ଜାଡେ, ଇଞ୍ଜାଁ ଏଞ୍ଜାରି ଏଟକା ଏଟକା ହାଡାତଲେ କାତା ଜଲାନା ମାହାପୁରୁତି ତାୟୁ ଆନି କାତା ଜିକେଏ ଖେକ୍‌ହେରି । ୭ ଏଞ୍ଜାରି ବାରେ ବାରଜାଣା ଆବାୟାଁ ମାଚେରି ।

୮ ତାୟୁ ପାଞ୍ଚୁଲ ଜୀହୁଦି ଲକୁତି ଜୀହୁଦି ଲକୁତି କୁଟମି ଇଲୁତା‡ ହାଜାନା ତାନି ଲେଞ୍ଜୁ ପାଡେକା ସାସାତଲେ ମାହାପୁରୁ ରାଜିତି କାତା ଖେକ୍‌ହିହିଁ ଲକୁତି ମନତି ନାମି କିହାଲି ଅଣ୍ପିଡେସି । ୯ ସାମା ଏଚିବେଲା ଏଚେକା ଲକୁ ଆଟ୍‌ଞ୍ଜା ହିୟାଁ ଅଡେ ମୁଣ୍ଡି ଆହାନା ଲକୁ ନକିତା ପ୍ରୁ ଜିରୁ କପାଟି ନିଜ୍ଜାନା ନିନ୍ଦା କାତା ଖେସ୍ପେରି, ଏଚିବେଲା ପାଞ୍ଚୁଲ ଏଞ୍ଜରାକ୍ ପିସାନା ସୀସୁୟାକ୍ ଏଟକା କିଡେସି, ଇଞ୍ଜାଁ ତୁରାନନ ଇନି ଜାପ୍‌ନି ଇଲୁତା ବାରେଦିନା ଜାପ୍‌ହି ମାଚେସି । ୧୦ ଇଲେଆହିଁ ରୀ ବାର୍ସା ପାଡେକା ଆଡେ; ଏଚେଟିଏ ଆସିୟା ଦେସାତା ବାସାଆହାମାନି ହାରେକା ଜୀହୁଦି ଅଡେ ଜୀହୁଦିଆଆତି ଲକୁ ବାରେଜାଣା ପ୍ରୁତି କାତା ଖେଚେରି ।

**ସ୍ତେବା ମୀରକା**

୧୧ ଅଡେ, ମାହାପୁରୁ ପାଞ୍ଚୁଲ ତାଣାଟି ହାରେକା ବାଡୁୟୁତି କାମାୟାଁ କିହିମାଚେସି । ୧୨ ଇଲାଆହିଁ ପାଞ୍ଚୁଲ ଲେମ୍ବିମାନି ପାଜ୍ଜାତା ତୁରନି ସକା କି ତୁଞ୍ଜାଲା ରଗ ଗାଟାରି ତାଣା ତାତିସାରେ ଏଞ୍ଜାରି ତାଣାଟି ରଗ

\* ୧୯:୩ ୧୯:୩ମୁଞ୍ଜିନାୟି † ୧୯:୩ ୧୯:୩ମୁଞ୍ଜିନାୟି ✨ ୧୯:୪ ୧୯:୪ ମାତି ୩:୧୧; ମାର୍କ ୧:୪,୭,୮; ଲୁକ ୩:୪,୧୭; ଜହ ୧:୨୨,୨୭ ‡ ୧୯:୪ ୧୯:୪ମୁଞ୍ଜିନାୟି § ୧୯:୪ ୧୯:୪ମୁଞ୍ଜିନାୟି \* ୧୯:୪ ୧୯:୪ମୁଞ୍ଜିନାୟି † ୧୯:୫ ୧୯:୫ମୁଞ୍ଜିନାୟି ‡ ୧୯:୮ ୧୯:୮ ସିନଗଗ

ପିସିମାଚେ ଅଡ଼େ ବୁଡୁୟାଁ ହଡ଼ା ହାଜିମାରୁ । ୧୩ ସାମା ରେଜି ରେଜିହିଁ  
 ବୁଡୁୟାଁ ପେରନି ଜୀହୁଦିୟାଁ ବିତ୍ରାଟି ଏଚରଜାଣା ପଲ୍ଲଆ ବୁଡୁୟାଁ  
 ଆସାମାନାରି ଲାକ ପ୍ରୁ ଜୀସୁ ଦରୁ ଆସାନା ପେରହାଲି ଅଶ୍‌ପାନା  
 ଏଲେଇଚେରି, “ପାଞ୍ଜୁଲ ଆମିନି ଜୀସୁଇଁ ଝେକ୍‌ହି ମାନେସି ନାନୁ  
 ଏଞ୍ଜାଣି ଦରୁଟି ନିଙ୍ଗେ ହୁକୁମି ହାହିମାଞ୍ଜାଇଁ ।” ୧୪ ସ୍ଲୋବା ଦରୁଗାଟି ର  
 ଜୀହୁଦି କାଜା ପୂଜେରାତି ସାଡ଼ା ଜାଣା ମୀରକା ଏଲେ କିହିମାଚେରି ।

୧୫ ସାମା ପଲ୍ଲଆ ବୁଡୁୟାଁ ଏଞ୍ଜାରାଇଁ ଏଲେଇରୁ, “ନାନୁ ଜୀସୁଇଁ  
 ପୁଞ୍ଜାମାଇଁ ଅଡ଼େ ପାଞ୍ଜୁଲଇଁ ପୁଞ୍ଜାମାଇଁ; ସାମା ମୀରୁ ଆମ୍ବାଆଚେରି?”

୧୬ ଏଚେଟିଏ ଏ ପଲ୍ଲଆ ବୁଡୁ ଆଲଗା ମାଚାସି ଏଞ୍ଜାରି ଲାକ  
 ଡେଞ୍ଜାନା ଏଞ୍ଜାରାଇଁ ଇରହାଲିଏ ଏଞ୍ଜାରି ନାଗ୍‌ଡ଼ା ଉଗ୍‌ଡ଼ା ରାଣାରାକା  
 ଆହାନା ଏ ଇଲୁଟି ହଚେରି । ୧୭ ଇ କାତା ଏପିସିୟତା ମାନି ଜୀହୁଦି  
 ଅଡ଼େ ଜୀହୁଦିଆଆତି ଲକୁ ବାରେଜାଣା ପୁଚେରି, ଇଞ୍ଜା ବାରେଜାଣା  
 ଆଜିଚେରି, ଅଡ଼େ ଏମ୍ବାଆଁ ପ୍ରୁ ଜୀସୁତି ଦରୁ ହାରେକା ଗାଞ୍ଜୁରମି  
 କିଚେରି । ୧୮ ଅଡ଼େ ନାମୁଗାଟାରି ବିତ୍ରାଟି ହାରେକା ଝାହାନା ତାମ୍ନୁ  
 କିହାମାନି ପଲ୍ଲଆ କାମାତି ଝେସ୍ତେରି । ୧୯ ଅଡ଼େ ଗାରୁଡ଼ି କାମା  
 କିହିମାଚି ହାରେକା ଜାଣା ତାମ୍ନୁ ତୁମି ପତିୟାଁ ତାରିହିଁ ରୁଣ୍ଡା କିହାନା  
 ବାରେଜାଣା ନକିତା ହୁଡ଼ିଚେରି; ଏଞ୍ଜାରି ଏ ବାରେଡି ଲେକା କିହାଲିଏ  
 ରୀ କଡ଼ି ଦସ ମାଣା ଝେଣ୍ଡିଟାକାୟାଁତି ପତିୟାଁ ମାରୁ । ୨୦ ଇଲେଆହିଁ  
 ପ୍ରୁବୁତି ବଲୁ ବାଡ଼ୟୁ ତଲେ ପାତାଆଡେ ସାରିସୁଟୁ ଝେଜିଡେ ।

### ଏପିସିୟ ଗାଡ଼ାତା ଗଡ଼ହା

୨୧ ଇ ବାରେ କାତା ରାତି ତାୟୁ ପାଞ୍ଜୁଲ ମାକିଦନିୟା ଅଡ଼େ  
 ଆକାୟା ମାଦିଟି ଜିରୁସାଲମତା ହାଜାଲି ମନତା ତୀରି କିଚେସି ।  
 ଏଞ୍ଜାସି ଏଲେଇଚେସି, “ଏମ୍ବାଆଁ ହାତି ତାୟୁ ନାନୁ ରମ୍‌ତା ଜିକେଏ  
 ହାନାୟିମାନେ ।” ୨୨ ଅଡ଼େ ଆମ୍ବାଆରି ଏଞ୍ଜାଣି ସେବା କିହିମାଚେରି,  
 ଏଞ୍ଜାରି ବିତ୍ରାଟି ତିମତି ଅଡ଼େ ଏରାସ୍ତ ଇ ରିଆରାଇଁ ମାକିଦନିୟାତା  
 ପାଣ୍ଡାନା ଏଞ୍ଜାସି ଏଚରଦିନା ପାଡେକା ଆସିୟାତା ଡ଼ୟିଚେସି ।

୨୩ ଏଟିବେଲ୍‌ତା ପ୍ରୁ ତସାମାନି ଜିରୁତି କାତା ଅହାନା ଏପିସିୟତା  
 ହାରେକା ଗଡ଼ହା ଆଡେ । ୨୪ ଦିମିଡ଼ିୟ ଦରୁଗାଟି ର ଝେଣ୍ଡି  
 କାମାକିନାସି ଆର୍ଡେମି ପେନୁତି ର ଝେଣ୍ଡିତି ଦେଞ୍ଜୁଡ଼ି କିହିମାଚେସି,

ଇଞ୍ଜା ଏଞ୍ଜାଣି ଇ ବେବାରା କାମା କିନାରାକି ହାରେକା ଲାବା ଆହିମାତେ । ୨୫ ଏମ୍ବାଟିଏ ଏଞ୍ଜାସି ଇଞ୍ଜା ଏଞ୍ଜାରିଲେହେଁ କାମା କିନାରାଇଁ ହାଟାନା ଏଲେଇଚେସି, “ବାରୁୟାଁ ଇ କାମାଟି ମାର ଦନ ବେଟାଆହି ମାନାୟି ଇଞ୍ଜା ମୀରୁ ବାରେ ପୁଞ୍ଜାମାଞ୍ଜେରି; ୨୬ ଅଡେ, କେସ୍ମାତଲେ କେପିତି ପେଣ୍ଟକା ମାହାପୁରୁ ଆଏ ଇଞ୍ଜା ଖେସାନା ପାଞ୍ଜୁଲ ଖାରଇ ଏପିସିୟତା ଆଏ, ସାମା ବାରେ ଆସିୟାତା ଜିକେଏ ହାରେକା ଲକୁଣି ଜାପୁହାନା ଏମ୍ବାଟି ମାଡ଼ି କିହିମାନେସି, ଇଦାଆଁ ମୀରୁ ମେସାମାଞ୍ଜେରି ଅଡେ ଖେଞ୍ଜାମାଞ୍ଜେରି । ୨୭ ଇମ୍ବାଆଁ ଖାରଇ ମା ବେବାରା କାମା ଲାଗେଏ ଆନେ, ଏଡି ଆଏ, ସାମା ଆମିନି କାଜା ପେନୁ ଆର୍ଡେମିଇଁ ବାରେ ଆସିୟା ଅଡେ ଦାରୁଡିତି ଲକୁ ପୂଜା କିହିମାନେରି, ଏଦାନି ଦେଞ୍ଜୁଡିତି ଜିକେଏ ଲକୁ ମାନି କିଅରି, ଇଞ୍ଜା ଆର୍ଡେମି ପେନୁଡି ଦରୁ କାଜା ଦରୁ ଇଞ୍ଜା ଖେଞ୍ଜେଏ ।”

୨୮ ଇ କାତା ଖେଞ୍ଜାନା ବାରେଜାଣା କାରୁବି ଆହାନା କାଜା ଗିୟାତଲେ ଏଲେଇଚେରି, “ଏପିସିୟ ଲକୁଡି ଆର୍ଡେମିଏ କାଜା ପେନୁ ।” ୨୯ ଏଚେଟିଏ ଗାଡ଼ା ବାରେ ଗଡ଼ହା ଆଡେ, ଇଞ୍ଜା ଲକୁ ବାରେ କାଲୁଞ୍ଜି ଆହାନା ପାଞ୍ଜୁଲ ତଲେ ହାଜିମାଟି ମାକିଦନିୟାତି ଗାୟ ଅଡେ ଆରିସ୍ତାର୍କଇଁ ଦସାନା କାହିନି ବାଟାତା ହଚେରି । ୩୦ ଏମ୍ବାଟିଏ ପାଞ୍ଜୁଲ ଲକୁ ମାନ୍ଦା ବିତ୍ରା ହାଜାଲି ଅଣ୍ଡପିଡେସି, ସାମା ସୀସୁୟାଁ ଏଞ୍ଜାଣାଇଁ ହାଜାଲି ହାଆତେରି । ୩୧ ଅଡେ ଆସିୟାତି ସାଲୁଞ୍ଜି କିନାରି ବିତ୍ରାଟି ଜିକେଏ ଏଞ୍ଜାରି ତଡ଼ ଗୁାଟାରି ମାଟାକି କାହିନି ବାଟା ମାଦି ହାଲାଆପେସି ଇଞ୍ଜା ଲକୁଣି ଖେସା ପାଣ୍ଡାନା ଏଞ୍ଜାଣାଇଁ ବାଡିମାଲିଚେରି । ୩୨ ଏଚିବେଲା ହାରେକା ଗଡ଼ହା ଆହିମାତେ, ଇଞ୍ଜା ଲକୁ ମାନ୍ଦା ମାନ୍ଦା ଆହୁଁ ଏଚରଜାଣା ଇ କାତା ଅଡେ ଏଚରଜାଣା ଏ କାତା ଇଞ୍ଜା କାଲୁଞ୍ଜି ଆହିମାତେରି, ଅଡେ ଏଞ୍ଜାରି ଏନାଆଁତାକି ରୁଣ୍ଡା ଆହାମାନେରି ହାରେକା ଲକୁ ପୁଞ୍ଜାହିଲାଆତେରି । ୩୩ ଲକୁ ବିତ୍ରାଟି ଏଚରଜାଣା ଏଲେଇଚେରି, ଆଲେକଜାଣ୍ଡାର ଇଦାଆଁତାକି ଦାୟି, ଇଚିହୁଁ ଜୀହୁଦି ଲକୁ ଏଞ୍ଜାଣାଇଁ ନକିତା ନିପୁହା ମାଚେରି, ଆଲେକଜାଣ୍ଡାର କେୟୁ ପେରୁହାନା ଲକୁଣି ପାଲେଏ ଆହାଲି କେୟୁ ଜୀଞ୍ଜିଚେସି, ଅଡେ ନାମୁଗାଟାରି ଖାକିଟି ଖେସାଲି ଅଣ୍ଡପିଡେସି ।

୩୪ ସାମା ଏଞ୍ଜେଲ୍ ର ଜୀବୁଦି ଇଞ୍ଜେଲ୍ ଏଚିବେଲା ଏଞ୍ଜେଲ୍ ପୁଚେରି; ଏଚିବେଲା ବାରେଜାଣା କାଜା ଗିୟାତଲେ ରୀ ଗଂଟା ପାତେକା କାଲୁଝି ଆହାନା ଏଲେଇଚେରି, “ଆର୍ଚେମିଏ ଏପିସିୟ ଲକୁଡି କାଜା ପେନୁ ।”

୩୫ ତାୟୁ ଗାଡ଼ାତି କାଜାସି ଲକୁଣି ସୂସି କିହାଲି ଖେସେସି, “ଏ ଏପିସିୟତା ମାନି ତାୟିୟାତେରି ବାରେଜାଣା ପୁଞ୍ଜାମାନେରି ଏପିସିୟ ଗାଡ଼ାତି କାଜା ପେନୁ ଆର୍ଚେମିତି ଦେଝୁଡ଼ି ଇଞ୍ଜା ହାଗୁଲାକଟି ରେଟା ଖାହାମାନି ସୁଦୁଡି ବମା ଗେଲପିକିଝି ଆହାମାନେ । ୩୬ ଆମ୍ବାଆସି ଇଦାଆଁ ଆଏ ଇଞ୍ଜାଲି ଆଡ଼ଅସି, ଏଦାଆଁତାକି ମୀରୁ ବାରେ ସୂସି ଆଦୁ, ଏନି ରୁଦି ହିଲାଆ କାମା କିଆଦୁ । ୩୭ ଇଚିହ୍ ଇ ଆମିନି ଲକୁଇ ମୀରୁ ଦସା ତାଚାମାଞ୍ଜେରି, ଇଞ୍ଜେରି ଦେଝୁଡ଼ିତି ସରୁ କିହାହିଲଅରି, ଇଞ୍ଜା ମା ପେଣକା କପାଟି ଏନି ନିୟା କାତା ଜଲା ହିଲଅରି । ୩୮ ଏଦାଆଁତାକି ଦିମିତ୍ରିୟ ଅଡ଼େ ଏଞ୍ଜାଣିତଲେ କାମାକିନାରି ଆମ୍ବାଆରି କପାଟି ଏନି କାତା ମାଚିହ୍, ନୀହାୟି କିହାଲି ନୀହାୟି ଇଲୁ ଦେପିଆହାମାନେ, ଇଞ୍ଜା ନୀହାୟି କିନାରି ମାନେରି, ଏଞ୍ଜେରି ନକିତା ତାମ୍ବୁ ତାମି ଦାଞ୍ଜା କିପେରି । ୩୯ ଇଦାଣିକିହାଁ ଆଗାଡ଼ା ଅଣ୍ପିମାଚିହ୍, ଲକୁ ତାଣାଟି ମେରା କିଝି ଆହାମାନି ନୀହାୟି କିନି ତାଣା ଏଦାଆଁ ତିକନାୟି ଆନେ । ୪୦ ଇଚିହ୍ ସାତେଏ ନୀଞ୍ଜୁଡି ଗଡ଼ହା ତାକି ମା କପାଟି ଦାଞ୍ଜା ଆନାୟି ମାନେ; ଏନିଇଚିହ୍ ଏ ଗଡ଼ହା ଏଦାଆଁତାକି ହଡ଼େ ଏଦାଆଁ ମାର ଏନି କାତାତଲେ ତସାଲି ଆଡ଼ାଆୟି ।” ୪୧ ଇ ବାରେ କାତା ଖେସାନା ଲକୁଣି ସୂସି କିହାନା ନୀହାୟି ତୁକହେସି ।

## ୨୦

ମାକିଦନିୟା ଅଡ଼େ ଆକାୟାତା ହାନାୟି

୧ ଏ ଗଡ଼ହା ତୁଞ୍ଜିତି ତାୟୁ ପାଞ୍ଜୁଲ ସୀସୁୟାଣି କୃଡ଼ି କିହାନା ଏଞ୍ଜେରାକ୍ ବାସୁଡି କାତା ଖେସେସି, ଏଞ୍ଜେରି ତାଣାଟି ହେଲ ଅହାନା ମାକିଦନିୟାତା ହାଚେସି । ୨ ଏଞ୍ଜେସି ବାରେ ନାସ୍କାଟି ହାଜିହ୍, ହାଚେକା ସୀସୁୟାଣି ବାସୁ ହୀହାନା ଗ୍ରିସ୍ ଦେସାତା ହାଚେସି । ୩ ଏମ୍ବାଟିଏ ଏଞ୍ଜେସି ଏମ୍ବାଆଁ ତୀନି ଲେଞ୍ଜୁ ତୟିତେସି, ଏଞ୍ଜେସି ସିରିୟାତା



ହାଜାଲି ତିୟାରା ଆହିମାଟି ବେଲାତା, ଜୀହୁଦି ଲକୁ ଏଞ୍ଜାଣାକ୍ ପାୟାଲି ତୀରି କିହାମାନେରି ଇଞ୍ଜି କାବୁ ପୁଞ୍ଜାନା ମାକିଦନିୟା ଖାକିଟି ଖେଣ୍ଡେ ହାଜାଲି ତୀରି କିତେସି । ୪ ଅଡେ ବେରିୟା ତାସି ପୁରତି ମୀରଏସି ସପାତର, ଅଡେ ତେସଲନିକି ଗାଡ଼ାତି ଆରିସ୍ପାକ୍, ସେକୁନ୍, ଦବିତି ଗାୟ, ତିମତି ଅଡେ ଆସିୟାତି ଲକୁ ବିଡ୍ରାଟି ତୁକିକ ଅଡେ ତ୍ରପିମ ଏଞ୍ଜାଣିତଲେ ହାଚେରି । ୫ ଏଞ୍ଜାରି ବାରେଜାଣା ନକେଏ ହାଜାନା ତ୍ରୟାତା ମାଜେ କାଟିମାଞ୍ଜାତେରି । ୬ ଅଡେ ପୁଲା ଗୁଣ୍ଡା ଆଣ୍ଡାଆତି ରୁଟି ତିନି ପାରୁ ତାୟୁ ମାୟୁ ପିଲିପିଟି ଏୟୁ ଜାଜାଟି ହାଚମି, ଇଞ୍ଜା ପାସା ଦିନା ତାୟୁ ତ୍ରୟାତା ଏଞ୍ଜାରାକ୍ ବେଟାଆହାନା; ଏମ୍ପାଆଁ ର ଖାରା ତୟିତମି ।

### ତ୍ରୟାତା ପାଞ୍ଜୁଲ ତାୟୁ ପାଲି ହାନାୟି

୭ ଖାରାତି ମୁଲୁ ଦିନାତି ମିଡ଼ଅଲା ରାନ୍ଦା ତିଞ୍ଜାଲି ରୁଣ୍ଡା ଆହାମାଚମି, ପାଞ୍ଜୁଲ ଅର ନେଚୁ ହାନାୟି ମାଚାକି ଏଞ୍ଜାସି ଲକୁଣି ମାଦି ନେକେରି ପାତେକା ନେହ କାତା ଖେସିମାଚେସି । ୮ ମାୟୁ କୁଡ଼ା ଆହାମାନି ଲାକନି ପାରୁତି ଇଲୁତା ଏମ୍ପାଆଁ ହାଚେକା ଦୀଞ୍ଜିୟା ତୀଞ୍ଜିମାଚୁ । ୯ ଅଡେ ଇଞ୍ଜୁତୁକ ଇନି ର ଦାଂଗଣେଏସି କିଡ଼କି ଲାକ କୁଗାମାଚେସି, ଏଞ୍ଜାଣାକି ହାଚେକା ଇଦା ଖାହିମାଚେ; ଇଞ୍ଜା ପାଞ୍ଜୁଲ କାତା ହାଚେକା ଲାୟା କିହ କ୍ଷେସିମାଚାକି ଇଞ୍ଜୁତୁକ ତୀନି ପାରୁ ଗାଟି ଇଲୁ ଲାକଟି ଡଇ ରୀତେସି, ଏଟିବେଲା ଏଞ୍ଜାରି ଇଞ୍ଜୁତୁକକ୍ ନିକହେରି, ଏଞ୍ଜାସି ହାହାମାଚେସି । ୧୦ ସାମା ପାଞ୍ଜୁଲ ଡଇ ରେଟାଖାହାନା ଏଞ୍ଜାଣି ମୁହେଁ ମାରହାନା ଏଞ୍ଜାଣାକ୍ ପମାନା ଏଲେଇଚେସି, “ଆଜାଆଦୁ ଇଚିହ କ୍ଷାଣି ତାଣା ଜୀଞ୍ଜୁ ମାନେ ।” ୧୧ ତାୟୁ ଲାକ ହାଜାନା ରୁଟି ବାଟିକିହାଁ ତିଚେରି, ଇଞ୍ଜା ଲାକ୍ ଖେୟିନି ପାତେକା ହାଡ଼ାକାତା ଆହାନା ପାଞ୍ଜୁଲ ହାଚେସି । ୧୨ ଅଡେ ଲକୁ ଏ ଦାଂଗଣା କକାଣାକ୍ ଜୀଞ୍ଜୁତଲେ ଇଜ ଅହ ହାଚେରି ଇଞ୍ଜା ଏଞ୍ଜାରି ହାଚେକା ବାସୁଁ ବେଟାଆଡେତି ।

### ତ୍ରୟାଟିଏ ମିଲିତତା ହାନାୟି

୧୩ ସାମା ମାୟୁ ନକେଏ ଜାଜାତା ହଚାନା ଆସସ୍ତା ହାଚମି, ଏମ୍ପାଟିଏ ମାୟୁ ପାଞ୍ଜୁଲକ୍ ଅହାଲି ଅଶ୍ପାମାଚମି, ଇଚିହ ଏଞ୍ଜାସି ତାନ୍ତୁଏ ତାକିହ ହାଜାଲି ତୀରି କିହାମାଚେସି । ୧୪ ଏଟିବେଲା

ଏଞ୍ଜେଲ୍ ଆସସ୍ତା ମାଙ୍ଗେ ବେଟା ଆୟାଲିଏ, ମାଗ୍ନୁ ଜ୍ଞାନାତା ଏଞ୍ଜେଲ୍ ମିତିଲିନିତା ତାଟିହିଁ ଖାଡ଼ମି, <sup>୧୫</sup> ଅଡ଼େ ଏମ୍ବାଟି ହାଜାନା ଏଅର ନେରୁ କିଅସତା ଏଗାହାଚମି, ଅଡ଼େ ର ଦିନାତି ଜେଟ ସାମସତା ଏଜାହା, ତାନି ଅର ନେରୁ ମିଲିତତା ଏଗାହାଚମି । <sup>୧୬</sup> ଇତିହିଁ ପାଞ୍ଜୁଲ ଆସିୟା ରାଜିତା ହାରେକା ଦିନା ତୁୟାଆନା, ଇଦାଆଁତାକି ଏଞ୍ଜେଲ୍ ଏପିସିୟ ପିସାନା ହାଜାଲି ତୀରି କିହାମାରେସି, ଆଡ଼ିସାରେ ପେଡ଼ିକସ୍ତ ଦିନା ଜିରୁସାଲମତା ଏଗାହାଜାଲି ଦାଗା ଆହିମାରେସି ।

**ଏପିସିୟ କୁଲମିତି କାଜାରାଇଁ ପାଞ୍ଜୁଲ ଖେହନାୟି**

<sup>୧୭</sup> ମିଲିତଟିଏ ପାଞ୍ଜୁଲ ଏପିସିୟ କୁଲମିତି କାଜା ଲକୁଣି କାରୁ ପାଣ୍ଡାନା ହାଡ଼ିକିତେସି । <sup>୧୮</sup> ଏଞ୍ଜେଲ୍ ତାନି ତାଣା ଖାୟାଲିଏ, ଏଞ୍ଜେଲ୍ ଏଞ୍ଜେରାଇଁ ଏଲେଇଚେସି, “ଆସିୟାତା ନାନୁ ଏଦାତି ଦିନାଟିଏ ମୀ ତଲେ ଏନିକିହିଁ ମାରେସି ମୀରୁ ପୁଞ୍ଜାମାଞ୍ଜେରି, <sup>୧୯</sup> ପ୍ରବୁତି ହଲେଏଶା ଆହାନା ଜାହାରାଇଁ ଉଶା କିହାଁ ଅଡ଼େ କାଣ୍ଡୁରକହାଁ ନାଙ୍ଗେ ସାସ୍ତି ଖାଡ଼ାଟି ନାନୁ ପ୍ରବୁତି ସେବା କିତେସି, ଏନାଆଁତାକି ଇତିହିଁ ଏଚରଜାଣା ଜୀହୁଦି ଲକୁତି ପାରୁ ପାରିମାଚାକି । <sup>୨୦</sup> ମୀରୁ ପୁଞ୍ଜାମାଞ୍ଜେରି, ନାନୁ ପାଙ୍ଗାଞ୍ଜେଙ୍ଗେ ଲକୁତାଣା ଖେହନାଟି ଅଡ଼େ ମିଙ୍ଗେତାକି ଇଲୁତା ଖେସ୍ତାନି ବେଲାତା ମୀ ନେହେଁ ଆନିଲେହେଁତି ଏନାଆଁ ଜିକେଏ ତୁକୁହା ହିଲାଆତେସି, <sup>୨୧</sup> ଜୀହୁଦି ଅଡ଼େ ଜୀହୁଦିଆଆତି ଲକୁ ନକିତା ଜାଗ୍ରାତା କିହିଁ ସାକି ହାହାନା ଖେସାମାରେସି, ଏଞ୍ଜେଲ୍ ପାପୁଟି ଏଚକା ଆହାନା ମାହାପୁରୁ ଖାକି ମନ ଖେଚହା କତାନା ମା ପ୍ରବୁ ଜୀସୁଇଁ ନାମିନେରି । <sup>୨୨</sup> ନୀସି ମେହଦୁ, ନାନୁ ସୁଦୁଜୀଞ୍ଜୁଇଁ ମାନଞ୍ଜି ଆହାନା ଜିରୁସାଲମତା ହାଜିମାଇଁ, ଏମ୍ବାଆଁ ନାଙ୍ଗେତାକି ଏନାଆଁ ଆନେ ନାନୁ ପୁଞ୍ଜାହିଲଅଁ; <sup>୨୩</sup> ସୁଦୁଜୀଞ୍ଜୁ ନାଙ୍ଗେ ଜାଗ୍ରାତା କିହାଁ ସାକି ହାହିମାଞ୍ଜାନେ, ଗାଡ଼ାତାକି ଗାଡ଼ା କାୟିଦି ଆହାନା କସ୍ତ ବେଟାଆଇଁ । <sup>୨୪</sup> ସାମା ନାନୁ ଏନିକିହିଁ ନା ତୀରିଆହାମାନି ଟାୟୁ ପାତେକା ହଗାଲି ଆଡ଼ିଇଁ, ଅଡ଼େ ମାହାପୁରୁତି କାର୍ମାଟି ନେହିଁ କାରୁତାକି ସାକି ହାହାଲିତାକି ଜୀସୁ ତାଣାଟିଏ ଏମିନି ସେବା କାମା ବେଟାଆହାମାଇଁ, ଏଦାଆଁ ଏନିକିହିଁ ରାପୁହାଲି ଆଡ଼ିଇଁ, ଏଦାଆଁତାକି ନା ଜୀଞ୍ଜୁତି କାଜାୟି ଇଞ୍ଜି ଅଣ୍ଡପି ହିଲଅଁ ।”

୨୫ “ଅଡ଼େ ନୀର୍ବ ନାନୁ ପୁଞ୍ଜିମାଇଁ ମୀରୁ ଅଡ଼େ ନାଙ୍ଗେ ୱେଣ୍ଡେ ମେସୁଅତେରି । ନାନୁ ମୀ ବାରେ ତାଣା ମାହାପୁରୁ ରାକ୍ତିତି କାତା ରେଜିହିଁ ୱେସାମାଞ୍ଜାଇଁ । ୨୬ ଏଦାଆଁତାକି ନାନୁ ନୀଞ୍ଜୁତି ଇ ପାରୁତାକି ଆଟୁଞ୍ଜା ତଲେ ୱେସିମାଇଁ, ମୀ ବିତ୍ରାଟି ଆମ୍ବାଆସି ନାସା ଆତିହିଁ ଏମ୍ବାତି ଦାୟି ନାନୁ ଆଏ ୨୭ ଇତିହିଁ ମାହାପୁରୁ ଅଣ୍ଠିପିମାନାଣି ବାରେ ମିଙ୍ଗେ ୱେସାଲି ନାନୁ ପିସା ହିଲଅଁ । ୨୮ ମୀରୁ ମିଙ୍ଗେ ଜାହାରା କାତା ଅଡ଼େ ଆମିନି କୁଲମିତି ମାହାପୁରୁ ତାନି ନେତେରି ତଲେ କତାମାନେସି, ତାନି ଏ କୁଲମିତି ପହି ପାଡ଼ିକିହାଲିତାକି ସୁଦୁଜୀଞ୍ଜୁ ବାରେ ମାନ୍ଦା ବିତ୍ରାଟି ଗୁମ୍ବୁସା କିହାଁ ମିଙ୍ଗ ଆଚାମାଞ୍ଜାନେସି, ଏଞ୍ଜାରାଇଁ ଜାଗ୍ରାତା କିଦୁ । ୨୯ ନାନୁ ହାତି ତାୟୁ ଆଜିହିପେତି ଗାଡ଼ଦେ କ୍ଳାଃନିଁ ୱାନୁ, ଅଡ଼େ ମେଣ୍ଡାୟାଁ ମାନ୍ଦାତି ରାଣାରାକା କିଆନା ପିହିତ, ୩୦ ଦିନା ୱାନେ, ଏତିବେଲା ମୀ ଗତିତି ଏତେକା ସୀସୁୟାଁ ନିଙ୍ଗାନା ନାମୁ ଗାଟାରାଇଁ ମିତି କାତା ୱେସାନା ଏଟକା ଜିରୁତା ଅନେରି, ୩୧ ଏତିବେଲା ଜାଗ୍ରାତା ଡୟାଦୁ, ନାନୁ ଲାଆଁ ମାଦେନା କାଣ୍ଡୁ ୱାକ୍ତିହିଁ ତାନି ବାର୍ଯା ପାତେକା ବାରେତେରି ମିଙ୍ଗେ ଜାପୁହା ମାଞ୍ଜାଇଁ, ଇ କାତା ଅଣ୍ଠପୁତା ଇଟାଦୁ ।”

୩୨ ନୀର୍ବ ନାନୁ ମିଙ୍ଗେ ମାହାପୁରୁ ଇଞ୍ଜା ତାନି କାର୍ମାମେହିନି ବଲ୍ଲୁ ନକିତା ହେର୍ପିମାଞ୍ଜାଇଁ, ଇ କାର୍ମାତି କାତା ମିଙ୍ଗେ ବାଡ଼ୟୁ ତଲେ ପାଡ଼ିକିହାଲିତାକି ଅଡ଼େ ସୁଦୁ ଆହାମାନି ବାରେ ଲକୁ ବିତ୍ରା ଅଦିକାରା ହୀହାଲି ଆଡାନେସି । ୩୩ ନାନୁ ଆମ୍ବାଆରି ବାଂଗାରା, ୱେଣ୍ଡି କି ହିମ୍ବୁରିକା ଜୁପକା ଆହାହିଲାଆତେର୍ଏ । ୩୪ ମୀରୁ ପୁଞ୍ଜାମାଞ୍ଜେରି ଇ ନା.ରୀ କେସ୍ତାତଲେ କାମା କିହାନା ନାଙ୍ଗେ ଅଡ଼େ ନା.ତଡ଼ୁ ଲକୁତି ବାରେ ଲଡ଼ାମାନାଣି ବେଟାଆହାମାଇଁ । ୩୫ ଇଲେକିହିଁ କସ୍ତିକିହାନା ଆଡାଆ ଗାଟାରି ସାୟେମି କିନାୟି, “ଇତିହିଁ ରାହିନି କିହାଁ ହୀନାୟି ହାରେକା ନେହାୟି” ପ୍ରୁ ଜୀସୁ ତାନୁଏ ଇ କାତା ୱେସାମାଞ୍ଜାନେସି, ଇ କାତା ମୀରୁ ଅଣ୍ଠିପିନାୟି ମାନେ, ଇ ବାରେ କାତାତଲେ ମିଙ୍ଗେ ପୁଣ୍ଡି କିହିମାଞ୍ଜାଇଁ ।

୩୬ ଇ ବାରେ କାତା ୱେସାଲି ରାପୁହି ତାୟୁ ପାଞ୍ଜୁଲ ମେଣ୍ଡାକୁତାନା ବାରେଜାଣା ତଲେ ପ୍ରାଡାନା କିଡେସି । ୩୭ ଅଡ଼େ, ଏଞ୍ଜାରି ବାରେଜାଣା ଡାହି ଡାହିଁ ପାଞ୍ଜୁଲଇଁ ପମାହାଁ ନଣ୍ଡିତେରି । ୩୮ ଏଞ୍ଜାରି ଅଡ଼େ

ତାନି ମୁମ୍ବୁ ଚୁଞ୍ଚଣ୍ଡେ ମେସାଲି ଆଡ଼ଅରି, ଏଞ୍ଜାସି ଝେସାମାଟି କାତାତାକି ହାରେକା ଦୁକୁ କିତେରି, ତାୟ୍ ଶ୍ଵାରି ଏଞ୍ଜାଣାକ୍ ଏୟ୍ ଜାଜା ପାତେକା ଇଟି ହାରେରି ।

## ୨୧

### ପାଞ୍ଜୁଲ ଜିରୁସାଲମତା ହାନାୟି

୧ ଏଞ୍ଜାରି ତାଣାଟି ହେଲ ବେଟାଆହାନା ମାମ୍ବୁ ଏୟ୍ ଜାଜାତା ହଚାହାଁ ସଲ୍‌କେ ଜିରୁଟି କସତା ଝାଡ଼ମି, ତାନି ଅର ନେଚୁ ରଦାତା, ଇଞ୍ଜା ଏମ୍ବାଟିଏ ପାତାରାତା ଝାଡ଼ମି । ୨ ଏମ୍ବାଟିଏ ପୟିନିକିୟା ହାନି ଏୟ୍ ଜାଜା ବେଟାଆହାନା ଏମ୍ବାଆଁ ହଚାହାଁ ହାଚମି । ୩ ତାୟ୍ କୁପ୍ର ତଞ୍ଜା ଆହାଲିଏ ତାନି ଚେବ୍ରିଞ୍ଜାକି ପିସାନା ମାମ୍ବୁ ସ୍ଥିରିୟାତା ହାଜାନା ସରତା ଏଗାତମି, ମାମ୍ବୁ ଚାୟ୍‌ରତା ଜାଜାଟି ରେତମି, ଇଟିହ୍ ଏମ୍ବାଆଁ ଜାଜାତି ଆସ୍ତି ରେପନାୟି ମାଚେ । ୪ ଏମ୍ବାଆଁ ନାମିତି ସାସ୍ତାୟାଣି ପାରାନା ଏଞ୍ଜାରାକ୍ ବେଟାଆହାନା ଏମ୍ବାଆଁ ସାଡ଼ା ଦିନା ଡ଼ୟିତମି; ଇଞ୍ଜା ପାଞ୍ଜୁଲ ଏନିକ୍ ଜିରୁସାଲମତା ହାଲଅସି ଏଡ଼ାଆଁତାକି ଏଞ୍ଜାରି ସୁଦ୍‌ଜାଞ୍ଜୁ ତଲେ ବାତିମାଲିତେରି । ୫ ମାମ୍ବୁ ସାଡ଼ା ଦିନା ଡ଼ୟିତି ତାୟ୍, ଏଞ୍ଜାରାକ୍ ପିସାନା ଜାହାରା ଜିରୁତା ହାଚମି, ଅଡ଼େ ମାଙ୍ଗେ ହେଲ ହିୟାଲି ଏଞ୍ଜାରି ବାରେଜାଣା ଇୟାସିକା କକାରି ପଦାୟାଁ ତଲେ ଗାଡ଼ାତି ପାଙ୍ଗାତା ମାନି ସାମ୍‌ଦୁରି ଗାଟୁ ପାତେକା ଇଟି ଝାଡ଼ତରି, ଏମ୍ବାଆଁ ମେଣ୍ଡାକୁତାନା ମାମ୍ବୁ ଚୁରେତମି ପ୍ରାତାନା କିତମି, ୬ ତାୟ୍ ମାମ୍ବୁ ବାରେଜାଣାଟି ହେଲ ହାହାନା; ଜାଜାତା ହଚମି, ଇଞ୍ଜା ଏଞ୍ଜାରି ତାନି ଇଜ ଝେଣ୍ଡା ହାଚେରି ।

୭ ମାମ୍ବୁ ସର ଗାଡ଼ାଟି ପତଲମାୟିତା ଏଗାହାଚମି, ଇଞ୍ଜା ଏମ୍ବାଆଁ ତାୟାୟାଣି ଜହରା କିହାନା ଏମ୍ବାଆଁ ର ଦିନା ଏଞ୍ଜାରିତଲେ ଡ଼ୟିତମି । ୮ ଅଡ଼େ ଅର ନେଚୁ ହାଜାନା କାୟିସରିୟାତା ଏଗାହାଚମି, ଏମ୍ବାଆଁ ମାମ୍ବୁ ଚୁନହ୍ ବଲ୍ଲୁ ଝେକ୍‌ନି ପିଲିପ ଇଜ ହାଜାନା ଡ଼ୟିତମି, ଜିରୁସାଲମତା ସେବା କାମା କିହାଲି ଆଚାମାନି ସାଡ଼ା ଜାଣା ବିଡ଼ାଟି ଏଞ୍ଜାସି ରଅସି ମାଚେସି । ୯ ଏଞ୍ଜାଣାକି ସାରି ଜାଣା ଡ଼ାଆ ମାସ୍‌କା ମାଚୁ, ଏଞ୍ଜି ବାରେ ମାହାପୁରୁ ଅଣ୍‌ପୁତି ବଲ୍ଲୁ ଝେହ୍‌ନାଲ ମାଚୁ ।

୧୦ ☆ ଏମ୍ବାଆଁ ହାରେକା ଦିନା ଡ଼ୟିତି ତାୟୁ ଆଗାବ ଦରୁଗାଟି ର ମାହାପୁରୁ ଅଣ୍ଡପୁତି ବଲୁ ଝେହ୍ନାସି ଜୀହୁଦା ଦେସାଟି ଝାଡ଼େସି ।  
 ୧୧ ଏଝାସି ମା ତାଣା ଝାହାନା ପାଝୁଲତି ଜାଟି ଡ଼ରି ଅହାନା ତାନି କେସ୍ନା କତାଣା ଦସା କତାନା ଏଲେଇଚେସି, “ସୁଦୁଜୀଝୁ ଏଲେଇଝି ଝେସିମାଝାନେ, ଇଦାଆଁ ଦସା କଡ଼ିନି ଜାଟି ଡ଼ରି ଗାଟାଣାଇଁ ଜିରୁସାଲମତି ଜୀହୁଦି ଲକୁ ଇଲେକ୍ ଦସାନା ଜୀହୁଦିଆଆତି ଲକୁତି କେୟୁତା ହେରପିନେରି ।”

୧୨ ଇ ବାରେ କାତା ଝେଞ୍ଜାନା ଜିରୁସାଲମତା ହାଲାଆନି ଇଝି ମାମ୍ବୁ ଅଡ଼େ ଏମ୍ବାତି ଲକୁ ବାତିମାଲିତମି । ୧୩ ସାମା ପାଝୁଲ ଏଲେଇଚେସି, “ମାରୁ ଡ଼ାହି ଡ଼ାହି ଏନାଆଁତାକି ନା ହିୟାତି କାଡ଼ି କିହିମାଝେରି, ଏନିଇଚିହି ନାନୁ ପ୍ରବୁ ଜୀସୁ ତାକି ଜିରୁସାଲମତା ଦସପି ଆହାଲି ଆଏ ସାମା ହାହାଲି ଜିକେଏ ଅଣ୍ଡପିମାଇଁ, ଇଝି ଇଚେସି ।”

୧୪ ଏଝାସି ମା କାତା ମାନଝି ଆଆତାକି ମାମ୍ବୁ ବାରେ ପାଲେଏ ଆଡ଼ମି, ଇଝି “ପ୍ରବୁତି କାଚେଏ ଆପେ” ଇଝି ଇଚମି ।

୧୫ ଏମ୍ବାଆଁ ଏଚରଦିନା ମାଟି ତାୟୁ ମାମ୍ବୁ ମା ଆସ୍ତି ଆସାନା ଜିରୁସାଲମତା ହାଚମି । ୧୬ ଅଡ଼େ କୁପୁତି ମନାସନ ଦରୁଗାଟି ର ନାମ୍ବୁଗାଟାସି ଅଡ଼େ କାୟିସରିୟାଟି ଏଚରଜାଣା ସୀସୁୟାଁ ମା ତଲେ ହାଚେରି; ମନାସନ ଇଜ ମାମ୍ବୁ ଡ଼ୟିନାୟି ମାଚେ ।

### ଜାକୁବ ତଲେ ପାଝୁଲ ବେଟାଆନାୟି

୧୭ ମାମ୍ବୁ ଜିରୁସାଲମତା ଏଗାହାଜାଲିଏ ନାମିତି ତାୟିୟାଁ ମାଜେ ରାହାଁଟି ହାଟା ଅୟାଚେରି । ୧୮ ଏ ଅର ନେରୁ ପାଝୁଲ ମା ତଲେ ଜାକୁବ ଇଜ ହାଚେସି; ଅଡ଼େ ବାରେ ପ୍ରାଟିନାଙ୍ଗା ଏମ୍ବାଆଁ କୃଡ଼ା ଆଚେରି । ୧୯ ପାଝୁଲ ଏଝାରାଇଁ ଜହରା କିତି ତାୟୁ, ମାହାପୁରୁ ତାନି ସେବା କାମାତା ଜୀହୁଦିଆଆତି ଲକୁତାଣା ଏନି ଏନି କାମା କିହାମାନେସି ଏ ବାରେ ଝେସ୍ତେସି । ୨୦ ଏଝାରି ଏଦାଆଁ ଝେଞ୍ଜାନା ମାହାପୁରୁତି ଜହରା କିଚେରି, ଅଡ଼େ ଏଝାଣାଇଁ ଏଲେଇଚେରି, “ଏ ତାୟି, ପାଝୁଲ ନୀଏଁ ମେସିମାଝି ଜୀହୁଦିୟାଁ ବିତ୍ରାଟି ମାଣା ମାଣା ଲକୁ ନାମିମାନେରି,

ଏଞ୍ଜରୀ ବାରେଜାଣା ମୋରତି ମାନୁଞ୍ଜି ଆହିମାନେରି । ୨୧ ଏଞ୍ଜରୀ କାରୁ ବେଟାଆହା ମାନେରି, ନାନୁ ଏଟ୍‌କା କୁଡ଼ାତାରି ତାଣା ବାସା ଆହାମାନି ବାରେ ଜୀହୁଦି ଲକୁଣି ମସାତି ମୋରା ପିସାଲି, ଏଞ୍ଜରୀ କକାରି ତଲୁ ଦାଦୁ, ଅଡେ ଜୀହୁଦି ଲକୁତି ପାଣାପାଟୁ ମାନୁଞ୍ଜି ଆଆଦୁ ଇଞ୍ଜି ଜାପୁହିମାଞ୍ଜି । ୨୨ ନାନୁ ଇମ୍ବାଆଁ ଖାହାମାନି କାରୁ ସାତେଏ ଏଞ୍ଜରୀ ଖେନେରି, ଆତିହିଁ ଏନି କିନାୟି ? ୨୩ ଏଡ଼ାଆଁତାକି ମାମ୍ବୁ ନିଙ୍ଗେ ଏନାଆଁ ଖେସିମାଞ୍ଜାନମି ଏଡ଼ାଆଁ କିମ୍ବୁ, ମା ତାଣା ସାରି ଜାଣା ମାନେରି, ଏଞ୍ଜରୀ ପାରମାଣା କିହାମାନେରି; ୨୪ ଏଞ୍ଜରୀତଲେ ହାଲାମ୍ବୁ ଇଞ୍ଜି ଏଞ୍ଜରୀତଲେ ଆଣ୍ଡାନା ନିଙ୍ଗେ ଅଟହା କଡାମ୍ବୁ, ଇଞ୍ଜି ଏଞ୍ଜରୀ ତାର୍କା ହିଣ୍ଡି କାରୁଁ ହାମ୍ବୁ, ଆତିହିଁ ବାରେ ଲକୁ ମେସାନା ଏଞ୍ଜରୀ ନୀ କପାଟି ଖେସାମାନି କାତା ଏନି ସାତା ହିଲେଏ, ସାମା ନାନୁ ଜିକେଏ ମସା ମୋରା ମାନୁଞ୍ଜି ଆହିମାଞ୍ଜି ଇଞ୍ଜି ପୁଞ୍ଜାମାନେରି । ୨୫ ☆ସାମା ଆମିନି ଏଟ୍‌କା କୁଡ଼ାତାରି ନାମାମାନେରି, ଏଞ୍ଜରୀ ପେଣ୍‌କା ବମାୟାଁକି ପୂଜା ହୀହାମାନି ବଗୁ, ନେତେରି ଇଞ୍ଜି ହେରକି ତିଣ୍‌ଗାନା ପାୟିତି ଜଡ଼ିତି ଉଙ୍ଗା ତିନାଆଦୁ, ଇଞ୍ଜି ଦାରିକାମାଟି ଏଟ୍‌କା ଆଦୁ, ଇଞ୍ଜି ମାମ୍ବୁ ତୁରିକିହାଁ ଏଞ୍ଜରୀକି ର ଆକୁ ରାଡ଼ାମାନମି ।”

୨୬ ଏମ୍ବାଟିଏ ପାଞ୍ଜୁଲ ଅର ଦିନା ଏଞ୍ଜରୀତଲେ ହାଜାନା ଅଟହା କଡ଼ିନି ମୋରା ମାନୁଞ୍ଜି ଆଡେସି, ଇଞ୍ଜି ମାହାପୁରୁ ଇଲୁତା ହାଜାନା ତାମି ଅଟହା କଡ଼ିନି ଦିନାୟାଁ ଏଚେଲା ରାନେ ଅଡେ ବାରେଜାଣା ତାକି ଏନି ଏନି ପୂଜା କିନାୟିମାନେ ଏ ବାରେ ଖେସେସି ।

### ମାହାପୁରୁ ଇଲୁତା ପାଞ୍ଜୁଲ ଦସପି ଆନାୟି

୨୭ ଏ ସାତା ଦିନା ପୂରା ଆହିମାଟାଟି ଆସିୟା ଦେସାଟି ଏଚେକା ଜୀହୁଦି ଲକୁ ମାହାପୁରୁ ଇଲୁତା ପାଞ୍ଜୁଲଇଁ ମେସାନା ଏଞ୍ଜରୀ ଏମ୍ବାଆଁ କୁଡ଼ା ଆହାମାନି ମାନ୍ଦା ଲକୁଣି ମାଡ଼ି କିତେରି, ଅଡେ ଏଞ୍ଜାଣାଇଁ ଆସାନା କାଲୁଞ୍ଜି ଆହିଁ ଏଲେଇଚେରି । ୨୮ “ଏ ଇସ୍ରାୟେଲତି ଲକୁ ସାୟେମି କିୟାଦୁ; ଇଞ୍ଜାସି ସାରିଞ୍ଜାକି ହାଜାନା ଇସ୍ରାୟେଲ ଲକୁତି କପାଟି ଅଡେ ମସା ହୀତି ମୋରା ଇଞ୍ଜି ଇ ମାହାପୁରୁ ଇଲୁ କପାଟି ଜାପୁହିମାନେସି । ଇଞ୍ଜି ନୀଏଁ ଏଚରଜାଣା ଜୀହୁଦିଆଆତି ଲକୁଣି

ମାହାପୁରୁ ଇଲୁତା ତାରାମା ସୁଦୁ ଟାୟୁତି ପଲୁଆ କିହିମାନେସି ।”  
 ୨୯ ✨ ଇଚିହିଁ ଏଞ୍ଜାରି ଗାଡ଼ାତା ଏପିସିୟତି ତ୍ରପିମଇଁ ପାଞ୍ଜୁଲ ତଲେ  
 ମେସାମାରେରି, ଅଡ଼େ ଏଞ୍ଜାଣାଇଁ ମାହାପୁରୁ ଇଲୁତା ତାରାମାନେସି  
 ଇଞ୍ଜିଁ ଅଣ୍ଡିପିମାରେରି ।

୩୦ ଏମ୍ବାଟିଏ ବାରେ ଗାଡ଼ା କିଲିବିଲି ଆଡେ, ଇଞ୍ଜାଁ ଲକୁ ମାନ୍ଦା ମାନ୍ଦା  
 ଆହିଁ ହଟାନା ପାଞ୍ଜୁଲଇଁ ଆସାନା ମାହାପୁରୁ ଇଲୁତି ରେଜା ତାଡେରି;  
 ଇଞ୍ଜାଁ ଏ ଦେବୁଣିଏ ମାହାପୁରୁ ଇଲୁତି ଦାରାୟାଁ ସୁଣ୍ଡିତେରି । ୩୧ ଅଡ଼େ  
 ଏଞ୍ଜାରି ପାଞ୍ଜୁଲଇଁ ପାୟାଲି ଅଣ୍ଡିପିତେରି, ଇଞ୍ଜାଁ ଜିରୁସାଲମତା କାଜା  
 ଗଡ଼ହା ଆହାମାନେ ଇଞ୍ଜିଁ ରିଜାରି କସକାତି କାଜାଣି ତାଣା କାବୁ  
 ହାତେରି । ୩୨ ଏମ୍ବାଟିଏ ଏଞ୍ଜାସି ଦେବୁଣିଏ ରିଜାରି କସକା ଇଞ୍ଜାଁ  
 ପାସାକଡ଼ି କସକା ମୁହେଁ କାଜାରାଇଁ ଆସାନା ଏଞ୍ଜାରିତାଣା ଦାବଡ଼ି  
 ହାତେସି, ଲକୁ ରିଜାରି କସକା ଅଡ଼େ କସକା ମୁହେଁ କାଜାରାଇଁ  
 ମେସାନା ଏଞ୍ଜାରି ପାଞ୍ଜୁଲଇଁ ଝେଚାଲି ପିସ୍ତେରି । ୩୩ ଏମ୍ବାଟିଏ କସକା  
 ମୁହେଁ କାଜାସି ପାଞ୍ଜୁଲ ତାଗେ ହାଜାନା ଏଞ୍ଜାଣାଇଁ ଆସାନା ରା  
 ହିକ୍‌ଶିୟାଁ ତଲେ ଦସାଲି ହୁକୁମି ହାତେସି, ଅଡ଼େ “ଇଞ୍ଜାସି ଆମ୍ବାଆସି  
 ? ଏନାଆଁ କିହାମାନେସି ଇଞ୍ଜିଁ ଝେଚେସି ?” ୩୪ ଏଚେଟିଏ  
 ଲକୁ ବାରେ ଆମ୍ବାଆରି ଇ କାତା ଆମ୍ବାଆରି ଏ କାତା ଇଞ୍ଜିଁ  
 କାଲୁଝି ଆଡ଼େରି, ଇଞ୍ଜାଁ ଏନାଆଁ ଆହାମାନେ ଇଞ୍ଜିଁ ତୀରପୁତି କାତା  
 ପୁନାଆନା ପାଞ୍ଜୁଲଇଁ କଟା ଇଲୁତା ଅହାଲି କସକାଣି ହୁକୁମି ହାତେସି  
 । ୩୫ ଏଚିଚେଲା ଏଞ୍ଜାସି ପାଞ୍ଜୁଜି ପିଣ୍ଡାଣା ଏଗାହାଜାଲିଏ, ଲକୁତି ମାନ୍ଦା  
 କାରବିଟି କାଲୁଝି ଆୟାଲିଏ କସକା ପାଞ୍ଜୁଲଇଁ ଇଲୁ ବିତ୍ରା ଡେକା  
 ଅଡ଼େରି । ୩୬ ଇଚିହିଁ ମାନ୍ଦା ମାନ୍ଦା ଲକୁ ଜେଟ ଝାହିହିଁ “ଏଞ୍ଜାଣାଇଁ  
 ପାୟାଦୁ” ଇଞ୍ଜିଁ କାଲୁଝି ଆହିମାରେରି ।

### ପାଞ୍ଜୁଲ ତାନୁଏ ତାଙ୍ଗେତାକି ଝେହନାୟି

୩୭ ଏଞ୍ଜାରି ପାଞ୍ଜୁଲଇଁ କଟା ଇଲୁ ବିତ୍ରା ଅହିମାଟାଟି ଏଞ୍ଜାସି କସକା  
 ମୁହେଁ କାଜାଣାଇଁ ଏଲେଇଚେସି, “ନାନୁ ନିଙ୍ଗେ ର କାତା ଝେସାଲି  
 ଆଡ଼ାଇଁ କି ?” ଏମ୍ବାଟିଏ କାଜାସି ଏଲେଇଚେସି “ନାନୁ ଗ୍ରିକ୍ ହାଡ଼ା  
 ପୁଞ୍ଜି କି ? ୩୮ ଆଡ଼ିହିଁ ଇଦାଆଁ ନଡ଼କଏ ଏମିନି ମିସରତି ଲକୁ ଗଡ଼ହା

ହୃଦ୍‌ହାନା ସାରି ମାଣା କାଗଂରାଣି ଲକୁ ହିଲାଆ ଚାୟୁତା ଅହାମାତାତି ନାନୁ ଏଞ୍ଜାତି ଆଏ କି ?”

୩୯ ଏମ୍ବାଟିଏ ପାଞ୍ଜୁଲ ଏଲେଇଚେସି “ନାନୁତ ର ଜୀହୁଦି କିଲିକିୟା ଦେସାତି ତାର୍ସ ଇଞ୍ଜହୁଁ ଝେଜାତି ଗାଡ଼ାତା ଜାର୍ନା ଆଡ଼ାତେଏ; ଇ ଲକୁଣି କାତା ଝେସାଲି ନାଜେ ହେଲ ହିୟାମୁ ।”

୪୦ ଏ କାଜାସି ହେଲ ହିୟାଲିଏ, ପାଞ୍ଜୁଲ ପାଞ୍ଜୁଜିକାଣା ନିଚାନା ଲକୁଣି କେୟୁତଲେ ସାପି କିତେସି; ଇଞ୍ଜା ବାରେଜାଣା ସାପି ଆହାଲିଏ ଏଞ୍ଜାସି ଏବୁ ହାଡ଼ାତଲେ ଏଞ୍ଜାରାଇଁ ଏଲେଇଚେସି ।

### ୨୨

୧ “ଏ ତାୟିୟାଁ ଅଡେ ତାଞ୍ଜିୟାଁତେରି, ନାନୁ ନୀଏଁ ମୀ ନକିତା ନା ଝାକିଟି କାତା ଝେସିମାଞ୍ଜାଇଁ, ଝେଞ୍ଜାଦୁ !” ୨ ପାଞ୍ଜୁଲ ଏଞ୍ଜାରି ନକିତା ଏବୁ ହାଡ଼ାତଲେ ଜଲିମାନାଣି ଝେଞ୍ଜାନା; ଏଞ୍ଜାରି ହାଡ଼ା ଆଆନା ପାଲେଏ ଆଡେରି, ଅଡେ ପାଞ୍ଜୁଲ ଜଲାଇ ମାଟ୍‌ହେସି ।

୩ ☆ଏମ୍ବାଟିଏ ଏଞ୍ଜାସି ଏଲେଇଚେସି, “ନାନୁ ର ଜୀହୁଦି ଲକୁତେଏ, କିଲିକିୟାତି ତାର୍ସତା ନା ଜାର୍ନା, ସାମା ନାନୁ ଇ ଜିରୁସାଲମ ଗାଡ଼ାତା ପହିପାତି ଆହାମାଇଁ, ଗମଲିୟେଲ ତାଣା କୁଗାନା ଜାପାମାଇଁ, ମା ଆକୁ ଆବାୟାତି ମେରାତି ନେହୁଁ କୁଁ ଜାପାମାଇଁ; ମୀରୁ ଏନିକିଁ ମାହାପୁରୁତି ସେବା କିହିମାଞ୍ଜେରି ନାନୁ ଜିକେଏ ଏଲେକିହୁଁ ମାନୁଞ୍ଜି ଆନାତେଏଁ ମାଚେଏ; ୪ ☆ନାନୁ ଇ ଜିରୁତା ତାକିମାନି ଇୟାସିକା ଆବାୟାଣି ହାନି ପାତେକା ସାସ୍ତି କିହିମାଚେଏ, ଅଡେ ଦସ୍‌ପାନା କାୟିଦି ଇଲକାଣା ହେରପିମାଚେଏ । ୫ ନା ଇ କାତା ସାତା, କାଜା ପୂଜେରାଜା ଅଡେ କାଜା ବେରଣି ମାଣ୍ଡାତାରି ନା ସାକି; ନାନୁ ଏଞ୍ଜାରି ତାଣାଟି ତାୟିୟାଁକି ଆକୁ ରୀସାନା ଲକୁଣି ହିକଣିୟାଁ ତଲେ ଦସ୍‌ପାନା ଜିରୁସାଲମତା ତାତାଲି ତାକି ନାନୁ ଦମେସକତା ମାନି ଜୀହୁଦି ଲକୁତାଣା ହାଜାମାଚେଏଁ ।”

ପାଞ୍ଜୁଲ ତାନି ମନ ଝେଚ୍‌ହାଣି ଝେହ୍‌ନାୟି  
(କାମା ୯:୧-୧୯; ୨୭:୧୨-୧୮)



୬ “ନାନୁ ଦମେସକ ତାଗେ ଏଜିମାଚାଟି ମାଦେନା ବେଲାତା ଦେବୁଣିଏ ନା ସାରିଝାକି ହାଗୁଲାକଟି ର ତାହାଣା ଉଜେଡ଼ି ଡ଼ାଞ୍ଜିତେ । ୭ ଏମ୍ପାଟିଏ ନାନୁ ବୁମିତା ତରଗିତେଏ, ଇଞ୍ଜା ନାଙ୍ଗେ ତାକି ଖେସିମାଟି ଇ ହାଡ଼ା ଖେଚେଏ, ‘ସାଝୁଲ, ସାଝୁଲ ଏନାଆଁତାକି ନାଙ୍ଗେ ସାସ୍ତି ହାହିମାଞ୍ଜାଦି ?’ । ୮ ନାନୁ ଏଲେଇଚେଏ, ‘ପ୍ରବୁ ନାନୁ ଆମ୍ପାଆତି ?’ ଏମ୍ପାଟିଏ ଏଝାସି ନାଙ୍ଗେ ଏଲେଇଞ୍ଜାତେସି, ‘ନାନୁ ଆମ୍ପାଆରାଇଁ ସାସ୍ତି ହାହିମାଞ୍ଜା ନାଜରିତତି ଜୀସୁତେଏ ନାନୁ ।’ ୯ ନା ତଲେ ମାଟି ଲକୁ ଏ ଉଜେଡ଼ି ମେସ୍ତେରି ସାତା, ସାମା ନାଙ୍ଗେ ଖେସ୍ତାତି ହାଡ଼ା ଖେନାଆତେରି । ୧୦ ଏଚେଟିଏ ନାନୁ ଏଲେଇଚେଏ, ‘ପ୍ରବୁ ନାନୁ ଏନାଆଁ କିଇଁ ?’ ଏଚେଟିଏ ପ୍ରବୁ ନାଙ୍ଗେ ଖେସ୍ତାତେସି, ‘ନିଙ୍ଗାନା ଦମେସକତା ହାଲାମ୍ପୁ, ଅଡ଼େ ନିଙ୍ଗେ ଏନାଆଁ କିହାଲି ଆଚେନ ଏନାଆଁ ଏମ୍ପାଆଁ ଖେସ୍ତାଇଁ ।’ ୧୧ ଏ ଉଜେଡ଼ି ମିଶ୍ସି ମାଚାକି ନାନୁ କାଣା ଆହାହାଚେଏ, ଇଞ୍ଜା ନା ତଲେ ଖାହିମାଚାରି ନାଙ୍ଗେ କେୟୁ ଆସାନା ଦମେସକତା ଅୟାତେରି ।”

୧୨ “ଏ ଗାଡ଼ାତା ହନନିୟ ଇଞ୍ଜିହଁ ର ଦାମ୍ପୁଗାଚାସି ମାଚେସି, ଏଝାସି ମା ମେରାତି ମାନଝି ଆନାସି, ଇଞ୍ଜା ଦମେସକତି ଜୀହୁଦି ଲକୁତାଣା ମାନ୍ତି ଗାଚାସି ଅଡ଼େ ଖେଙ୍ଗିତାସି ମାଚେସି । ୧୩ ଏଝାସି ନା ତାଣା ଖାହାନା ଦାରିତା ନିଚାନା ନାଙ୍ଗେ ଏଲେଇଞ୍ଜାତେସି, ‘ଏ ସାଝୁଲ ତାୟି ମେହମ୍ପୁ’ ଏ ଦେବୁଣିଏ ନା କାଣକା ଦେପିଆତୁ ଇଞ୍ଜା ନାନୁ ଏଝାଣାଇଁ ମେସାଲି ଆଡ଼ିତେଏ । ୧୪ ଏଝାସି ଏଲେଇଞ୍ଜାତେସି, ‘ମା ଆକୁ ଆବାୟାତି ମାହାପୁରୁ ତାନି କାତା ପୁଞ୍ଜାଲି ଅଡ଼େ ଏ ତୀରି ଗାଚାଣାଇଁ ମେସାଲି, ଅଡ଼େ ତାନି ଗୁଡ଼ିଟି ହରିମାନି ହାଡ଼ା ଖେଞ୍ଜାଲି ଆଚାମାଞ୍ଜାତେସି । ୧୫ ଇଚିହଁ ନାନୁ ଏନାଆଁ ମେସାମାଞ୍ଜି ଇଞ୍ଜା ଖେଞ୍ଜାମାଞ୍ଜି, ଏ ବାରେତାକି ବାରେ ଲକୁତାଣା ଖେସାଲି ନାନୁ ସାକି ଆଦି । ୧୬ ଅଡ଼େ ନୀଏଁ ଏନାଆଁତାକି ଖେଡ଼ା କିହିମାଞ୍ଜି, ନିଙ୍ଗାମ୍ପୁ ବାପ୍ତିସ୍ତ\* ଆହାନା ତାନି ତାଣା ପ୍ରାତାନା କିହାନା ନୀ ପାପୁ ବାରେ ନରଝି କିହାକତାମ୍ପୁ ।”

ପାଝୁଲ ଜୀହୁଦିଆଆତି ଲକୁତାଣା ପାଣ୍ଡୁଝି ଆନାୟି

\* ୨୨:୧୭ ୨୨:୧୭ମୁଞ୍ଜିନାୟି

୧୭ “ଏମ୍ବାଟିଏ ନାନୁ ଜିରୁସାଲମତା ଖେଣ୍ଡା ଖାହାନା ମାହାପୁରୁ  
 ଇଲୁତା ପ୍ରାତାନା କିହିମାଟାଟି, ସେୟାଣା ହାପାନାତା ମେସ୍ତେସ୍, ୧୮  
 ନାନୁ ସେୟାଣା ହାପାନାତା ପ୍ରବୁଇଁ ମେସ୍ତେସ୍, ଏଞ୍ଜାସି ନାଜେ  
 ଏଲେଇଞ୍ଜାତେସି, ‘ତବେ ଜିରୁସାଲମ ପିହ୍ମୁ, ଇଟିହିଁ ଇମ୍ବାତି  
 ଲକୁ ନା ସାକି ହାନାଟି ନୀ କାତା ଆହୁଅରି ।’ ୧୯ ଏମ୍ବାଟିଏ  
 ନାନୁ ଏଲେଇଚେସ୍ ‘ପ୍ରବୁ ନାନୁ ଜାହୁଦି ଲକୁଡି କୁଟମି ଇଲକାଣା†  
 ହାଜାନା ନିଜେ ନାମାନାରାଇଁ ଖେଟାନା କାୟିଦି ଇଲୁତା ସୁଣ୍ଡିମାଟାଣି  
 ଏଞ୍ଜାରି ନେହିଁ କିଁ ପୁଞ୍ଜାମାନେରି; ୨୦ ✨ଅଡେ ଏଚିବେଲା ନୀ ସାକି  
 ସ୍ତ୍ରୀପାନଇଁ ପାୟିତେରି, ନାନୁଏ ଏମ୍ବାଆଁ ମାଚେସ୍; ଇଞ୍ଜା ବେଲେଏ  
 ହାପେସି ଇଞ୍ଜାଁ ଅଣ୍ଡପିମାଚେସ୍, ଅଡେ ପାୟିମାଟାରି ହିମ୍ବରକା  
 କାଟିମାଚେସ୍ ।’ ୨୧ ସାମା ପ୍ରବୁ ନାଜେ ଏଲେଇଞ୍ଜାତେସି, ‘ହାଲାନୁ  
 ଇଟିହିଁ ନାନୁ ନିଜେ ହେକ ଦେସାତି ଜାହୁଦିଆଆତି ଲକୁତାଣା  
 ପାଣ୍ଡାଇଁ ।’ ”

୨୨ ପାଞ୍ଜୁଲ ଏଲେଇଞ୍ଜା ଖେହ୍ନି ପାତେକା ଲକୁ ଖେଞ୍ଜିମାଚେରି,  
 ସାମା ଏ ଦେବୁଣିଏ ଏଞ୍ଜାରି କାଜା ଗିୟାତଲେ କାଲୁଞ୍ଜି ଆହାନା  
 ଏଲେଇଚେରି, “ଏଞ୍ଜାଣାଇଁ ପାଙ୍ଗାତା ତାରାହାଁ ପାୟନା ଦାଟିଟି  
 ମେକ୍‌ହା ତୁହ୍‌ଦୁ, ଏଞ୍ଜାସି ନୀତାଲି ପାଡ଼ାଆଅସି ।” ୨୩ ଅଡେ ଏଚିବେଲା  
 ଏଞ୍ଜାରି କିଲଡି କିହିଁ ତାମି ହିମ୍ବରକା କୁଡିହିଁ ଲାକଞ୍ଜାକି ଦୁଡି  
 ଡାଞ୍ଜିତେରି, ୨୪ ଏଚିବେଲା ପାସାକଡି କସକା ମୁହେଁ କାଜାସି ପାଞ୍ଜୁଲଇଁ  
 କଟା ଇଲୁ ବିତ୍ରା ଅହାଲି ହୁକୁମି ହୀତେସି, ଅଡେ ଜାହୁଦି ଲକୁ  
 ଏନାଆଁତାକି ଏଞ୍ଜାଣି କପାଟି ଗଡ଼ହା କିହିମାନେରି, ଏଦାଆଁ ପୁଞ୍ଜାଲି  
 ପାଞ୍ଜୁଲଇଁ ସାଟ୍‌ଣି ତଲେ ଖେଟାନା ଖେଞ୍ଜୁ ଇଞ୍ଜାଁ ହୁକୁମି ହୀତେସି  
 । ୨୫ ସାମା ଏଞ୍ଜାରି ଏଞ୍ଜାଣାଇଁ ସାଟ୍‌ଣି ତଲେ ଖେଟାଲି ତ୍ପରିତଲେ  
 ଦସାଲିଏ, ପାଞ୍ଜୁଲ ଦାରିତା ମାଟି ପାସାକଡି କସକା ମୁହେଁ କାଜାଣାଇଁ  
 ଏଲେଇଚେସି, “ଏମିନି ଦହତା ନୀହାୟି କିଞ୍ଜି ଆହାହିଲାଆ ର ରମ୍  
 ଦେସା ତାଣାଇଁ ସାଟ୍‌ଣି ତଲେ ଖେଟାଲି ଏନି ମେରା ମାନେ କି ?”

୨୬ ଇଦାଆଁ ଖେଞ୍ଜାନା କହୁଏସି ପାସାକଡି କସକା ମୁହେଁ କାଜାଣା  
 ତାଣା ହାଜାନା ଏଲେଇଚେସି, “ନାନୁ ଏନାଆଁ କିହାଲି ହାଜିମାଞ୍ଜି,

† ୨୨:୧୯ ୨୨:୧୯ ସିନଗର   ✨ ୨୨:୨୦ ୨୨:୨୦ କାମା ୭:୫୮

ଇତିହାସ ଇସ୍ରାଏଲ ରମିୟ ଲକ୍ଷ୍ମୀ ।”

୨୭ ଏମ୍ମାଟିଏ ପାସାକଡ଼ି କସକା ମୁହେଁ କାଜାସି ଖାହାନା ପାସ୍ତୁଲଙ୍କ ଖେରେସି, “ନାନୁ ନାଈଁ ଖେସ୍ତାମୁ ନାନୁ ରମ୍ ଦେସାତାତି କି ?” ପାସ୍ତୁଲ ଏଲେଇରେସି “ହାଅ ।”

୨୮ ଏମ୍ମାଟିଏ ପାସାକଡ଼ି କସକା ମୁହେଁ କାଜାସି ଏଲେଇରେସି, “ନାନୁ ହାରେକା ଟାକାୟା ହାହାନା ରମ୍ ଦେସାତାତେସ୍ ଆହାମାଙ୍କ ।” ସାମା ପାସ୍ତୁଲ ଏଲେଇରେସି, “ନାନୁତ ଜାନୀଟିଏ ।”

୨୯ ଏମ୍ମାଟିଏ ଆମ୍ମାଆରି ପାସ୍ତୁଲଙ୍କ ଖେଞ୍ଜାଲି ତିୟାରା ଆହାମାରେରି, ଦେରୁଣିଏ ଗୁଟା ଆହାହାରେରି, ଇତିହାସ ପାସ୍ତୁଲ ରମ୍ ଦେସାତାସି ଇଞ୍ଜି ପୁଞ୍ଜାନା ର ମାଣା କସକା ମୁହେଁ କାଜାସି ଏଞ୍ଜାଣାଙ୍କ ହିକ୍‌ଶିୟା ତଲେ ଦସ୍‌ପି କିହାମାଚାକି ତାନୁଏ ଆଜିତେସି ।

**କାଜା ବେରଣିମାଣ୍ଡା ନକିତା ପାସ୍ତୁଲ**

୩୦ ଜୀହୁଦି ଲକ୍ଷ୍ମୀ ପାସ୍ତୁଲ କପାଟି ଏନି ଦାଞ୍ଜା କିହାମାନେରି, ଏଦାଆଁ ସାତା ତଲେ ପୁଞ୍ଜାଲିତାକି ର ମାଣା କସକା ମୁହେଁ କାଜାସି ତାନି ଅର ନେରୁ ପାସ୍ତୁଲତି ହିକ୍‌ଶିୟା ହୁକ୍‌ହାନା କାଜା ବେରଣିମାଣ୍ଡାତି ବାରେଜାଣାତି କୁଡ଼ିକିହାଲି ପୂଜେରାଙ୍ଗାଣି ହୁକୁମି ହୀତେସି । ତାୟୁ ପାସ୍ତୁଲଙ୍କ ଏଞ୍ଜାରି ନକିତା ନିପ୍‌ହେସି ।

**୨୩**

୧ ପାସ୍ତୁଲ ଜୀହୁଦି ଲକ୍ଷ୍ମୀ କାଜା ବେରଣିମାଣ୍ଡାତା କୁଗାମାନି ଲକ୍ଷ୍ମୀ ଆଚେ ସିନିକିହାନା ଏଲେଇରେସି, “ଏ ଇସ୍ରାୟେଲ ତାୟିୟାତେରି ନାନୁ ନୀଞ୍ଜୁପାତେକା ମାହାପୁରୁ ନକିତା ନେହ୍ ଅଣପୁ ତଲେ ନୀତାମାଙ୍କ, ଏଦାଆଁତାକି ନା ହିୟା ହାରେକା ଅତିତାୟି ।” ୨ ଇ କାତା ଖେଞ୍ଜାନା କାଜା ପୂଜେରା ହାନାନ ପାସ୍ତୁଲ ଦାରିତା ନିଚାମାନି ଲକ୍ଷ୍ମୀ ତାନି ଗୁଡିତା ଖେଦୁ ଇଞ୍ଜି ହୁକୁମି ହୀତେସି । ୩ ପାସ୍ତୁଲ ଏଞ୍ଜାଣାଙ୍କ ଏଲେଇରେସି, “ଏ ହୁନୁ ଉସ୍‌ପିତି ଦବ୍‌ଲା କାତି ମାହାପୁରୁ ନିଈଁ ଖେତାନେସି, ନାନୁ ମସାତି ମେରା ଲେହେଁ ନାଈଁ ନୀହାୟି କିହାଲି କୁଗାମାଟି ଜିକେସି, ନାନୁ ନାଈଁ ଖେତାଲି ହୁକୁମି ହାହାନା ନାନୁଏ ମସାତି ମେରା ଉରିମାଞ୍ଜି !”

☆ ୨୩:୩ ୨୩:୩ ମାତି ୨୩:୨୭,୨୮

୪ ଏଚେଟିଏ ଦାରିତା ନିତାମାଟି ଲକୁ ପାଞ୍ଜୁଲଇଁ ଏଲେଇଚେରି,  
“ନାନୁ ମାହାପୁରୁତି କାଜା ପୂଜେରାଇଁ ଲାଜା କିହିମାଞ୍ଜି ।”

୫ ପାଞ୍ଜୁଲ ଏଲେଇଚେସି, “ଏ ଇସ୍ରାୟେଲ ତାୟିୟାଁତେରି ଏଞ୍ଜାଣାଇଁ  
ନାନୁ କାଜା ପୂଜେରା ଇଞ୍ଜି ପୁଞ୍ଜା ହିଲାଆତେଏ; ଇଚିହିଁ  
ଦାମ୍ଭୁପତିତା ରାସ୍‌କି ଆହାମାନେ, ‘ମୀରୁ ମୀ ସାଲୁଞ୍ଜି କିନାରାଇଁ ବାକା  
ଇଟାଆଦୁ ।’”

୬ ✧ସାମା ପାଞ୍ଜୁଲ ର ବାଗା ସାଦୁକିୟାଁ ଅଡେ ର ବାଗା ପାରୁସିୟାଁ  
ମାନେରି ଇଞ୍ଜି ପୁଞ୍ଜାନା, କାଜା ବେରଣିମାଣ୍ଡାତା କାଜା ଗିୟାଁତଲେ  
ଏଲେଇଚେସି, “ଏ ଇସ୍ରାୟେଲ ତାୟିୟାଁତେରି ନାନୁ ର ପାରୁସିତେଏ  
ଇଞ୍ଜା ପାରୁସି ମୀରଏଣାତେଏ; ଇଞ୍ଜା ହାଡାରି ଖେଣ୍ଡେ ନିଙ୍ଗିନେରି  
ଇଞ୍ଜି ଆସା କିହିମାନାକି ମୀରୁ ନାଜେ ନୀହାୟି କିହିମାଞ୍ଜାଦେରି ।”

୭ ଏଞ୍ଜାସି ଇ କାତା ଏଲେଇଶମ୍ବନିଏ ପାରୁସି ଅଡେ ସାଦୁକି ଲକୁ  
ବିତ୍ରା ଗଡ଼ହା ହଡେ, ଇଞ୍ଜା କାଜା ବେରଣି ମାଣ୍ଡାତାରି ଗଟି ଗଟି ଆହାଁ  
ରୀ ବାଗା ଆଡେରି । ୮ ✧ଇଚିହିଁ ସାଦୁକିୟାଁ ଖେଣ୍ଡେ ନିଙ୍ଗିନାୟି  
ହିଲେଏ, ଦୁତୁୟାଁ ଅଡେ ଜୀଞ୍ଜୁୟାଁ ହିଲାତ ଇନେରି, ସାମା ପାରୁସିୟାଁ  
ଏ ବାରେତି ନାମିନେରି । ୯ ଏମ୍ବାଟିଏ କାଜା ଗଡ଼ହା ଆଡେ, ଅଡେ  
ପାରୁସିୟାଁ ବିତ୍ରାଟି ଏଚରଜାଣା ମେରାପୁନାରି ନିଙ୍ଗାନା ଏଲେଇଚେରି;  
“ମାମ୍ବୁ ଇଞ୍ଜାଣି ତାଣାଟି ଏନି ଦହ ବେଟାଆଆତମି, ସାତେଏ ଏଞ୍ଜାଣି  
ତାଣାଟି ର ଜୀଞ୍ଜୁ ଆଆତ ଲାକପୁରୁତି ଦୁତୁ କାତା ଖେସାମାନେ ।”

୧୦ ଇଲେଆହଁ କାଜା ଗଡ଼ହା ଆହାଲିଏ, ପାଞ୍ଜୁଲଇଁ ଏଞ୍ଜାରି  
କାଣ୍ଡାମୁକା କିନେରି ଇଞ୍ଜି ଆଜିତାକି ର ମାଣା କସକା ମୁହେଁ କାଜାସି  
ପାଞ୍ଜୁଲଇଁ ଏଞ୍ଜାରି ତାଣାଟି ଗେଲପାନା ବାଲ୍‌ମିଟି କଟା ଇଲୁ ବିତ୍ରା  
ଅହାଲି କସକାଣି ହୁକୁମି ହୀତେସି ।

୧୧ ଏ ନେରୁ ଲାଆଁୟାଁ ପ୍ରବୁ ପାଞ୍ଜୁଲଇଁ ଏଲେଇଚେସି, “ଆଜାଆନି,  
ସାସା ଆହମ୍ବୁ ଇଚିହିଁ ନାନୁ ଜିରୁସାଲମତା ଏନିକଁ ନା ସାକି ହୀତି,  
ରମ୍ବୁ ଗାଡ଼ାତା ଜିକେଏ ଏଲେକିହିଁ ନା ସାକି ହୀନାୟି ମାନେ ।”

### ପାଞ୍ଜୁଲଇଁ ପାୟାଲି ଅଶ୍‌ପିନାୟି

୧୭ ଅର ଦିନା ଲାଈ, ଜୀହୁଦିୟାଁ ଜାଟୁ ଆହାନା ପାଞ୍ଜୁଲଇଁ ପାୟାଆ ପାତେକା ଏନ୍ତି ରାନ୍ଦା କି ଏୟୁ ତୀଗାଆପ ଇଞ୍ଜିଁ ତାମ୍ବୁତାମ୍ବୁସୁ ପାର୍ମାଣା କିହାମାଚେରି । ୧୩ ଏଲେଇଞ୍ଜି ଅଣ୍ଡପି ମାଚାରି ରୀ କଡ଼ି ଜାଣାଟିଏ ଆଗାଡ଼ା ମାଚେରି । ୧୪ ଏଞ୍ଜାରି କାଜା ପୂଜେରାଙ୍ଗା ଅଡ଼େ ପ୍ରାଚିନାଙ୍ଗା ତାଣା ଝାହଁ ଏଲେଇଚେରି, “ମାମ୍ବୁ ପାଞ୍ଜୁଲଇଁ ପାୟାଲି ଆଡ଼ାଆ ପାତେକା ଏନାଆଁ ତିନଅମି କି ତୀଗଅମି ଇଞ୍ଜିଁ ମାମ୍ବୁ ମାଞ୍ଜେତାକି ପାର୍ମାଣା କିହାମାନମି । ୧୫ ଏଦାଆଁତାକି କାଜା ବେରଣିମାଣ୍ଡାତି କାଜାରି ହାଜାନା, ର ମାଣା କସ୍‌କା ମୁହେଁ କାଜାଣାଇଁ ନାଡ଼ି କିହଁ ଏଲେଇଞ୍ଜୁ, ମାମ୍ବୁ ପାଞ୍ଜୁଲ ଏନାଆଁ କିହାମାନାଣି ନେହଁକଁ ଝେନମି ଇଞ୍ଜିହଁ ମୀ ତାଣା ହାଟିକିଦୁ, ଏଚେଟିଏ ଏଞ୍ଜାସି ମୀ ତାଣା ଏଗାଞ୍ଜାଆ ନକେଏ ପାୟାଲି ଜାଗ୍ରାତା ଆହା ଡ଼ୟିନମି ।”

୧୬ ସାମା ପାଞ୍ଜୁଲ ତାମି ବାଣ୍ଞା କସ୍‌କା ଜଲ୍‌କି ଆହିମାଟି କାତା ଡ଼ଗୁାନା ଝେଚେସି; ଇଞ୍ଜା କଟା ଇଲୁ ବିତ୍ରା ଝାହାନା ପାଞ୍ଜୁଲଇଁ ଈ ବାରେ କାତା ଝେସ୍ତେସି । ୧୭ ଏଚେଟିଏ ପାଞ୍ଜୁଲ ର ରମିୟ କହ୍‌ଏଣାଇଁ ହାଟାନା ଏଲେଇଚେସି, “ଇ ଦାଂଗଣେଣାଇଁ ର ମାଣା କସ୍‌କା ମୁହେଁ କାଜାଣି ତାଣା ଅମ୍ବୁ, ଇଚିହଁ ଇଞ୍ଜାସି ର କାତା ଏଞ୍ଜାଣାଇଁ ଝେହ୍‌ନାୟି ମାନେ ।” ୧୮ ଏଚେଟିଏ ଏଞ୍ଜାସି ର ମାଣା କସ୍‌କା ମୁହେଁ କାଜାଣି ତାଣା ଅହାନା ଏଲେଇଚେସି, “କାୟିଦିତା ମାନି ପାଞ୍ଜୁଲ ନାଞ୍ଜେ ହାଟାନା ନୀ ତାଣା ଈ ଦାଂଗଣେଣାଇଁ ତାଚାଲି ବାତିମାଲାତେସି, ନିଞ୍ଜେ ଝେସାଲି ଇଞ୍ଜାଣାକି ର କାତା ମାନେ ।”

୧୯ ର ମାଣା କସ୍‌କା ମୁହେଁ କାଜାସି ଏଞ୍ଜାଣି କେୟୁ ଆସାନା ଲକୁ ହିଲାଆ ତାଣା ଅହାନା ଝେଚେସି, “ନାଞ୍ଜେ ନୀନୁ ଏନାଆଁ ଝେସ୍ତାନାୟିମାନେ ଝେସ୍ତାମୁ ।”

୨୦ ଏଞ୍ଜାସି ଏଲେଇଚେସି, “ପାଞ୍ଜୁଲ ଏନାଆଁ କିହାମାନେସି ଏଦାଆଁ ନେହଁକଁ ପୁଞ୍ଜାଲି ଏଞ୍ଜାଣାଇଁ ଝିଏ କାଜା ବେରଣିମାଣ୍ଡାତା ମା ତାଣା ତାମ୍ବୁ ଇଞ୍ଜିଁ ଜୀହୁଦି ଲକୁତି କାଜାରି ନାଡ଼ିକିହାନା ନିଞ୍ଜେ ବାତିମାଲାନେରି, ୨୧ ସାମା ନୀନୁ ଏଞ୍ଜାରି କାତା ମାନଞ୍ଜି ଆଆନି, ଇଚିହଁ ଏଞ୍ଜାଣାଇଁ ପାୟାଲି ଆଡ଼ାଆ ପାତେକା ରାନ୍ଦା ତିଚିହଁ କି ତୀଗିତିହଁ ମାଞ୍ଜେ ବାକା ଆଟାପେ ଇଞ୍ଜିଁ ମାନି କିହାନା ରୀ

କଢ଼ିଟିଏ ଆଗାଡ଼ା ଲକ୍ଷ୍ମୀ ଡ଼ଗୁଆଁ କାଚାମାନେରି, ନୀର୍ବ୍ୟ ଏଞ୍ଜାରି ନୀ ତାଣାଟି ହେଲ ବେଟାଆହାଲି କାଟିମାନେରି ।”

୨୨ ଏଚେଟିଏ ର ମାଣା କସକା ମୁହେଁ କାଜାସି ଏଲେଇଚେସି, “ନୀନୁ ନାଙ୍ଗେ ଝେସ୍ତାତି କାତା ଆମ୍ବାଆରାଇଁ ଝେହୁଆନି” ଇଞ୍ଜିଁ ଝେସାନା ଏ ଦଂରଣେଶାଇଁ ପାଣ୍ଡିତେସି ।

### ପେଲିକସ୍ ତାଣା ପାଞ୍ଜୁଲଇଁ ପାଣ୍ଡିନାୟି

୨୩ ର ମାଣା କସକା ମୁହେଁ କାଜାସି ତାନି ଡ଼ଇ କାମା କିନି ପାସାକଡ଼ି କସକା ମୁହେଁ କାଜାରାଇଁ ରିଆରାଇଁ ହାଟାନା ଏଲେଇଚେସି, “ନୀଞ୍ଜୁ ଲାଆଁୟାଁ ନ ଗଂଟା ବେଲାତା କାୟିସରିୟାତା ହାଜାଲିତାକି ତାନିକଡ଼ି ଦସ ଜାଣା ଗଡ଼ାତା ହାନାରି ଅଡ଼େ ରୀ ଖାଞ୍ଜା ବାଲାଁ ଗାଟାରି ତଲେ ରୀ ଖାଞ୍ଜା କସକାଣି ତିୟାରା କିଦୁ । ୨୪ ଅଡ଼େ ଏଞ୍ଜାରି ଏନିକିଁ ପାଞ୍ଜୁଲଇଁ ଗଡ଼ା ଲାକ କୁଗିକିହାନା ସାଲୁଞ୍ଜି କିନି ପେଲିକସ୍ ତାଣା ଜାଗ୍ରାତା ତଲେ ଅନେରି, ଏଦାଆଁତାକି ବାରେ କିହାଲି ହୁକୁମି ହୀତେସି ।” ୨୫ ର ମାଣା କସକା ମୁହେଁ କାଜାସି ଇଲେଇଞ୍ଜିଁ ର ଆକୁ ରାଟିତେସି;

୨୬ “ଏ ମାନିଗାଟି ଦେସା ସାଲୁଞ୍ଜି କିନି ପେଲିକସ୍ କ୍ଲାଞ୍ଜୁଦିୟା ଲୁସିୟାତି ଜହରା । ୨୭ ଜୀହୁଦିୟାଁ ଇ ଲକ୍ଷ୍ମୀ ଆସାନା ପାୟାଲି ଅଣ୍ଡିପାଟି ବେଲାତା, ଏଞ୍ଜାସି ର ରମିୟ ଲକ୍ଷ୍ମୀ ଇଞ୍ଜିଁ ପୁଞ୍ଜାନା, ନାନୁ କସକା ତଲେ ହାଜାନା ଏଞ୍ଜାଣାଇଁ ପିସ୍ପି କିତେସି । ୨୮ ଏଞ୍ଜାସି ଏଞ୍ଜାରି କପାଟି ଏନି ଦହ କିହାମାନେସି ପୁଞ୍ଜାଲି ନାନୁ ଏଞ୍ଜାଣାଇଁ ତାନି କାଜା ବେରଣିମାଣ୍ଡାତା ଅହାମାଚେସି । ୨୯ ସାମା ଏଞ୍ଜାସି ହାନି ଡ଼ଣ୍ଡୁ କି କାୟିଦି ଡ଼ଣ୍ଡୁ ବେଟାଆନି ଲେହେଁତି ଏନି ଦହ କିହାହିଲଅସି ଇଞ୍ଜିଁ ନାନୁ ପୁଚେସି, ତାନି କପାଟି ଖାରଇ ତାନି ମେରାତି କାତାତାକି ଏଞ୍ଜାଣାଇଁ ଦହ ଦସାମାନେରି । ୩୦ ଏଞ୍ଜାରି ନାଡ଼ିକିହାଁ ଏଞ୍ଜାଣାଇଁ ପାୟାଲି ଅଣ୍ଡିପାମାନେରି ଇଞ୍ଜିଁ ନାଙ୍ଗେ କାବୁ ହିୟାଲିଏ ନାନୁ ଇଞ୍ଜାଣାଇଁ ଝେଡ଼ାକିଆନା ନୀ ତାଣା ପାଣ୍ଡାତେସି; ଏଞ୍ଜାଣାଇଁ ଦହ ଦସାମାନାରାଇଁ ଜିକେଏ ନୀ ନକିତା ଏଞ୍ଜାଣି କପାଟି ସାକି ହୀହାଲି ଝେସା ପାଣ୍ଡାତେସି ।”

୩୧ ଏମ୍ବାଟିଏ କସକା ହୁକୁମି ବେଟାଆହାନା ପାଞ୍ଜୁଲଇଁ ଅହାନା ଲାଆଁୟାଁ ବେଲାତା ଏଞ୍ଜାଣାଇଁ ଆନ୍ତିପାଡ଼ିତା ତାତେରି । ୩୨ ଅର ଦିନା

ଗଡ଼ାୟାଁ ଗାଟାରାଇଁ ଏଞ୍ଜାଣିତଲେ ହାଜାଲି ପିସାନା, କସ୍କା କଟା  
 ଇଲୁତା ଖେଣ୍ଡା ଖାଡ଼େରି । ୩୩ ଗଡ଼ାୟାଁ ଗାଟାରି କାୟିସରିୟାତା  
 ଖାହାନା, ସାଲୁଞ୍ଜି କିନି ପେଲିକସକି ଆକୁ ହାହାନା ପାଞ୍ଜୁଲଇଁ ଏଞ୍ଜାଣି  
 ତାଣା ହେରପିତେରି । ୩୪ ଏଞ୍ଜାସି ଏ ଆକୁ ପଡ଼ଞ୍ଜି ଆଡ଼ି ତାୟୁ ନୀନୁ  
 ଏମିନି ରାଜିତାତି ଇଞ୍ଜୁଁ ଖେରେସି; ଅଡ଼େ ଏଞ୍ଜାସି କିଲିକିୟାତି ଲକୁ  
 ଇଞ୍ଜୁଁ ପୁରେସି, ୩୫ ଇଞ୍ଜାଁ ଏଞ୍ଜାସି ଏଲେଇରେସି, “ନିଙ୍ଗେ ଦହ  
 ଦସାମାଞ୍ଜାନାରି ଇମ୍ପାଆଁ ଖାଡ଼ିସାରେ ନାନୁ ନୀ କାତା ଖେଞ୍ଜାଇଁ” ଅଡ଼େ  
 ଏଞ୍ଜାସି ପାଞ୍ଜୁଲଇଁ ହେରଦତି ଇଜ ଇଟାଲି ହୁକୁନି ହୀତେସି ।

## ୨୪

### ଜୀହୁଦି ଲକୁ ପାଞ୍ଜୁଲ କପାଟି ଦାଞ୍ଜା କିନାୟି

୧ ପାସା ଦିନା ତାୟୁ କାଜା ପୁଜେରା ହାନାନ, ଏତେକା ପ୍ରାତିନାଙ୍ଗା  
 ଅଡ଼େ ତରତୁଲ ଦରୁଗାଟି ଅକିଲା ତଲେ କାୟିସରିୟାତା ଖାଡ଼େରି,  
 ଅଡ଼େ ଏଞ୍ଜାରି ପାଞ୍ଜୁଲ କପାଟି ସାଲୁଞ୍ଜି କିନି ପେଲିକସ ତାଣା ଦାଞ୍ଜା  
 କିତେରି । ୨ ପାଞ୍ଜୁଲଇଁ ଏମ୍ପାଆଁ ତାଟାଲିଏ, ତରତୁଲ ଏଞ୍ଜାଣି କପାଟି  
 ଏଲେଇରେସି, “ଏ ମାନ୍ନିଗାଟି ପେଲିକସ ନୀ ତାଣାଟି ମାମ୍ପ ହାରେକା  
 ଦିନାଟିଏ ହିଡ଼ଡ଼ି ବେଟାଆହି ମାନମି, ଇଞ୍ଜାଁ ନୀନୁ ମା ଦେସାତାକି  
 କିହାମାନି କାମା ବାରେ ଇ କୂଡ଼ା ତାରାକି ହାରେକା ନେହେଁ  
 ଆହାମାନେ । ୩ ଇଦାଆଁ ମାମ୍ପ ବାରେଜାଣା ତଲେ ବାରେ ତାଣା  
 ହାରେକା ମାନ୍ନିତଲେ ପେଲିକସଇଁ ମାନ୍ନିଞ୍ଜି ଆହିମାନମି । ୪ ସାମା  
 ନାନୁ ନିଙ୍ଗେ ଏନିକଁ ହାରେକା ବିତିବିତା କିୟଅଁ, ଇଦାଆଁତାକି  
 ନୀନୁ ନାଙ୍ଗେ କାର୍ମାମେସାନା ମା ଏତରଗଟା କାତା ଖେଞ୍ଜାଲିତାକି  
 ନିଙ୍ଗେ ବାତିମାଲିମାଞ୍ଜାଇଁ । ୫ ଇତିହଁ ଇ ମାଣ୍ଡସି ଆଜିହପେତି  
 ଗଡ଼ହା ଗାଟାସି, ଏଞ୍ଜାସି ଦାରଡ଼ିତି ବାରେଖାକି ମାନି ଜୀହୁଦିୟାଁ  
 ତାଣା ଗଡ଼ହା ହପ୍ପନାସି, ଅଡ଼େ ନାଜରିତ ଗଟିତି ର କାଜାସି ଇଞ୍ଜୁଁ  
 ମାମ୍ପ ପୁଞ୍ଜାମାନମି; ୬ ଅଡ଼େ ଜିକେଏ ମାହାପୁରୁ ଇଲୁତି ଲାଗେଏ  
 କିହାଲି ଅଶପାମାରେସି, ଏତିବେଲା ମାମ୍ପ ଇଞ୍ଜାଣାଇଁ ଆସୁମି, ଅଡ଼େ  
 ମା ମୋରାତି ଲେହେଁ ଇଞ୍ଜାଣାଇଁ ନୀହାୟି କିୟାଲି ଅଶପାମାତମି ।  
 ୭ ସାମା ର ମାଣା କସ୍କା ମୁହେଁ କାଜାସି ଲୁସିୟା ଖାହାନା ଏଞ୍ଜାଣାଇଁ  
 ମା ତାଣାଟି ବାଡ଼ୟୁ ତଲେ ମୀଞ୍ଜା ଅୟାତେସି, ୮ ଅଡ଼େ ଇଞ୍ଜାଣାଇଁ

ଦହ ଦସିମାନାରାଇଁ ନୀ ତାଣା ଖାହାଲି ହୁକୁମି ହୀତେସି, ଇ ବାରେ କାତାତାକି ନୀନୁ ଇଖାଣାଇଁ ଖେଟିହିଁ ମାମ୍ବୁଏଖାଣି କପାଟି ଦାଖା କିହାମାନାଣି ପୁଞ୍ଜାଲି ଆଡ଼ିଦି ।”<sup>୯୬</sup> କୃତା ଆହାମାଟି ଜୀହୁଦିୟାଁ ଜିକେଏ ଦାଖା କିହାମାନାରି ତଲେ ଆଣ୍ଠାନା ଇ ବାରେ କାତା ସାତା ଇଞ୍ଜିଁ ଇଚେରି ।

**ତାନି ଖାକିଟି ପାଞ୍ଜୁଲ ପେଲିକସ ନକିତା ଖେହନାୟି**

<sup>୯୦</sup> ଏଚେଟିଏ ସାଲୁଝି କିନାସି ଖାଞ୍ଜୁ ହୁଟାନା ପାଞ୍ଜୁଲଇଁ ଜଲ୍ଲାଲି ହେଲ ହୀତେସି, ଇଞ୍ଜାଁ ପାଞ୍ଜୁଲ ଏଲେଇଚେସି, “ନୀନୁ ହାରେକା ବାର୍ସା ଆଡେ ଇ କୃତାତାରାଇଁ ନୀହାଁୟି କିନାତି ଆହାମାଞ୍ଜି ଇଞ୍ଜିଁ ପୁଞ୍ଜାନା, ନାନୁ ସାସାତଲେ ନା ଖାକିଟି ଖେସିମାଞ୍ଜାଇଁ । <sup>୯୧</sup> ବାର ଦିନାଟିଏ ଆଗାଡ଼ା ଆଏ, ନାନୁ ମାହାପୁରୁତି ସେବା କିହାଲି ଜିରୁସାଲମତା ହାଜାମାଚେଏଁ, ଇଦାଆଁ ନୀନୁ ଖେଞ୍ଜାନା ପୁଞ୍ଜାଲି ଆଡ଼ିଦି । <sup>୯୨</sup> ଅଡ଼େ ଇଖାରି ମାହାପୁରୁ ଇଲ୍ଲୁତାକି ଜୀହୁଦି ଲକୁଡି କୁଟମି ଇଲ୍ଲୁତା\* କି ଗାଡ଼ାତି ଆମିନି ଟାମୁତା ଆମ୍ବାଆରି ତଲେ ବାଦିବାଦା କିତାଣି କି ଗଡ଼ହା ହପହାଣି ଇଞ୍ଜାଁ ଜୀହୁଦିୟାଁଣି ମାଡ଼ଝି କିହିମାଟାଣି ଇଖାରି ମେସାମାଞ୍ଜଅରି, <sup>୯୩</sup> ଇଞ୍ଜାଁ ନୀଏଁ ନା କପାଟି ତାତାମାନି ଦହ ତାକି, ଏଖାରି ନୀ ନକିତା ଏନି ପାରମାଣା ତସାଲି ଆଡ଼ଅରି । <sup>୯୪</sup> ସାମା ନାନୁ ନିଜେ ଇଦାଆଁ ଖେସିମାଞ୍ଜାଇଁ; ଇଖାରି ଏମିନି ଜିରୁତି ମିରି ଇଞ୍ଜିମାନେରି, ଏ ଜିରୁ ତାକାନା ନାନୁ ମା ଆକୁ ଆବାୟାତି ମାହାପୁରୁଇଁ ଜହରା କିହିମାଇଁ, ସାମା ନାନୁ ଜିକେଏ ମସାତି ମେରା ଅଡ଼େ ମାହାପୁରୁ ଅଣ୍ଟପୁତି ବଲୁ ଖେହନାରି ପତିତା ଏନାୟି ରାସ୍‌କି ଆହାମାନେ ଏ ବାରେ ନାମିମାଇଁ; <sup>୯୫</sup> ଇଖାରି ଲେହେଁ ମାହାପୁରୁ ତାଣା ନା ଏ ରଣ୍ଡିଏ ଆସା ମାନେ ଦାମ୍‌ଗାଟାରି ଅଡ଼େ ଦାମ୍‌ ହିଲ୍ଲାଆ ଗାଟାରି ବାରେ ଲକୁ ହାଡ଼ାରି ତାଣାଟି ଖେଣ୍ଡେ ନିଜିନେରି ଇଞ୍ଜିଁ ନୀ ନକିତା ଖେସିମାଞ୍ଜାଇଁ । <sup>୯୬</sup> ଏଦାଆଁତାକି ନାନୁ ଜିକେଏ ମାହାପୁରୁ ଅଡ଼େ ଲକୁ ନକିତା ବାରେଦିନା ନେହିଁ ଅଣ୍ଟପୁ ତଲେ ଡ଼ୟାଲି ଅଣ୍ଟପିମାଇଁ ।”

<sup>୯୭</sup> “ହାରେକା ବାର୍ସା ଜେଟ ନାନୁ ମା ଲକୁତାଣା ଦାନା ତାତାଲି ଅଡ଼େ ମାହାପୁରୁ ତାଣା ପୂଜା କିୟାଲି ଜିରୁସାଲମତା ଖାହାମାଚେଏଁ

\* ୨୪:୧୭ ୨୪:୧୭ ସିନଗଗ୍



। ୧୮ ଏତିବେଲାତା ନାନୁ ମାହାପୁରୁ ଇଲୁତା ଅବହା କଡିନି ମେରା ରାପୁହିମାତି ବେଲାତା ଇଝାରି ନାଜେ ମାହାପୁରୁ ଇଲୁତା ମେସ୍ତାତେରି; ଏତିବେଲା ନା ତଲେ ମାନ୍ଦା ଲକୁ ହିଲାଆତେରି କି ଏମ୍ବାଆଁ ଏନି ଗଡ଼ହା ହିଲାଆତେ, ୧୯ ସାମା ଆସିୟାତି ଏଚରଜାଣା ଜୀହୁଦିୟାଁ ଏମ୍ବାଆଁ ମାଚେରି; ନା କପାଟି ଏଝାରି ଏନି କାତା ମାଟିହୁଁ ଏଝାରି ନୀ ନକିତା ଖାହାନା ଦାଝା କିତିହୁଁ ନେହେଁ ଆଡେମା । ୨୦ ନାନୁ କାଜା ବେରଣିମାଣ୍ଡା ନକିତା ନିଚାମାଟି ବେଲାତା ଏନି ଦହ ମେସାମାଟିହୁଁ ଇମ୍ବାଆଁ ମାନି ଇଲକୁ ନାଜେ ଝେସ୍ତାପେରି, ୨୧ ନାନୁ ରଣ୍ଡିଏ କାତା ଝେସାମାଚେଏଁ ଏଝାରି ନକିତା ନିଚାମାଟି ବେଲାତା ନାନୁ ଆଟ୍ଝାତଲେ ଏଲେଇଞ୍ଜା ମାଚେଏଁ, ‘ହାଡାରି ଝେଣ୍ଡେ ନିଙ୍ଗିନେରି ଇଞ୍ଜୁଁ ନାନୁ ନାମାମାନାକି ନୀଞ୍ଜୁ ମୀ ତାଣାଟି ନୀହାଁୟି କିଝି ଆହିମାଇଁ ।’”

୨୨ ସାମା ପେଲିକସ୍ ଏ ଜିରୁତି କାତା ପୁଞ୍ଜାମାଚାକି ନୀହାଁୟି କିହାଲି ବାୟିଦା କିହାନା ଏଲେଇଚେସି, “ର ମାଣା କସକା ମୁହେଁ କାଜାସି ଲୁସିୟା ଝାଡିଦେହେଁ ନାନୁ ମୀ ନୀହାଁୟି ତିକହାଇଁ,” ଇଞ୍ଜୁଁ ଝେସା ପାଣ୍ଡିତେସି । ୨୩ ଏଝାସି ପାସାକଡ଼ି କସକା ମୁହେଁ କାଜାଣାଇଁ ଏଲେଇଚେସି, ତାନି ଲକୁ ଅଡେ ତଣେସିଙ୍ଗା ତାନି ସେବା କିହାଲି କାହି କିଆନି, ଅଡେ ତାନି କାୟିଦିତା ମାନାସି ଇଞ୍ଜୁଁ ଗେଲ୍‌ପାନା ଏଝାଣାଇଁ ହିଡ଼ଡ଼ି ତଲେ ଲେମ୍ବାଲି ଏଲେଇଚେସି ।

### ପେଲିକସ୍ ଅଡେ ଦୁସିଲା ନକିତା ପାଞ୍ଚୁଲ

୨୪ ଏଚରଦିନା ତାୟୁ ପେଲିକସ୍ ଦୁସିଲା ଦରୁଗାଟି ଜୀହୁଦି ତାନି ଡକ୍ତି ତଲେ ଝାଡେସି, ଏଝାସି ପାଞ୍ଚୁଲଇଁ ହାଟି କିହାନା କ୍ରୀସ୍ତ ଜୀସ୍ତ ତାଣା ନାମିନି କାତା ଏଝାଣି ତାଣାଟି ଝେଚେସି । ୨୫ ସାମା ପାଞ୍ଚୁଲ ଦାମ୍ବୁତି କାତା, ତୀରପୁ ହିୟାଁ ଅଡେ ଝାହିମାନି ନୀହାଁୟି ଦିନାତି କାତା ଝେସିମାଚାକି, ପେଲିକସ୍ ଆଜାନା ଏଲେଇଚେସି, “ନୀଏଁ ନୀନୁ ହାଲାମୁ ବେଲା ସିନକିହାନା ଅଡେ ର ଦିନା ହାଟି କିୟାଇଁ ।” ୨୬ ପାଞ୍ଚୁଲ ନାଜେ ଟାକାୟାଁ ହିୟାନେସି ଇଞ୍ଜୁଁ ଏଝାସି ଆସା

☆ ୨୪:୨୧ ୨୪:୨୧ କାମା ୨୩:୭

କିହାମାରେସି, ଏଦାଆଁତାକି ଏଞ୍ଜାସି ଅଲେ ଅଲେ ଏଞ୍ଜାଣାକ୍ ହାଟି କିହାନା ଏଞ୍ଜାଣିତଲେ କାତା ଆଞ୍ଜିତେସି ।

୨୭ ଏଲେକିହ୍ ରୀ ବାସୀ ଆଡି ତାୟୁ ପକ୍ ଯ ପେସ୍ତସ୍, ପେଲିକସ୍ ଚାୟୁତା ସାଲୁଞ୍ଜି କିନାସି ଆଡେସି, ଅଡେ ପେଲିକସ୍ ଜୀହୁଦିୟା ନେହାସି ଇଞ୍ଜି ଇଞ୍ଜାପେରିଞ୍ଜା ଇଞ୍ଜି ଅଣ୍ପାନା ପାଞ୍ଜୁଲକ୍ କାୟିଦିତା ଇଚାନା ହାଚେସି ।

## ୨୫

ସାଲୁଞ୍ଜି କିନାଣି ତାଣା ପାଞ୍ଜୁଲ ଗହାରା କିନାୟି

୧ ଏମ୍ବାଟିଏ ପେସ୍ତସ୍ ଇ ରାଜିତା ଖାହାନା ତାନିଦିନା ଆୟାଲିଏ କାୟିସରିୟାଟି ଜିରୁସାଲମତା ହାଚେସି, ୨ ଅଡେ ଏମ୍ବାଆଁ କାଜା ପୂଜେରାକ୍ ଇଞ୍ଜା ଜୀହୁଦି ଲକ୍ଷୁତ କାଜାରି ପାଞ୍ଜୁଲ କପାଟି ପେସ୍ତସ୍ ତାଣା ଖେଶ୍ଟେ ଦାଞ୍ଜା କିତେରି, ୩ ଅଡେ ଏଞ୍ଜାସି ଏନିକ୍ ପାଞ୍ଜୁଲକ୍ ଜିରୁସାଲମତା ହାଟା ପାଣ୍ଡାନେସି, ଏଦାଆଁତାକି ଗହାରା କିହାନା ଏଞ୍ଜାଣି କପାଟି କାର୍ମାଆନି ଲେହେଁ ପେସ୍ତସ୍ ବାଟିମାଲିତେରି; ଇଞ୍ଜା ଏଞ୍ଜାରି ଜିରୁତା ଡଗୁହାଁ ପାୟାଲି ଅଣ୍ପମାଚେରି । ୪ ପେସ୍ତସ୍ ଏଲେଇଚେସି, “ପାଞ୍ଜୁଲ କାୟିସରିୟାତା କାୟିଦିତା ମାନେସି, ଇଞ୍ଜା ନାନୁ ଜିକେଏ ତବେ ଏମ୍ବାଆଁ ଖେଶ୍ଟା ହାଜିମାକ୍, ୫ ଏଞ୍ଜାସି ଏନି ଦହ କିହାମାନେସି, ଆଡିହ୍ ମୀ କାଜାରି ନା ତଲେ କାୟିସରତା ହାଲାପେରି ଅଡେ ଏଞ୍ଜାଣି କପାଟି ତାମି ଦାଞ୍ଜା କିପାରି ।”

୬ ପେସ୍ତସ୍ ଏମ୍ବାଆଁ ଆଟା କି ଦସ ଦିନା ଏଞ୍ଜାରିତଲେ ଡୟାହାଁ କାୟିସରିୟାତା ଖେଶ୍ଟେ ହାଚେସି, ଏ ଅର ନେଚୁ ନୀହାଁୟି କିନି ଚାୟୁତା କୁଗାନା ପାଞ୍ଜୁଲକ୍ ତାଚାଲି ହୁକୁମି ହାଚେସି । ୭ ପାଞ୍ଜୁଲ ଖାହାଲିଏ ଜିରୁସାଲମଟି ଖାହାମାନି ଜୀହୁଦିୟା ତାନି ସାରିସୁଚୁ ନିଚାନା ଏଞ୍ଜାଣି କପାଟି ହାଚେକା ଦହ ଦସାଲି ମାଟ୍ ହେରି, ସାମା ଏଞ୍ଜାରି ଏ ବାରେଡି ପାର୍ମାଣା କିହାଲି ଆଡାଆତେରି । ୮ ଏଚେଟିଏ ପାଞ୍ଜୁଲ ତାନି ଖାକିଟି ଖେସାକତାନା ଏଲେଇଚେସି, “ଜୀହୁଦିୟା ମେରା କପାଟି ଆଆତ୍ ମାହାପୁରୁ ଇଲୁ କପାଟି କି କାୟିସର କପାଟି ଜିକେଏ ନାନୁ ଏନି ଦହ କିହାହିଲଅଁ ।”

<sup>୯</sup> ସାମା ପେସ୍ତସ୍, ଜୀହୁଦି ଲକ୍ଷ୍ମ ନକିତା ନେହାଁସି ଆୟାଲି ପାଞ୍ଜୁଲଇଁ  
 ଝେରେସି, “ନୀନୁ ଜିରୁସାଲମତା ହାଜାନା ଏମ୍ବାଆଁ ନା ନକିତା ଇ  
 ବାରେତାକି ନୀହାୟି ଆୟାଲି ମନ କିହିମାଞ୍ଜି କି ?”

<sup>୧୦</sup> ସାମା ପାଞ୍ଜୁଲ ଏଲେଇରେସି, “ନୀନୁ କାୟିସର ନକିତା ନୀହାୟି  
 କିନି ଚାୟୁତା ନିଚାମାଇଁ, ଏମ୍ବାଆଁ ନା ନୀହାୟି ଆନାୟି ମାନେ,  
 ନୀନୁ ଜୀହୁଦିୟାଁ କପାଟି ଏନି ଲାଗେଏ କାମା କିହାହିଲଅଁ, ଏଦାଆଁ  
 ନୀନୁ ଜିକେଏ ନେହଁ କଁ ପୁଞ୍ଜାମାଞ୍ଜି । <sup>୧୧</sup> ମେରା ମାନି କିଆନା  
 ଲାଗେଏତି କାମା କିହାମାଟିହଁ, ନୀନୁ ହାହାଲି ଆଜିହିଲଅଁ; ସାମା  
 ଇଞ୍ଜାରି ନା କପାଟି ଆମିନି ବାରେ ଦାଞ୍ଜା କିହିମାନେରି, ଏ ବାରେ  
 ବିତ୍ରାଟି ଆମିନି ର ପଦୁ ଜିକେଏ ସାତା ଆଆତିହଁ, ଆମ୍ବାଆସି ଏଞ୍ଜାରି  
 କେୟୁତା ନାଙ୍ଗେ ହେରପାଲି ଆଡ଼ଅସି, ନୀନୁ କାୟିସର ନକିତା  
 ନୀହାୟି କିଞ୍ଜିଆୟାଲି ଗହାରା କିହିମାଇଁ ।”

<sup>୧୨</sup> ଏମ୍ବାଟିଏ ପେସ୍ତସ୍ ତାନି ନୀହାୟିତି କାଜାରି ତଲେ ଜଲୁକି  
 ଆହାନା ଏଲେଇରେସି, “ନୀନୁ କାୟିସର ନକିତା ନୀହାୟି  
 କିଞ୍ଜିଆୟାଲି ରାସିମାଞ୍ଜି, ଆତିହଁ ନୀନୁ କାୟିସର ତାଣେଏ ହାଜି ।”

**ଆଗ୍ରିପା ଅଡ଼େ ବନଁ କି ନକିତା ପାଞ୍ଜୁଲ**

<sup>୧୩</sup> ଏଚରଦିନା ତାୟୁ ରାଜା ଆଗ୍ରିପା ଅଡ଼େ ବନଁ କି କାୟିସରିୟାତା  
 ଞ୍ଜାହାନା ପେସ୍ତସ୍ ଆଶ୍ଟାଲି ହାଚେରି । <sup>୧୪</sup> ଏଞ୍ଜାରି ଏମ୍ବାଆଁ ଏଚରଦିନା  
 ଡ଼ୟିତି ତାୟୁ, ପେସ୍ତସ୍ ରାଜା ନକିତା ପାଞ୍ଜୁଲ କାତା ଝେସ୍ତେସି,  
 “ପେଲିକସ୍ କାୟିଦିତା ଇଟାମାନାସି ରଅସି ଇମ୍ବାଆଁ ମାନେସି; <sup>୧୫</sup> ନୀନୁ  
 ଏରିବେଲା ଜିରୁସାଲମତା ହାଜାମାଚେଏଁ ଏରିବେଲାତା ଜୀହୁଦି  
 ଲକ୍ଷ୍ମି କାଜା ପୂଜେରାଜା ଅଡ଼େ ପ୍ରାଟିନାଜା ଏଞ୍ଜାଣି କପାଟି ଝେସାନା  
 ଏଞ୍ଜାଣାଇଁ ତଣ୍ଡୁ ହୀହାଲି ନାଙ୍ଗେ ବାତିମାଲି ମାଞ୍ଜାତେରି । <sup>୧୬</sup> ସାମା  
 ନୀନୁ ଏଞ୍ଜାରାଇଁ ଏଲେଇଚେଏଁ, ଦହଗାଟାସି ତାନି ଦହ ଦସାମାନାରା  
 ନକିତା ନିଆ ପାତେକା ଇଞ୍ଜା ତାଙ୍ଗେ ତାନି ଞ୍ଜାକିଟି ଜଲୁଲି ହୀଆ  
 ପାତେକା ଏଞ୍ଜାଣାଇଁ ତଣ୍ଡୁ ହୀହାଲି ମା ରମ୍ ଲକ୍ଷ୍ମି ମେରା ହିଲେଏ  
 । <sup>୧୭</sup> ଏଞ୍ଜାରି ନା ତଲେ ଇମ୍ବାଆଁ ଞ୍ଜାୟାଲିଏ, ନୀନୁ ଝେଡ଼ାକିଆନା ତାନି  
 ଅର ନେରୁ ନୀହାୟି କିନି ତାଣା କୁଗାନା, ଏଞ୍ଜାଣାଇଁ ତାଚାଲି ହୁକୁମି  
 ହୀତେଏଁ । <sup>୧୮</sup> ଏଞ୍ଜାଣାଇଁ ଦହ ଦସାମାନାରି ଞ୍ଜାହାନା ନିତେରି, ସାମା

ଏଞ୍ଜେଲ୍ ଏନିଲେହେଟି ଦାଞ୍ଜା କିନେରି ଇଞ୍ଜେଲ୍ ନାନୁ ଅଶ୍ଵିମାଚେର୍ସ୍, ଏଞ୍ଜାରି ଏନି ଦହ୍ ଏଞ୍ଜାଣି କପାଟି ଖେସ୍ତାଆତେରି । ୧୯ ଏଞ୍ଜାରି ଖାରୁଇ ତାନି ଦାମ୍ବୁତି କାତା ଇଞ୍ଜା ଜୀସୁ ଦରୁଗାଟି ଏନିନି ହାତାଣାଇଁ ପାଞ୍ଜୁଲ ନୀତାମାନେସି ଇଞ୍ଜେଲ୍ ଖେସିମାନେସି, ତାନି କାତାତାକି ଆସ୍ପି ଆଡେରି । ୨୦ ଇ ବାରେ କାତା ନେହ୍ କ୍ ପୁଞ୍ଜାଲିତାକି ଏନାଆଁ କିହାଲି ଆନେ, ଏନାଆଁ ତାରି କିହାଲି ଆଡାଆନା ଇ ଦାଞ୍ଜା ତାକି ନୀହାୟି ଆହାଲିତାକି ପାଞ୍ଜୁଲ ଜିରୁସାଲମତା ହାନେସି କି ଆଏ ଏଦାଆଁ ନାନୁ ଖେଚେର୍ସ୍ । ୨୧ ସାମା ପାଞ୍ଜୁଲ ସାଲ୍ଫି କିନି କାୟିସର ନକିତା ନୀହାୟି କିଞ୍ଚିଆୟାଲି ନାନୁ ହାଇଁ ଇଞ୍ଜେଲ୍ ଖେସିମାଚାକି, ନାନୁ ଏଞ୍ଜାଣାଇଁ କାୟିସର ତାଣା ପାଣ୍ଡିନି ପାତେକା କାୟିଦିତା ଇଚାଲି ହୁକୁମି ହୀଚେର୍ସ୍ ।”

୨୨ ଆଗ୍ରିପା ପେସ୍ପସ୍ ଏଲେଇଚେସି, “ନାନୁ ଜିକେଏ ଇଞ୍ଜାଣି କାତା ଖେଞ୍ଜାଲି ମନ କିହିମାଇଁ । ହାଅ ଓଏ ନାନୁ ଏଞ୍ଜାଣି କାତା ଖେଞ୍ଜେଲ୍ ଇଞ୍ଜେଲ୍ ପେସ୍ପସ୍ ଏଲେଇଚେସି ।

୨୩ ତାନି ଅର ଦିନା ଆଗ୍ରିପା ଇଞ୍ଜା ବନି କି କାଜାପାଣା ଅଡେ ଗାଞ୍ଜୁରମିଗାଟି କସ୍ତା ଇଞ୍ଜା ଗାଡାତି କାଜାରି ତଲେ ହାଜାନା ନୀହାୟି କିନି ଗାୟୁତା ଖାଡେସି, ଏମ୍ପାଟିଏ ପେସ୍ପସ୍ ହୁକୁମି ତଲେ ପାଞ୍ଜୁଲ ଏମ୍ପାଆଁ ତାପିଆଡେସି । ୨୪ ଏମ୍ପାଟିଏ ପେସ୍ପସ୍ ଏଲେଇଚେସି, “ଏ ରାଜା ଆଗ୍ରିପା ଅଡେ ଇମ୍ପାଆଁ ମାନି ମାନିଗାଟି କାଜାତେରି, ମୀରୁ ବାରେ ଇଞ୍ଜାଣାଇଁ ମେସିମାଞ୍ଜେରି; ଇଞ୍ଜାଣି କପାଟି ଜିରୁସାଲମ ଇଞ୍ଜା ଇମ୍ପାଆଁ ମାନି ଜୀହୁଦି ଲକୁ ନା ତାଣା ଦାଞ୍ଜା କିହାମାନେରି, ଇଞ୍ଜାସି ନୀତାମାନାୟି ଲଡା ହିଲେଏ ଇଞ୍ଜେଲ୍ ବାରେଜାଣା କାଲ୍ଫି ଆଡେରି । ୨୫ ସାମା ଇଞ୍ଜାସି ହାନିଲେହେଟି ଏନି ଦହ୍ କିହାମାନାଣି ନାନୁ ମେସାହିଲର୍ସ୍ ଇଞ୍ଜା ଏଞ୍ଜାସି ତାନୁଏ କାୟିସର ତାଣା ନୀହାୟି କିଞ୍ଚିଆୟାଲି ବାତିମାଲ୍ତାକି ନାନୁ ଏଞ୍ଜାଣାଇଁ ଏମ୍ପାଆଁ ପାଣ୍ଡାଲି ତାକି ତାରି କିଚେର୍ସ୍ । ୨୬ ସାମା ରାଜା କାୟିସର ତାଣା ଏଞ୍ଜାଣି ତାକି ରାଚାଲି ନାଞ୍ଜେ ଏନି କାତା ହିଲେଏ, ଏଦାଆଁତାକି ନାନୁ ଏଞ୍ଜାଣାଇଁ, ବାରେକିହାଁ ରାଜା ଆଗ୍ରିପା ନୀ ତାଣା ଏଞ୍ଜାଣାଇଁ ତାଚାମାଇଁ, ଏନିକ୍ ଏଞ୍ଜାଣି କାତା ଖେଞ୍ଜାନା, ପୁଟିତାୟୁ ନାନୁ ଏଞ୍ଜାଣାକି ଇଚାଣି ରାଚାଲି ଆଡ଼ିଇଁ । ୨୭ ଇଚିହ୍ ର କାୟିଦି ଗାଟାଣାଇଁ ପାଣ୍ଡିନି ବେଲ୍ତା ତାନି କପାଟି

କିହାମାନି ଦାଞ୍ଜା ନେହଁକଁ ତହୁଆନା ପାଣ୍ଡାଲି ନେହେଁ ଆଏ ଇଞ୍ଜଁ ନାନୁ ଅଶ୍ଵିମାଇଁ ।”

### ୨୭

ରାଜା ଆଗ୍ରିପା ନକିତା ପାଞ୍ଚୁଲ ତାଙ୍ଗୋତାକି ଖେହନାୟି

୧ ଆଗ୍ରିପା ପାଞ୍ଚୁଲଇଁ ଏଲେଇଚେସି, “ନିଙ୍ଗେ ନୀ ଖାକିଟି କାତା ଜଲ୍ଲାଇ ହେଲ ହୀପକିଆଡେ” ଏମ୍ପାଟିଏ ପାଞ୍ଚୁଲ କେୟୁ ଦାସାନା ତାନି ଖାକିଟି ଏଲେଇଚେସି ।

୨ “ରାଜା ଆଗ୍ରିପା, ଜୀହୁଦିୟାଁ ନା କପାଟି ଏନ୍ତି ଦହ ଦସାମାଞ୍ଜାନେରି, ଏଦାଆଁ ନୀଞ୍ଜୁ ନୀ ନକିତା ଖେସାଲି ନାନୁ ହେଲ ବେଟାଆହାମାନାକି ନାନୁ ନାଙ୍ଗେ କପଲ ଗାଟାତେଏଁ ଇଞ୍ଜଁ ଅଶ୍ଵା କଡିମାଇଁ, ୩ ଏନାଆଁତାକି ଇଚିହଁ, ନାନୁ ଜୀହୁଦିୟାଁ ପାଣ୍ଡାପାଟୁ ଅଡେ କାତା ନେହଁକଁ ପୁଞ୍ଜାମାଞ୍ଜି; ଏଦାଆଁତାକି ନା କାତା ସାସାତଲେ ଖେଞ୍ଜାଲି ନିଙ୍ଗେ ବାଡିମାଲିମାଞ୍ଜାଇଁ ।”

୪ “ନା ଦାଂଗଣା ଖେଡାଟିଏ ନୀଏଁ ପାତେକା ନାନୁ ତଲି ମା କୁଡାତାରି ତଲେ ଅଡେ ଜିରୁସାଲମତା ଏନ୍ତିଆହଁ ନୀତା ମାଚେଏଁ ଏଦାଆଁ ଜୀହୁଦିୟାଁ ବାରେ ନେହଁକଁ ପୁଞ୍ଜାମାନେରି; ୫ \*ନାନୁ ମା ମାହାପୁରୁତି ମେରା ହାରେକା ନେହଁକଁ ମାନୁଞ୍ଜି ଆହ୍ମାନି ପାରୁସିୟାଁ ଗଚିତା ମାଚେଏଁ, ଏଞ୍ଜାରି ନାଙ୍ଗେ ତଲିଟିଏ ପୁଞ୍ଜାମାଞ୍ଜାନେରି, ଏଞ୍ଜାରି ମନ କିଚିହଁ ସାକି ହୀହାଲି ଆଡିନେରି । ୬ ମାହାପୁରୁ ମା ଆକୁ ଆବାୟାଁଣି ଏମିନି କାତା ଆଞ୍ଜାମାଚେସି, ଏ କାତା ହୀହାମାନାଣି ବାସୁଁ କିହାମାନାକି ନୀଞ୍ଜୁ ନାନୁ ଇମ୍ପାଆଁ ନୀହାଁୟି କିଞ୍ଜିଆୟାଲି ନିଚାମାଇଁ ୭ ମା ଲକୁତି ବାର କୁଡାତାରି ଲାଆଁ ମାଦେନା ମାହାପୁରୁତି ସେବା କିହାନା ଏ ରଣ୍ଡିଏ କାତା ବେଟାଆହାଲି ତାକି ଆସା କିନେରି, ଏ ରାଜା, ନା ଏ ବାସୁଁ ତାକି ଜୀହୁଦିୟାଁ ନାଙ୍ଗେ ଦହ କିହିମାଞ୍ଜାନେରି । ୮ ମାହାପୁରୁ ହାଡାରାଇଁ ନିକ୍ନେସି, ଇଦାଆଁ ନାମାଲି ଆଡାଆ ଗାଟାୟି ଇଞ୍ଜଁ ମୀରୁ ଏନାଆଁତାକି ଅଶ୍ଵିମାଞ୍ଜେରି ?”

୯ \* “ନାଜ୍ଝିତ ଜୀସୁ ଦରୁ କପାଟି ନାଙ୍ଗେ ହାରେକା କାମା

☆ ୨୭:୫ ୨୭:୫ କାମା ୨୩:୭; ପିଲିପି ୩:୫ ☆ ୨୭:୯ ୨୭:୯ କାମା ୮:୩; ୨୨:୪,୫

କିନାୟିମାନେ ଇଞ୍ଜି ନାନୁ ଅଣ୍ଠିମାରେଏ । ୧୦ ଜିରୁସାଲମତା ନାନୁ ଏଲେଜିକେଏ କିତେଏ । କାଜା ପୂଜେରାଜା ତାଣାଟି ଅଦିକାରା ଆକୁ ବେଗାଆହାନା, ମାହାପୁରୁ ଲକୁ ତାଣାଟି ହାରେକା ଜାଣାଇଁ କାୟିଦିତା ସୁଣ୍ଠିକିହାମାରେଏ ଇଞ୍ଜା ଏଝାରାଇଁ ପାୟିନାଟି ନାନୁ ଜିକେଏ ଆଣ୍ଠିମାରେଏ । ୧୧ ହାରେକା ଦେବା ଜୀହୁଦି ଲକୁତି କୁଟମି ଇଲ୍‌କାଣା\* ନାନୁ ଏଝାରାଇଁ ଲାଜାକିହ୍ ଡଣ୍ଡ ହାହିମାରେଏ ଇଞ୍ଜା ଏଝାରି ନାମୁତି ଏଟ୍‌କା କିହାଲି ଅଣ୍ଠିମାରେଏ, ନାନୁ ଏଝାରି କପାଟି ହାରେକା କାରି ଆହାମାରେଏ, ଏଝାରାଇଁ ସାସ୍ତି ହାହାଲି ଏଟ୍‌କା ଦେସାତା ଜିକେଏ ହାଜାମାରେଏ ।”

ପାଞ୍ଜୁଲ ତାନି ମନ ଝେବ୍‌ହି କାତା ଝେହ୍‌ନାୟି  
(କାମା ୯:୧-୧୯; ୨୨:୬-୧୭)

୧୨ ଇଦାଆଁତାକି କାଜା ପୂଜେରାଜା ତାଣାଟି ଅଦିକାରା ଆକୁ ଅଡେ ହୁକୁମି ବେଗାଆହାନା ନାନୁ ଦମେସକ ହାଜାମାରେଏ । ୧୩ ଏ ରାଜା ଆଗ୍ରିପା, ର ଦିନା ମାଦେନା ବେଲା ଜିରୁତା ହାଗୁଲାଇଟି ଝେଡାକିହ୍ ହାରେକା ଉଜେଡି ମେସ୍ତେଏ, ଏ ଉଜେଡି ନାଜେ ଅଡେ ନା ତଲେ ହାଜିମାଚାରି ସାରିଝାକି ତଞ୍ଜାଆଡେ । ୧୪ ମାମ୍‌ ବାରେଜାଣା ବୁମିତା ତରଗାଲିଏ, ଏବି ହାଡାତଲେ ନାଜେଡାକି ଇ ହାଡା ଝେରେଏ, “ଆଡେ ସାଞ୍ଜୁଲ ଆଡେ ସାଞ୍ଜୁଲ ଏନାଆଁତାକି ନାଜେ ସାସ୍ତି ହାହିମାଜାଦି ? ଏନିକ୍ ଡକୁ କଡି ହେରୁ ଡନୁଣି ହୁଡୁ ବାଡଗାତା ଦୟିନେ ଏଲେକିହ୍ ନାନୁ ତାୟୁଝାକି ଦୟାହାଁ ଜାହାରା କତାତା ଗାଣ୍ଠି ମାଞ୍ଜି ।” ୧୫ ଏମ୍‌ାଟିଏ ନାନୁ ଝେରେଏ, “ପ୍ରୁ ନାନୁ ଆମ୍‌ାଆଡି ?” ଏରେଟିଏ ପ୍ରୁ ଏଲେଇଞ୍ଜାତେସି “ନାନୁ ଆମ୍‌ାଆରାଇଁ ସାସ୍ତି ହାହିମାଞ୍ଜି ନାନୁ ଏ ଜୀସୁତେଏ । ୧୬ ସାମା ନିଜାମୁ କତାତା ବାଡ଼ୟୁ ହାହାନା ନିମ୍, ଇଚିହ୍ ନାନୁ ନିଜେ ନା ସେବା କାମା କିହାଲିତାକି ତଞ୍ଜା ଆହାମାଞ୍ଜାଇଁ, ନୀଞ୍ଜୁ ନାନୁ ଏନାଆଁ ମେସାମାଞ୍ଜି ତାୟୁ ନାନୁ ନିଜେ ଏନାଆଁ ତସ୍ତାଇଁଏ କାତା ଏଟ୍‌କା ତାରାଇଁ ସାକି ହାଦି । ୧୭ ଜୀହୁଦି ଅଡେ ଜୀହୁଦିଆଆଡି ଲକୁତାଣା ନାନୁ ନିଜେ ପାଣ୍ଠାଇଁ, ଏଝାରି ତାଣାଟି ନାନୁ ନିଜେ ଗେଲ୍‌ପାଇ । ୧୮ ନିଜେ ଏଝାରି କାଣ୍ଠକା

\* ୨୭:୧୧ ୨୭:୧୧ ସିନଗଗ୍

ଦେବାଲି ଆନେ, ଅଡ଼େ ଏଞ୍ଜାରାଇଁ ଆନେରିଟି ଉଜେଡ଼ିତା ଅଡ଼େ ସୟତାନ ପାନ୍ଦାଟି ମାହାପୁରୁ ତାଣା ଝେଟ୍‌ହା ତାନାୟି ଆନେ, ଏନିକ୍ ନା ତାଣା ନାମିନି ତାଣାଟି ସୁଦୁ କିଞ୍ଜି ଆହାନା ଏଞ୍ଜାରି ପାପୁ ମେଣ୍‌ଜିନେ ଅଡ଼େ ମାହାପୁରୁ ଆଡ଼ିତି ଲକୁ ବିତ୍ରା ଏଞ୍ଜାରି ଚାୟୁ ବେଟାଆନେରି ।”

### ପାଞ୍ଜୁଲ ତାନି କାମାତି ଝେହ୍‌ନାୟି

୧୯ “ରାଜା ଆଗ୍ରିପା, ଏ ଲାକପୁରୁଟି ମେସ୍ତାଣି ନାନୁ ଉରାଆଡେଏଁ, ୨୦ ତଲିଏ ଦମେସକତା ଇଞ୍ଜା ଜିରୁସାଲମତି ଲକୁତାଣା ତାୟୁ ଜୀହୁଦା ରାଜିତି ବାରେ ନାସକାଣା, ଅଡ଼େ ଜୀହୁଦିଆଆତି ଲକୁତାଣା ଜିକେଏ ଝେକ୍‌ହେଏଁ, ଏନିକ୍ ଏଞ୍ଜାରି ମନ ଝେଟ୍‌ହାନା ମାହାପୁରୁ ତାଣା ଝାନ୍‌ନେରି, ଇଞ୍ଜା ଏଞ୍ଜାରି ମନ ଝେଟ୍‌ହା କତାମାନେରି, ଏଦାଆଁ କାମାତା ତହ୍‌ନେରି । ୨୧ ଏଦାଆଁତାକି ନାନୁ ମାହାପୁରୁ ଇଲୁତା ମାଗାଟି ଜୀହୁଦିୟା ନାଜେ ଆସାନା ପାୟାଲି ଅଣ୍‌ପି ମାଞ୍ଜାତେରି । ୨୨ ସାମା ନୀଞ୍ଜୁପାତେକା ମାହାପୁରୁ ନାଜେ ସାୟେମି କିହାମାଞ୍ଜାନେସି, ଏଦାଆଁତାକି ନୀଞ୍ଜୁ ନାନୁ ଉଣା କାଜାରି ବାରେତି ନକିତା ସାକି ହୀହାଲି ନିଗାମାଇଁ । ମାହାପୁରୁ ଅଣ୍‌ପୁତି ବଲୁ ଝେହ୍‌ନାରି ଅଡ଼େ ମସା ଏନାଆଁ ଆନେ ଇଞ୍ଜା ଝେସାମାନେସି ନାନୁ ଏ କାତା ଝେସିମାଇଁ, ୨୩ ☆ଇରିହ୍ ମସିହା ସାତେଏ ଦୁକୁ ବେଟାଆହାନା ହାଡାରି ବିତ୍ରାଟି ତଲିଏ ନିଜ୍ଠାନା ଜୀହୁଦି ଲକୁ ଇଞ୍ଜା ଜୀହୁଦିଆଆତି ଲକୁ ନକିତା ଗେଲ୍‌ପିନି ଉଜେଡ଼ି ତହ୍‌ନେସି ।”

୨୪ ପାଞ୍ଜୁଲ ଇଲେକିହ୍ ତାନି ଝାକିଟି ଜଲିମାଗାଟି ପେସ୍ତସ୍ କାଜା ଗିୟାତଲେ ଏଲେଇଚେସି, “ପାଞ୍ଜୁଲ ନୀନୁ ବାୟା ଆଡ଼ି; ଗାଡି ଜାପିତାକି ନୀନୁ ବାୟା ଆହାମାଞ୍ଜି ।”

୨୫ ସାମା ପାଞ୍ଜୁଲ ଏଲେଇଚେସି, “ଏ ମାନ୍‌ଗାଟି ପେସ୍ତସ୍ ନାନୁ ବାୟା ଆହାହିଲଅଁ; ସାମା ନାନୁ ଏନାଆଁ ଜଲିମାଇଁ ଏଦି ସାତା, ତୀରି ବୁଦିତଲେ ଝେସିମାଇଁ । ୨୬ ରାଜା ଆଗ୍ରିପା ନୀନୁ ଇ ବାରେ ପୁଞ୍ଜାମାନାକି, ନାନୁ ନୀ ନକିତା ସାସାତଲେ କାତା ଜଲିମାଇଁ, ନାନୁ ସାତେଏ ନାମିମାଇଁ, ଇ ବାରେ ନୀନୁ ପୁନାଆରେଟୁ ଆହା ହିଲେଏ; ଅଡ଼େ ଇ ବାରେ କାତା ତ୍ଵଗ୍‌ନା ମେଣେଏ ଆହାହିଲେଏ । ୨୭ ଏ ରାଜା

ଆଗ୍ରିପା, ନୀନୁ ମାହାପୁରୁ ଅଶ୍ଵତ୍ଵି ବଲୁ ଝେହ୍ନାରି କାତା ନାମିମାଞ୍ଜି କି ? ହାଅ ନୀନୁ ନାମିମାଞ୍ଜି ଇଞ୍ଜି ନୀନୁ ପୁଞ୍ଜାମାଞ୍ଜି ।”

୨୮ ଆଗ୍ରିପା ପାଞ୍ଜୁଲଞ୍ଜି ଏଲେଇରେସି, “ନୀନୁ ନାଞ୍ଜେ ଗାଡ଼େକେଏ କ୍ରୀସ୍ତାନା କିଞ୍ଜି ଇଞ୍ଜି ଅଶ୍ଵପିମାଞ୍ଜାଦି ?”

୨୯ ପାଞ୍ଜୁଲ ଏଲେଇରେସି, “ଗାଡ଼େକା ତାକି ଆପେ କି ଗାଡ଼ିତାକି ଆପେ ମାହାପୁରୁ ତାଣା ଇରେକେଏ ନା ପ୍ରାତାନା, ନୀନୁ, ଅଡ଼େ ଏଚରଜାଣା ନୀଞ୍ଜୁ ନା କାତା ଝେଞ୍ଜିମାନେରି, ବାରେଜାଣା ନାଲେହେଁ ଆପେରି ସାମା ନାଲେହେଁ ହିକ୍ଵିୟା ତଲେ ଦସ୍ଵି ଆପେରି ଇଞ୍ଜି ନୀନୁ ଝେସିମାଞ୍ଜିଅଁ ।”

୩୦ ଏରେଟିଏ ରାଜା, ସାଲଞ୍ଜି କିନାସି ଅଡ଼େ ବନିକି ଇଞ୍ଜା ଏଟ୍ଵକାତାରି ବାରେ ହାଜାଲି ନିଜିତେରି, ୩୧ ଏଞ୍ଜାରି ହାନିବେଲ୍ଲାତା ତାମ୍ବୁ ତାମ୍ବୁ ଜଲ୍ଲକି ଆଡ଼େରି, “ଇ ମାଣ୍ଠସି ଇଲେତି ଏନି କାମା କିହାହିଲଅସି ଏନାଆଁତାକି ଏଞ୍ଜାସି ଦସ୍ଵି ଆନେସି କି ପାୟୁଞ୍ଜି ଆନେସି ।” ୩୨ ଅଡ଼େ ଆଗ୍ରିପା ପେସ୍ଵସ୍ଵଞ୍ଜି ଏଲେଇରେସି, “ଇ ମାଣ୍ଠସି କାୟସର ତାଣା ନୀହାୟି କିଞ୍ଜିଆୟାଲି ବାଡ଼ିମାଲ୍ଲାଆଡ଼ିହଁମା ମାମ୍ବୁ ଏଞ୍ଜାଣାଞ୍ଜି ପିସାଲି ଆଡ଼ିତମିମା ।”

# ୨୭

## ପାଞ୍ଜୁଲ ସାମ୍ବୁରିଟି ରମ୍ବତା ହାନାୟି

୧ ମାମ୍ବୁ ଇଟାଲି ଦେସାତା ଏୟୁ ଜାଜା ତଲେ ହାଜାଲି ତୀରି କିଞ୍ଜିଆଡ଼ି ତାୟୁ ପାଞ୍ଜୁଲ ଅଡ଼େ ଏଚରଜାଣା କାୟିଦିତା ମାତାରାଞ୍ଜି, ରାଜାତି କସକା ଜୁଲିୟସ୍ ଦରୁଗାଟି ପାସାକଡ଼ି କସକା ମୁହେଁ କାଜାଣି କେୟୁତା ହେରପିତେରି । ୨ ଏମ୍ବାଟିଏ ମାମ୍ବୁ ଆସିୟା ଦେସାତି ଏଟ୍ଵକା ଏଟ୍ଵକା ଚାୟୁତା ହାନି ଏୟୁ ଜାଜା ନିନି ଚାୟୁଟି ଆଦ୍ରାମୁଡ଼ିୟୁ ଜାଜାତା ହଡ଼ମି; ଇଞ୍ଜା ମାକିଦନିୟା ଦେସାତି ତେସଲନିକି ଗାଡ଼ାଟି ଆରିସ୍ଵାର୍କ ମା ତଲେ ମାରେସି । ୩ ତାନି ଅର ନେରୁ ମାମ୍ବୁ ସିଦନତା ଏଗାତମି, ଅଡ଼େ ଜୁଲିୟସ୍ ପାଞ୍ଜୁଲଞ୍ଜି କାର୍ମା ଆହାନା ତାନି ତଣେସିଙ୍ଗା ତାଣା ହାଜାନା ଲଡ଼ାମାନାଣି ସେବା ବେଟାଆହାଲି ହେଲ ହୀତେସି । ୪ ଏମ୍ବାଟି ଜାଜାତା ହଡ଼ାମାଚାଟି ମା ଞ୍ଜାକି ଗାଲି ଝେଚାଲିଏ ମାମ୍ବୁ ଛୁପୁ ଦାରି ଦାରିଟି ହାତମି, ୫ କିଲିକିୟା ଅଡ଼େ ପଂପୁଲିୟା ନକିତା ମାନି



ସାମ୍ବୁର ଗାଣ୍ଡୀନା ଲୁକିୟାତି ମୁରାତା ଖାଡ଼ମି ।<sup>୬</sup> ଏମ୍ବାଆଁ ପାସାକଡ଼ି କସ୍କା ମୁହେଁ କାଜାସି, ଇଟାଲିତା ହାଜିମାନି ର ଆଲେକ୍‌ଜାଣ୍ଡିୟା ଏମ୍ବୁ ଜାଜା ବେଟାଆହାନା ମାଙ୍ଗେ କୁରି କିୟାତେସି ।

<sup>୭</sup> ତାୟୁ ହାରେକା ଦିନାତାକି ଦୀରେ ଦୀରେ ହାଜାନା କସ୍ତଲେ କ୍ଳିଦ ଗାଡ଼ା ତାଗେ ହାଚମି । ନକିତି ଗାଲି ମାଙ୍ଗେ ନକିତା ହାଜାଲି ହିୟାଆଲିଏ ସାଲ୍‌ମନିତି ଅରଝାକି କ୍ଳିତି ଦାରି ଦାରିଟି ହାଚମି । ଠ ଅଡ଼େ କସ୍ତଲେ ଗାଟୁ ଗାଟୁଟି ହାଜାନା “ଅଜିତି ବାନ୍ଦା” ଇନି ଚାୟୁତା ହାଚମି, ଏଡ଼ି ଲାସାୟା ଗାଡ଼ାତି ତାଗେ ମାଚେ ।

<sup>୮</sup> ଇଲାଆହୁଁ ହାରେକା ଦିନା ଆହାହାଚେ, ଇଞ୍ଜା ସାମ୍ବୁରିଟି ହାନାୟି କସ୍ତ ଆହାହାଚେ, ଇଚିହୁଁ ଏଚିବେଲା ଉପାସା ପାରୁ ରାହାମାଚେ, ଏଦାଆଁତାକି ପାଝୁଲ ଜାଗ୍ରାତା କିହାନା ଏଲେଇଚେସି ।<sup>୧୦</sup> “ବାବୁୟାତେରି ଇ ସାମ୍ବୁରିଟି ହାନାଟି ଜାଜାତି ଆସ୍ତି ଅଡ଼େ ଏମ୍ବୁ ଜାଜା ନସ୍ତୁ ଆନେ ଏଡ଼ି ଆଏ, ସାମା ଜାଜାତା ହାଜିମାନାରି ଜୀଝୁ ଜିକେଏ ନସ୍ତୁ ଆନେ ନାନୁ ପୁଞ୍ଜିମାଈ ।”<sup>୧୧</sup> ସାମା ପାସାକଡ଼ି କସ୍କା ମୁହେଁ କାଜାସି, ପାଝୁଲତି କାତା କିହାଁ ଜାଜାତି ସାଲ୍‌ଖି କିନାଶାଈ ଇଞ୍ଜା ସାଝୁକାରି କାତାତି ହାରେକା ନାମିତେସି ।<sup>୧୨</sup> ଇ ବାନ୍ଦାତା ପେନିଝେଡ଼ା ଡ଼ୟାଲି ନେହେଁ ହିଲାଆତେ, ଇଦାଆଁତାକି ଜାଜାତା ହାଜିମାଚାରି ହାରେକା ସାମ୍ବୁରିଟି ହାଜାନା ପିନିକ୍‌ସ୍ତା ପେନିବେଲା ରାପୁହାଲି ଅଣ୍ଡପିମାଚେରି, ଏ ପିନିକ୍‌ସ୍ କ୍ଳିତିତି ର ଜାଜାୟାଁ ନିନି କାଜା ଚାୟୁ ମାଚେ, ଏଡ଼ି ଝେଡ଼ା କୁଡ଼ନ୍ ଚିଃନିଝାକି ଅଡ଼େ, ଝେଡ଼ା କୁଡ଼ନ୍ ଚେବୁଝାକି ମୁମ୍ବୁ କ୍ଳିହାମାଚେ ।

### ସାମ୍ବୁରିତା ଗାଲି ପିୟୁ

<sup>୧୩</sup> ଏଚିବେଲା ଚିଃନି ଝାକିତି ଗାଲି ଦୀରେ ଦୀରେ ଝାଡ଼େ, ହାଜିମାଚାରି ନୀଏଟି ମା ଅଣ୍ଡପିମାଟି ଲେହେଁ ଆଡ଼େ ଇଞ୍ଜା ଅଣ୍ଡପିତେରି, ଜାଜା ନିପୁହାମାଟି କାଜା ଲହତି ରେଜାନା କ୍ଳିତିତି ଗାଟୁ ଗାଟୁଟି ହାଜାଲି ମାଚ୍‌ହେରି,<sup>୧୪</sup> ସାମା ଗାଡ଼େକା ହାଜାଲିଏ ଇୟୁରକ୍‌ଖିଲ୍ ଇନି ଆଜିହପେତି କାଜା ଗାଲି ଝେଡ଼ା ହନି ଚେବୁ ଝାକିଟି ହଚାନା ଜାଜା ମାଟିଝାକି ଝାଡ଼େ ।<sup>୧୫</sup> ଗାଲି ଜାଜାତି ଝେଚାଲିଏ, ଜାଜାତି ଗାଲିଝାକି ଅୟାଲି ଆଡ଼ାଆନା ଜାଜାତି ଗାଲି ତଲେ ଅଝିଆୟାଲି ପିସ୍ତମି ।<sup>୧୬</sup> ମାମ୍ବୁ କ୍ଳାଝୁଦାତି ସାମ୍ବୁରି ମାଦି ମାନି

ଓଣା ବୃମିତି ଜମିନି ଚାନ୍ଦୁ ବେଟାଆଡ଼ମି । ଏମ୍ବାଟି ହାରେକା କସ୍ତୁଟି  
 ଏନ୍ଦୁ ଜାଜାତି ଓଣା ତଂଗ ତଲେ ଗେଲ୍‌ପି ଆଡ଼ମି । ୧୭ ଜାଜା ସାଲ୍‌ଖି  
 କିନାରି ଏଦାଆଁ ଜାଜା ଲାକ ଅଡ଼ି ତାନ୍ଦୁ ଡ଼ର୍କା ତଲେ ଜାଜା ସାରିସ୍ତୁଟୁ  
 ଦସ୍ତେରି, ଇଞ୍ଜା ଜାଜା ଲିବିୟାତି ସ୍ତୁରତି ଇନି ବାଃଲି ତିବାତା ଗୁପିନେ  
 ଇଞ୍ଜା ଆଜିତାକି ଜାଜା ସାଲ୍‌ଖି କିନାରି ଜାଜାତା ଗଞ୍ଜାମାଟି ହିମ୍ବୁରିକା  
 ହୁକ୍‌ହାନା ଜାଜାତି ଗାଲି ତଲେ ସାମ୍‌ଦୁରି ବିତ୍ରା ଡ଼ୟାଲି ପିସ୍ତେରି  
 । ୧୮ କାଜା ଗାଲି ପିନ୍ଦୁ ତାକି ହାରେକା କସ୍ତୁ ଆହାଲିଏ ତାନି ଅର  
 ନେରୁ ଜାଜାତି ସାଲ୍‌ଖି କିନାରି ଜାଜାତା ମାଟି ଆସ୍ତିତି ସାମ୍‌ଦୁରିତା  
 ମେଡ଼ହାଲି ମାଟ୍‌ହେରି, ୧୯ ଅଡ଼େ ତାନିଦିନା ନେରୁ ଏଞ୍ଜାରି ତାନି  
 ଜାଜାତି କଚେକା କାଣ୍ଡା ମୁଣ୍ଡା ଏନ୍ଦୁଣାଁ ମେଡ଼ହେରି । ୨୦ ହାରେକା ଦିନା  
 ପାତେକା ଝେଡ଼ା କି ହୁକାୟାଁ ମେସାଲି ଆଡ଼ାଆଡ଼ମି, ଅଡ଼େ ହାରେକା  
 ଗାଲି ପିନ୍ଦୁ ପିହ୍‌ଆଲିଏ ମାମ୍‌ ଲୁମ୍‌ବାଟି ଗେଲ୍‌ପିଆନି ଆସା ପିସାଡ଼ୁସ୍ତମି  
 ।

୨୧ ବାରେଜାଣା ହାରେକା ଦିନା ପାତେକା ରାନ୍ଦା ତିନାଆନା ଡ଼ୟିତି  
 ତାନ୍ଦୁ, ପାଞ୍ଜୁଲ ଏଞ୍ଜାରି ବିତ୍ରା ନିଚାନା ଏଲେଇଚେସି, “ବାବୁୟାଁ  
 ନା କାତା ଆସାନା କ୍ରିତିଟି ସାମ୍‌ଦୁରି ଜାଜା ହୁକ୍‌ହା ହିଲାଆତିହ  
 ମାଦି ଏନାୟିଞ୍ଜା ନସ୍ତୁ ଆଆତେମା । ୨୨ ସାମା ନାଏଁ ନାନୁ ମିଙ୍ଗେ  
 ଝେସିମାଞ୍ଜାଲ୍, ସାସା ଆହ୍‌ଦୁ, ଇତିହ  
 ମୀ ବିତ୍ରା ଆମ୍‌ଆରି ଜୀଞ୍ଜୁ  
 ଜିକେଏ ନାସା ଆଏ; ଝାଉଇ ଜାଜାଦେ ନସ୍ତୁ ଆନେ । ୨୩ ଇତିହ  
 ନାନୁ ଏମିନି ମାହାପୁରୁତି ସେବା କିହିମାଲ୍, ନୀଞ୍ଜୁ ଲାଆଁୟାଁ ଏଞ୍ଜାଣି  
 ର ଲାକପୁରୁତି ଦୁଡୁ ନା ତାଗେ ଝାହାନା ଏଲେଇଞ୍ଜାତେ, ୨୪ ଏ  
 ପାଞ୍ଜୁଲ ‘ଆଜାଆନି; ନୀନୁ ସାଲ୍‌ଖି କିନି କାୟିସର ନକିତା ନିନାୟି  
 ମାନେ, ମାହାପୁରୁ ନିଙ୍ଗେ କାର୍ମା ଆହାମାଞ୍ଜାନାକି ନୀ ତଲେ ଝାହିମାନି  
 ବାରେତି ଜୀଞ୍ଜୁ ଏଞ୍ଜାସି ଗେଲ୍‌ପିନେସି ।’ ୨୫ ଏଦାଆଁତାକି ଏ  
 ବାବୁୟାଁତେରି ସାସା ଆହ୍‌ଦୁ ଇତିହ  
 ନାନୁ ମାହାପୁରୁ ତାଣା ନା ନାମୁ  
 ମାନେ, ନାଙ୍ଗେ ଏନିକ  
 ଝେସ୍‌ପି ଆହାମାନେ, ଏଲେଆହ୍  
 ଏ ଆନେ  
 । ୨୬ ସାମା ମାଙ୍ଗେ ର ସାମ୍‌ଦୁରି ମାଦିଏ ମାନି ଦେସାତା ଏଗାହାନାୟି  
 ମାନେ ।”

୨୭ ଇଲେକିହ  
 ମାମ୍‌ ଆଦିଆ ସାମ୍‌ଦୁରି ଇତାଲା ଆତାଲା ଆହ  
 ରୀ ଝାଋ ଆୟାଲିଏ, ମାଦି ଲାଆଁୟାଁ ଜାଜା ସାଲ୍‌ଖି କିନାରି ର

ବୁଦ୍ଧି ଦାରିତା ଏଜିମାନାୟି ଇଞ୍ଜି ଅଣ୍ଠପିମାଚେରି । ୨୮ ଏମ୍ବାଟିଏ ଏଞ୍ଜାରି ଏୟୁଣି ଲାଟାଲିଏ ପନ୍ଦର ହାତା ଏୟୁ କୁଡ଼ହା ମାରୁ, ଇଞ୍ଜା ଅଡ଼େ ନକିତା ହାଜାନା ଝେଣ୍ଡେ ଲାଟାଲିଏ ଏଗାର ହାତା ଏୟୁ କୁଡ଼ହା ମାରୁ । ୨୯ ମାର ହାଜାନା ଜାଜା ଖାଲ୍‌କା ବୁଦ୍ଧିତା ଗୁପିକିନାୟି ଇଞ୍ଜି ଅଣ୍ଠପାନା ଆଜିତାକି ଏଞ୍ଜାରି ଜାଜାତି ତାୟୁଞ୍ଜାକି ସାରିଗଟା ବଜୁ ଗାଟି ଲହ୍ ମୁଣ୍ଡାୟା ରେପହାନା ଏଚେଲା ଝେୟିନେ ଇଞ୍ଜି ପ୍ରାତାନା କିହିମାଚେରି । ୩୦ ଇଞ୍ଜା ଜାଜାତି ସାଲ୍‌ଝି କିନାରି ଜାଜାଟି ରେଚାନା ହଟାତୁସାଲି ଅଣ୍ଠପାନା ନାଡ଼ିକିହାଁ ଜାଜାତି ନକିଞ୍ଜାକି ଲହ୍ ମୁଣ୍ଡାୟା ରେପନ୍ ଲେହେଁ ଉଣା ତଂଗତି ସାମ୍‌ଦୁରିତା ରେପହେରି । ୩୧ ସାମା ପାଞ୍ଜୁଲ ପାସାକଡ଼ି କସକା ମୁହେଁ କାଜାଣାଇଁ ଇଞ୍ଜା କସକାଣି ଏଲେଇଚେସି, “ଜାଜା ସାଲ୍‌ଝି କିନାରି ଜାଜାତା ମାନାଆତିହ୍ ମୀରୁ ଗେଲ୍‌ପିଆନ୍‌ ଆସା ହିଲେଏ ।” ୩୨ ଏମ୍ବାଟିଏ ଜାମାନାଞ୍ଜା ଉଣା ତଂଗତି ଡ଼କା ଦାଟାନା ସାମ୍‌ଦୁରିତା ପିସ୍ତେରି ।

୩୩ ଲାଇ ଜୁଲୁପୁଲୁ ଝେୟି ମାଚାଟି ପାଞ୍ଜୁଲ ଏଞ୍ଜାରାଇଁ ଏନ୍‌ ରାନ୍‌ ମାଟିହ୍ ତିଞ୍ଜାଲି ବାସୁଁ ହୀହାନା ଏଲେଇଚେସି, “ନୀଞ୍ଜୁଟିଏ ରୀ ଖାରା ଆଡେ ମୀରୁ ଏନାଆଁ ତିନାଆନାହାଁ ହାକିଟିଏ ମାଞ୍ଜାମାଞ୍ଜେରି । ୩୪ ବାତିମାଲିମାଞ୍ଜାଇଁ, ନୀଏଁ ଇଚାଣି ତିଞ୍ଜୁ, ମୀ ଜୀଞ୍ଜୁ ଗେଲ୍‌ପାଲିତାକି ତିନାୟିମାନେ, ଆଜାଆଦୁ, ମୀ ତାର୍‌କାତି ର ବାଣା ଜିକେଏ ନାସା ଆଏ ।” ୩୫ ପାଞ୍ଜୁଲ ଇ ବାରେ କାତା ଜଲାନା ରୁଟି ଆସାନା ବାରେଜାଣା ନକିତା ମାହାପୁରୁଇଁ ଜହରା କିହାନା ରୁଟି ଡ଼ିକ୍‌ହାନା ତିଞ୍ଜାଲି ମାଟ୍‌ହେସି । ୩୬ ଏମ୍ବାଟିଏ ଏଞ୍ଜାରି ବାରେଜାଣା ବାସୁଁ ବେଟାଆହାନା ବାରେଜାଣା କାଡ଼ି ତିଚେରି । ୩୭ ମାମ୍‌ ଜୁଜାଜାତା ରୀ ଖାଞ୍ଜା ତାନିକଡ଼ି ସଡ଼ ଜାଣାତମି ମାଚମି । ୩୮ ଏଞ୍ଜାରି ପାଞ୍ଜେ ତିଟି ତାୟୁ ଜାଜାତି ବଜୁ ଉଣା ଆପେଞ୍ଜା ଇଞ୍ଜି ଜାଜାତି ବାରେ ଗହ୍‌ୟାଁ ସାମ୍‌ଦୁରିତା ମେଡ଼ହେରି ।

### ଜାଜା ତାନାୟି

୩୯ ଅର ନେଚୁ ଲାଇ ଝେୟାଲିଏ ଏଞ୍ଜାରି ଏମିନି ଦେସାତି ଚାୟୁତା ଖାଡ଼େରି ପୁଞ୍ଜାଲି ଆଡାଆଡେରି, ସାମା ଏଞ୍ଜାରି ଗାଟୁ ଦାରି ର ବାଞ୍ଜାଲି ଚାୟୁ ମେସାନା ଏନ୍‌କି ଜିକେଏ ଏମ୍ବାଆଁ ଜାଜାତି ନିପହାଲି

ଅର୍ଥପିତେରି । ୪୦ ଏଦାଆଁତାକି ଏଞ୍ଜାରି ଲହ୍ ମୁଣ୍ଡାୟାତି ଡର୍କା ଦାଚାନା ସାମ୍ବଦୁରିତା ମୁଞ୍ଜାଲି ପିସ୍ତେରି, ଇଞ୍ଜା ଦେରୁଣିଏ ଏମ୍ମୁ ଜାଜାତି ହାଟଞ୍ଜା ବାଡ଼ଗାୟାତି ଡର୍କା ବାରେ ହୁକ୍‌ହାନା ଜାଜା ନକିତା ଗାଲିଞ୍ଜାକି ହିମ୍ବୁରିକା ଗଞ୍ଜାନା ଗାଟୁଞ୍ଜାକି ହାଜାଲି ଅର୍ଥପିତେରି । ୪୧ ସାମା ଏଞ୍ଜାରି ରୀ ସାମ୍ବଦୁରିକା କାଲୁଞ୍ଜି ଆହିମାନି ଚାମ୍ମୁତା ଏଜାଲିଏ ଜାଜା ସାମ୍ବଦୁରି ଗାଟୁତି ର ବାଃଲି ଡିବାତା ଗୁପିତେ, ଜାଜାତି ନକି ଞ୍ଜାକିତାୟି ଜାଣ୍ଡାନା ଡୟାହାଚେ, ସାମା ଡାମ୍ମୁତାୟି ସାମ୍ବଦୁରିତି ଏମ୍ମୁ ଉଣ୍ଡାୟା ଗୁପାଲିଏ ଡାହାଲି ମାଟ୍‌ହେ ।

୪୨ କାୟିଦି ଗାଟାରି ସାମ୍ବଦୁରି ଗାଟୁତି ପର୍‌ହ୍ ପର୍‌ହ୍ ହଣନେରି ଇଞ୍ଜା ଅର୍ଥପାନା କସ୍‌କା ଏଞ୍ଜାରାଇ ପାୟାଲି ଅର୍ଥପିତେରି । ୪୩ ସାମା ପାସାକଡ଼ି କସ୍‌କା ମୁହେଁ କାଜାସି ପାଞ୍ଜୁଲଇଁ ଗେଲ୍‌ପାଲି ମନ୍ କିହାନା, ଏଞ୍ଜାରି ଅର୍ଥପୁତି କାହି କିହାନା ଏଲେଇଞ୍ଜି ହୁକୁମି ହୀତେସି, ଆମ୍ବାଆସି ପର୍‌ହାଲି ପୁନାସି ଏଞ୍ଜାସି ସାମ୍ବଦୁରିତା ଡେଞ୍ଜାନା ତଲିଏ ଗାଟୁତା ହାଲାପେରି; ୪୪ ଡୟାମାନାରି ଜାଜାତି ମାର୍‌କା ପାଟାୟା ଇଞ୍ଜା ଏନ୍ ଏନ୍ ଡାତି ମୁକାୟା ଆସାନା ହାଲାପେରି ଇଞ୍ଜାଲିଏ, ଇଲେକିହି ବାରେଜାଣା ନେହ୍ ଆହ୍ ଗାଟୁତା ଏତେରି ।

## ୨୮

### ମେଲିତି ଦେସାତା ପାଞ୍ଜୁଲ

୧ ମାମ୍ମୁ ଏମ୍ବାଟି ଗେଲ୍‌ପିଆଡ଼ି ଡାମ୍ମୁ ସାମ୍ବଦୁରି ମାଦି ମାନି ଚାମ୍ମୁ ମେଲିତି ଇଞ୍ଜିହି ପୁଟମି । ୨ ଏମ୍ବାଆଁ ବାସାଆହାମାନି ପାଞ୍ଜାତି ଲକୁ ମାଞ୍ଜେ ତଣେସିଞ୍ଜା ଲେହେଁ କାର୍ମା ଆୟାତେରି, ଇଚିହି ପିମ୍ମୁ ଇଞ୍ଜା ପେନି ଆହିମାଚାକି ଏଞ୍ଜାରି ମାଞ୍ଜେ ହିରୁ ଡାସାନା କେର୍‌ଞ୍ଜାଲି ହିୟାତେରି । ୩ ସାମା ପାଞ୍ଜୁଲ ର ପେଣ୍ଡା ଞ୍ଜେସ୍‌କା ହିରୁତା କୁମ୍ବାଲିଏ, ଉସମି ତାକି ର ରାଟୁ ହଚାନା ପାଞ୍ଜୁଲ କେମ୍ମୁତା କାଚାହାଁ ଆଟା ଡୟିତେ । ୪ ଏମ୍ବାଆଁ ବାସା ଆହାମାଟି ପାଞ୍ଜାତି ଲକୁ ପାଞ୍ଜୁଲ କେମ୍ମୁତା ଏ ରାଟୁ ଲେଜା ମାନାଣି ମେସାନା ତାମ୍ମୁତାମ୍ମୁ ଞ୍ଜେସ୍‌ପି ଆଡେରି, “ଇ ମାଣସି ସାତେଏ ଲକୁଣି ପାୟିନାସି, ସାମ୍ବଦୁରିତି ଗେଲ୍‌ହାଲିଏ ଜିକେଏ ଦାମ୍ମୁ ନୀତାଲି ହୀହି ହିଲେଏ ।” ୫ ସାମା ପାଞ୍ଜୁଲ ଏ ରାଟୁତି

ହିରୁତା ହାଣ୍ଡାଣା ମେଡ଼ହା ତୁସ୍ତେସି, ଇଞ୍ଜା ଏଞ୍ଜାଣାକି ଏନି ନସ୍ତୁ  
ଆଆତେ । ୭ ଏଞ୍ଜାଣି ଆଙ୍ଗା ପଙ୍ଗା ହାନେ ଆଆତେ ଦେବୁଣିଏ  
ହାନେସି ଇଞ୍ଜା କାଟିମାରେରି; ସାମା ହାରେକା ବେଲା ଆଡ଼ି  
ତାୟୁ ଏଞ୍ଜାଣାକି ଏନି ନସ୍ତୁ ଆଆତାଣି ମେସାନା ଏଞ୍ଜାରି ତାନି ହିୟା  
ଝେଟ୍‌ହାନା ଏଲେଇଚେରି, “ଇଞ୍ଜାସି ର ମାହାପୁରୁ ।”

୭ ଏ ଟାୟୁ ତାଗେ ପୁଲ୍ଲିୟ ଦରୁଗାଟି ଏ ଟାୟୁତି କାଜାଣି ଇଲୁ ଅଡ଼େ  
ବୁମି ମାଚେ; ଏଞ୍ଜାସି ମାଙ୍ଗେ ହାଟା ଅହାନା ତାନିଦିନା ପାଡେକା କାର୍ମା  
ଆହାନା ରାହାଟି ସେବା କିୟାତେସି । ୮ ଏଟିବେଲାତା ପୁଲ୍ଲିୟ ତାନି  
ଆବା ନମେରି ଇଞ୍ଜା ନେତେରି ବାଣ୍ଡି ତାକି ପାସ୍‌ପନିତା ତୁରାମାଚେସି,  
ଇଞ୍ଜା ପାଞ୍ଜୁଲ ତାନି ବାକ୍ରାତା ହାଜାନା ପ୍ରାତାନା କିହାନା ତାନି ଲାକ  
କେୟୁ ଇଟାନା ନେହ କିତେସି । ୯ ଇଦି ଆଡ଼ି ତାୟୁ ଏମ୍ବାଆଁ  
ମାନି ରଟା ଗାଟାରି ବାରେ ପାଞ୍ଜୁଲ ତାଣା ଖାହାନା ନେହ ଆଡ଼େରି;  
୧୦ ଏଞ୍ଜାରି ମାଙ୍ଗେ ଜିକେଏ ହାରେକା ମାନି ତଲେ ଜୀଞ୍ଜୁ ନୟାତେରି,  
ଅଡ଼େ ମାୟୁ ହାଜିମାଚାଟି ମା ଲଡ଼ାମାନାଣି ହାହାନା ପାଣ୍ଡାତେରି ।

### ମେଲିତିଟିଏ ରମ୍‌ତା ପାଞ୍ଜୁଲ ହାନାୟି

୧୧ ତାନି ଲେଞ୍ଜୁ କେଟ ମାୟୁ ରୁ ଆଲେକ୍‌ଜାଣ୍ଡିୟାତି ଏୟୁ ଜାଜାତା  
ହଟାନା ହାତମି, ଏୟୁ ଜାଜା ପେନିବେଲା ହାଲ୍‌ଝେ ଏ ଟାୟୁତା  
ଡ଼ୟାମାଚେ, ଏଦାନି ଦରୁ “ଜାଣ୍ଡା ପେଣ୍‌କା,” ଇଞ୍ଜିମାଚେରି ।  
୧୨ ସୁରାକୁସା ଗାଡ଼ାତା ଏଜାନା ଏମ୍ବାଆଁ ମାୟୁ ତାନିଦିନା ମାଚମି ।  
୧୩ ଅଡ଼େ ଏମ୍ବାଟି ଏୟୁ ଜାଜା ତଲେ ହାଜାନା ରେଗିୟା ଗାଡ଼ାତା  
ଏତମି, ତାନି ଅର ଦିନା ଚିଟନି ଖାକିଟି ଗାଲି ଝେଚାଲିଏ ଅଡ଼େ ରା  
ଦିନା ତାୟୁ ପୁଡେଅଲି ଗାଡ଼ାତା ଏତମି; ୧୪ ଏମ୍ବାଆଁ ମାୟୁ ଏଚେକା  
କ୍ରୀସ୍ତାନା ତାୟିୟା ଅଡ଼େ ତାଜିସ୍ତାଣି ବେଟାଆଡ଼ମି, ଏଞ୍ଜାରିତଲେ ର  
ଞ୍ଜା ଡ଼ୟାଲି ମାଙ୍ଗେ ବାଡିମାଲାତେରି; ଇଲାଆହ ମାୟୁ ରମ୍‌ତା  
ଏଗାତମି । ୧୫ ରମ୍‌ତା ମାନି ତାୟିୟା ଅଡ଼େ ତାଜିସ୍ତା ମା କାବୁ  
ପୁଞ୍ଜାନା ଏମ୍ବାଟିଏ ଅପିୟତି ହାଟା ଇଞ୍ଜା ତାନିଗଟା ବାଡ଼ା ଇଲ୍‌କା  
ପାଡେକା ମାଙ୍ଗେ ମେସାଲି ଖାଡ଼େରି, ଇଞ୍ଜା ପାଞ୍ଜୁଲ ଏଞ୍ଜାରାଇ  
ମେସାନା ମାହାପୁରୁଇଁ ଜହରା କିହାନା ବାସୁ ବେଟାଆଡ଼େସି ।

### ରମ୍‌ ଗାଡ଼ାତା ପାଞ୍ଜୁଲ

୧୭ ମାମ୍ବୁ ରମ୍ବୁ ଏଜାଲିଏ, ପାଞ୍ଜୁଲଇଁ କାଃଆନି କସ୍‌କା ତଲେ ତାନି ମନତଲେ ବାସା ଆୟାଲି ହେଲ ହୀଠକିଆଡ଼େ ।

୧୭ ତାନିଦିନା ତାୟୁ ପାଞ୍ଜୁଲ ଜୀହୁଦିୟାତି କାଜାରାଇଁ ହାଟାନା କୃତି କିତେସି, ଅଡ଼େ ଏଞ୍ଜାରି ରୁଣ୍ଡା ଆୟାଲିଏ, ପାଞ୍ଜୁଲ ଏଞ୍ଜାରାଇଁ ଏଲେଇଚେସି, “ଏ ଇସ୍ରାୟେଲ ତାୟିୟାତେରି ନାନୁ ମା ଲକୁ କପାଟି କି ମା ଆକୁ ଆବାୟାତି ପାଣାପାଟୁ କପାଟି ଏନାଆଁ କିହା ହିଲାଆତି ଜିକେଏ ଜିରୁସାଲମତା ଦସ୍‌ପି ଆହାନା ରମ୍ବୁ ଦେସାତି ଲକୁତାଣା ହେରପି ଆହାମାଇଁ । ୧୮ ଏଞ୍ଜାରି ନାଙ୍ଗେ ନାହାଁୟି କିହାନା ନା ତାଣାଟି ହାନି ତଣ୍ଡ ପାଣ୍ଡନି ଏନି ଦହ୍ ବେଟାଆଆଲିଏ ନାଙ୍ଗେ ପିସାଲି ଅଣ୍ଡପାମାଚେରି; ୧୯ ଯାମା ଜୀହୁଦିଙ୍ଗା ଏଦାଣି କପାଟି ଖେସାଲିଏ ନାନୁ କାୟିସର ନକିତା ନାହାଁୟି କିୟାଦୁ ଇଞ୍ଜୁ ବାତିମାଲିତେସ୍; ଏଲେଆତି ଜିକେଏ ନାଙ୍ଗେ ମା ଲକୁ କପାଟି ଏନି କାତା ଖେସାଲି ହିଲାଆଡେ, ଏନି ଆଏ । ୨୦ ଏଦାଆଁତାକି ନାନୁ ମିଙ୍ଗେ ନା ତଲେ ବେଟାଆହାନା ଜଲୁକି ଆହାଲି ବାତିମାଲାତେସ୍, ଏନାଆଁତାକି ଇତିହ୍ ଆମ୍ବାଆରି ଲାକ ଇସ୍ରାୟେଲ ଲକୁ ବାସ୍ କିହାମାନେରି, ଏଞ୍ଜାରି ତାକି ନାନୁ ନୀଞ୍ଜୁ ଇ ହିକ୍‌ଶିୟା ତଲେ ଦସ୍‌ପି ଆହାମାଇଁ ।”

୨୧ ଏଞ୍ଜାରି ଏଲେଇଚେରି, “ମାମ୍ବୁ ଜୀହୁଦା ଦେସାଟି ନୀ କପାଟି ଏନି ଆକୁ ବେଟାଆହା ହିଲଅମି, ଅଡ଼େ ନୀ କାକୁ ଆସାନା କି ନୀ କପାଟି ଦହ୍ ଦସାନା ଖେସାଲି ମା ତାୟିୟା ବିତ୍ରାଟି ଆମ୍ବାଆରି ଇମ୍ବାଆଁ ଖାହାହିଲଅରି । ୨୨ ସାମା ନୀ ଅଣ୍ଡପୁ ଏନାୟି ଏଦାଆଁ ମାମ୍ବୁ ନୀ ତାଣାଟି ଖେଞ୍ଜାଲି ମନ କିହିମାନମି, ଇତିହ୍ ବାରେଖାକିତି ଲକୁ ଇ ଗତି କପାଟି କାତା ଖେସିମାନେରି ଇଞ୍ଜୁ ମାମ୍ବୁ ପୁଞ୍ଜିମାନମି ।”

୨୩ ଏଚେଟିଏ ଏଞ୍ଜାରି ର ଦିନା ତୀରି କିହାନା ହାରେକା ଲକୁ ପାଞ୍ଜୁଲ ମାଟି ଇଲୁତା ଖାଡ଼େରି, ଅଡ଼େ ଏଞ୍ଜାସି ଲାକ୍‌ଟିଏ ଲାଆଁ ପାତେକା ଏଞ୍ଜାରି ନକିତା ମାହାପୁରୁତି ରାଜିତି କାତାତାକି ସାକି ହୀତେସି, ଅଡ଼େ ମସାତି ମେରା ଇଞ୍ଜା ମାହାପୁରୁ ଅଣ୍ଡପୁତି ବଲୁ ଖେହ୍‌ନାରି କାତା ଆସାନା ଏଞ୍ଜାସି ଜୀସୁଇଁ ନାମି କିଞ୍ଜି କିୟାଲି ଅଣ୍ଡପିତେସି । ୨୪ ଏମ୍ବାଟିଏ ଆମ୍ବା ଆମ୍ବାଆରି ତାନି ଖେସି କାତାତି ନାମିତେରି ଇଞ୍ଜା

ଆମ୍ବା ଆମ୍ବାଆରି ନାମାଆତେରି । ୨୫ ଏ କାତାତାକି ଏଞ୍ଜାରି ତାମି ବିତ୍ତା ରଣ୍ଡିଏ କାତା ଆଆଲିଏ ହେଲ ଅଡେରି; ଏଞ୍ଜାରି ହାନି ନକେଏ ପାଞ୍ଜୁଲ ର କାତା ଖେସ୍ତେସି, “ସୁଦୁଜୀଞ୍ଜୁ ମୀ ଆକୁ ଆବାୟାଣି ମାହାପୁରୁ ଅଣ୍ଡପୁତି ବଲୁ ଖେହ୍ନି ଜିସାୟ ତାଣ୍ଡାଟି ଖେସାମାଚେସି ।”

୨୬ ଏଞ୍ଜାସି ଏଲେଇଞ୍ଜି ମାନେସି, “ଇ ଲକୁତାଣା ହାଜାନା ଖେହ୍ନୁ, ମୀରୁ ଖେଞ୍ଜିଖେଞ୍ଜି ଖେଞ୍ଜେରି, ସାମା ଏନାଆଁ ତେଲହଅ ତେରି, ଇଞ୍ଜା ମୀରୁ ମେସି ମେସି ମେହ୍ଦେରି, ସାମା ଏନାଆଁ ପୁଞ୍ଜାଲି ଆଡ଼ଅତେରି,

୨୭ ଇତିହଁ ଇ ଲକୁ ହିୟାତା ଉଣା ବୁଦିଗାଟାରି,  
ଏଞ୍ଜାରି ଜାହା ଜାହାରା କୀକା କାଣ୍ଡକା ମୁଟା କତାମାନେରି,  
ଏଲେଆହଁ ହିଲାଆତିହଁ ମା,

ଏଞ୍ଜାରି କାଣ୍ଡକା ଦେତାନା ମେସାଲି ଆଡ଼ିତେରିମା,  
ଅଡେ କୀକା ତଲେ ଖେଞ୍ଜାଲି ଆଡ଼ିତେରିମା ।  
ଏଞ୍ଜାରି ହିୟାତା ତେଲହାଲି ଆଡ଼ିନି ବାଡ଼ୁୟୁ ଡ଼ୟିତେମା;  
ଏଞ୍ଜାରି ମାହାପୁରୁ ଖାକି ଖେଣ୍ଡା ଖାଡେରିମା,  
ଅଡେ ନାନୁ ଏଞ୍ଜାରାଇଁ ନେହଁ କିତେଏଁମା ।”

୨୮ ତାୟୁ ପାଞ୍ଜୁଲ ଏଲେଇଚେସି, “ଏନାଆଁତାକି ମାହାପୁରୁତି ଇ ଗେଲ୍ପିନାଣି ଏଟକା କୁଡାତି ଲକୁତାଣା ପାଣ୍ଡୁଞ୍ଜି ଆହାମାନେ, ଇଦାଆଁ ମୀରୁ ପୁଞ୍ଜୁ; ଏଞ୍ଜାରି ଜିକେଏ ଖେନେରି ।” ୨୯ ପାଞ୍ଜୁଲ ଇ ବାରେ କାତା ଖେସାଲିଏ, ଜୀହୁଦିୟା ତାମ୍ବୁ ତୁମି ବିତ୍ତା ବାଦିବାଦା ଆହଁ ହାଚେରି\* ।

୩୦ ପାଞ୍ଜୁଲ ରୀ ବାର୍ଯା ପାତେକା ତାନି ବାଡ଼ା ଇଲୁତା ଡ଼ୟିତେସି, ଅଡେ ଏଚେକା ଲକୁ ଏଞ୍ଜାଣି ତାଣା ଖାହିମାଚେରି, ବାରେତି ଇଜ ହାଟା ଅହିମାଚେସି । ୩୧ ଇଞ୍ଜା ସାସାତଲେ ନୀରାସା ଆଆନା ମାହାପୁରୁ ରାଜିତି କାତା ଖେସିମାଚେସି, ଇଞ୍ଜା ପ୍ରୁ ଜୀସୁ କ୍ରୀସ୍ତତି କାତା ଜାପ୍ହି ମାଚେସି ।

\* ୨୮:୨୯ ୨୮:୨୯ ଇ କାତା ପୁଞ୍ଜଲ ପତିତା ହିଲେଏ ।

## ପୁସ୍ତକ ଫେରା

# The New Testament in the Kuvi language of India: ପୁସ୍ତକ ଫେରା (Bible)

copyright © 2020 The Word for the World International

Language: କୁଭି (Kuvi)

Contributor: The Word for the World International

## ପୁସ୍ତକ ଫେରା, କୁଭି ପୁସ୍ତକ ଫେରା, 2020

The New Testament in Kuvi Language

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-12

---

PDF generated using Haiola and XeLaTeX on 21 Feb 2024 from source files dated 13 Apr 2023

081337bf-dba3-542b-bc85-280acfb14d33